


UNIVERSITY OF TORONTO




3 1761 00004233 3











T. LIVII PATAVINI

HISTORIARUM

TOMUS III

---

LIB. XXVII.—XXXVI.



LIVY  
T. LIVII PATAVINI

HISTORIARUM

QUÆ SUPERSUNT,

EX RECENSIONE

ARN. DRAKENBORCHII.

CUM INDICE RERUM.

ACCEDUNT

GENTES ET FAMILIÆ ROMANORUM,

AUCTORE R. STREINNIO.

NECNON

ERNESTI GLOSSARIUM LIVIANUM,

AUCTIUS NONNIHIL, ET IN LOCIS QUAMPLURIMIS  
EMENDATUM.

---

TOMUS III.

---

OXONII,

E TYPOGRAPHEO CLARENDOIANO.

MDCCCXIII.

594  
6

PA  
6452  
A2  
1800  
t.3

---

T. LIVII PATAVINI  
HISTORIARUM  
AB URBE CONDITA  
LIBRI.

---

EPITOME LIBRI XXVII.

CN. FULVIUS proconsul cum exercitu ab Hannibale ad Herdoneam cæsus est. Meliore eventu a Claudio Marcello consule adversus eumdem ad Numistronem pugnatum est: inde Hannibal noctu recessit. Marcellus insecurus est, et subinde cedentem pressit, donec configeret: priore pugna Hannibal superior fuit, Marcellus insequenti. Fabius Maximus pater consul Tarentinos per proditionem recepit. In Hispania ad Bæculam Scipio cum Hasdrubale Hamilcaris conflixit, et vicit: inter alia captum puerum regalem eximiæ formæ ad avunculum Masinissam cum donis dimisit. Claudius Marcellus, T. Quinctius Crispinus consules, speculandi caussa progressi e castris, insidiis ab Hannibale circumventi sunt. Marcellus occisus fuit, Crispinus fugit. Res præterea a P. Sulpicio prætore adversus Philippum et Achæos gestas continet. Lustrum a censoribus conditum est: censa sunt civium capita centum triginta septem millia centum et octo: ex quo

*numero adparuit, quantum hominum tot præliorum  
adversa fortuna populo Romano abstulisset. Hasdrubal,  
qui cum exercitu novo transcenderat Alpes, ut se  
Hannibali conjungeret, cum millibus hominum quin-  
quaginta sex cæsus est, M. Livii consulis ductu, sed non  
minore opera Claudii Neronis consulis: qui, quum  
Hannibali obpositus esset, relictis castris, ita ut hostem  
falleret, cum electa manu profectus, Hasdrubalem cir-  
cumvenit.*

---

# T. LIVII PATAVINI

## LIBER XXVII.

---

**H**IC status rerum Hispaniæ erat. In Italia con- U.C. 542.  
sul Marcellus, Salapia per proditionem recepta, A. C. 210.  
Maroneam et Meles de Samnitibus vi cepit. Ad tria  
millia militum ibi Hanuibal, quæ præsidii caussa  
relicta erant, obpressa. Præda (et aliquantum ejus  
fuit) militi concessa: tritici quoque ducenta qua-  
draginta millia modiūm, et centum decem millia hor-  
dei inventa. Ceterum nequaquam inde tantum gau-  
dium fuit, quanta clades intra paucos dies accepta  
est, haud procul ab Herdonea urbe. Castra ibi Cn. Fulvius  
Fulvius proconsul habebat, spe recipiendæ Her- ab Hanni-  
doneæ, quæ post Cannensem cladem ab Romanis bale victus  
defecerat, nec loco satis tuto posita, nec præsidiis ad Herdo-  
neam. firmata. Negligentiam insitam ingenio ducis auge-  
bat spes ea, quod labare iis adversus Pœnum fidem  
senserat, postquam, Salapia amissa, excessisse his  
locis in Bruttios Hannibalem auditum est. Ea om-  
nia, ab Herdonea per occultos nuncios delata Han-  
nibili, simul curam sociæ retinendæ urbis, et spem  
fecere incautum hostem adgrediendi: exercitu ex-  
pedito, ita ut famam prope præveniret, magnis iti-  
neribus ad Herdoneam contendit, et, quo plus ter-  
roris hosti objiceret, acie instructa accessit. Par-  
audacia Romanus, consilio et viribus inpar, copiis  
raptim eductis, conflixit: quinta legio et sinistra al-

U.C. 542. acriter pugnam inierunt. Ceterum Hannibal, signo  
A.C. 210. equitibus dato, ut, quum pedestres acies occupassent  
præsenti certamine oculos animosque, circumvecti,  
pars castra hostium, pars terga trepidantium invade-  
rent, ipse in Fulvij similitudinem nominis, quod Cn.  
Fulvium prætorem biennio ante in iisdem devicerat  
locis, increpans, similem eventum pugnae fore adfir-  
mabat. Neque ea spes vana fuit: nam, quum co-  
minus acie et peditum certamine multi cecidissent  
Romanorum, starent tamen ordines signaque, eques-  
tris a tergo tumultus, simul a castris clamor hostilis  
auditus, sextam ante legionem, quæ, in secunda acie  
posita, prior ab Numidis turbata est; quintam deinde  
atque eos, qui ad prima signa erant, avertit. Pars  
in fugam effusi, pars in medio cæsi: ubi et ipse Cn.  
Fulvius cum undecim tribunis militum cecidit. Ro-  
manorum sociorumque quot cæsa in prælio millia  
sint, quis pro certo adfirmet? quum tredecim millia  
alibi, alibi haud plus, quam septem, inveniam. Cas-  
tris prædaque victor potitur. Herdoneam, quia et  
defecturam fuisse ad Romanos comperit, nec man-  
suram in fide, si inde abscessisset, multitudine omni  
Metapontum ac Thurios traducta, incendit: occidit  
principes, qui cum Fulvio conloquia occulta habuisse  
comperti sunt. Romani, qui ex tanta clade evase-  
rant, diversis itineribus semermes ad Marcellum con-  
sulem in Samnum perfugerunt.

II. Marcellus, nihil admodum tanta clade territus,  
literas Romam ad senatum de duce et exercitu ad  
Herdoneam amisso scribit: *ceterum, eumdem se, qui  
post Cannensem pugnam ferocem victoria Hannibalem  
contudisset, ire adversus eum, brevem illi lætitiam, qua  
exsultet, facturum.* Et Romæ quidem quum luctus

ingens ex præterito, tum timor in futurum erat. U. C. 542.  
 Consul, ex Samnio in Lucanos transgressus, ad Nu- A. C. 210.  
 mistronem in conspectu Hannibal's loco plano,  
 quum Pœnus collem teneret, posuit castra. Addidit  
 et aliam fidentis speciem, quod prior in aciem eduxit:  
 nec detractavit Hannibal, ut signa portis efferri vi-  
 dit. Ita tamen aciem instruxerunt, ut Pœnus dex- Marcelli  
 trum cornu in collem erigeret, Romani sinistrum ad <sup>adversus</sup> Hanniba-  
 oppidum adplicarent. Ab hora tertia quum ad noc- lem pugna-  
 tem pugnam extendissent, fessæque pugnando primæ  
 acies essent, ab Romanis prima legio et dextera ala,  
 ab Hannibale Hispani milites et funditor Balairis,  
 elephanti quoque, commisso jam certamine, in prœ-  
 lium acti. Diu pugna neutro inclinata stetit. Primæ  
 legioni tertia, dexteræ alæ sinistra subiit, et apud  
 hostes integri a fessis pugnam accepere. Novum  
 atque atrox prœlium ex tam segni repente exarsit,  
 recentibus animis corporibusque: sed nox incerta  
 victoria diremit pugnantes. Postero die Romani ab  
 sole orto in multum diei stetere in acie: ubi nemo  
 hostium adversus prodiit, spolia per otium legere, et  
 congestos in unum locum cremavere suos. Nocte  
 insequenti Hannibal silentio movit castra, et in Apu-  
 liam abiit: Marcellus, ubi lux fugam hostium ape-  
 ruit, sauciis cum præsidio modico Numistrone re-  
 lictis, præpositoque his L. Furio Purpureone tribuno  
 militum, vestigiis institut sequi. Ad Venusiam adeptus  
 eum est. Ibi per dies aliquot quum ab stationi-  
 bus procursaretur, mixta equitum peditumque tu-  
 multuosa magis prælia, quam magna, et ferme omnia  
 Romanis secunda fuerunt. Inde per Apuliam ducti  
 exercitus sine ullo memorando certamine; quum  
 Hannibal nocte signa moveret, locum insidiis quæ-

**U. C. 542.** rens ; Marcellus, nisi certa luce, et explorato ante,  
**A. C. 210.** non sequeretur.

Conjura-  
tio Cam-  
panorum. **III.** Capuæ interim Flaccus dum bonis principum vendendis, agro, qui publicatus fuerat, locando (locavit autem omnem frumento) tempus terit; ne de-  
esset materia in Campanos sœviendi, novum in oc-  
culto gliscens per indicium protractum est facinus.  
Milites ædificiis emotos, simul ut cum agro tecta ur-  
bis fruenda locarentur, simul metuens, ne suum quo-  
que exercitum, sicut Hannibal, nimia urbis amœ-  
nitas emolliret, in portis murisque sibimet ipsos tecta militariter coegerat ædificare: erant autem pleraque ex cratibus aut tabulis facta, alia arundine texta, stramento inducta omnia, velut de industria, alimen-  
tis ignis. Hæc noctis una hora ut omnia incende-  
rent, centum septuaginta Campani, principibus fra-  
tribus Blosiis, conjuraverant: indicio ejus rei ex fa-  
milia Blosiorum facto, portis repente jussu procon-  
sulis clausis, quum ad arma signo dato milites con-  
currissent; comprehensi omnes, qui in noxa erant,  
et, quæstione acriter habita, damnati necatiique: in-  
dicibus libertas, et æris dena millia data. Nuceri-  
nos et Acerranos querentes, ubi habitarent, non es-  
se, Acerris ex parte incensis, Nuceria deleta, Romam Fulvius ad senatum misit. Acerranis permissum, ut ædificarent, quæ incensa erant: Nucerini Atellam, quia id maluerant, (Atellanis Calatianum migrare jus-  
sis) traducti. Inter multas magnasque res, quæ, nunc secundæ, nunc adversæ, occupabant cogitatio-  
nes hominum, ne Tarentinæ quidem arcis excidit me-  
moria. M. Ogulnius et P. Aquillius in Etruriam le-  
gati ad frumentum coëmendum, quod Tarentum por-  
taretur, profecti: et mille milites de exercitu urbano,

par numerus Romanorum sociorumque, eodem in U.C. 542.  
præsidium cum frumento missi sunt. A.C. 210.

IV. Jam ætas in exitu erat, comitiorumque consularium instabat tempus: sed literæ Marcelli, ne-  
gantis e republica esse, vestigium abscedi ab Hanni-  
bale, cui cedenti certamenque abnuenti gravis ipse  
instaret, curam injecerant, ne aut consulem, tum  
maxime res agentem, a bello avocarent, aut in an-  
num consules deessent. Optimum visum est, quam-  
quam extra Italiam esset, Valerium potius consulem  
ex Sicilia revocari. Ad eum literæ jussu senatus ab  
L. Manlio prætore urbis missæ, cum literis consulis  
M. Marcelli: ut ex iis nosceret, quæ caussa Patribus  
eum potius, quam collegam, revocandi ex provincia  
esset. Eo fere tempore legati ab rege Syphace Ro-  
mam venerunt, quæ is prospera prælia cum Kartha-  
giniensibus fecisset, memorantes. *Regem nec inimi-  
ciorem ulli populo, quam Karthaginensi, nec amicio-  
rem, quam Romano, adfirmabant esse: misisse eum  
antea legatos in Hispaniam ad Cn. et P. Cornelios, im-  
peratores Romanos: nunc ab ipso velut fonte petere  
Romanam amicitiam voluisse.* Senatus non legatis  
modo benigne respondit, sed et ipse legatos cum do-  
nis ad regem misit, L. Genucium, P. Poetelium, P.  
Popillium. Dona tulere, togam, et tunicam purpu-  
ream, sellam eburneam, pateram ex quinque pondo  
auri factam. Protinus et alios Africæ regulos jussi  
adire: iis quoque quæ darentur, portata, togæ præ-  
textæ, et terua pondo pateræ aureæ. Et Alexan-  
driam ad Ptolemæum Cleopatramque reges M. Ati-  
lius et M'. Acilius legati, ad commemorandam reno-  
vandamque amicitiam missi, dona tulere, regi togam  
et tunicam purpuream cum sella eburnea; regiæ,

Syphacis  
legati ad

Romanos.

Rom. legati  
Alexandri-  
am missi.

U.C. 542. pallam pictam cum amiculo purpureo. Multa ea æ-  
 A.C. 210. state, qua hæc facta sunt, ex propinquis urbibus a-  
 grisque nunciata sunt prodigia; Tusculi agnum cum  
 ubere lactenti natum: Jovis ædis culmen fulmine  
 ictum, ac prope omni tecto nudatum: iisdem ferme  
 diebus, Anagniæ terram ante portam ictam, diem ac  
 noctem sine ullo ignis alimento arsisse: et aves, ad  
 compitum Anagninum, in luco Dianæ nidos in arbo-  
 ribus reliquisse: Tarracinæ in mari haud procul por-  
 tu angues magnitudinis miræ, lascivientium piscium  
 modo exsultasse: Tarquiniis porcum cum ore huma-  
 no genitum: et in agro Capenate, ad lucum Fero-  
 niæ, quatuor signa sanguine multo diem ac noctem  
 sudasse. Hæc prodigia hostiis majoribus procurata  
 decreto pontificum: et supplicatio diem unum Ro-  
 mæ ad omnia pulvinaria, alterum, in Capenate agro,  
 ad Feroniæ lucum, indicta.

V. M. Valerius consul literis excitus, provincia ex-  
 ercituque mandato Cincio prætori, M. Valerio Mes-  
 salla præfecto classis cum parte navium in Africam  
 prædatum simul speculatumque, quæ populus Kar-  
 thaginiensis ageret pararetque, misso, ipse decem  
 navibus Roman profectus quum prospere pervenis-  
 set, senatum extemplo habuit: ibi de suis rebus  
 gestis commemoravit. Quum annos prope sexaginta  
 in Sicilia terra marique sæpe magnis cladibus bellatum  
 esset, se eam provinciam confecisse: neminem Kartha-  
 giniensem in Sicilia esse: neminem Siculum, qui metu  
 inde fugati afuerint, non esse: omnes in urbes, in agros  
 suos reductos, arare, serere: desertam recoli tandem  
 terram, frugiferam ipsis cultoribus, populoque Romano  
 pace ac bello fidissimum annonæ subsidium. Exin Mu-  
 tine, et si quorum aliorum merita erga populum Ro-

manum erant, in senatum introductis, honores om- U. C. 542.  
 nibus, ad exsolvendam fidem a consule, habiti. Ma- A. C. 210.  
 tines etiam civis Romanus factus, rogatione ab tri-  
 buno plebis, ex auctoritate Patrum, ad plebem lata.  
 Dum hæc Romæ geruntur, M. Valerius Messalla  
 quinquaginta navibus quum ante lucem ad Africam  
 accessisset, improviso in agrum Uticensem exscensio-  
 nem fecit: cumque late depopulatus, multis morta-  
 libus cum alia omnis generis præda captis, ad naves  
 rediit, atque in Siciliam transmisit: tertiodecimo die,  
 quam profectus inde erat, Lilybæum revectus. Ex  
 captivis, quæstione habita, hæc comperta, consuliique  
 Lævino omnia ordine perscripta, ut sciret, quo in  
 statu res Africæ essent. *Quinque millia Numidarum*  
*cum Masinissa, Galæ filio, acerrimo juvene, Karthagine*  
*esse; et alios per totam Africam milites mercede con-*  
*duci, qui in Hispaniam ad Hasdrubalem trajicerentur:*  
*ut is, quam maximo exercitu primo quoque tempore in*  
*Italiam transgressus, jungeret se Hannibali: in eo po-*  
*sitam victoriam credere Karthaginienses. Classem præ-*  
*terea ingentem adparari ad Siciliam repetendam, eam-*  
*que se credere brevi trajecturam. Hæc recitata a con-*  
*sule ita movere senatum, ut non exspectanda comitia*  
*consuli censerent, sed dictatoreni comitiorum haben-*  
*dorum caussa dici, et exemplo in provinciam rede-*  
*undum. Illa disceptatio tenebat, quod consul in Si-*  
*cilia se M. Valerium Messallam, qui tum classi præ-*  
*esset, dictatorem dicturum esse aiebat: Patres extra*  
*Romanum agrum (eum autem in Italia terminari)*  
*negabant dictatorem dici posse. M. Lucretius tri-*  
*bunus plebis quum de ea re consuleret, ita decrevit*  
*senatus, Ut consul prius, quam ab urbe discederet, po-*  
*pulum rogaret, quem dictatorem dici placeret; eumque,*

Concertatio  
de dictatore  
dicendo.

U.C. 542. quem *populus jussisset, diceret dictatorem.* Si consul  
A.C. 210. noluisset, *prætor populum rogaret: si ne is quidem vellet, tum tribuni ad plebem ferrent.* Quum consul se populum rogaturum negasset, quod suæ potestatis esset, *prætoremque vetuisset rogare;* tribuni plebis rogarunt, plebesque scivit, ut Q. Fulvius, qui tum ad Capuam erat, dictator diceretur: sed, quo die id plebis concilium futurum erat, consul clam nocte in Siciliam abiit: destitutiqne Patres literas ad M. Claudium mittendas censuerunt, ut desertæ ab collega reipublicæ subveniret, diceretque, quem *populus jus-*  
*Q. Fulvius sisset, dictatorem.* Ita a M. Claudio consule Q. Ful-  
*dictator.* vius dictator dictus, et ex eodem plebiscito et ab Q. Fulvio dictatore P. Licinius Crassus pontifex maximus magister equitum dictus.

VI. Dictator postquam Romam venit, Cn. Sempronium Blæsum legatum, quem ad Capuam habuerat, in Etruriam provinciam ad exercitum misit, in locum C. Calpurnii prætoris; quem, ut Capuae exercituique suo præcesset, literis excivit. Ipse comitia, in quem diem primum potuit, edixit: quæ, certamine inter tribunos dictatoremque injecto, perfici non potuerunt. Galeria juniorum, quæ sorte prærogativa erat, Q. Fulvium et Q. Fabium consules dixerat, eodemque jure vocatæ inclinassent, ni tribuni plebis C. et L. Arennii se interposuissent: qui, neque magistratum continuari satis civile esse, aiebant; et multo fædioris exempli, eum ipsum creari, qui comitia haberet. Itaque, si suum nomen dictator acciperet, se comitiis intercessuros: si aliorum, præterquam ipsius, ratio haberetur, eomitiis se morum non facere. Dictator caussam comitorum auctoritate senatus, plebiscito, exemplis tutabatur. Namque, Cn. Servilio con-

sule, quum C. Flaminius alter consul ad Trasimenum U. C. 542.  
 cecidisset, ex auctoritate Patrum ad plebem latum, ple- A. C. 210.  
 bemque scivisse, ut, quoad bellum in Italia esset, ex iis,  
 qui consules fuissent, quos et quoties vellet, reficiendi  
 consules populo jus esset: exemplumque eam in rem  
 se habere vetus L. Postumii Megelli, qui interrex iis co-  
 mitiis, quæ ipse habuisset, consul cum C. Junio Bubulco  
 creatus esset; recens Q. Fabii, qui sibi continuari con-  
 sulatum, nisi id bono publico fieret, profecto numquam  
 sivisset. His orationibus quum diu certatum esset,  
 postremo ita inter dictatorem ac tribunos convenit,  
 ut eo, quod censuisset senatus, staretur. Patribus  
 id tempus reipublicæ visum est, ut per veteres, et  
 expertos, bellique peritos imperatores respublica ge-  
 reretur: itaque moram fieri comitiis non placere.  
 Concedentibus tribunis, comitia habita. Declarati  
 consules Q. Fabius Maximus quintum, Q. Fulvius  
 Flaccus quartum. Prætores inde creati, L. Veturius  
 Philo, T. Quinctius Crispinus, C. Hostilius Tubulus,  
 C. Aurunculeius. Magistratibus in annum creatis,  
 Q. Fulvius dictatura se abdicavit. Extremo æstatis  
 hujus classis Punica navium quadraginta, cum præ-  
 fecto Hamilcare in Sardiniam trajecta, Olbiensem  
 primo, dein, postquam ibi P. Manlius Vulso prætor  
 cum exercitu adparuit, circumacta inde ad alterum  
 insulæ latus, Caralitanum agrum yastavit, et cum  
 præda omnis generis in Africam rediit. Sacerdotes  
 Romani eo anno mortui aliquot subiectique. C.  
 Servilius Pontifex factus in locum T. Otacilii Crassi.  
 Ti. Sempronius Ti. F. Longus angur factus in locum  
 T. Otacilii Crassi. Decemvir item sacris faciundis  
 in locum Ti. Sempronii C. F. Longi Ti. Sempronius  
 Ti. F. Longus subiectus. M. Marcius rex sacrorum

U. C. 542. mortuus est, et M. Aemilius Papus maximus curio :  
A. C. 210. neque in eorum locum sacerdotes eo anno subfecti.

Et censores hic annus habuit L. Veturium Philonenm et P. Licinium Crassum, maximum pontificem. Crassus Licinius nec consul, nec prætor ante fuerat, quam censor est factus : ex ædilitate gradum ad censoriam fecit. Sed hi censores neque senatum legerunt, nec quidquam publicæ rei egerunt : mors diremit L. Veturii : inde et Licinius censura se abdicavit. Aediles curules L. Veturius et P. Licinius Varus ludos Romanos diem unum instaurarunt. Aediles plebis Q. Catius et L. Porcius Licinus ex multaticio argento signa ænea ad Cereris dedere : et ludos, pro temporis ejus copia, magnifici adparatus fecerunt.

Lælius ex  
Hispania  
Romam  
venit.

VII. Exitu anni hujus, die quarto et tricesimo, quam ab Tarracone profectus erat, C. Lælius legatus Scipionis Romam venit : isque, cum agmine captivorum ingressus urbem, magnum concursum hominum fecit. Postero die in senatum introductus, captam Karthaginem, caput Hispaniæ, uno die, receptasque aliquot urbes, quæ defecissent, novasque in societatem adscitas, exposuit. Ex captivis comperta his fere congruentia, quæ in literis fuerant M. Valerii Messallæ. Maxime movit Patres Hasdrubalis transitus in Italiam, vix Hannibali atque ejus armis subsistentem. Productus et in concionem Lælius eadem edisseruit. Senatus ob res feliciter a P. Scipione gestas supplicationem in unum diem decrevit. C. Lælium primo quoque tempore, cum quibus venerat navibus, redire in Hispaniam jussit. Karthaginis expugnationem in hunc annum contuli, multis auctoribus ; haud nescius, quosdam esse, qui anno subsequenti captam tradiderint : quod mihi minus si-

mile veri visum est, annum integrum Scipionem nihil gerundo in Hispania consumsisse. **Q. Fabio Ma-** U. C. 543.  
**ximo quintum, Q. Fulvio Flacco quartum consulibus,** A. C. 209.  
 Idibus Martiis, quo die magistratum inierunt, Italia ambobus provincia decreta; regionibus tamen partitum imperium: Fabius ad Tarentum, Fulvius in Lucanis ac Bruttiis rem gereret. M. Claudio prorogatum in annum imperium. Prætores sortiti provincias: C. Hostilius Tubulus urbanam, L. Veturius Philo peregrinam cum Gallia, T. Quinctius Crispinus Capuam, C. Aurunculeius Sardiniam. Exercitus ita per provincias divisi. Fulvio duæ legiones, quas in Sicilia M. Valerius Lævinus haberet: Q. Fabio, quibus in Etruria C. Calpurnius præfuisset, decretæ. Exercitus urbanus ut in Etruriam succederet: C. Calpurnius eidem præcesset provinciæ exercituique: Capuam exercitumque, quem Q. Fulvius habuisset, T. Quinctius obtineret. C. Hostilius ab C. Lætorio proprætore provinciam exercitumque, qui tum jam Arimini erat, acciperet. M. Marcellio, quibus consul bene rem gesserat, legiones decretæ. M. Valerio cum L. Cincio (his quoque est enim prorogatum in Sicilia imperium) Cannensis exercitus datus: eumque supplere ex militibus, qui ex legionibus Cn. Fulvii superessent, jussi. Conquisitos eos consules in Siciliam miserunt: additaque eadem militiæ ignominia, sub qua Cannenses militabant, quique ex prætoris Cn. Fulvii exercitu, ob similis iram fugæ, missi eo ab senatu fuerant. C. Aurunculeio eadem in Sardinia legiones, quibus P. Manlius Vulso eam provinciam obtainuerat, decretæ. P. Sulpicio, eadem legione eademque classe Macedoniam obtainere jusso, prorogatum in annum imperium: triginta quinque-

U.C. 543. remes ex Sicilia Tarentum ad Q. Fabium consulem  
 A.C. 209. mitti jussæ : cetera classe præ datum in Africam aut  
 ipsum M. Valerium Lævinum trajicere ; aut mittere,  
 seu L. Cincium, seu M. Valerium Messallam. Nec  
 de Hispania quidquani mutatum, nisi quod non in  
 annum Scipioni Silanoque, sed, donec revocati ab  
 senatu forent, prorogatum imperium est. Ita pro-  
 vinciae exercituumque in eum annum partita imperia.

VIII. Inter majorum rerum curas comitia maximi  
 curionis, quum in locum M. Æmilii sacerdos creare-  
 tur, vetus excitaverunt certamen ; patriciis neganti-  
 bus C. Mamilius Vituli, qui unus ex plebe petebat,  
 habendam rationem esse, quia nemo ante eum, nisi  
 ex Patribus, id sacerdotium habuisset. Tribuni ad-  
 pellati ad senatum rejecerunt. Senatus populi po-  
 testatem fecit. Ita primus ex plebe creatus maxi-  
 mus curio C. Mamilius Vitulus. Et flaminem Dia-  
 lem invitum inaugurarari coëgit P. Licinius pontifex  
 maximus C. Valerium Flaccum. Decemvir sacris  
 faciundis creatus in locum Q. Mucii Scævolæ demor-  
 tui C. Lætorius. Caussam inaugurarari coacti flami-  
 nis libens reticuisse, ni ex mala fama in bonam  
 vertisset. Ob adolescentiam negligentem luxurio-  
 samque C. Flaccus flamen captus a P. Licinio ponti-  
 fice maximo erat, L. Flacco fratri germano cognati-  
 que aliis ob eadem vitia invisus. Is, ut animum  
 ejus cura sacrorum et ceremoniarum cepit, ita re-  
 pente exuit antiquos mores, ut nemo tota juventute  
 haberetur prior, nec probatior prioribus Patrum,  
 suis pariter alienisque, esset. Hujus famæ consensu  
 elatus ad justam fiduciam sui, rem intermissam per  
 multos annos ob indignitatem flaminum priorum re-  
 petivit, ut in senatum introiret. Ingressum eum cu-

riam quam L. Licinius prætor inde eduxisset, tribu- U. C. 543.  
 nos plebis adpellavit flamen. Vetustum jus sacer- A. C. 209.  
 dotii repetebat: datum id cum toga prætexta, et sel- C. Valerius  
 la curuli, et flaminio esse. Prætor, non exoletis ve- jure sacer-  
 tustate annualium exemplis stare jus, sed recentis- dotii sena-  
 simæ cujusque consuetudinis usu, volebat: nec pa- tum in-  
 trum, nec avorum memoria Dialem quemquam id  
 jus usurpasse. Tribuni, rem inertia flaminum obli- greditur.  
 teratam ipsis, non sacerdotio, damno fuisse, quum  
 æquum censuissent, ne ipso qnidem contra tendente  
 prætore, magno adsensu Patrum plebisque, flaminem  
 in senatum introduxerunt; omnibus ita existimantibus,  
 magis sanctitate vitæ, quam sacerdotii jure,  
 rem eam flaminem obtinuisse. Consules prius, quam  
 in provincias irent, duas urbanas legiones; in sup-  
 plementum, quantum opus erat ceteris exercitibus  
 militum, scripserunt. Urbanum veterem exercitum  
 Fulvius consul C. Fulvio Flacco legato (frater hic  
 consulis erat) in Etruriam dedit ducendum, et le-  
 giones, quæ in Etruria erant, Romanæ deducendas.  
 Et Fabius consul reliquias exercitus Fulviani conqui-  
 sitas (fuere autem ad tria millia trecenti triginta sex)  
 Q. Maximum filium ducere in Siciliam ad M. Vale-  
 rium proconsulem jussit: atque ab eo duas legiones  
 et triginta quinqueremes accipere. Nihil hæ eductæ  
 ex insula legiones minuerunt nec viribus nec specie  
 ejus provinciæ præsidium: nam quum, præter egre-  
 gie suppletas duas veteres legiones, transfugarum  
 etiam Numidarum equitum peditumque magnam vim  
 haberet, Siculos quoque, qui in exercitu Epicydis aut  
 Pœnorum fuerant, belli peritos viros, milites scrip-  
 sit. Ea externa auxilia quumi singulis Romanis le-  
 gionibus adjunxisset, duorum speciem exercituum

U. C. 542. servavit : altero **L.** Cincium partem insulæ, qua reg-  
 A. C. 209. num Hieronis fuerat, tueri jussit ; altero ipse cete-  
 ram insulam tuebatur, divisam quondam Romani  
 Punicique imperii finibus ; classe quoque navium  
 septuaginta partita, ut omni ambitu litorum præsidia  
 oræ maritimæ essent. Ipse cum Mutinis equitatu  
 provinciam peragrabat, ut viseret agros, cultaque ab  
 incultis notaret, et perinde dominos laudaret casti-  
 garetque. Ita tantum ea cura frumenti provenit, ut  
 et Rouam mitteret, et Catanam conveheret, unde  
 exercitui, qui ad Tarentum æstiva acturus esset,  
 posset præberi.

**IX.** Ceterum transportati milites in Siciliam (et erant major pars Latini nominis sociorumque) prope magni motus caussa fuere : adeo ex parvis saepe magnarum momenta rerum pendent. Fremitus enim inter Latinos sociosque in conciliis ortus : *Decimum annum delectibus, stipendiis exhaustos esse : quotannis ferme elade magna pugnare.* Alios in acie occidi, alios morbo absundi : magis perire sibi civem, qui ab Romano miles lectus sit, quam qui a Pœno captus : quippe ab hoste gratis remitti in patriam ; ab Romanis extra Italiam in exsilium verius, quam in militiam, ablegari. Octavum jam ibi annum senescere Cannensem militem, moriturum ante, quam Italia hostis (quippe nunc quum maxime florens viribus) excedat. Si veteres milites non redeant in patriam, novi legantur, brevi neminem superfuturum. Itaque, quod prope diem res ipsa negatura sit, priusquam ad ultimam solitudinem atque egestatem perveniant, negandum populo Romano esse. Si consentientes in hoc socios videant Romani, profecto de pace cum Karthaginiensibus jungenda cogitatueros : ali-  
 ter numquam, vivo Hannibale, sine bello Italiam fore.

Querelæ  
 sociorum  
 et Latini  
 nominis.

Hæc acta in conciliis. Triginta tum coloniæ populi U. C. 543.  
 Romani erant: ex iis duodecim, quum omnium legationes Romæ essent, negaverunt consulibus esse, duodecim unde milites pecuniamque darent. Eæ fuere Ardea, negant se Nepete, Sutrium, Alba, Carseoli, Cora, Suessa, Circeii, Setia, Cales, Narnia, Interamna. Nova re consules icti, quum absterrere eos a tam detestabili consilio vellent, castigando increpandoque plus, quam leniter agendo, prefecturos rati, eos ausos esse consilibus dicere, aiebant, quod consules, in senatu ut pronunciarent, in animum inducere non possent: non enim detractationem eam munerum militiæ, sed apertam defectionem a populo Romano esse. Redirent itaque propere in colonias, et, tamquam integra re, locuti magis, quam ausi, tantum nefas, cum suis consulerent: admonerent, non Campanos, neque Tarentinos eos esse, sed Romanos; inde oriundos, inde in colonias atque in agrum bello captum stirpis augendæ caussa missos: quæ liberi parentibus deberent, ea illos Romanis debere, si ulla pietas, si memoria antiquæ patriæ esset. Consulerent igitur de integro: nam, tum quidem quæ temere agitissent, ea prodendi imperii Romani, tradendæ Hannibali victoriæ esse. Quum alternis hæc consules diu jactassent, nihil moti legati, neque se, quod domum renunciarent, habere, dixerunt, neque senatum suum, quid novi consuleret, ubi nec miles, qui legeretur, nec pecunia, quæ daretur in stipendum, esset. Quum obstinatos eos viderent consules, rem ad senatum detulerunt: ubi tantus pavor animis omnium est injectus, ut magna pars, actum de imperio, diceret: idem alias colonias facturas; idem socios consensisse omnes, ad prodendam Hannibali urbem Romanam.

X. Consules hortari et consolari senatum, et di-

A. C. 209.

Coloniæ

daturas mi-

litæ Ro-

manis.

Castigantur  
a coss.

**U. C. 543.** cere, *Alias colonias in fide atque officio pristino fore:*  
**A. C. 209.** *eas quoque ipsas, quæ officio decessissent, si legati circa eas colonias mittantur, qui castigent, non qui precentur, verecundiam imperii habituras esse.*

Permissum ab senatu iis quum esset, agerent, facerentque, ut e republica ducerent; pertentatis prius aliarum coloniarum animis, citaverunt legatos, quæsiveruntque ab iis, *ecquid milites ex formula paratos haberent?*

**Reliquæ  
in officio  
sunt.**

Pro duodeviginti coloniis M. Sextilius Fregellanus respondit: *et milites ex formula paratos esse: et, si pluribus opus esset, plures daturos: et, quidquid aliud imperaret velletque populus Romanus, enise facturos: ad id sibi neque opes deesse, animum etiam superesse.* Consules, sibi parum videri, præfati, pro merito eorum, sua voce conlandari eos, nisi universi Patres iis in curia gratias egissent, sequi in senatum jusserunt. Senatus, quam poterat honoratissimo decreto adlocutus eos, mandat consulibus, ut ad populum quoque eos producerent, et inter multa alia præclara, quæ ipsis majoribusque suis præstitissent, recens etiam meritum eorum in renpublicam commemorarent. Ne nunc quidem post tot secula sileantur, fraudenturve laude sua. Signini fuere, et Norbani, Saticulanique, et Brundisini, et Fregellani, et Lucerini, et Venusini, et Hadriani, et Firmani, et Ariminenses: et ab altero mari, Pontiani, et Pæstani, et Cosani: et mediterranei, Beneventani, et Æsernini, et Spoletni, et Placentini, et Cremonenses. Harum coloniarum subsidio tum imperium populi Romani stetit: iisque gratiæ et in senatu, et ad populum actæ. Duodecim aliarum coloniarum, quæ detractaverunt imperium, mentionem fieri Patres vetuerunt, neque illos dimitti, neque retineri, neque adpellari a consu-

libus: ea tacita castigatio maxime ex dignitate po- U. C. 543.  
puli Romani visa est. Cetera expedientibus, quæ A. C. 209.  
ad bellum opus erant, consulibus, aurum vicesima-  
rium, quod in sanctiore ærario ad ultimos casus ser-  
vabatur, promi placuit. Promta ad quatuor millia  
pondi auri: inde quingena pondo data consulibus,  
et M. Marcello, et P. Sulpicio proconsulibus, et L.  
Veturio prætori, qui Galliam provinciam sortitus  
erat; additumque Fabio consuli centum pondo auri  
præcipuum, quod in arcem Tarentinam portaretur:  
cetero usi sunt ad vestimenta præsenti pecunia lo-  
canda exercitui, qui in Hispania bellum secunda sua  
fama ducisque gerebat.

XI. Prodigia quoque, priusquam ab urbe con-  
sules proficiscerentur, procurari placuit. In Albano  
monte tacta de cœlo erant signum Jovis, arborque  
templo propinqua, et Ostiæ lacus, et Capuæ murus,  
Fortunæque ædes, et Sinucessæ murus portaque. Hæc  
de cœlo tacta. Cruentam etiam fluxisse aquam Al-  
banam, quidam auctores erant. Et Romæ intus  
cellam ædis Fortis Fortunæ de capite signum, quod  
in corona erat, in manus sponte sua prolapsum. Et  
Priverni satis constabat bovem locutum, volturiu-  
que frequenti foro in tabernam devolasse, et Sinues-  
sæ natum ambiguo inter marem ac feminam sexu  
infantem; quos androgynos vulgus (ut pleraque,  
faciliore ad duplicanda verba Græco sermone) adpel-  
lat: et lacte pluissè, et cum elephanti capite puerum  
natum. Ea prodigia hostiis majoribus procurata,  
et supplicatio circa omnia pulvinaria, et obsecratio  
in unum diem indicta: et decretum, ut C. Hostilius  
prætor ludos Apollini, sicut his annis voti factique  
erant, voveret faceretque. Per eos dies et censori-

U.C. 543. bus creandis Q. Fulvius consul comitia habuit. Creati  
 A.C. 209. censores, ambo qui nondum consules fuerant, M.  
 Cornelius Cethagus, P. Sempronius Tuditanus. Hi  
 censores, ut agrum Campanum fruendum locarent,  
 ex auctoritate Patrum latum in plebem est, plebes-  
 que scivit. Senatus lectionem contentio inter cen-  
 sores de principe legendo tenuit. Sempronii lectio  
 erat: ceterum Cornelius *morem traditum a patribus*  
*sequendum* aiebat: *ut, qui primus censor ex iis, qui vi-*  
*verent, fuisse, eum principem legerent: is T. Manlius*  
*Torquatus erat. Sempronius, cui Dii sortem legen-*  
*di dedissent, ei jus liberum eosdem dedisse Deos. Se id*  
*suo arbitrio facturum: lecturumque Q. Fabium Maxi-*  
*mum, quem tum principem Romanæ civitatis esse, vel*  
*Hannibale judice, victurus esset. Quum diu certatum*  
*verbis esset, concedente collega, lectus a Sempronio*  
*princeps in senatu Q. Fabius Maximus consul: inde*  
*alius lectus senatus, octo præteritis, inter quos L.*  
*Cæcilius Metellus erat, infamis auctor deserendæ Ita-*  
*liæ post Cannensem cladem. In equestribus quoque*  
*notis eadem servata caussa: sed erant perpauci, quos*  
*ea infamia adtingeret. Illis omnibus (et multi erant)*  
*ademi equi, qui Cannensium legionum equites in*  
*Sicilia erant: addiderunt acerbitali etiam tempus,*  
*ne præterita stipendia procederent iis, quæ equo*  
*publico emeruerant, sed deua stipendia equis priva-*  
*tis facerent. Magnum præterea numerum eorum*  
*conquisiverunt, qui equo merere deberent: atque ex*  
*iis, qui principio ejus belli septemdecim annos nati*  
*fuerant, neque militaverant, omnes ærarios fecerunt.*  
*Locaverunt inde refienda, quæ circa forum incen-*  
*dio consumpta erant, septem tabernas, macellum,*  
*atrium regium.*

XII. Transactis omnibus, quæ Romæ agenda U. C. 543.  
 erant, consules ad bellum profecti. Prior Fulvius A. C. 209.  
 prægressus Capuam. Post paucos dies consecutus  
 Fabius; qui et collegam coram obtestatus, et per  
 literas Marcellum, ut quam acerrimo bello detineret  
 Hannibalem, dum ipse Tarentum obpugnaret: ea Fabius sta-  
 urbe ademta hosti jam undique pulso, nec ubi con-<sup>tuit Taren-</sup>  
 sisteret, nec quid fidum respiceret habenti, ne re-<sup>tum ob-</sup>pugnare.  
 morandi quidem caussam in Italia fore. Rhegium  
 etiam nuncium mittit ad præfectum præsidii, quod  
 ab Lævino consule adversus Bruttios ibi locatum  
 erat, octo millia hominum: pars maxima ab Aga-  
 thyrna (sicut antea dictum est) ex Sicilia traducta,  
 rapto vivere hominum adsuetorum: additi erant  
 Bruttiorum indidem perfugæ, et audacia et audendi  
 omnia necessitatibus pares. Hanc manum ad Brut-  
 tium primum agrum depopulandum duci jussit, inde  
 ad Cauloniam urbem obpugnandam. Imperata non  
 in pigre solum, sed etiam avide, exsecuti, direptis fu-  
 gatisque cultoribus agri, summa vi urbem obpugna-  
 bant. Marcellus, et consulis literis excitus, et quia Marcellus  
 ita in animum induxerat, neminem ducem Roma-<sup>ad Canu-</sup>  
 num tam parem Hannibali, quam se, esse, ubi pri-<sup>sium Han-</sup>  
 mum in agris pabuli copia fuit, ex hibernis profectus,<sup>nibali ob-</sup>  
 currit.  
 ad Canusium Hannibali obcurrit. Sollicitabat ad  
 defectionem Canusinos Pœnus: ceterum, ut adpro-  
 pinquare Marcellum audivit, castra inde movit. A-  
 perta erat regio, sine ullis ad insidias latebris; ita-  
 que in loca saltuosa cedere inde cœpit. Marcellus  
 vestigiis instabat, castraque castris conferebat: et,  
 opere perfecto, extemplo in aciem legiones educe-  
 bat. Hannibal, turmatim per equites peditumque  
 jaculatores levia certamina serens, casum universæ

U.C. 543. pugnæ non necessarium ducebat: tractns est tamen  
A.C. 209.

ad id, quod vitabat, certamen. Nocte prægressum  
adsequitur locis planis ac patentibus Marcellus: ca-  
stra inde ponentem, pugnando undique in munitores,

**Prælrium** æquo Marte. operibus prohibet. Ita signa conlata, pugnatumque  
totis copiis: et, quum jam nox instaret, Marte æquo  
discessum est: castra, exiguo distantia spatio, rap-  
tim ante noctem permunita. Postero die luce prima  
Marcellus in aciem copias eduxit: nec Hannibal  
detractavit certamen, multis verbis adhortatus mili-  
tes, *ut, memores Trasimeni Cannarumque, contunde-*  
*rent ferociam hostis: urgere atque instare eum: non*  
*iter quietos facere, non castra ponere pati, non respi-*  
*re aut circumspicere: quotidie simul orientem solem*  
*et Romanam aciem in campis videndam esse. Si uno*  
*prælio haud incuruentus abeat, quietius deinde tranquil-*

**Alterum** prælrium, in quo su-  
perior Pœ-  
nus. bellaturum. His irritati adhortationi-  
bus, simulque tædio ferociæ hostium quotidie in-  
stantium lacescentiumque, acriter prælrium ineunt.

Pugnatum amplius duabus horis est: cedere inde ab  
Romanis dextra ala et extraordinarii cœpere. Quod  
ubi Marcellus vidit, duodecimam legionem in pri-  
mam aciem inducit. Dum alii trepidi cedunt, alii  
segniter subeunt, turbata tota acies est, dein pro-  
sus fusa; et, vincente pudorem metu, terga dabant.  
Cecidere in pugna fugaque ad duo millia et septin-  
genti civium sociorumque: in his quatuor Romani  
centuriones, duo tribuni militum, M. Licinius et M.  
Helvius. Signa militaria quatuor de ala, prima quæ  
fugit; duo de legione, quæ cedentibus sociis succes-  
serat, amissa.

**Exercitus** acriter a  
Marcello increpitus. **XIII.** Marcellus, postquam in castra redditum est,  
concionem adeo sævam atque acerbam apud milites

habuit, ut prælio, per diem totum infeliciter tole- U. C. 543.  
rato, tristior iis irati ducis oratio esset. *Dius immor-* A. C. 209.  
*talibus, ut in tali re, laudes gratesque, inquit, ago, quod*  
*victor hostis, cum tanto pavore incidentibus vobis in val-*  
*lum portasque, non ipsa castra est adgressus: deseruis-*  
*setis profecto eodem terrore castra, quo omisistis pug-*  
*nam. Qui pavor hic, qui terror, quæ repente, qui, et cum*  
*quibus pugnaretis, oblivio animos cepit? nempe iidem*  
*sunt hi hostes, quos vincendo et victos sequendo priorem*  
*æstatem absumsistis; quibus dies noctesque fugientibus*  
*per hos dies institistis; quos levibus præliis fatigastis;*  
*quos hesterno die nec iter facere, nec castra ponere*  
*passi estis. Omitto ea, quibus gloriari potestis: cujus*  
*et ipsius pudere ac pænitere vos oportet, referam: nem-*  
*pe, æquis manibus hesterno die diremistis pugnam. Quid*  
*hæc nox, quid hic dies adtulit? Vestræ his copiæ in-*  
*minutæ sunt, an illorum auctæ? Non equidem mihi*  
*cum exercitu meo loqui videor, nec cum Romanis mi-*  
*litibus: corpora tantum atque arma eadem sunt. An,*  
*si eosdem animos habuissetis, terga vestra vidisset hos-*  
*tis? signa alicui manipulo aut eohorti abstulisset? Ad-*  
*huc cæsis Romanis legionibus gloriabatur: vos illi ho-*  
*dierno die primum fugati exercitus dedistis decus. Clam-*  
*mor inde ortus, ut veniam ejus diei daret; ubi vellet,*  
*deinde experiretur militum suorum animos. Ego*  
*vero experiar, inquit, milites: et vos crastino die in*  
*aciem educam, ut victores potius, quam victi, veniam*  
*inpetretis, quam petitis. Cohortibus, quæ signa ami-*  
*serant, hordeum dari jussit: centurionesque mani-*  
*pulorum, quorum signa amissa fuerant, destrictis*  
*gladiis discinctos destituit; et, ut postero die om-*  
*nnes, equites, pedites, armati adessent, edixit. Ita*  
*concio dimissa fatentium, jure ac merito sese incre-*

U.C. 543. pitos ; neque illo die virum quemquam in acie Ro-  
 A. C. 209. mana fuisse, præter unum ducem ; cui aut morte sa-  
 tisfaciendum, aut egregia victoria esset. Postero  
 die ornati armatique ad edictum aderant. Impera-  
 tor eos conlaudat, pronunciatque, *a quibus orta pridie*  
*fuga esset, cohortesque, quæ signa amisissent, se in pri-*  
*mam aciem inducturum : edicere jam sese, omnibus*  
*pugnandum ac vincendum esse ; et adnitendum singulis*  
*universisque, ne prius hesternæ fugæ, quam hodiernæ*  
*victoriæ, fama Romanæ perveniat.* Inde cibo corpora  
 firmare jussi, ut, si longior pugna esset, viribus sub-  
 ficerent. Ubi omnia dicta factaque sunt, quibus ex-  
 citarentur animi militum, in aciem procedunt.

Tertium  
prœlium.

XIV. Quod ubi Hannibali nunciatum est : *Cum*  
*eo nimirum, inquit, hoste res est, qui nec bonam, nec*  
*malam ferre fortunam potest. Seu vicit, ferociter in-*  
*stat victis : seu vicitus est, instaurat cum victoribus cer-*  
*tamen.* Signa inde cancre jussit, copias educit.  
 Pugnatum utrumque aliquanto, quam pridie, acrius  
 est : Pœnis ad obtinendum hesternum decus adni-  
 tentibus, Romanis ad demendam ignominiam. Si-  
 nistra ala ab Romanis et cohortes, quæ amiserant  
 signa, in prima acie pugnabant, et legio vicesima  
 ab dextro cornu instructa. L. Cornelius Lentulus  
 et C. Clandius Nero legati cornibus præerant, Mar-  
 cellus medium aciem, hortator testisque præsens,  
 firmabat. Ab Hannibale Hispani primam obtine-  
 bant frontem, et id roboris in omni exercitu erat.  
 Quum anceps diu pugna esset, Hannibal elephantos  
 in primam aciem induci jussit : si quem injicere ea  
 res tumultum ac pavorem posset. Et primo turba-  
 runt signa ordinesque, et partim occulcatis, partim  
 dissipatis terrore, qui circa erant, nudaverant una

parte aciem : latiusque fuga manasset, ni C. Deei- U.C. 543.  
 mius Flavus tribunus militum, signo adrepto primi A. C. 209.  
 hastati, manipulum ejus signi se sequi jussisset :  
 duxit, ubi maxime tumultum conglobatae belluæ fa-  
 ciebant, pilaque in eas conjici jussit. Hæsere om-  
 nia tela haud difficile ex propinquo in tanta corpora  
 ietu, et tam conferta turba : sed ut non omnes vul-  
 nerati sunt ; ita, in quorum tergis infixa stetere pila,  
 (ut est genus *anceps*) in fugam versi etiam integros  
 avertere. Tum jam non unus manipulus, sed pro se  
 quisque miles, qui modo adsequi agmen fugientium  
 elephantorum poterat, pila conjicere : eo magis ru-  
 ere in suos belluæ ; tantoque majorem stragem edere,  
 quam inter hostes ediderant, quanto acrius pavor  
 consternatam agit, quam insidentis magistri imperio  
 regitur. In perturbatam transeurus belluarum aciem Vincit Mar-  
 signa inferunt Romani pedites : et haud magno cer- cellus.  
 tamine dissipatos trepidantesque avertunt. Tum in  
 fugientes equitatum immittit Marellus, nec ante  
 finis sequendi est factus, quam in castra paventes  
 compulsi sunt. Nam super alia, quæ terrorem tre-  
 pidationemque facerent, elephanti quoque duo in  
 ipsa porta conruerant, coactique erant milites per  
 fossam vallumque ruere in castra : ibi maxima hos-  
 tium cædes facta ; cæsa ad octo millia hominum,  
 quinque elephanti. Nec Romanis incruenta victo-  
 ria fuit : mille ferme et septingenti de duabus legio-  
 nibus, et sociorum supra mille et trecentos oceisi :  
 vulnerati permulti civium sociorumque. Hannibal  
 nocte proxima castra movit. Cupiente insequi  
 Marcellum prohibuit multitudo sauciorum.

XV. Speculatores, qui prosequerentur agmen,  
 missi, postero die retulerunt, Bruttios Hannibalem

U.C. 543. petere. Iisdem fere diebus et ad Q. Fulvium con-  
 A.C. 209. sulem Hirpini, et Lucani, et Volcentes, traditis  
 præsidiis Hannibalibus, quæ in urbibus habebant, de-  
 diderunt sese, clementerque a consule, cum verbo-  
 rum tantum castigatione ob errorem præteritum,  
 accepti. Et Bruttis similis spes veniae facta est :  
 quum ab iis Vibius et Pactius fratres, longe nobi-  
 lissimi gentis ejus, eamdem, quæ data Lucanis erat,  
 conditionem deditiois petentes venissent. Q. Fa-  
 bius consul oppidum in Sallentinis Manduriam vi-  
 cepit: ibi ad quatuor millia hominum capta, et ce-  
 teræ prædæ aliquantum. Inde Tarentum profectus,  
 Fabius Tarentum in ipsis faucibus portus posuit castra: naves, quas  
 obpugnat. Livins tutandis commeatis habuerat, partim ma-  
 chinationibus onerat adparatuque mœnium obpug-  
 nandorum, partim tormentis et saxis omnique mis-  
 silium telorum genere instruit, onerarias quoque,  
 non eas solum, quæ remis agerentur; ut alii machi-  
 nas scalasque ad muros ferrent, alii procul ex navi-  
 bus vulnerarent mœnium propugnatores. Eæ na-  
 ves, ab aperto mari ut urbem adgredierentur, in-  
 structæ paratæque sunt. Et erat liberum mare,  
 classe Punica, quam Philippus obpugnare Ætolos  
 pararet, Coreyram transmissa. In Bruttis interim  
 Caulonis obpugnatores, sub adventum Hannibalibus,  
 ne obprimerentur, in tumulum, a præsenti impetu  
 tutum, se recepere. Fabium, Tarentum obsidentem,  
 leve dictu momentum ad rem ingentem potiundam  
 Tarentum adjuvit. Præsidium Bruttiorum datum ab Hanni-  
 proditione bale Tarentini habebant: ejus præsidii præfectus  
 capti. deperibat amore mulierculæ, cuius frater in exercitu  
 Fabii consulis erat. Is, certior literis sororis fac-  
 tus de nova consuetudine advenæ, locupletis, atque

inter populares tam honorati, spem nactus per so- U. C. 543.  
rorem quolibet impelli amantem posse, quid spera- A. C. 209.  
ret, ad consulem detulit: quæ quum haud vana  
cogitatio visa esset, pro perfuga jussus Tarentum  
transire, ac per sororem præfecto conciliatus, primo  
occulte animum ejus tentando, dein, satis explorata  
levitate, blanditiis muliebribus perpulit eum ad pro-  
ditionem custodiæ loci, cui præpositus erat. Ubi et  
ratio agendæ rei, et tempus convenit, miles, nocte  
per intervalla stationum clam ex urbe emissus, ea,  
quæ acta erant, quæque, ut agerentur, convenerat,  
ad consulem refert. Fabius vigilia prima, dato sig-  
no iis, qui in arce erant, quique custodiam portus  
habebant, ipse circuito portu ab regione urbis in  
orientem versa occultus consedit. Canere inde  
tubæ simul ab arce, simul a portu et ab navibus,  
quæ ab aperto mari adpulsæ erant; clamorque un-  
dique cum ingenti tumultu, unde minimum periculi  
erat, de industria ortus. Consul interim silentio  
continebat suos. Igitur Democrats, qui præfectus  
antea classis fuerat, forte illo loco præpositus, post-  
quam quieta omnia circa se vidit, alias partes eo  
tumultu personare, ut captæ urbis interdum exci-  
taretur clamor, veritus ne inter cunctationem suam  
consul aliquam vim faceret, signaque inferret, præ-  
sidium ad arcem, unde maxime terribilis accidebat  
sonus, traducit. Fabius, quum et ex temporis spa-  
tio et ex silentio ipso (quod ubi paullo ante strepe-  
bant excitantes vocantesque ad arma, inde nulla ac-  
cidebat vox) deductas custodias sensisset; ferri sca-  
las ad eam partem muri, qua Bruttiorum cohortem  
præsidium agitare proditionis conciliator nunciave-  
rat, jubet. Ea primum est captus inurus, adjuvan-

U. C. 543. tibus recipientibusque Bruttiis; et transcensum in  
A. C. 209. urbem est: inde et proxima refracta porta, ut fre-  
quenti agmine signa inferrentur. Tum, clamore  
sublato, sub ortum ferme lucis, nullo obvio armato,  
in forum pervenient: omnesque undique, qui ad  
arcem portumque pugnabant, in se converterunt.

XVI. Prælium in aditu fori majore inpetu, quam  
perseverantia, commissum est: non animo, non ar-  
mis, non arte belli, non vigore aut viribus corporis,  
par Romano Tarentinus erat. Igitur, pilis tantum  
conjectis, prius pene, quam consererent manus, ter-  
ga dederunt, dilapsique per nota urbis itinera in  
suas amicorumque domos. Duo ex ducibus Nico-  
et Democrates fortiter pugnantes cecidere. Phile-  
menustr, qui proditionis ad Hannibalem auctor fue-  
rat, quum citato equo ex prælio avectus esset; va-  
gus paullo post equus errans per urbem cognitus;  
corpus nusquam inventum est: creditum vulgo est,  
in puteum apertum ex equo præcipitasse. Kartha-  
lonem autem, præfectum præsidii Punici, cum com-  
memoratione paterni hospitii, positis armis, venien-  
tem ad consulem, miles obvius obtruncat. Alii  
alios passim sine discriminè armatos, inermes, cæ-  
dunt, Karthaginienses Tarentinosque pariter. Brut-  
tii quoque multi interfici, seu per errorem, seu ve-  
tere in eos insito odio, seu ad proditionis famam (ut  
vi potius atque armis captum Tarentum videretur)  
extinguendam. Tum ab cæde ad diripiendam ur-  
bem discursum: millia triginta servilium capitum di-  
cuntur capti: argenti vis ingens facti signatique: auri  
octoginta tria millia pondo: signa tabulæque, prope  
ut Syracusarum ornamenta æquaverint. Sed majore  
animo generis ejus præda abstinuit Fabius, quam

Marcellus; qui interroganti scribæ, quid fieri signis U.C. 543.  
vellet, (ingentis magnitudinis Dii sunt, suo quisque  
habitu in modum pugnantium formati) *Deos iratos*  
*Tarentinis relinqui* jussit. Murus inde, qui urbem  
ab aree dirimebat, dirutus est ac disjectus. *Dum Adecurrit*  
*haec Tarenti aguntur, Hannibal iis, qui Caulonian*  
*obsidebant, in deditio[n]em acceptis, audita obpugna-*  
*tione Tarenti, dies noctesque cursim agmine aeto,*  
quum, festinans ad opem ferendam, captam urbem  
audisset; *Et Romani, inquit, suum Hannibalem ha-*  
*bent: eadem, qua ceperamus, arte Tarentum amisi-*  
*mus.* Ne tamen fugientis modo convertisse agmen  
videretur, quo constituerat loco, quinque millia fer-  
me ab urbe posuit castra: ibi paucos moratus dies,  
Metapontum sese recepit: inde duos Metapontinos  
cum literis principum ejus civitatis ad Fabium Ta-  
rentum mittit, fidem ab consule accepturos, inpu-  
nita iis priora fore, si Metapontum ei cum præsidio  
Punico prodidissent. Fabius vera, quæ adferrent,  
esse ratus, diem, qua accessurus esset Metapontum,  
constituit: literasque ad principes dedit, quæ ad  
Hannibalem delatae sunt. Enimvero lætus successu  
fraudis, si ne Fabius quidem dolo invictus fuisse  
haud procul Metaponto insidias ponit. Fabio aus-  
picanti prius, quam egrederetur ab Tarento, aves  
semel atque iterum non addixerunt: hostia quoque  
cæsa consulenti Deos aruspex, cavendum a fraude  
hostili et ab insidiis, prædixit. Metapontini, post-  
quam ad constitutam non venerat diem, remissi, ut  
cunctantem hortarentur, repente comprehensi, metu  
gravioris quæstionis, detegunt insidias.

XVII. Æstatis ejus principio, qua hæc agebantur, Hispaniae  
P. Scipio in Hispania quum hiemem totam reconcili- res; Ro-  
manis fe-  
condæ.

U. C. 543. liandis barbarorum animis, partim donis, partim re-  
A. C. 209. missione obsidum captivorumque, absumsisset; E-  
desco ad eum, clarus inter duces Hispanos, venit.  
Erant conjux liberique ejus apud Romanos: sed  
præter eam caussam etiam velut fortuita inclinatio  
animorum, quæ Hispaniam omnem averterat ad  
Romanum a Punico imperio, traxit eum. Eadem  
caussa Indibili Mandonioque fuit, haud dubie omnis  
Hispaniæ principibus, cum omni popularium manu,  
relicto Hasdrubale, secedendi in inminentes castris  
eius tumulos, unde per continentia juga tutus recep-  
tus ad Romanos esset. Hasdrubal, quum hostium  
res tantis augescere incrementis cerneret, suas in-  
minui, ac fore, ut, nisi audendo aliquid moveret,  
qua cœpissent, fluerent, dimicare quam primum  
statuit. Scipio avidior etiam certaminis erat, quum  
a spe, quam successus rerum augebat; tum quod  
prius, quam jungerentur hostium exercitus, cum  
uno dimicare duece exercituque, quam simul cum  
universis, malebat. Ceterum, etiam, si cum pluri-  
bus pariter dimicandum foret, arte quadam copias  
auxerat: nam quum videret, nullum esse navium  
usum, quia vacua omnis Hispaniæ ora classibus  
Punicis erat, subductis navibus Tarracone, navales  
socios terrestribus copiis addidit: et armorum ad-  
fatim erat captorum Karthagine, et quæ post cap-  
tam eam fecerat, tanto opificum numero inclusio.  
Cum iis copiis Scipio, veris principio ab Tarracone  
egressus, (jam enim et Lælius redierat ab Roma,  
sine quo nihil majoris rei motum volebat) ducere ad  
hostem pergit. Per omnia pacata eunti, ut cuius-  
que populi fines transiret, prosequenteribus excipien-  
tibusque sociis, Indibilis et Mandonius cum suis co-

piis obcurrerunt. Indibilis pro utroque locutus, U. C. 543.  
 haudquaquam ut barbarus stolidi incauteque, sed A. C. 209.  
 potius cum verecunda gravitate: propiorque excu- Indibilis et  
 santi transitionem ut necessariam, quam glorianti Mandonius  
 eam velut primam occasionem raptam. *Scire enim* ad Roma-  
*se, transfugæ nomen execrabile veteribus sociis, novis*  
*suspectum esse: neque eum se reprehendere morem ho-*  
*minum, si tamen anceps odium caussa, non nomen, fa-*  
*ciat.* Merita inde sua in duces Karthaginienses  
 commemoravit, avaritiam contra eorum, superbiam-  
 que, et omnis generis injurias in se atque populares.  
*Itaque corpus dum taxat suum ad id tempus apud eos*  
*fuisse: animum jam pridem ibi esse, ubi jus ac fas*  
*crederent coli: ad Deos quoque configere supplices,*  
*qui nequeant hominum vim atque injurias pati.* Se id  
*Scipionem orare, ut transitio sibi nec fraudi apud*  
*eum, nec honori sit: quales ex hac die experiundo*  
*cognorit, perinde operæ eorum pretium faceret.* Ita  
 prorsus respondet facturum Romanus: nec pro  
 transfugis habiturum, qui non duxerint societatem  
 ratam, ubi nec divini quidquam, nec humani sanctum  
 esset. Productæ deinde in conspectum iis conjuges  
 liberique lacrimantibus gaudio redduntur, atque eo  
 die in hospitium abducti. Postero die fœdore ac-  
 cepta fides; dimissique ad copias adducendas. Iis-  
 dem deinde castris tendebant, donec ducibus iis ad  
 hostem perventum est.

XVIII. Proximus Karthaginiensium exercitus Ad Has-  
 Hasdrubalis prope urbem Bæculam erat: pro cas- drubalem  
 tris equitum stationes habebat. In eas velites an- contendit  
 tes signanique, et qui primi agminis erant, advenien- Scipio.  
 tes ex itinere, priusquam castris locum caperent,  
 adeo contemptim inpetum fecerunt, ut facile adpare-

U. C. 543. ret, quid utriusque parti animorum esset. In castra  
 A. C. 209. trepida fuga compulsi equites sunt : signaque Ro-  
 mana portis prope ipsis inlata. Atque illo quidem  
 die, irritatis tantum ad certamen animis, castra Ro-  
 mani posuerunt. Nocte Hasdrubal in tumulum co-  
 pias recipit, plano campo in summo patentem : flu-  
 vius ab tergo ; ante circaque velut ripa præceps  
 oram ejus omnem cingebat. Suberat et altera infe-  
 rior submissa fastigio planities : eam quoque altera  
 crepido haud facilior in adscensum ambibat. In  
 hunc inferiorem campum postero die Hasdrubal,  
 postquam stantem pro castris hostium aciem vidit,  
 equites Numidas, leviumque armorum Baliares, et  
 Afros dimisit. Scipio, circumvectus ordines signa-  
 que, ostendebat, *hostem, prædamnata spe æquo di-  
 micandi campo, captantem tumulos, loci fiducia, non  
 virtutis armorumque, stare in conspectu : sed altiora  
 mænia habuisse Karthaginem, quæ transcendisset miles  
 Romanus.* Nec tumulos, nec arcem, ne mare quidem  
 armis obstitisse suis : ad id fore altitudines, quas ce-  
 pissent hostes, ut per præcipitia et prærupta salientes  
 fugerent : eam quoque se illis fugam clausurum. Co-  
 hortesque duas, alteram tenere fauces vallis, per  
 quam deferretur amnis, jubet ; alteram, viam insi-  
 dere, quæ ab urbe per tumuli obliqua in agros fer-  
 ret : ipse expeditos, qui pridie stationes hostium  
 pepulerant, ad levem armaturam, infimo stantem  
 supercilio, dicit. Per aspreta primo, nihil aliud  
 Adgredi-  
 tur hos-  
 tem.  
 quam via impediti, iere : deinde, ut sub ictum vene-  
 runt, telorum primo omnis generis vis ingens effusa  
 est in eos : ipsi contra, saxa, quæ locus strata pas-  
 sim, omnia ferme missilia, præbet, ingerere, non  
 milites solum, sed etiam turba calonum immixta

armatis. Ceterum, quamquam adscensus difficilis U. C. 543.  
 erat, et prope obruebantur telis saxisque, adsuetudine tamen succedendi muros, et pertinacia animi, subierunt primi. Qui, simul cepere aliquid æqui loci, ubi firmo consisterent gradu, levem et concursatorem hostem, atque intervallo tutum, quum procul missilibus pugna eluditur, instabilem eundem ad minus conserendas manus, expulerunt loco, et cum cæde magna in aciem altiori superstante tumulo inpegere. Inde Scipio, jussis adversus mediam evadere aciem victoribus, ceteras copias cum Lælio dividit; atque eum parte dextra tumuli circumire, donec mollieris adscensus viam inveniret, jubet: ipse ab læva, circuitu haud magno, in transversos hostes incurrit. Inde primo turbata acies est, dum ad circumsonantem undique clamorem flectere cornua et obvertere ordines volunt. Hoc tumultu et Lælius subiit; et, dum pedem referunt, ne ab tergo vulnerarentur, laxata prima acies, locusque ad evadendum et mediis datus est; qui per tam iniquum locum, stantibus integris ordinibus, elephantisque ante signa locatis, numquam evasisserent. Quum ab omni parte cædes fieret, Scipio, qui lævo cornu in dextrum incucurrerat, maxime in nuda hostium latera pugnabat. Et jam ne fugæ quidem Vincit. patebat locus: nam et stationes utrimque Romanæ dextra lævaque insederant vias: et portam castorum ducis principumque fuga clauerat; addita trepidatione elephantorum, quos territos æque atque hostes timebant. Cæsa igitur ad octo millia hominum.

XIX. Hasdrubal jam ante, quam dimicaret, pecunia rapta, elephantisque præmissis, quam pluri-

**U. C. 543.** mos poterat, de fuga excipiens, præter Tagum flu-

**A. C. 209.** men ad Pyrenæum tendit. Scipio, castris hostium potitus, quum præter libera capita omnem prædam militibus concessisset, in recensendis captivis decem millia peditum, duo millia equitum invenit: ex iis Hispanos sine pretio omnes domum dimisit: Afros vendere quæstorem jussit. Circumfusa inde multitudo Hispanorum, et ante deditorum, et pridie captorum, regem eum ingenti consensu adpellavit.

**Scipio ve-** Tum Scipio, silentio per præconem facto, *sibi maxi-*  
**tat se re-** *mum nomen imperatoris esse, dixit, quo se milites sui*  
**gem ad-** *adpellasset: regium nomen alibi magnum, Romæ in-*  
**pellari.** *tolerabile esse. Regalem animum in se esse, si id in*

*hominis ingenio amplissimum ducerent, tacite judica-*  
*rent; vocis usurpatione abstinerent. Sensere etiam*  
*barbari magnitudinem animi; cuius miraculo no-*  
*minis alii mortales stuperent, id ex tam alto fastigio*  
*adspersant. Dona inde regulis principibusque*  
*Hispanorum divisa, et ex magna copia captorum*  
*equorum trecentos, quos vellet, eligere Indibilem*  
*jussit. Quum Afros venderet jussu imperatoris*  
*quæstor, puerum adultum inter eos forma insigni,*  
*quum audisset regii generis esse, ad Scipionem mi-*  
*sit: quem quum percunctaretur Scipio, quis, et cu-*

*jus, et cur id ætatis in castris fuisset? Numidam esse,*

**Massiva** ait; *Massiram populares vocare: orbum a patre re-*  
**Numida.** *lictum, apud maternum avum Galam, regem Numida-*  
*rum, eductum, cum avunculo Masinissa, qui nuper*  
*cum equitatu subsidio Karthaginiensibus venisset, in*  
*Hispaniam trajecisse. Prohibitum propter ætatem a*  
*Masinissa, numquam ante prælium iniisse. Eo die,*  
*quo pugnatum cum Romanis esset, inscio avunculo,*  
*clam armis quoque sumto, in aciem exisse: ibi, pro-*

*lapso equo effusum in præceps, captum ab Romanis U. C. 543.  
esse. Scipio, quum adservari Numidam jussisset,  
quæ pro tribunali agenda erant, peragit: inde,  
quum se in prætorium recepisset, vocatum eum in-  
terrogat, *velletne ad Masinissam reverti?* Quum,  
effusis gaudio lacrimis, *cupere vero*, diceret; tum  
puero annulum aureum, tunicam lato clavo cum  
Hispano sagulo et aurea fibula, equumque ornatum  
donat, jussisque prosequi, quoad vellet, equitibus  
dimisit.*

XX. De bello inde consilium habitum: et, au-  
toribus quibusdam, ut confestim Hasdrubalem con-  
sequeretur, anceps id ratus, ne Mago atque Has-  
drubal cum eo jungerent copias, præsidio tantum  
ad insidendum Pyrenæum misso, ipse reliquum  
æstatis recipiendis in fidem Hispaniæ populis ab-  
sumsit. Paucis post proelium factum ad Bæculam  
diebus, quum Scipio, rediens jam Tarraconem, saltu  
Castulonensi excessisset, Hasdrubal Gisgonis filius  
et Mago imperatores ex ulteriori Hispania ad Has-  
drubalem venere, serum post male gestam rem auxi-  
lium; consilio in cetera exsequenda belli haud pa-  
rum opportuni. Ibi conferentibus, quid in cuius-  
que provinciæ regione animorum Hispanis esset,  
unus Hasdrubal Gisgonis, ultimam Hispaniæ oram,  
quæ ad Oceanum et Gades vergit, ignaram adhuc  
Romanorum esse, eoque Karthaginiensibus satis fi-  
dam, censebat. Inter Hasdrubalem alterum et Ma- <sup>Pœnorum</sup>  
gonem constabat, *beneficiis Scipionis occupatos om-*  
*nium animos publice privatimque esse: nec transitioni-  
bus finem ante fore, quam omnes Hispani milites aut  
in ultima Hispaniæ amoti, aut traducti in Galliam  
forent.* Itaque, etiamsi senatus Karthaginiensium non  
conclilia.

U. C. 548. censuisset, eundum tamen Hasdrubali fuisse in Ita-  
 A. C. 209. liam, ubi belli caput rerumque summa esset; simul, ut  
 Hispanos omnes procul ab nomine Scipionis ex Hispania  
 abduceret: exercitum ejus, cum transitionibus, tum  
 adverso prælio inminutum, Hispanis repleri militibus.  
 Et Magonem, Hasdrubali, Gisgonis filio, tradito exer-  
 citu, ipsum cum grandi pecunia ad conducenda mer-  
 eede auxilia in Baleares trajicere. Hasdrubalem Gis-  
 gonis cum exercitu penitus in Lusitaniam abire, nec  
 cum Romanis manus conserere. Masinissæ ex omni  
 equitatu, quod roboris esset, tria millia equitum exple-  
 ri; eunque vagum per citeriorem Hispaniam sociis  
 opem ferre, hostium oppida atque agros populari:  
 his decretis, ad exsequenda, quæ statuerant, duces  
 digressi. Hæc eo anno in Hispania acta. Romæ  
 fama Scipionis in dies crescere. Fabio Tarentum  
 captum astu magis, quam virtute, gloriæ tamen esse.  
 Fulvii senescere fama. Marcellus etiam adverso ru-  
 more esse, super quam quod primo male pugnave-  
 rat, quia, vagante per Italiam Hannibale, media  
 æstate Venusiam in tecta milites abduxisset. Ini-  
 micus erat ei C. Publicius Bibulus tribunus plebis.  
 Is jam a prima pugna, quæ adversa fuerat, adsiduis  
 concionibus infamem invisumque plebei Claudium  
 fecerat, et jam de imperio abrogando ejus agebat:  
 quum tamen necessarii Claudi obtinuerunt, ut, re-  
 lecto Venusiae legato, Marcellus Romam rediret ad  
 purganda ea, quæ inimici decernerent: nec de im-  
 perio ejus abrogando, absente ipso, ageretur. Forte  
 sub idem tempus et Marcellus ad deprecandam igno-  
 miniam, et Q. Fulvius consul comitiorum caussa  
 Romam venit.

XXI. Actum de imperio Marcelli in circulo Flami-

nio est, ingenti concursu plebisque et omnium ordinum. Accusavitque tribunus plebis, non Marcel- U. C. 543.  
 lus modo, sed omnem nobilitatem. *Fraude eorum* Accusatur  
*et cunctatione fieri, ut Hannibal decimum jam annum* Marcellus,  
*Italianam provinciam habeat: diutius ibi, quam Kartha-*  
*gine, vixerit. Habere fructum imperii prorogati Mar-*  
*cello populum Romanum: bis cæsum exercitum ejus*  
*æstiva Venusiae sub tectis agere.* Hanc tribuni ora-  
 tionem ita obruit Marcellus commemoratione rerum Absolvitur  
 suarum, ut non rogatio solum de imperio ejus abro- et cos.  
 gando antiquaretur, sed postero die consulem eum  
 ingenti consensu centuriæ omnes crearent. Addi- creatur.  
 tur collega T. Quinctius Crispinus, qui tum prætor  
 erat. Postero die prætores creati P. Licinius Cras-  
 sus Dives, pontifex maximus, P. Licinius Varus,  
 Sex. Julius Cæsar, Q. Claudio Flamen. Comitio-  
 rum ipsorum diebus sollicita civitas de Etruriæ de-  
 fectione fuit. Principium ejus rei ab Arretinis fieri,  
 C. Calpurnius seripserat, qui eam provinciam pro  
 prætore obtinebat. Itaque confestim eo missus  
 Marcellus, consul designatus, qui rem inspiceret, ac,  
 si digna videretur, exercitu adito, bellum ex Apu-  
 lia in Etruriam transferret. Eo metu compressi  
 Etrusci quieverunt. Tarentinorum legatis, pacem  
 petentibus cum libertate ac legibus suis, responsum  
 ab senatu est, ut redirent, quum Fabius consul Ro-  
 mani venisset. Ludi et Romani et plebeii eo anno  
 in singulos dies instaurati. Ædiles curules fuere  
 L. Cornelius Caudinus et Ser. Sulpicius Galba: ple-  
 beii C. Servilius et Q. Cæcilius Metellus. Servilium  
 negabant jure aut tribunum plebis fuisse, aut ædi-  
 lem esse; quod patrem ejus, quem triumvirum agrari-  
 um occisum a Boiis circa Mutinam esse opinio per

decem annos fuerat, vivere, atque in hostium potestate esse, satis constabat.

**U. C. 544.** **XXII.** Undecimo anno Punici belli consulatum  
**A. C. 208.** inierunt **M.** Marcellus quintum (ut numeretur consulatus, quem vitio creatus non gessit) et **T. Quinctius Crispinus.** Utrisque consulibus Italia decreta provincia est, et duo consulares prioris anni exercitus: tertius tum erat Venusiae, cui **M. Marcellus** præfuerat: ita ut ex tribus eligerent duo, quos vellent; tertius ei traderetur, cui Tarentum et Sallentini provincia evenisset. Ceteræ provinciæ ita divisæ prætoribus. **P. Licinio Varo** urbana, **P. Licinio Crasso** pontifici maximo peregrina, et quo senatus censisset: **Sex. Julio Cæsari** Sicilia, **Q. Claudio Flamini** Tarentum. Prorogatum imperium in annum est **Q. Fulvio Flacco**, ut provinciam Capuam, quæ **T. Quinetii** prætoris fuerat, cum una legione obtineret: prorogatum et **C. Hostilio Tubulo** est, ut pro prætore in Etruriam ad duas legiones succederet **C. Calpurnio**: prorogatum et **L. Veturio Philoni** est, ut pro prætore Galliam eamdem provinciam cum iisdem duabus legionibus obtineret, quibus prætor obtinuisse. **Quod in L. Veturio**, idem in **C. Aurunculeio** decretum ab senatu, latumque de prorogando imperio ad populum est, qui prætor Sardiniam provinciam cum duabus legionibus obtinuerat: additæ ei ad præsidium provinciæ quinquaginta naves, quas **P. Scipio** ex Hispania misisset. Et **P. Scipioni**, et **M. Silaui** suæ Hispaniæ, suique exercitus in annum decreti. **Scipio** ex octoginta navibus, quas aut secum ex Italia adductas aut captas Karthagine habebat, quinquaginta in Sardiniam transmittere jussus: quia fama erat, mag-

num navalem adparatum eo anno Karthagine esse; U. C. 544.  
 ducentis navibus omnem oram Italiæ, Siciliæque, ac <sup>A. C. 208.</sup>  
 Sardiniæ inpleturos. Et in Sicilia ita divisa res est.  
 Sex. Cæsari exercitus Cannensis est datus. M. Valerius Lævinus (ei quoque enim prorogatum imperium est) classem, quæ ad Siciliam erat, navium septuaginta obtineret. Adderet eo triginta naves, quæ ad Tarentum priore anno fuerant: cum ea centum navium classe, si videretur ei, prædatum in Africam trajiceret. Et P. Sulpicio, ut eadem classe Macedoniam Græciamque provinciam haberet, prorogatum in annum imperium est. De duabus, quæ ad urbem Romam fuerant, legionibus nihil mutatum. Supplementum, quo opus esset, scriberent consules, permissum. Una et viginti legionibus eo anno defensum imperium Romanum est. Et P. Licinio Varo prætori urbis negotium datum, *ut naves longas triginta veteres reficeret, quæ Ostiæ erant, et viginti novas naves sociis navalibus inpleret: ut quinquaginta navium classe oram maris vicinam urbi Romanæ tueri posset.* C. Calpurnius vetitus ab Arretio movere exercitum, nisi quum successor venisset. Idem et Tubulo imperatum, ut inde præcipue caveret, ne qua nova consilia caperentur.

XXIII. Prætores in provincias profecti. Consules religio tenebat, quod, prodigiis aliquot nuntiatis, non facile litabant. Et ex Campania nunciata erant: Capuæ duas ædes, Fortunæ et Martis, et sepulera aliquot de cœlo tacta. Cumis (adeo minimis etiam rebus prava religio inserit Deos) mures in æde Jovis aurum rosisse. Casini examen apium ingens in foro consedisse. Et Ostiæ murum portamque de cœlo tactam. Cære vulturium volasse in

**U.C. 344.** ædem Jovis. Volsiniis sanguine lacum manasse.  
**A.C. 208.** Horum prodigiorum caussa diem unum supplicatio fuit. Per dies aliquot hostiæ majores sine litatione cæsæ, diuque non inpetrata pax Deûm. In capita consulum, republica incolumi, exitiabilis prodigiorum eventus vertit. Ludi Apollinares, Q. Fulvio, Ap. Claudio consulibus, a P. Cornelio Sulla prætore urbis primum facti erant: inde omnes deinceps prætores urbani fecerant: sed in unum annum vovebant, dieque incerta faciebant. Eo anno pestilentia gravis incidit in urbem agrosque: quæ tamen magis in longos morbos, quam in perniciales, evasit. Ejus pestilentiae caussa et supplicatum per compita tota urbe est, et P. Licinius Varus prætor urbis legem ferre ad populum jussus, ut hi ludi in perpetuum in statam diem voverentur. Ipse primus ita vovit, fecitque ante diem tertium Nonas Quintiles. Is dies deinde sollemnisi servatus.

**XXIV.** De Arretinis et fama in dies gravior, et cura crescere Patribus. Itaque C. Hostilio scriptum est, ne differret obsides ab Arretinis accipere: et, cui traderet Romam deducendos, C. Terentius Varro cum imperio missus: qui ut advenit, extemplo Hostilius legionem unam, quæ ante urbem castra habebat, signa in urbem ferre jussit, præsidiaque locis idoneis disposuit, tum in foro citatis senatoribus obsides imperavit. Quum senatus biduum ad considerandum peteret tempus, aut ipsos extemplo dare, aut se postero die senatorum omnes liberos sumitrum, edixit: inde portas custodire jussi tribuni militum, præfectique socium, et centuriones, ne quis nocte urbe exiret. Id segnus negligentiusque factum: septem principes senatus, priusquam custodiæ-

In portis locarentur, ante noctem cum liberis evase- U. C. 544.  
runt. Postero die luce prima, quum senatus in fo- A. C. 208.  
rum citari cœptus esset, desiderati, bonaque eorum  
venierunt: a ceteris senatoribus centum viginti ob-  
sides, liberi ipsorum, accepti, traditique C. Terentio  
Romam deducendi. Is omnia suspectiora, quam  
ante fuerant, in senatu fecit. Itaque, tamquam in-  
minente Etrusco tumultu, legionem alteram ex ur-  
banis Arretium ducere jussus ipse C. Terentius, eam-  
que habere in præsidio urbis. C. Hostilium cum  
cetero exercitu placet totam provinciam peragrare,  
et cavere, ne qua occasio novare cupientibus res da-  
retur. C. Terentius, ut Arretium cum legione venit,  
claves portarum quum magistratus poposcisset, ne-  
gantibus iis comparere, fraude amotas magis ratus,  
quam negligentia intercidisse, ipse alias claves om-  
nibus portis inposuit: cavitque cum cura, ut omnia  
in potestate sua essent. Hostilium intentius mo-  
nuit, ut in eo spem, non moturos quidquam Etrus-  
cos, poneret, si, ne quid moveri posset, cavisset.

XXV. De Tarentinis inde magna contentione in De Taren-  
senatu actum coram Fabio, defendente ipso, quos <sup>tinis in se-</sup>  
ceperat armis, aliis infensis, et plerisque æquanti- <sup>natu ac-</sup>  
bus eos Campanorum noxæ pœnæque. Senatuscon-  
sultum in sententiam M'. Acilii factum est, ut oppi-  
dum præsidio custodiretur: Tarentinique omnes in-  
tra mœnia continerentur: res integra postea refer-  
retur, quum tranquillior status Italiæ esset. Et de <sup>Tum de</sup> M. Livio, præfecto arcis Tarentinæ, haud minore <sup>M. Livio</sup>  
certamine actum est, aliis senatusconsulto notanti- <sup>Tarenti</sup>  
bus præfectum, quod ejus socordia Tarentum prodi-  
tum hosti esset; aliis præmia decernentibus, quod  
per quinquennium arcem tutatus esset, maximeque

U. C. 544. unius ejus opera receptum Tarentum foret; mediis  
A. C. 208. ad censores, non ad senatum, notionem de eo per-  
tinere dicentibus. Cujus sententiæ et Fabius fuit:  
adjecit tamen, *fateri se, opera Livii Tarentum recep-  
tum, quod amici ejus vulgo in senatu jactassent; neque  
enim recipiendum fuisse, nisi amissum foret.* Consu-  
lum alter T. Quintcius Crispinus ad exercitum, quem  
Q. Fulvius Flaccus habuerat, cum supplemento in  
Lucanos est profectus. Marcellum aliæ atque aliæ  
objectæ animo religiones tenebant: in quibus, quod,  
quum bello Gallico ad Clastidium ædem Honori et  
Virtuti vovisset, dedicatio ejus a pontificibus impe-  
diebatur: quod negabant, unam cellam duobus recte  
dedicari: quia, si de cœlo tacta, aut prodigii aliquid  
in ea factum esset, difficilis procuratio foret; quod,  
utri Deo res divina fieret, sciri non posset: neque  
enim duobus, nisi certis, Deis rite una hostia fieri:  
ita addita Virtutis ædes adproperato opere; neque  
tamen ab ipso ædes eæ dedicatæ sunt. Tum demum  
ad exercitum, quem priore anno Venusiae reliquerat,  
cum supplemento proficiscitur. Locros in Bruttii  
Crispinus obpugnare conatus, quia magnam famam  
ad tulisse Fabio Tarentum rebatur, omne genus tor-  
mentorum machinarumque ex Sicilia arcessierat: et  
naves indidem ad citæ erant, quæ vergentem ad mare  
partem urbis obpugnarent. Ea omissa obpugnatio  
est, quia Lacinium Hannibal admoverat copias: et  
collegam eduxisse jam ab Venusia exercitum fama  
erat, cui conjungi volebat. Itaque in Apuliam ex  
Bruttii redditum, et inter Venusiam Bantiamque,  
minus trium millium passuum intervallo, consules  
binis castris conserderant. In eamdem regionem et  
Hannibal rediit, averso ab Locris bello. Ibi ambo

•onsules, ingenio feroce, prope quotidie in aciem U. C. 544.  
exire; haud dubia spe, si duobus exercitibus con- A. C. 208.  
sularibus junctis commisisset sese hostis, debellari Ambo coss.  
posse. opositi Hannibali.

XXVI. Hannibal quia cum Marcello bis priore anno congressus vicerat victusque erat, ut, cum eodem si dimicandum foret, nec spem, nec metum ex vano haberet; ita duobus consulibus haudquaquam sese parem futurum credebat: itaque, totus in suas artes versus, insidiis locum quærebatur. Levia tamen prælia inter bina castra vario eventu fiebant: quibus quum extrahi æstatem posse consules crederent, nihilominus obpugnari Locros posse rati, L. Cincio, ut ex Sicilia Locros cum classe trajiceret, scribunt. Et, ut ab terra quoque obpugnari mœnia possent, ab Tarento partem exercitus, qui in præsidio erat, duci eo jusserunt. Ea ita futura per quosdam Thurinos compertum Hannibali quum esset, mittit ad insidendam ab Tarento viam: ibi sub tumulo Peteliæ tria millia equitum, peditum duo in occulto locata: in quæ inexplorato euntes Romani quum incidissent, ad duo millia armatorum cæsa, et mille ducenti ferme vivi capti: alii dissipati fuga per agros saltusque Tarentum rediere. Tumulus erat silves- Insidiis ex-  
tris inter Punica et Romana castra, ab neutrīs pri- cipiuntur.  
mo occupatus: quia Romani, qualis pars ejus, quæ vergeret ad hostium castra, esset, ignorabant; Hannibal insidiis, quam castris, aptiorem eum crediderat. Itaque nocte ad id missas aliquot Numidarum turmas medio in saltu condiderat, quorum interdit nemo ab statione movebatur, ne aut arma, aut ipsi procul consiperentur. Fremebant vulgo in castris Romanis, occupandum eum tumulum esse, et castello

**U. C. 544.** firmandum: ne, si occupatus ab Hannibale foret,  
**A. C. 208.** velut in cervicibus haberent hostem. Movit ea res Marcellum, et collegæ, *quin imus, inquit, ipsi cum equitibus paucis exploratum?* *Subjecta res oculis nostris certius dabit consilium.* Consentiente Crispino, cum equitibus duecentis et viginti, ex quibus quadraginta Fregellani, ceteri Etrusci erant, proficiscuntur. Secuti M. Marcellus consulis filius, et A. Manlius, tribuni militum: simul et duo præfecti sociū, L. Arelius, et M'. Aulius. Inmolasse eo die quidam memoriae prodidere consulem Marcellum, et, prima hostia cæsa, jecur sine capite inventum; in secunda omnia comparuisse, quæ adsolent. Auctum etiam visum in capite: nec id sane aruspici placuisse, quod, secundum truncā et turpia exta, nimis læta adparuissent.

**XXVII.** Ceterum consulem Marcellum tanta cupiditas tenebat dimicandi cum Hannibale, ut numquam satis castra castris conlata crederet: tum quoque vallo egrediens signum dedit, ut ad locum miles esset paratus: ut, si collis, in quem speculatum irent, placuisset, vasa conligerent, ac sequerentur. Exiguum campi ante castra erat: inde in collem aperta undique et conspecta ferebat via. Numidis speculator, nequaquam in spem tantæ rei positus, sed si quos vagos, pabuli aut lignorum caussa longius a castris progressos, possent excipere, signum dat, ut pariter ab suis quisque latebris exorirentur. Non ante adparuere, quibus obviis ab jugo ipso consurgendum erat, quam circumiere, qui a tergo includerent viam. Tum undique omnes exorti, et clamore sublato inpetum fecere. Quum in ea valle consules essent, ut neque evadere possent in jugum

occupatum ab hoste, nec receptum ab tergo circum- U. C. 544.  
venti haberent; extrahi tamen diutius certamen potuisset, ni cœpta ab Etruscis fuga pavorem ceteris A. C. 203.  
injecisset. Non tamen omisere pugnam deserti ab Etruscis Fregellani, donec integri consules hortando, ipsique ex parte pugnando rem sustinebant. Sed, postquam vulneratos ambo consules, Marcellum etiam transfixum lancea prolabentem ex equo moribundum videre, tum et ipsi (perpauci autem supererant) cum Crispino consule duobus jaculis icto, et Marcello adolescente, saucio et ipso, effugerunt. Interfectus A. Manlius tribunus militum, et ex duabus præfectis sociū M'. Aulius occisus, L. Arennius captus; et lictores consulū quinque vivi in hostium potestatem venerunt: ceteri aut imperfecti, aut cum consule effugerunt: equites tres et quadraginta, aut in prælio, aut in fuga, ceciderunt, duodeviginti vivi capti. Tumultuatum et in castris fuerat, ut consulibus irent subsidio; quum consulem et filium alterius consulis saucios, exiguaeque infelicis expeditionis reliquias, ad castra venientes cernunt. Mors Marcelli quum alioqui miserabilis fuit, tum quod nec pro ætate, (major jam enim sexaginta annis erat) neque pro veteris prudentia ducis, tam inprovide se, collegamque, et prope totam rem publicam, in præceps dederat. Multos circa unam rem ambitus fecerim, si, quæ de Marcelli morte variant auctores, omnia exsequi velim. Ut omittam alios, L. Cœlius triplicem rei gestæ ordinem edit: unam traditam famam; alteram scriptam laudatione filii, qui rei gestæ interfuerit; tertiam, quam ipse pro inquisita ac sibi comperta adfert. Ceterum ita fama va-

Marcellus  
occiditur.  
Crispinus  
vulneratus  
fugit.

**U. C. 544.** riat, ut tamen plerique loci speculandi caussa castris  
**A. C. 208.** egressum; omnes insidiis circumventum tradant.

**XXVIII.** Hannibal, magnum terrorem hostibus, morte consulis unius, vulnere alterius, injectum esse ratus, ne cui deesset occasio, castra in tumulum, in quo pugnatum erat, extemplo transfert: ibi inventum Marcelli corpus sepelit. Crispinus, et morte collegæ, et suo vulnere territus, silentio insequentis noctis profectus, quos proximos nactus est montes, in iis loco alto et tuto undique castra posuit. Ibi duo duces sagaciter moti sunt, alter ad inferendam, alter ad cavendam fraudem. Annulo Marcelli si-

Hannibal ad Salapiam suamet fraude captus. mul cum corpore Hannibal potitus erat: ejus signi errore ne cui dolus necteretur a Pœno, metuens Crispinus, circa civitates proximas miserat nuncios; occisum collegam esse, annuloque ejus hostem potitum: ne quibus literis crederent nomine Marcelli compositis. Paullo ante hic nuncius consulis Salapiam venerat, quum literæ ab Hannibale adlatæ sunt, Marcelli nomine compositæ: *se nocte, quæ diem illum secutura esset, Salapiam venturum: parati milites essent, qui in præsidio erant, si quo opera eorum opus esset.* Sensere Salapitani fraudem: et ab ira, non defectionis modo, sed etiam equitum interfectorum, rati occasionem supplicii peti, remisso retro nuncio, (perfuga autem Romanus erat) ut sine arbitro milites, quæ vellent, agerent, oppidanos per inuros urbisque opportuna loca in stationibus disponunt: custodias vigiliasque in eam noctem intentius instruunt: circa portam, qua venturum hostem rebantur, quod roboris in præsidio erat, obponunt. Hannibal quarta vigilia ferme ad urbem accessit.

Primi agminis erant perfugæ Romanorum, et arma U. C. 544.  
Romana habebant: ii, ubi ad portam est ventum, A. C. 205.  
Latine omnes loquentes excitant vigiles, aperirique  
portam jubent: consulem adesse. Vigiles, velut ad  
vocem eorum excitati, tumultuari, trepidare, moliri  
portam: cataracta dejecta clausa erat: eam partim  
vectibus levant; partim funibus subducunt in tan-  
tum altitudinis, ut subire recti possent. Vixdum  
satis patebat iter, quum perfugæ certatim ruunt per  
portam: et quum sexcenti ferme intrassent, remis-  
so fune, quo suspensa erat, cataracta magno sonitu  
cecidit. Salapitani, alii perfugas negligenter ex iti-  
nere suspensa humeris, ut inter pacatos, gerentes  
arma, invadunt: alii e turri ejus portæ murisque  
saxis, sudibus, pilis, absterrent hostem. Ita inde  
Hannibal suamet ipse fraude captus abiit: profec-  
tusque ad Locrorum solvendam obsidionem, quam Locrorum  
Cincius summa vi, operibus tormentorumque omni  
genere ex Sicilia advecto, obpugnabat. Magoni,  
obsidionem  
solvit.  
jam haud ferme fidenti retenturum defensurumque  
se urbem, prima spes, morte nunciata Marcelli, ad-  
fulsit. Secutus inde nuncius, Hannibalem, Numi-  
darum equitatu præmisso, ipsum, quantum adcele-  
rare posset, cum peditum agmine sequi. Itaque  
ubi primum Numidas edito e speculis signo adven-  
tare sensit, et ipse, patefacta repente porta, ferox  
in hostes erumpit. Et primo, magis quia improviso  
id fecerat, quam quod par viribus esset, anceps cer-  
tamen erat: deinde, ut supervenere Numidæ, tan-  
tus pavor Romanis est injectus, ut passim ad mare  
ac naves fugerent; relictis operibus machinisque,  
quibus muros quatiebant. Ita adventu Hannibalilis  
soluta Locrorum obsidio est.

**U. C. 544.** **XXIX.** Crispinus, postquam in Bruttios profectum Hannibalem sensit, exercitum, cui collega præfuerat, M. Marcellum tribunum militum Venusiam abducere jussit: ipse, cum legionibus suis Capuam profectus, vix lecticæ agitationem præ gravitate vulnerum patiens, Romam literas de morte collegæ scripsit, quantoque ipse in discrimine esset. *Se comitiorum caussa non posse Romam venire: quia nec viæ laborem passurus videretur, et de Tarento sollicitus esset, ne ex Bruttiiis Hannibal eo converteret agmen. Legatos opus esse ad se mitti, viros prudentes: cum quibus, quæ vellet, de republicâ loqueretur.* Hæ litteræ recitatæ magnum et luctum morte alterius consulis, et metum de altero fecerunt. Itaque et Q. Fabium filium ad exercitum Venusiam miserunt: et ad consulem tres legati missi, Sext. Julius Cæsar, L. Licinius Pollio, L. Cincius Alimentus, quum paucis ante diebus ex Sicilia redisset. Hi nunciare consuli jussi, ut, si ad comitia ipse Romam venire non posset, dictatorem in agro Romano diceret comitiorum caussa. Si consul Tarentum profectus esset, Q. Claudium prætorem placere in eam regionem inde abducere legiones, in qua plurimas sociorum urbes tueri posset. Eadem æstate M. Valerius cum classe centum navium ex Sicilia in Africam transmisit; et, ad Clupeam urbem exseensione facta, agrum late, nullo ferme obvio armato, vastabat. Inde ad naves raptim prædatores recepti, quia repente fama accidit, classem Punicam adventare: octoginta erant et tres naves. Cum iis haud procul Cluea prospere pugnat Romanus: decem et octo navibus captis, fugatis aliis, cum magna terrestri navalique præda, Lilybæum rediit. Eadem æstate

Classis  
Romana  
Africam  
popula-  
tur.

Res Græ-  
ciæ.

et Philippus implorantibus Achæis auxilium tulit : U. C. 544.  
 quos et Machanidas tyrannus Lacedæmoniorum si- A. C. 208.  
 nitimo bello urebat; et Ætoli, navibus per fretum,  
 quod Naupactum et Patras interfluit, (Rhion incolæ  
 vocant) exercitu trajecto, depopulati erant. Atta-  
 lum quoque regem Asiæ, quia Ætoli summum gen-  
 tis suæ magistratum ad eum proximo concilio detu-  
 lerant, fama erat in Europam trajecterum.

XXX. Ob hæc Philippo in Græciam descendenti Ætoli a  
 ad Lamiam urbem Ætoli, duce Pyrrhia, qui prætor Philippo  
 in eum annum cum absente Attalo creatus erat, ob-  
 currerunt. Habebant et ab Attalo auxilia secum : victi.  
 et mille ferme ex Romana classe, a P. Sulpicio mis-  
 sos. Adversus hunc ducem atque has copias Philip-  
 pus bis prospero eventu pugnavit : mille admodum  
 hostium utraque pugna occidit. Inde quum Ætoli  
 metu compulsi Laniæ urbis mœnibus tenerent sese,  
 Philippus ad Phalara exercitum reduxit : in Maliaco  
 sinu is locus est, quondam frequenter habitatus  
 propter egregium portum, tutasque circa stationes,  
 et aliam opportunitatem maritimam terrestremque.  
 Eo legati ab rege Ægypti Ptolemæo, Rhodiisque, et  
 Atheniensibus, et Chiis venerunt, ad dirimendum  
 inter Philippum atque Ætolos bellum. Adhibitus  
 ab Ætolis et ex finitiinis pacificator Amyntander, rex  
 Athamanum. Omnium autem non tanta pro Ætolis  
 cura erat, ferocioribus quam pro ingeniosis Græcorum  
 gentis : quam ne Philippus regnumque ejus, grave  
 libertati futurum, rebus Græciæ innisceretur. De  
 pace dilata consultatio est in concilium Achæorum ;  
 concilioque ei et locus et dies certa indicta : interim  
 triginta dierum induciæ inpetratæ. Profectus inde <sup>Induciæ</sup>  
 rex per Thessaliam Bœotiamque, Chalcidem Eubœæ

**U. C. 544.** venit, ut Attalum, quem classe Eubœam petiturum  
**A. C. 208.** audierat, portibus et litorum adpulsu arceret. Inde,

præsidio relicto adversus Attalum, si forte interim trajecisset, profectus ipse cum paucis equitum levisque armaturæ, Argos venit. Ibi curatione Heræorum Nemeorumque suffragiis populi ad eum delata, quia se Mædonum reges ex ea civitate oriundos referunt, Heræis peractis, ab ipso ludicro extemplo Rhium profectus est, ad indictum multo ante sociorum concilium. Ibi de Ætolico finiendo bello actum, ne caussa aut Romanis, aut Attalo intrandi Græciam esset. Sed ea omnia, vixdum induciarum tempore circumacto, Ætoli turbavere, postquam et Attalum Æginam venisse, et Romanam classem stare ad Naupactum audivere. Vocati enim in concilium Achæorum, in quo eadem legationes erant, quæ ad Phalara egerant de pace, primum questi sunt quædam parva contra fidem conventionis tempore induciarum facta: postremo negarunt dirimi bellum posse, nisi Messeniis Achæi Pylum redderent, Romanis restitueretur Atintania, Scerdilædo et Pleurato Ardyæi. Enimvero indignum ratus Philippus, victos victori sibi ultro conditiones ferre: *ne antea quidem se aut de pace audisse, aut inducias pepigisse, dixit, spem ullam habentem quieturos Ætolos; sed ut omnes socios testes haberet, se pacis, illos belli caussam quæsisse.* Ita infecta pace concilium dimisit, quatuor millibus armatorum relictis ad præsidium Achæorum, et quinque longis navibus acceptis: quas si adjecisset missæ nuper ad se classi Karthaginensium, et ex Bithynia ab rege Prusia venientibus navibus, statuerat navalii prælio lacessere Romanos, jam diu in ea regione potentes maris. Ipse ab eo

Ætoli  
spem pa-  
cis tur-  
bant.

concilio Argos regressus: jam enim Nemeorum ad- U. C. 544.  
petebat tempus, quæ celebrari volebat præsentia A. C. 203.  
sua.

**XXXI.** Occupato rege adparatu ludorum, et per Classis Ro-  
dies festos licentius, quam inter belli tempora, re-<sup>mana Co-</sup>  
mittente animum, P. Sulpicius, ab Naupacto profec-<sup>rinthium</sup>  
tus, classem adpulit inter Sicyonem et Corinthum,<sup>a agrum va-</sup>  
<sup>stat.</sup> agrumque nobiliissimæ fertilitatis effuse vastavit. Fa-  
ma ejus rei Philippum ab Iudis excivit: raptimque  
cum equitatu profectus, jussis subsequi peditibus,  
palatos passim per agros gravesque præda (ut qui  
nihil tale metuerent) adortus Romanos, compulit in  
naves. Classis Romana, haudquaquam lœta præda,  
Naupactum rediit. Philippo quoque ludorum, qui  
reliqui erant, celebritatem quantæcumque, de Ro-  
manis tamen, victoriæ partæ fama auxerat; lœtitia-  
que ingenti celebrati festi dies: eo magis etiam,  
quod, populariter demto capitis insigni, purpuraque,  
atque alio regio habitu, æquaverat ceteris se in spe-  
ciem: quo nihil gratius est civitatibus liberis. Præ-  
buissetque haud dubiam eo facto spem libertatis, ni- Philippi  
si omnia intoleranda libidine fœda ac deformia effe-<sup>licentia.</sup>  
cisset: vagabatur enim cum uno aut altero comite  
per maritas domos dies noctesque; et, submittendo  
in privatum fastigium, quo minus conspectus, eo so-  
lutor erat: et libertatem quum aliis vanam osten-  
disset, totam in suam licentiam verterat. Neque  
enim omnia emebat aut eblandiebatur, sed vim etiam  
flagitiis adhibebat: periculosumque et viris et pa-  
rentibus erat, moram incommoda severitate libidini  
regiæ fecisse: uni etiam principi Achæorum Arato  
ademta uxor nomine Polycratia, ac spe regiarum  
nuptiarum in Macedoniam asportata fuerat. Per

U. C. 544. hæc flagitia sollempni Nemcorum peracto, paucisque  
 A. C. 208. additis diebus, Dymas est profectus, ad præsidium  
 Ætolorum, quod ab Eleis adeitum acceptumque in  
 urbem erat, ejiciendum. Cyeliadas (penes eum sum-  
 ma imperii erat) Achæique ad Dymas regi obeurrere :  
 et Eleorum accensi odio, quod a ceteris Achæis dis-  
 sentirent : et infensi Ætolis, quos Romanum quoque  
 adversus se movisse bellum credebant. Profecti ab  
 Dymis, conjuncto exercitu transeunt Larisum am-  
 nem, qui Eleum agrum ab Dymæo dirimit.

XXXII. Primum diem, quo fines hostium ingres-  
 si sunt, populando absumserunt. Postero die acie  
 instructa ad urbem accesserunt, præmissis equiti-  
 bus ; qui, obequitando portis, promptum ad excursio-  
 nes genus lacesserent Ætolorum. Ignorabant,  
 Sulpicium cum quindecim navibus ab Naupacto Cyl-  
 lenen trajecisse, et, expositis in terram quatuor mil-  
 libus armatorum, silentio noctis, ne conspici agmen  
 posset, intrasse Elim. Itaque improvisa res ingen-  
 tem injecit terrorem, postquam inter Ætolos Eleos-  
 que Romana signa atque arina cognovere. Et pri-  
 mo recipere suos voluerat rex : dein, contracto jam  
 inter Ætolos et Trallos (Illyriorum id est genus)  
 certamine, quum urgeri videret suos, et ipse rex  
 cum equitatū in cohortem Romanam incurrit. Ibi  
 equus pilo trajectus quum prolapsum per caput re-  
 gem effudisset, atrox pugna utrimque accensa est,  
 et ab Romanis in petu in regem facto, et protegenti-  
 bus regiis. Insignis et ipsius pugna fuit, quum  
 pedes inter equites coactus esset proelium inire :  
 dein, quum jam inpar certamen esset, caderentque  
 circa eum multi, et vulnerarentur, raptus ab suis,  
 atque alteri equo injectus, fugit. Eo die castra

Rex vin-  
 citur a  
 Sulpicio.

quinque millia passuum ab urbe Eleorum posuit : U. C. 544.  
 postero ad castellum (Pyrgum vocant) copias omnes eduxit : quo agrestium multitudinem cum pecoribus metu populationum compulsam audierat : eam inconditam inermemque multitudinem primo statim terrore adveniens cepit : compensaveratque ea præda, quod ignominiae ad Elim acceptum fuerat. Dividenti prædam captivosque (fuerant autem quatuor millia hominum, pecoris omnis generis ad millia vi-

redit in  
Macedo-  
niam.

ginti) nuncius ex Macedonia venit, Eropum quemdam, conrupto arcis præsidiique præfecto, Lycnidum cepisse : tenere et Dassaretiorum quosdam viros, et Dardanos etiam concire. Omisso igitur Achaico bello, relictis tamen duobus millibus et quingentis omnis generis armatorum cum Menippo et Polyphanta ducibus ad præsidium sotorum, profectus ab Dymis, per Achaiam Bœotiamque et Euœam, decimis castris Demetriadem in Thessaliam pervenit.

XXXIII. Ibi alii, majorem adferentes tumultum, nuncii obcurrunt: Dardanos, in Macedoniam effusos, Orestidem jam tenere, ac descendisse in Argostæum campum: famamque inter barbaros celebrein esse, Philippum occisum. Expeditione ea, qua cum populatoribus agri ad Sicyonem pugnavit, in arborem inlatus in petu equi, ad eminentem ramum cornu alterum galeæ præfregit: id inventum ab Ætolo quodam, perlatumque in Ætoliam ad Scerdilædum, cui notum erat insigne galeæ, famam interfecti regis vulgavit. Post profectionem ex Achâia regis, Sulpicius, Æginam classe profectus, cum Attalo sese conjunxit. Achæi cum Ætolis Eleisque haud procul Messene prosperam pugnam fecerunt.

U. C. 544. Attalus rex et P. Sulpicius Æginæ hibernarunt.  
 A. C. 206. Exitu hujus anni T. Quinctius Crispinus consul, dictatore comitiorum ludorumque faciendorum causa dicto T. Manlio Torquato, ex vulnere moritur : alii Tarenti, alii in Campania mortuuni tradunt. Id quod nullo ante bello acciderat, duo consules, sine memorando prælio interfecti, velut orbam rempublicam reliquerant. Dictator Manlius magistrum equitum C. Servilium (tum ædilis curulis erat) dixit. Senatus, quo die primum est habitus, ludos magnos facere dictatorem jussit, quos M. Æmilius prætor urbis, C. Flaminio, Cn. Servilio consulibus, fecerat, et in quinquennium voverat. Tum dictator et ludos fecit, et in insequens lustrum vovit. Ceterum, quum duo consulares exercitus tam prope hostem sine duabus essent, omnibus aliis omissis, una præcipua cura Patres populumque incessit, consules primo quoque tempore creandi ; et ut eos potissimum crearent, quorum virtus satis tuta a fraude Punica esset ; quum *toto eo bello* *damnosa præpropera ac ferrida ingenia imperatorum* fuissent, tum *eo ipso anno* *consules, nimia cupiditate conserendi cum hoste manum, in necopinatam fraudem lapsos esse.* Ceterum *Deos immortales, miscritos nominis Romani, pepercisse innoxiis exercitibus : temeritatem consulum ipsorum capitibus damnasse.*

XXXIV. Quum circumspicerent Patres, quosnam consules facerent, longe ante alios eminebat C. Claudius Nero. Ei collega quærebatur, et virum quidem cum egregium ducebant, sed promptioreni acrioremque, quam tempora belli postularent, aut hostis Hannibal : temperandum acre ejus ingenium moderato et prudenti viro adjuncto collega censebant.

*Curæ de  
coss. cre-  
andis.*

M. Livius erat, multis ante annis ex consulatu po- U. C. 544.  
 puli judicio damnatus : quam ignominiam adeo æ- A. C. 208.  
 gre tulerat, ut et rus migraret, et per multos annos  
 et urbe et omni cœtu careret hominum : octavo  
 ferme post damnationem anno M. Claudius Marcellus et M. Valerius Lævinus consules reduxerant eum  
 in urbem : sed erat veste obsoleta, capilloque et  
 barba promissa, præferens in vultu habituque insig-  
 nem memoriam ignominiae acceptæ. L. Veturius et  
 P. Licinius censores eum tonderi, et squalorem de-  
 ponere, et in senatum venire, fungique aliis publicis  
 muneribus coegerunt : sed tum quoque aut verbo  
 adsentiebatur, aut pedibus in sententiam ibat, do-  
 nec cognati hominis eum caussa M. Livii Macati,  
 quum fama ejus ageretur, stantem coegit in senatu  
 sententiam dicere. Tum ex tanto intervallo auditus  
 convertit ora hominum in se, caussamque sermoni-  
 bus præbuit, *indigno injuriam a populo factam, mag-*  
*noque id damno fuisse, quod tam gravi bello nec opera,*  
*nec consilio talis viri usa respublika esset. C. Neroni*  
*neque Q. Fabium, neque M. Valerium Lævinum dari*  
*collegas posse, quia duos patricios creari non liceret :*  
*eamdem caussam in T. Manlio esse, præterquam quod*  
*recusasset delatum consulatum, recusaturusque esset.*  
*Egregium par consulum fore, si M. Livium C. Claudio*  
*collegam adjunxissent. Nec populus mentionem ejus*  
*rei ortam a Patribus est adspersnatus. Unus eam*  
*rem in civitate is, cui deferebatur honos, abnuebat,*  
*levitatem civitatis accusans. Sordidati rei non mi-*  
*seritos, candidam togam invito obferre : eodem honores*  
*pœnasque congeri. Si bonum virum ducerent, quid ita*  
*pro malo ac noxio damnassent ? si noxiū comperis-*  
*sent, quid ita, male credito priore consulatu, alterum*

*V. C. 544. crederent? Hæc taliaque arguentem et querentem  
A. C. 208. castigabant Patres, et M. Furium, memorantes, revo-  
catum de exsilio, patriam pulsam sede sua restituisse.  
Ut parentum sævitiam, sic patriæ, patiendo ac ferendo  
leniendam esse: adnisi omnes, cum C. Claudio M.  
Livium consulem fecerunt.*

XXXV. Post diem tertium ejus diei prætorum comitia habita. Prætores creati L. Porcius Licinus, C. Mamilius, A. et C. Hostilii Catones. Comitiis perfectis, ludisque factis, dictator et magister equitum magistratu abierunt. C. Terentius Varro in Etruriam præceptor missus, ut ex ea provincia C. Hostilius Tarentum ad eum exercitum iret, quem T. Quinctius consul habuerat: et L. Manlius trans mare legatus iret, viseretque, quæ res ibi gererentur: simul, quod Olympiæ ludicrum ea a state futurum erat, quod maximo cœtu Græciæ celebraretur, ut, si tuto per hostem posset, adiret id concilium: ut, qui Siculi bello ibi profugi, aut Tarentini cives relegati ab Hannibale essent, domos redirent, scirentque, sua omnia, quæ ante bellum habuissent, reddere populum Romanum. Quia periculosissimus annus inminere videbatur, neque consules in republika erant, in consules designatos omnes versi, quam primum eos sortiri provincias, et præsciscere, quam quisque eorum provinciam, quem hostem haberet, volebant. De reconciliatione etiam gratiæ eorum in senatu actum est, principio facto a Q. Fabio Maximo. Inimicitiae autem nobiles inter eos erant, et acerbiores eas indignioresque Livio sua calamitas fecerat, quod spretum se in ea fortuna credebat: itaque is magis implacabilis erat; et, nihil opus esse reconciliatione, aiebat: *acrius et intentius omnia gestu-*

Coss. de-  
signati re-  
concili-  
antur.

*ros, timentes ne crescendi ex se inimico collegæ potestas U. C. 544.  
fieret. Vicit tamen auctoritas senatus, ut, positis A. C. 208.  
simultatibus, communi animo consilioque admini-  
strarent rempublicam. Provinciae iis non permixtae  
regionibus, sicut superioribus annis, sed diversæ ex-  
tremis Italiæ finibus, alteri adversus Hannibalem  
Bruttii, Lucani; alteri Gallia adversus Hasdrubalem  
(quem jam Alpibus adpropinquare fama erat)  
decreta. Exercitum ex duobus, qui in Gallia, qui-  
que in Etruria essent, addito urbano, eligeret, quem  
mallet, qui Galliam esset sortitus. Cui Brutii pro-  
vincia evenisset, novis legionibus urbanis scriptis,  
utrius mallet consulun prioris anni, exercitum su-  
meret. Relictum a consule exercitum Q. Fulvius  
proconsul acciperet; eique in annum imperium es-  
set: et C. Hostilio, cui pro Etruria Tarentum mu-  
taverant provinciam, pro Tarento Capuam mutave-  
runt: legio una data, cui Fulvius proximo anno  
præfuerat.*

**XXXVI. De Hasdrubalis adventu in Italiam cu-** Hasdrubal  
ra in dies crescebat. Massiliensium primum legati in Galliam  
nunciaverant, eum in Galliam transgressum: erec- transgres-  
sus,  
tosque adventu ejus, quia magnum pondus auri ad-  
tulisse diceretur ad mercede auxilia conducenda,  
Gallorum animos: missi deinde cum iis legati ab  
Roma Sex. Antistius et M. Ræcius ad rem inspic-  
endam, retulerant, misisse se cum Massiliensibus  
ducibus, qui per hospites eorum, principes Gallo-  
rum, omnia explorata referrent. Pro comperto ha-  
bere, Hasdrubalem ingenti iam coacto exercitu pro-  
ximo vere Alpes trajecturum: nec tum eum quid-  
quam aliud morari, nisi quod clausæ hieme Alpes  
essent. In locum M. Marcelli P. Ælius Pætus au-

U. C. 544. gur creatus inaugurusque: et Cn. Cornelius Do-  
 A. C. 208. labella rex sacerorum inaugurus est in locum  
 M. Marcii, qui biennio ante mortuus erat. Hoc  
 eodem anno et lustrum conditum est a censoribus  
 P. Sempronio Tuditano et M. Cornelio Cethego.  
 Censa civium capita centum triginta septem millia,  
 centum et octo: minor aliquanto numerus, quam  
 qui ante bellum fuerat. Eo anno prium, ex quo  
 Hannibal in Italiā venisset, comitium tectum esse,  
 memoriæ proditum est, et ludos Romanos semel in-  
 stauratos ab ædilibus curulibus Q. Metello et C. Ser-  
 vilio: et plebeis Iudis biduum instauratum ab Q.  
 Mamilio et M. Cæcilio Metello ædilibus plebis: et  
 tria signa ad Cereris iidem dederunt: et Jovis epu-

U. C. 545. lum fuit ludorum caussa. Consulatum inde ineunt  
 A. C. 207. C. Claudius Nero et M. Livius iterum: qui, quia  
 jam designati provincias sortiti erant, prætores sor-  
 tiri jusserunt. C. Hostilio urbana evenit: addita  
 et peregrina, ut tres in provincias exire possent. A.  
 Hostilio Sardinia, C. Mamilio Sicilia, L. Porcio Gal-  
 lia evenit. Summa legionum trium et viginti ita per  
 provincias divisa, ut binæ consulum essent; quatuor  
 Hispania haberet; tres prætores binas, in Sicilia, in  
 Sardinia, et Gallia; duas C. Terentius in Etruria;  
 duas Q. Fulvius in Bruttii; duas Q. Claudius circa  
 Tarentum et Sallentinos; unam C. Hostilius Tubu-  
 lus Capuae: duæ urbanæ ut scriberentur: primis  
 quatuor legionibus populus tribunos creavit: in ce-  
 teras consules miserunt.

**XXXVII.** Priusquam consules proficiserentur,  
 novemdiale sacrum fuit, quia Veis de cœlo lapida-  
 verat. Sub unius prodigii (ut fit) mentionem alia  
 quoque nunciata; Minturnis ædem Jovis et lucum

Maricæ; item Atellæ murum et portam de cœlo U. C. 545.  
 tacta. Minturnenses, terribilis quod esset, adjicie- A. C. 207.  
 bant, sanguinis rivum in porta fluxisse: et Capnæ  
 lupus, nocte portam ingressus, vigilem laniaverat.  
 Hæc procurata hostiis majoribus prodigia, et sup-  
 plicatio diem unum fuit ex decreto pontificum: inde  
 iterum novemdiale instauratum, quod in Aramilusto  
 lapidibus visum pluere. Liberatas religione mentes  
 turbavit rursus nunciatum, Frusinone infantem na-  
 tum esse quadrimo parem: nec magnitudine tam mi-  
 randum, quam quod is quoque, ut Sinnessæ biennio  
 ante, incertus, mas an femina esset, natus erat. Id  
 vero aruspices, ex Etruria ad citi, fœdum ac turpe  
 prodigium dicere: extorrem agro Romano, procul  
 terræ contactu, alto mergendum. Vivum in arcam  
 condidere, provectumque in mare projecerunt. De-  
 crevere item pontifices, ut virgines ter novenæ, per  
 urbem euntes, carmen canerent. Id quum in Jovis  
 Statoris æde discerent, conditum ab Livio poeta,  
 carmen, tacta de cœlo ædes in Aventino Junonis  
 Reginæ: prodigiumque id ad matronas pertinere,  
 aruspices quum respondissent, donoque Divam pla-  
 candam esse; ædilium curulium edicto in Capito-  
 lium convocatæ, quibns in urbe Romana, intraque  
 decimum lapidem ab urbe, domicilia essent, ipsæ  
 inter se quinque et viginti delegerunt, ad quas ex  
 dotibus stipem conferrent. Inde donum pelvis aurea  
 facta, lataque in Aventinum, pureque et caste a ma-  
 tronis sacrificatum. Confestim ad aliud sacrificium  
 eidem Divæ ab decemviris edicta dies, cuius ordo  
 talis fuit: ab æde Apollinis boves feminæ albæ duæ  
 porta Carmentali in urbem ductæ: post eas duo  
 signa cypressæ Junonis Reginæ portabantur: tum

**U.C. 545.** septem et viginti virgines, longam indutæ vestem,  
**A.C. 207.** carmen in Junonem Reginam canentes ibant; illa  
 tempestate forsitan laudabile rudibus ingeniis, nunc  
 abhorrens et inconditum, si referatur. Virginum  
 ordinem sequebantur decemviri coronati laurea, præ-  
 textatique. A porta Jugario vico in forum venere:  
 in foro pompa constitit; et, per manus reste data,  
 virgines sonum vocis pulsu pedum modulantes in-  
 cesserunt: inde vico Tusco Velabroque, per Boarium  
 forum, in clivum Publicium atque ædem Junonis  
 Reginæ perrectum: ibi duæ hostiæ ab decemviris  
 immolatæ, et simulacra cuprescea in ædem inlata.

**Acri-**  
**lēctor**  
**cæcetus.**

XXXVIII. Diis rite placatis, delectum consules  
 habebant acrius intentiusque, quam prioribus annis  
 quisquam meminerat habitum: nam et belli terror  
 duplicatus novi hostis in Italiam adventu: et minus  
 juventutis erat, unde scriberent milites. Itaque co-  
 lonos etiam maritimos, qui sacrosanctam vacatio-  
 nem dicebantur habere, dare milites cogebant: qui-  
 bus recusantibus, edixere in diem certam, ut, quo  
 quisque jure vacationem haberet, ad senatum defer-  
 ret. Ea die hi populi ad senatum venerunt: Ostien-  
 sis, Alsiensis, Antias, Anxuras, Minturnensis, Si-  
 nuessanus, et ab supero mari Senensis. Quum va-  
 cationes suas quisque populus recitaret; nullius,  
 quum in Italia hostis esset, præter Antiatem Ostien-  
 semque, vacatio observata est: et earum coloniarum  
 juniores jurejurando adacti, supra dies triginta non  
 pernoetatuos se esse extra mœnia coloniæ suæ, do-  
 nec hostis in Italia esset. Quum omnes censerent,  
 primo quoque tempore consulibus eundum ad bel-  
 lumi, (nam et Hasdrubali obcurrendum esse descen-  
 denti ab Alpibus, ne Gallos Cisalpinos, neve Etru-

**Exercitus**  
**contra**  
**Hasdrubalem** et  
**Hanniba-**  
**lem.**

riam, erectam in spem rerum novarum, sollicitaret: U. C. 545.  
 et Hannibalem suo proprio occupandum bello, ne A. C. 207.  
 emergere ex Bruttii atque obviam fratri ire posset)  
 Livius cunetabatur, parum fidens suarum provinciarum exercitibus: collegam ex duobus consularibus egregiis exercitibus, et tertio, cui Q. Claudius Tarenti præcesset, electionem habere: intuleratque mentionem de volonibus revocandis ad signa. Senatus liberam potestatem consulibus fecit, et supplendi unde vellent, et eligendi de omnibus exercitibus, quos vellent, permutandique, et ex provinciis, quos e republica censerent esse, traducendi. Ea omnia cum summa concordia consulum acta. Volones in undevicesimam et vicesimam legiones scripti. Magni roboris auxilia ex Hispania quoque a P. Scipione M. Livio missa quidam ad id bellum auctores sunt: octo millia Hispanorum Gallorumque, et duo millia de legione militum, equitum mille, mixtos Numidas Hispanosque. M. Lucretium has copias navibus adduxisse: et sagittariorum funditorumque ad quatuor millia ex Sicilia C. Mamilium misisse.

XXXIX. Auxerunt Romæ tumultum literæ ex Hasdrubal Gallia adlatæ ab L. Porcio prætore: *Hasdrubalem transit Alpes.* morisse ex hibernis, et jam Alpes transire: octo millia Ligurum conscripta armataque, conjunctura se transgresso in Italiam esse, nisi mitteretur in Ligures, qui eos bello occuparet: se cum invalido exercitu, quoad tutum putaret, progressurum. Haec literæ consules, raptim confecto delectu, maturius, quam constituerant, exire in provincias coegerunt, ea mente, ut uterque hostem in sua provincia contineret, neque conjungi, aut conferre in unum vires pateretur. Plurimum in eam rem adjuvit opinio Hannibal: *Alpes.*

U.C. 545. quod, etsi ea æstate transitum in Italiam frā.  
 A.C. 207. trem crediderat, recordando quæ ipse in transitu  
 nunc Rhodani, nunc Alpium, cum hominibus lo-  
 cisque pugnando per quinque menses exhausisset,  
 haudquaque tam facilem maturumque transitum-  
 exspectabat: ea tardius movendi ex hibernis caussa  
 fuit. Ceterum Hasdrubali et sua et aliorum spe  
 omnia celeriora atque expeditiora fuere: non enim  
 receperunt modo Arverni eum, deincepsque aliæ  
 Gallicæ atque Alpinæ gentes; sed etiam seutæ  
 sunt ad bellum: et quum per munita pleraque tran-  
 situ fratris, quæ antea invia fuerant, ducebat; tum  
 etiam, duodecim annorum adsuetudine perviis Al-  
 pibus factis, inter mitiora jam hominum transibat  
 ingenia. Invisitati namque antea alienigenis, nec  
 videre ipsi advenam in sua terra adsueti, omni  
 generi humano insociabiles erant. Et primo ignari,  
 quo Pœnus pergeret, suas rupes suaque cas-  
 tella, et pecorum hominumque prædam peti credide-  
 rant: fama deinde Punici belli, quo duodecimum an-  
 num Italia urebatur, satis edocuerat, viam tantum  
 Alpes esse: duas prævalidas urbes, magno inter se  
 maris terrarumque spatio discretas, de imperio et  
 opibus certare: hæ caussæ aperuerant Alpes Has-  
 drubali. Ceterum quod celeritate itineris profec-  
 tum erat, id mora ad Placentiam, dum frustra ob-  
 sidet magis, quam obpugnat, conrupit. Crediderat  
 campestris oppidi facilem expugnationem esse: et  
 nobilitas coloniæ induxerat eum, magnum se ex-  
 cicio ejus urbis terrorem ceteris ratum injecturum.  
 Non ipsum solum ea obpugnatio impedit: sed Han-  
 nibalem post famam transitus ejus, tanto spe sua  
 celeriorem, jam moventem ex hibernis, continuera:

Placen-  
tiam ob-  
sidet.

quippe reputantem, non solum quam lenta urbium U.C. 545.  
obpugnatio esset, sed etiam quam ipse frustra eam- A.C. 207.  
dem illam coloniam, ab Trebia victor regressus,  
tentasset.

**XL.** Consules, diversis itineribus profecti ab urbe, Anxietas  
velut in duo pariter bella distenderant curas ho- Romano-  
minum, simul recordantium, quas primus adventus rum.  
Hannibalis intulisset Italæ clades; simul, quum il-  
la angeret cura, *quos tam propitios urbi atque imperio*  
*fore Deos, ut eodem tempore utrobique respublica pros-*  
*pere gereretur?* adhuc adversa secundis pensando rem  
ad id tempus extractam esse: quum in Italia ad *Trasi-*  
*menum et Cannas præcipitasset Romana res, prospera*  
*bella in Hispania prolapsam eam erexisse: postea,*  
*quam in Hispania alia super aliam clades, duobus egre-*  
*giis ducibus amissis, duos exercitus ex parte delesset*  
*multa, secunda in Italia Siciliaque gesta quassatam*  
*rempublicam excepsisse: et ipsum intervallum loci, quod*  
*in ultimis terrarum oris alterum bellum gereretur, spa-*  
*tium dedisse ad respirandum. Nunc duo bella in Ita-*  
*liam accepta, duo celeberrimi nominis duces circum-*  
*stare urbem Romanam, et unum in locum totam peri-*  
*culi molem, omne onus incubuisse: qui eorum prior*  
*ricisset, intra paucos dies castra cum altero juncturum.*  
Terrebat et proximus annus lugubris duorum con-  
sulum funeribus. His anxii curis homines digredi-  
entes in provincias consules prosecuti sunt. Me-  
moriæ proditum est, plenum adhuc iræ in cives M.  
Livium, ad bellum proficiscentem, moneuti Q. Fabio, Livii vox  
ne, priusquam genus hostium cognosset, temere manum <sup>plena iræ</sup> in cives.  
consereret, respondisse: ubi primum hostium agmen  
consperisset, pugnaturum. Quum quæreretur, quæ  
caussa festinandi esset? Aut ex hoste egregiam glo-

**U. C. 545.** *riam, inquit, aut ex ciribus victis gaudium, meritum*  
**A. C. 207.** *certe, etsi non honestum, capiam.* Priusquam Clau-  
 dius consul in provinciam perveniret, per extremum  
 finem agri Larinatis ducentem in Sallentinos exer-  
 citum Hannibalem cum expeditis cohortibus ador-  
 tus, C. Hostilius Tubulus incomposito agmini terri-  
 bilem tumultum intulit: ad quatuor millia hominum  
 occidit, novem signa militaria cepit. Moverat ex  
 hibernis ad famam hostis Q. Claudius, qui per urbes  
 agri Sallentini castra disposita habebat. Itaque, ne  
 cum duobus exercitibus simul confligeret, Hannibal  
 nocte castra ex agro Tarentino movit, atque in  
 Bruttios concessit. Claudius in Sallentinos agmen  
 convertit. Hostilius, Capuani petens, obvius ad  
 Venusiam fit consuli Claudio. Ibi ex utroque ex-  
 ercitu electa peditum quadraginta millia, duo millia  
 et quingenti equites, quibus consul adversus Hanni-  
 balem rem gereret: reliquas copias Hostilius Ca-  
 puam ducere jussus, ut Q. Fulvio proconsuli tra-  
 deret.

**XLI.** Hannibal, undique contracto exercitu,  
 quem in hibernis, aut in præsidiis agri Brutii ha-  
 buerat, in Lucanos ad Grumentum venit, spe reci-  
 piendi oppida, quæ per metum ad Romanos defecis-  
 sent: eodem a Venusia consul Romanus exploratis  
 itineribus contendit, et mille fere et quingentos pas-  
 sus castra ab hoste locat. Grumenti mœnibus pro-  
 pe injunctum videbatur Pœnorum vallum: quingen-  
 ti passus intererant. Castra Punica ac Romana in-  
 ter jacebat campus, colles inminebant nudi sinistro  
 lateri Karthaginiensium, dextro Romanorum, neu-  
 tris suspecti, quod nihil silvae neque ad insidias late-  
 brarum habebant. In medio campo ab stationibus

Neronis  
et Hanni-  
balis cas-  
tra con-  
lata.

procursantes certamina, haud satis digna dictu, se- U. C. 545.  
rebant. Id modo Romanum quærere adparebat, ne A. C. 207.  
abire hostem pateretur. Hannibal, inde evadere  
cupiens, totis viribus in aciem descendebat. Tum Insidiæ Ro-  
manorum.  
consul, ingenio hostis usus, quo minus in tam aper-  
tis collibus timeri insidiæ poterant, quinque cohortes,  
additis quinque manipulis, nocte jugum superare,  
et in aversis vallibus considere jubet: tempus  
exsurgendi ex insidiis, et adgrediendi hostem, Ti.  
Claudium Asellum tribunum militum et P. Claudium  
præfectum sociūm edocet, quos cum iis mittebat.  
Ipse luce prima copias omnes peditum equitumque  
in aciem eduxit. Panullo post et ab Hannibale sig-  
num pugnæ propositum est, clamorque in castris ad  
arma disurrentium est sublatus: inde eques pedes-  
que certatim portis ruere, ac palati per campum  
properare ad hostes. Quos ubi effusos consul videt,  
tribuno militum tertiae legionis C. Aurunculeio im-  
perat, ut equites legionis, quanto maximo inpetu  
possit, in hostem emittat: ita pecorum modo in-  
compositos toto passim campo se fudisse, ut sterni  
obterique, priusquam instruantur, possint.

XLII. Nondum Hannibal e castris exierat, quum Pugna  
pugnantium clamorem audivit: itaque, excitus tu-  
multu, raptim ad hostem copias agit. Jam primos  
occupaverat equester terror; peditum etiam prima  
legio et dextra ala prælium inibant: incompositi  
hostes, ut quemque aut pediti, aut equiti casus ob-  
tulit, ita conserunt manus: crescit pugna subsidiis,  
et procurrentium ad certamen numero augetur;  
pugnantesque (quod nisi in vetere exercitu, et duci  
veteri hand facile est) inter tumultum ac terrorem  
instruxisset Hannibal, ni cohortium ac manipulo-

U. C. 545. rum decurrentium per colles clamor, ab tergo audi-  
A. C. 207. tus, metum, ne intercluderentur a castris, injecisset.  
Vincunt Inde pavor incussus, et fuga passim fieri cœpta  
Romani. est: minorque cædes fuit, quia propinquitas castro-  
rum breviorem fugam perculis fecit. Equites enim  
tergo inhærebant; in transversa latera invasrant  
cohortes, secundis collibus via nuda ac facili decur-  
rentes: tamen supra octo millia hominum occisa;  
supra septingentos capti: signa militaria novem  
ademta: elephanti etiam, quorum nullus usus in  
repentina ac tumultuaria pugna fuerat, quatuor oc-  
cisi, duo capti. Circa quingentos Romanorum so-  
ciorumque victores ceciderunt. Postero die Pœnus  
quievit: Romanus, in aciem copiis eductis, post-  
quam neminem signa contra efferre vidit, spolia legi  
cæsorum hostium, et suorum corpora conlata in  
unum sepeliri jussit: inde insequentibus continuis  
diebus aliquot ita institit portis, ut prope inferre  
signa videretur: donec Hannibal tertia vigilia, cre-  
bris ignibus tabernaculisque, quæ pars castrorum  
ad hostes vergebat, et Numidis paucis, qui in vallo  
portisque se ostenderent, relictis, profectus Apuliam  
petere intendit. Ubi inluxit, successit vallo Roma-  
na acies: et Numidæ ex composito paullisper in  
portis se valloque ostentavere: frustratique aliquam-  
diu hostes, citatis equis agmen suorum adsequuntur.  
Consul, ubi silentium in castris, et ne paucos qui-  
dem, qui prima luce obambulaverant, parte ulla cer-  
nebat, duobus equitibus speculatum in castra præ-  
missis, postquam satis tuta omnia esse exploratum  
est, inferri signa jussit: tantumque ibi moratus,  
dum milites ad prædam discurrunt, receptui deinde  
cecinit, multoque ante noctem copias reduxit. Pos-

tero die prima luce profectus, magnis itineribus fa- U.C. 545.  
mam et vestigia agminis sequens, haud procul Ve- A.C. 207;  
nusia hostem adsequitur. Ibi quoque tumultuaria  
pugna fuit: supra duo millia Pœnorum cæsa. Inde  
(is enim præsidio ejus loci præfuerat) in Bruttios  
cum paucis ad exercitum novum comparandum mis-  
sus. Hannibal, copiis ejus ad suas additis, Venu-  
siam retro, quibus venerat itineribus, repetit, atque  
inde Canusium procedit. Numquam Nero vestigiis  
hostis abstiterat: et Q. Fulvium, quum Metapontum  
ipse proficeretur, in Lucanos, ne regio ea sine  
præsidio esset, arcessierat.

XLIII. Inter hæc ab Hasdrubale, postquam a Intercipi-  
Placentiæ obsidione abscessit, quatuor Galli equites, untur Has-  
duo Numidæ, cum literis ad Hannibalem missi, drubalis li-  
teræ. quum per medios hostes totam ferme longitudinem  
Italiæ emensi essent, dum Metapontum cedentem  
Hannibalem sequuntur, incertis itineribus Tarentum  
delati, a vagis per agros pabulatoribus Romanis ad  
Q. Claudium proprætorem deducuntur. Eum primo  
incertis implicantes responsis, ut metus tormentorum  
admotus fateri vera coëgit, edocuerunt, literas se ab  
Hasdrubale ad Hannibalem ferre. Cum iis literis,  
sicut erant, signatis, L. Virginio tribuno militum du-  
cendi ad Claudium consulem traduntur: duæ sīnūl  
turmæ Samnitium præsidii caussa missæ. Qui ubi  
ad consulem pervenerunt, literæque lectæ per inter-  
pretem sunt, et ex captivis percunctatio facta; tum  
Claudius, non id tempus esse reipublicæ ratus, quo  
consiliis ordinariis provinciæ suæ quisque finibus per  
exercitus suos cum hoste destinato ab senatu bellum

**U. C. 545.** gereret, audendum aliquid improvisum inopinatum,  
**A. C. 207.** quod cœptum non minorem apud cives, quam hostes  
 terrorem faceret, perpetratum in magnam lætitiam  
 ex magno metu verteret; literis Hasdrubalis Ro-  
 mam ad senatum missis, simul et ipse Patres con-  
 scriptos, quid pararet, edocet, ut, quum in Umbria  
 Nero pro-  
 ficitur  
 ad colle-  
 gam.  
 se obcursum Hasdrubal fratri scribat, legionem a  
 Capua Romam arcessant; delectum Romæ habeant;  
 exercitum urbanum ad Narniam hosti obponant.  
 Hæc senatui scripta. Præmissi item per agrum La-  
 rinate, Marrucinum, Frentanum, Prætutianum,  
 qua exercitum ducturus erat, ut omnes ex agris ur-  
 bibusque commeatus paratos militi ad vescendum in  
 viam deferrent, equos jumentaque alia producerent,  
 ut vehiculorum fassis copia esset. Ipse de toto ex-  
 exercitu civium sociorumque, quod roboris erat, dele-  
 git, sex millia peditum, mille equites: pronunciat,  
 occupare se in Lucanis proximam urbem Punicum-  
 que in ea præsidium velle; ut ad iter parati omnes  
 essent. Profectus nocte flexit in Picenum. Et con-  
 sul quidein, quantis maximis itineribus poterat, ad  
 collegam ducebat, relicto Q. Catio legato, qui cas-  
 tris præesset.

**XLIV.** Romæ haud minus terroris ac tumultus  
 erat, quam fuerat biennio ante, quum castra Punica  
 objecta Romanis mœnibus portisque fuerant: neque  
 satis constabat animis, tam audax iter consulis lau-  
 darent vituperarentne. Adparebat (quo nihil ini-  
 quius est) ex eventu famam habiturum. *Castra prope*  
*Hannibalem hostem relicta sine duce cum exercitu, cui*  
*detractum foret omne, quod roboris, quod floris fuerit;*  
*et consulem in Lucanos ostendisse iter, quum Picenum*  
*et Galliam peteret, castra relinquenter nulla alia re-*

*tutiora, quam errore hostis, qui ducem inde atque ex- U.C. 545:  
ercitus partem abesse ignoraret. Quid futurum, si id A. C. 207.  
palam fiat? et aut insequi Neronem, cum sex millibus  
armatorum profectum, Hannibal toto exercitu velit,  
aut castra invadere, prædæ relicta, sine viribus, sine im-  
perio, sine auspicio? Veteres ejus belli clades, duo  
consules proximo anno interfecti terrehant. Et ea  
omnia accidisse, quum unus imperator, unus exercitus  
hostium in Italia esset: nunc duo bella Punica facta,  
duos ingentes exercitus, duos prope Hannibales in Italia  
esse: quippe et Hasdrubalem, patre eodem Hamilcare  
genitum, æque in pigrum ducem, per tot in Hispania  
annos Romano exercitatum bello, gemina victoria in-  
signem, duobus exercitibus cum clarissimis ducibus dele-  
tis. Nam itineris quidem celeritate ex Hispania et con-  
citatis ad arma Gallicis gentibus multo magis, quam  
Hannibalem ipsum, gloriari posse: quippe in iis locis  
hunc coëgisse exercitum, quibus ille majorem partem mi-  
litum fame ac frigore, quæ miserrima mortis genera-  
sunt, amisisset. Adjiciebant etiam periti rerum His-  
paniæ, haud cum ignoto duce C. Nerone congressurum:  
sed quem in saltu impedito deprehensus forte, haud se-  
cus quam puerum, conscribendis fallacibus conditioni-  
bus pacis frustratus elusisset. Omnia majora etiam  
vero præsidia hostium, minora sua, metu interprete,  
semper in deteriora inclinato, ducebant.*

*XLV. Nero, postquam jam tantum intervalli ab Nero mi-  
hoste fecerat, ut detegi consilium satis tutum esset, lites hor-  
paucis milites ad loquitur. Negat ullius consilium  
imperatoris in speciem audacius, re ipsa tutius fuisse,  
quam suum. Ad certam eos se victoriam ducere: quip-  
pe ad quod bellum collega non ante, quam ad satietatem  
ipsius peditum utque equitum datæ ab senatu*

**U. C. 545.** copiae fuissent majores instructioresque, quam si adver-  
**A. C. 207.** sus ipsum Hannibalem iret, profectus sit, eo ipsos,  
quantumcumque virium momentum addiderint, rem  
omnem inclinaturos. Auditum modo in acie (nam, ne  
ante audiretur, daturum operam) alterum consulem et  
alterum exercitum advenisse, haud dubiam victoriam  
facturum. Famam bellum confidere, et parva momen-  
ta in spem metumque inpellere animos. Glorie qui-  
dem ex re bene gesta partæ fructum prope omnem ip-  
sos laturos. Semper, quod postremum adjectum sit, id  
rem totam videri traxisse. Cernere ipsos, quo concur-  
su, qua admiratione, quo favore hominum iter suum  
celebretur. Et, Hercule, per instructa omnia ordi-  
nibus virorum mulierumque, undique ex agris esfu-  
sorum, inter vota et preces et laudes ibant: illos  
præsidia reipublicæ, vindices urbis Romæ imperiique  
adpellabant: in illorum armis dextrisque suam li-  
berumque suorum salutem ac libertatem repositam  
esse. Deos omnes Deasque precabantur, ut illis  
faustum iter, felixque pugna, matura ex hostibus  
victoria esset: damnarenturque ipsi votorum, quæ  
pro iis suscepissent: Ut, quemadmodum nunc sol-  
liciti prosequerentur eos, ita paucos post dies læti-  
ovantibus victoria obviam irent. Invitare inde pro  
se quisque, et obferre, et fatigare precibus, ut, quæ  
ipsis jumentisque usui essent, ab se potissimum su-  
merent: benigne omnia cumulata dare. Modestia  
certare milites, ne quid ultra usum necessarium su-  
merent: nihil morari, nec ab signis absistere cibum  
cipientes: diem ac noctem ire; vix, quod satis ad  
naturale desiderium corporum esset, quieti dare.  
Et ad collegam præmissi erant, qui nunciarent ad-  
ventum, percunctarenturque, clam an palam, inter-

diu an noctu, venire sese vellet, iisdem an aliis con- U. C. 545.  
sidere castris. Nocte clam ingredi melius visum A. C. 207.  
est.

**XLVI.** Tessera per castra ab Livio consule data erat, ut tribunum tribunus, centurio centurionem, eques equitem, pedes peditem acciperet: neque enim dilatari castra opus esse, ne hostis adventum alterius consulis sentiret: et coartatio plurium in angusto tendentium facilior futura erat, quod Claudianus exercitus nihil ferme, præter arma, secum in expeditionem tulerat. Ceterum in ipso itinere auctum voluntariis agmen erat; obferentibus sese ultro et veteribus militibus perfunctis jam militia, et juvenibus, quos certatim nomina dantes, si quorum corporis species roburque virium aptum militiæ videbatur, conscripserat. Ad Senam castra alterius consulis erant: et quingentos inde ferme passus Hasdrubal aberat. Itaque quum jam adpropinquaret, tectus montibus substitit Nero, ne ante noctem cas- tra ingrederetur. Silentio ingressi, ab sui quisque ordinis hominibus in tentoria abducti, cum summa omnium lætitia hospitaliter excipiuntur. Postero die consilium habitum, cui et L. Porcius Licinus prætor adfuit. Castra juncta consulum castris habebat: et ante adventum eorum, per loca alta du- cendo exercitum, quum modo insideret angustos sal- tus, ut transitum clauderet, modo ab latere aut ab tergo carperet agmen, ludificatus hostem omnibus artibus belli fuerat: is tum in consilio aderat. Mul- torum eo inclinant sententiae, ut, dum fessum via ac vigiliis reficeret militem Nero, simul et ad noscen- dum hostem paucos sibi sumeret dies, tempus pug- nae differretur. Nero non suadere modo, sed sum-

Clam in-  
greditur  
castra  
Livii.

**U. C. 545.** ma ope orare instituit, ne consilium suum, quod tutum  
**A. C. 207.** celeritas fecisset, temerarium morando facerent. Errore (qui non diuturnus futurus esset) velut torpem Hannibalem, nec castra sua sine duce relicta adgredi, nec ad sequendum se iter intendisse: antequam se moveat, deleri exercitum Hasdrubalis posse, redireque in Apuliam. Qui prolatando spatiū hosti det, eum et illa castra prodere Hannibali, et aperire in Galliam iter, ut per otium, ubi velit, Hasdrubali conjungatur. Extemplo signum dandum, et exeundum in aciem: abutendumque errore hostium absentium præsentiumque; dum neque illi sciant cum paucioribus, nec hi cum pluribus et validioribus rem esse. Consilio dimisso, signum pugnæ proponitur, confestimque in aciem procedunt.

**Hasdrubalis prudenter.** XLVII. Jam hostes ante castra instructi stabant: morari pugnæ adlulit, quod Hasdrubal, proiectus ante signa cum paucis equitibus, scuta vetera hostium notavit, quæ ante non viderat, et strigisores equos: multitudo quoque major solita visa est. Suspicatus enim id, quod erat, receptui propere cecinit, ac misit ad flumen, unde aquabantur: ubi et excipi aliqui possent, et notari oculis, si qui forte adustioris coloris, ut ex recenti via, essent; simul circumvehi procul castra jubet specularique, num auctum aliqua parte sit vallum: et ut adtentant, semel bisne signum canat in castris. Ea quum ordine omnia relata essent, castra nihil aucta errorem faciebant. Bina erant, sicut ante adventum consulis alterius fuerant: una M. Livii, altera L. Porci: neutris quidquam, quo latius tenderetur, ad munimenta adjectum. Illud veterem ducem adiutumque Romano hosti movit, quod semel in

prætoriis castris signum, bis in consularibus refere- U. C. 545.  
 bant cecinisse: *duos profecto consules esse*, et, quo- A. C. 207.  
 nam modo alter ab Hannibale abscessisset, cura an-  
 gebat. Minime id, quod erat, suspicari poterat,  
 tantæ rei frustratione Hannibalem elusum, ut, ubi  
 dux, ubi exercitus esset, cum quo castra conlata  
 haberet, ignoraret. Profecto haud mediocri clade  
 absterritum insequi non ausum: magnopere vereri,  
 ne perditis rebus serum ipse auxilium venisset; Ro-  
 manisque eadem jam fortuna in Italia, quæ in His-  
 pania, esset: interdum, literas suas ad eum non  
 pervenisse, credere: interceptisque iis, consulem ad  
 sese obprimendum accelerasse. His anxius curis, Noctu cas-  
 extinctis ignibus, vigilia prima dato signo, ut ta- tra movet.  
 citi vasa conligerent, signa ferri jussit. In trepidatione et nocturno tumultu duces parum intente ad-  
 servati, alter in destinatis jam ante animo latebris  
 subsedit, alter per vada nota Metaurum flumen tra-  
 navit: ita desertum a ducibus agmen primo per  
 agros palatur; fessique aliquot somno ac vigiliis  
 sternunt corpora passim, atque infrequentia relin-  
 quunt signa. Hasdrubal, dum lux viam ostenderet,  
 ripa fluminis signa ferri jubet: et per tortuosi am-  
 nis sinus flexusque errorem volvens haud multum  
 processit, ubi prima lux transitum opportunum os-  
 tendisset, transiturus: sed quum, quantum mare  
 abseedebat, tanto altioribus coercentibus annuem  
 ripis, non inveniret vada, diem terendo spatium de-  
 dit ad insequendum sese hosti.

XLVIII. Nero primum cum omni equitatu adve- Adsequun-  
 nit. Porcius deinde adsecutus cum levi armatura. tur eum  
 Qui quum fessum agmen carperent ab omni parte  
 incurserantque, et jam, omissso itinere, quod fugæ Romanæ.

U. C. 545. simile erat, castra metari Poenus in tumulo super  
 A. C. 207. fluminis ripam vellet; advenit Livius peditum omnibus copiis, non itineris modo, sed ad conserendum extemplo prælium instructis armatisque. Sed ubi omnes copias conjunxerunt, directaque acies est, Claudius dextro in cornu, Livius ab sinistro pugnam instruit: media acies prætori tuenda datur. Hasdrubal, omissa munitione castrorum, postquam pugnandum vidit, in prima acie ante signa elephantes colocat: circa eos laeo in cornu adversus Claudio Gallos obponit, haud tantum eis fidens, quantum ab hoste timeri eos credebat: ipse dextrum cornu adversus M. Livium sibi atque Hispanis (et ibi maxime in vetere milite spem habebat) sumvit. Ligures in medio post elepliantos positi; sed longior, quam latior, acies erat. Gallos prominens collis tegebatur. Ea frons, quam Hispani tenebant, cum sinistro Romanorum cornu concurrit: dextra omnis acies extra prælium eminens cessabat: collis obpositus arcebat, ne aut a fronte, aut ab latere adgredierentur. Inter Livium Hasdrubalemque ingens contractum certamen erat, atroxque cædes utrimque edebatur: ibi duces ambo, ibi pars major peditum equitumque Romanorum: ibi Hispani, vetus miles peritusque Romanæ pugnæ, et Ligures, durum in armis genus: eodem versi elephanti, qui primo in petu turbaverant antesignanos, et jam signa moverant loco: deinde crescente certamine et clamore, inpotentius jam regi, et inter duas acies versari, velut incerti quorum essent; haud dissimiliter navibus sine gubernaculo vagis. Claudius, *Quid ergo præcipiti cursu tam longum iter emensi sumus?* clamitans militibus, quum in adversum col-

Prælium  
initur.

leū fruſtra ſigna erigere conatus eſſet, poſtquam U. C. 545.  
ea regione penetrari ad hostem non videbat poſſe; A. C. 207.  
cohortes aliquot ſubductas e dextro cornu, ubi sta-  
tionem magis ſegnem, quam pugnam, futuram cer-  
nebat, poſt aciem circumducit: et, non hostibus  
modo, ſed etiam ſuis inopinantibus, in ſinistrum  
hostium latus incurrit: tantaque celeritas fuit, ut,  
quum ostendiffent ſe ab latere, mox in terga jam  
pugnarent. Ita ex omnibus partibus, ab fronte, ab  
latere, ab tergo, trucidantur Hispani Liguresque:  
et ad Gallos jam cædes pervenerat. Ibi minimum  
certaminis fuit: nam et pars magna ab signis ab-  
erant, nocte dilapsi, ſtratiq[ue] ſomno paſſim per  
agros: et, qui aderant, itinere ac vigiliis felli, in-  
tolerantissima laboris corpora, vix arma humeri  
geſtabant. Et jani diei medium erat, ſitique et  
calor hiantes cædendos capiendoſque adfatiſ præ-  
bebat.

XLIX. Elephanti plures ab ipsiſ rectoribus, Elephanti  
quam ab hone, interfecti: fabrile scalprum cum a rectoribus  
malleo habebant; id, ubi ſævire belluæ ac ruere in  
ſuos cœperant, magister inter aures poſitum, ipſo in  
articulo, quo jungitur capiti cervix, quanto maximo  
poterat ictu, adigebat. Ea celerrima via mortis in  
tantæ molis bellua inventa erat, ubi regendi ſpem  
viciffent: priuusque id Hasdrubal instituerat, dux Hasdruba-  
quum ſæpe alias memorabilis, tum illa præcipue lis fortitu-  
do, et pugna. Ille pugnantes hortando, pariterque ob-  
mors.  
eundo pericula, ſuſtinuit: ille feffos abnuentesque  
tædio et labore, nunc precando, nunc castigando,  
accendit: ille fugientes revocavit, omissamque pug-  
nam aliquot locis restituit: poſtremo, quum haud  
dubie fortuna hostium eſſet, ne ſupereret tanto

**U. C. 545.** exercitui suum nomen secuto, concitato equo se in  
**A. C. 207.** cohortem Romanam innisit. Ibi, ut patre Hamil-

Quinqua-  
ginta sex  
millia Po-  
norum  
cæsa.

Romano-  
rum octo  
millia.

Nero ad  
exercitum  
redit.

care et Hannibale fratre dignum erat, pugnans ce-  
 cedit. Numquam eo bello una acie tantum hostium  
 interfectum est, redditaque æqua Cannensi clades,  
 vel ducis, vel exercitus interitu, videbatur. Quin-  
 quaginta sex millia hostium occisa: capta quinque  
 millia et quadringenti: præda alia magna tum om-  
 nis generis, tum auri etiam argentique. Civium  
 etiam Romanorum, qui capti apud hostes erant, su-  
 pra quatuor millia capitum recepta: id solatii fuit  
 pro amissis eo prælio militibus. Nam haudqua-  
 quam incruenta victoria fuit: octo ferme millia Ro-  
 manorum sociorumque occisa. Adeoque etiam vic-  
 tores sanguinis cædisque ceperat satietas, ut postero  
 die, quum esset nunciatum Livio consuli, Gallos Cis-  
 alpinos Liguresque, qui aut prælio non adfuissent,  
 aut inter cædem effugissent, uno agmine abire sine  
 certo duce, sine signis, sine ordine ullo, aut impe-  
 rio; posse, si una equitum ala mittatur, omnes de-  
 leri; *Supersint, inquit, aliqui nuncii, et hostium cla-  
 dis, et nostræ virtutis.*

L. Nero ea nocte, quæ secuta est pugnam, citatiore, quam inde venerat, agmine, die sexto ad stativa sua, atque ad hostem pervenit. Iter ejus fre-  
 quentia minore, quia nemo præcesserat nuncius, laetitia vero tanta, vix ut compotes mentium præ  
 gaudio essent, celebratum est. Nam Romæ neuter  
 animi habitus satis dici enarrarique potest; nec quo  
 incerta exspectatione eventus civitas fuerat, nec  
 quo victoriae famam accepit. Numquam per om-  
 nes dies, ex quo Clodium consulem profectum fa-  
 ma adtulit, ab orto sole ad occidentem, aut senator

quisquam a curia atque ab magistratibus abscessit, U. C. 545.  
 aut populus e foro. Matronæ, quia nihil in ipsis A. C. 207.  
 opis erat, in preces obtestationesque versæ, per om-  
 nia delubra vagæ suppliciis votisque fatigare Deos.  
 Tam sollicitæ ac suspensæ civitati fama incerta pri-  
 mo accidit, duos Narnienses equites in castra, quæ  
 in fauibus Umbriæ obposita erant, venisse ex prœ-  
 lio, nunciantes cæsos hostes. Et primo magis au-  
 ribus, quam animis, id acceptum erat, ut majus læ-  
 tiusque, quam quod mente capere, aut satis credere  
 possent: et ipsa celeritas fidem impeditiebat, quod  
 biduo ante pugnatum dicebatur. Literæ deinde ab  
**L. Manlio Acidino** missæ ex castris adferuntur de  
 Narniensium equitum adventu. Eæ literæ, per fo-  
 rum ad tribunal prætoris latæ, senatum curia exci-  
 verunt: tantoque certamine ac tumultu populi ad  
 fores curiæ concursum est, ut adire nuncius non  
 posset, trahereturque a percunctantibus vociferanti-  
 busque, ut in Rostris prius, quam in senatu, literæ  
 recitarentur: tandem submoti et coërciti a magis-  
 tratibus; dispensarique lætitia inter inpotentes ejus  
 animos potuit. In senatu primum, deinde in con-  
 cione, literæ recitatæ sunt: et, pro cujusque inge-  
 nio, aliis jam certum gaudium, aliis nulla ante fu-  
 tura fides erat, quam legatos consulumve literas au-  
 dissent.

**LI.** Ipsos deinde adpropinquare legatos adlatum  
 est: tum enimvero omnis ætas currere obvii, pri-  
 mus quisque oculis auribusque haurire tantum gau-  
 dium cupientes: ad Mulvium usque pontem con-  
 tinens agmen pervenit. Legati (erant **L. Veturius**  
**Philo**, **P. Licinius Varus**, **Q. Cæcilius Metellus**) Gaudium  
 circumfusi omnis generis hominum frequentia in fo- Romano-  
 rum.

U. C. 545. rum pervenerunt ; quum alii ipsos, alii comites eo-  
A. C. 207. rum, quæ acta essent, percunctarentur, et ut quisque audierat, exercitum hostium imperatoremque occisum, legiones Romanas incolumes, salvos consules esse, extemplo aliis porro inpertiebant gaudium suum. Quum ægre in curiam perventum esset, multo ægrius submota turba, ne Patribus misceretur, literæ in senatu recitatæ sunt : inde producti in concionem legati. L. Veturius, literis recitatis, ipse planius omnia, quæ acta erant, exposuit cum ingenti adsensu, postremo etiam clamore universæ concionis, quum vix gaudium animis caperent. Discursum inde ab aliis circa templa Deūm, ut grates agerent ; ab aliis domos, ut conjugibus liberisque tam lætum nuncium inpertirent. Senatus, quod M. Livius et C. Claudius consules, incolui exercitu, ducem hostium legionesque occidissent, supplicationem in triduum decrevit : eam supplicationem C. Hostilius prætor pro concione edixit, celebrataque a viris feminisque est. Omnia templa per totum triduum æqualem turbam habuere : quum matronæ amplissima veste cum liberis, perinde ac si debellatum foret, omni solutæ metu, Deis inmortilibus grates agerent. Statum quoque civitatis ea victoria movit : ut jam inde, haud secus quam in pace, res inter se contrahere, vendendo, emendo, mutuum dando, argentum creditum solvendo, auderent. C. Claudius consul quum in castra redisset, caput Hasdrubalis, quod servatum cum cura adtulerat, projici ante hostium stationes, captivosque Afros vincitos, ut erant, ostendi, duos etiam ex iis solutos ire ad Hannibalem, et expromere, quæ acta essent, jussit. Hannibal, tanto simul publico fa-

miliarique ictus luctu, agnoscere se fortunam Kartha- U. C. 545.  
ginis, fertur dixisse: castrisque inde motis, ut om- A. C. 207.  
nia auxilia, quæ diffusa latius tueri non poterat, in  
extremum Italiæ angulum Bruttios contraheret, et Hannibal  
Metapontinos, civitatem universam, excitos sedibus <sup>in extre-</sup><sub>mam</sub> Italii-  
suis, et Lucanorum qui suæ ditionis erant, in Brut- am recedit,  
tium agrum traduxit.

---

## EPITOME LIBRI XXVIII.

---

**R**ES in Hispania prospere gestæ a Silano, Scipionis legato, et ab L. Scipione fratre adversus Pœnos, a Sulpicio proconsule et ab Attalo rege Asiæ adversus Philippum regem Macedonum, pro Ætolis, referuntur. Quum M. Livio et Claudio Neroni consulibus triumphus decretus esset, Livius, qui in provincia sua rem gesserat, quadrigis invectus est; Nero, qui in collegæ provinciam, ut victoriam ejus adjuvaret, venerat, equo est secutus, et in hoc habitu plus gloriae reverentiæque habuit: nam et plus in bello, quam collega, fecerat. Ignis in æde Festæ negligentia virginis, quæ non custodierat, exstinctus est: virgo cæsa est flagro. P. Scipio in Hispania cum Pœnis debellarit quarto decimo anno ejus belli, quinto post anno, quam ierat: exclusisque in totum possessione ejus hostibus, Hispaniam recepit: et a Tarracone in Africam ad Syphacem regem Numidarum duobus navigiis transvectus, fædus junxit. Hasdrubal Gisgonis ibi cum eo in eodem lecto adcubuit. Munus gladiatorium in honorem patris patruique Karthagini novæ edidit, non ex gladiatoriis, sed ex iis, qui aut in honorem ducis, aut ex provocatione in certamen descendebant: in quo reguli fratres de regno ferro contenderunt. Quum Astapa urbs ab Romanis obpugnaretur, oppidani liberos et conjuges rogo exstructo occiderunt, et se insuper præcipitaverunt. Ipse Scipio, dum gravi morbo implicitus est, seditionem, in parte exercitus motam, confirmatus discussit,

rebellantesque Hispaniæ populos coëgit in ditionem venire; et, amicitia facta cum Masinissa rege Numidarum, qui illi auxilium, si in Africam trajecisset, pollicebatur, cum Gaditanis quoque post discessum inde Magonis, cui ex Karthagine scriptum erat, ut in Italiam trajiceret, Romam reversus, consulque creatus. Africam provinciam petenti, contradicente Q. Fabio Maximo, Sicilia data est: permissumque, in Africam trajiceret, si ex republica esse censeret. Mago, Hamilcaris filius, a minore Bialiari insula, ubi hiemarat, in Italiam trajecit.

---

## T. LIVII PATAVINI

### LIBER XXVIII.

---

U.C. 545.  
A.C. 207.  
Res Hispaniæ.

**Q**UUM transitu Hasdrubalis, quantum in Ita-  
liam declinaverat belli, tantum levatae Hispaniæ  
viderentur; renatum ibi subito par priori bel-  
lum est. Hispanias ea tempestate sic habebant  
Romani Pœnique. Hasdrubal, Gisgonis filius, ad  
oceانum penitus Gadesque concesserat. Nostri  
maris ora omnisque ferme Hispania, qua in orien-  
tem vergit, Scipionis ac Romanæ ditionis erat.  
Novus imperator Hanno, in locum Barcini Has-  
drubalis novo cum exercitu ex Africa transgressus,  
Magonique junctus, quum in Celtiberia, quæ media  
inter duo maria est, brevi magnum hominum nu-  
merum armasset; Scipio adversus eum M. Silanum  
cum decem haud plus millibus militum, equitibus  
quingentis, misit. Silanus, quantis maximis potuit  
itineribus, (inpediebant autem et asperitates viarum,  
et angustiæ saltibus crebris, ut pleraque Hispaniæ  
sunt, inclusæ) tamen non solum nuncios, sed etiam  
famam adventus sui prægressus, ducibus indidem ex  
Celtiberia transfugis, ad hostem pervenit. Eisdem  
auctoribus compertum est, quum decem circiter  
millia ab hoste abessent, bina castra circa viam,  
qua irent, esse: læva Celtiberos, novum exercitum,  
supra novem millia hominum, dextra Punica tenere  
castra: hæc stationibus, vigiliis, omni justa militari

Silani de  
Pœnissimis  
Hispanis  
que victoria.

custodia tuta et firma esse : illa altera soluta neg- U.C. 545.  
lectaque, ut barbarorum et tironum, et minus ti- A.C. 207.  
mentium, quod in sua terra essent. Ea prius ad-  
gredienda ratus Silanus, signa quam maxime ad læ-  
vam jubebat ferri, necunde ab stationibus Punicis  
conspiceretur : ipse, præmissis speculatoribus, citato  
agmine ad hostem pergit.

II. Tria millia ferme aberat, quum haudum quisquam hostium senserat : confragosa loca et ob-  
sita virgultis tenebant colles. Ibi in cava valle, at-  
que ob id occulta, considere militem, et cibum ca-  
pere jubet : interim speculatores, transfugarum dicta  
adfirmantes, venerunt. Tum, sarcinis in medium  
conjectis, arma Romani capiunt, acieque justa in  
pugnam vadunt. Mille passuum aberant, quum ab  
hoste conspecti sunt, trepidarique repente cœptum :  
et Mago ex castris citato equo ad primum clamor-  
rem et tumultum advehitur. Erant autem in Cel-  
tibero exercitu quatuor millia scutatorum et du-  
centi equites ; hanc justam legionem (et id ferme  
roboris erat) in prima acie locat : ceteros, levem  
armaturam, in subsidiis posuit. Quum ita instruc-  
tos educeret castris, vixdum in egressos vallo Ro-  
mani pila conjecterunt. Subsidunt Hispani adversus  
emissa tela ab hoste, inde ad mittenda ipsi consur-  
gunt ; quæ quum Romani conferti, ut solent, den-  
satis exceperint scutis, tum pes cum pede conlatus,  
et gladiis geri res cœpta est. Ceterum asperitas lo-  
corum et Celtiberis, quibus in prælio concursare  
mos est, velocitatem inutilem faciebat ; et haud  
iniqua eadem erat Romanis stabili pugnæ adsuetis ;  
nisi quod angustiæ et internata virgulta ordines di-  
rimebant, et singuli binique, velut cum paribus,

U C. 545. conserere pugnam cogebantur. Quod ad fugam  
A. C. 207. impedimento hostibus erat, id ad cædem eos, velut  
vinctos, præbebat. Et jam, ferme omnibus scutatis

Celtiberorum interfectis, leve armatura et Karthaginienses, qui ex alteris castris subsidio venerant, perculti cædebantur: duo haud amplius millia peditum et equitatus omnis, vix inito prælio, eum Magone effugerunt. Hauno, alter imperator, cum eis, qui postremi, jam profligato prælio, advenabant, vivus capitur. Magonem fugientem equitatus ferme omnis, et quod veterum peditum erat secuti, decimo die in Gaditanam provinciam ad Hasdrubalem pervenerunt. Celtiberi, novus miles, in proximas dilapsi silvas, inde domos diffugerunt. Peropportuna victoria nequaquam tantum jam conflatum bellum, quanta futuri materia belli (si liceisset eis, Celtiberorum gente excita, et alios ad arma sollicitare populos) obpressa erat. Itaque, conlandato benigne Silano, Scipio spem debellandi, si nihil eam ipse eunctando moratus esset, nactus, ad id, quod reliquaum belli erat, in ultimam Hispaniam adversus Hasdrubalem pergit. Pœnus, quem castra tum forte ad sociorum animos in Bætica continendos in fide haberet, signis repente sublatis, fugæ magis, quam itineris modo, penitus ad oceum et Gades ducit. Ceterum, quoad continuisset exercitum, propositum bello se fore ratus, antequam freto Gades traiiceret, exercitum omnem passim in civitates divisit, ut et muris se ipsi, et armis muros tutarentur.

III. Scipio ubi animadvertisit, dissipatum passim bellum, et circumferre ad singulas urbes arma diutini magis, quam magni, esse operis, retro vertit.

In Bætica  
cam it  
Scipio.

iter. Ne tamen hostibus eam relinquaret regionem, U. C. 545.  
 L. Scipionem fratrem cum decem millibus peditum,  
 et mille equitum ad obpugnandam opulentissimam  
 in iis locis urbem, Oringin barbari adpellabant,<sup>A. C. 207.</sup>  
<sup>Oringis a</sup>  
<sup>L. Scipione</sup>  
<sup>captā.</sup>  
 mittit. Sita in Melessum finibus est Hispanæ gen-  
 tis : ager frugifer : argentum etiam incolæ fodunt :  
 ea arx fuit Hasdrubali ad excursiones circa in me-  
 diterraneos populos faciendas. Scipio, castris prope  
 urbem positis, priusquam circumvallaret urbem, mi-  
 sit ad portas, qui ex propinquo adloquio animos ten-  
 tarent, suaderentque, ut amicitiam potius, quam vim,  
 experirentur Romanorum. Ubi nihil pacati respon-  
 debatur, fossa duplique vallo circumdata urbe, in  
 tres partes exercitum dividit : ut una semper pars,  
 quietis interim duabus, obpugnaret. Prima pars  
 quum adorta obpugnare est, atrox sane et anceps  
 prælium fuit : non subire, non scalas ferre ad mu-  
 ros præ incidentibus telis facile erat : et jam, qui  
 erexerant ad murum scalas, alii furcis ad id ipsum  
 factis detrucebantur, in alios lupi superne ferrei in-  
 jecti, ut in periculo essent, ne suspensi in murum  
 extraherentur : quod ubi animadvertisit Scipio, nimia  
 paucitate suorum exæquatum certamen esse, et jam  
 eo superare hostem, quod ex muro pugnaret ; dua-  
 bus simul partibus, prima recepta, urbem est ad-  
 gressus. Quæ res tantum pavoris injectit fassis jam  
 cum primis pugnando, ut et oppidanæ mœnia repen-  
 tina fuga desererent : et Punicum præsidium metu,  
 ne prodita urbs esset, relictis stationibus in unum se-  
 conligeret. Timor inde oppidanos incessit, ne, si  
 hostis urbem intrasset, sine discrimine, Poenus an  
 Hispanus esset, obvii passim cæderentur : itaque,  
 patefacta repente porta, frequentes ex oppido sese

**U.C. 545.** ejecerunt, scuta præ se tenentes, ne tela procul con-  
**A. C. 207.** jicerentur; dextras nudas ostentantes, ut gladios abjecisse adpareret: id utrum parum ex intervallo sit conspectum, an dolus aliquis suspectus fuerit, incomptum est. Inpetus hostilis in transfugas factus: nec secus, quam adversa acies, cæsi. Eademque porta signa infesta in urbem inlata: et aliis partibus securibus dolabrisque cædebantur et refrin-gebantur portæ, et, ut quisque intraverat eques, ad forum occupandum (ita enim præceptum erat) ci-tato equo pergebat. Additum erat et triariorum equiti præsidium: legionarii ceteras partes perva-dunt: direptione et cæde obviorum, nisi qui armis se tuebantur, abstinuerunt. Karthaginienses om-nes in custodiam dati sunt: oppidanorum quoque trecenti ferme, qui clauiserant portas: ceteris tradi-tum oppidum, suæ redditæ res. Cecidere in urbis ejus obpugnatione hostium duo millia ferme; Ro-manorum haud amplius nonaginta.

IV. Læta et ipsis, qui rem gessere, urbis ejus ex-pugnatio fuit, et imperatori ceteroque exercitu; et speciosum adventum suum, ingentem turbam capti-vorum præ se agentes, fecerunt. Scipio, conlau-dato fratre, quum, quanto poterat verborum honore, Karthagini ab se captæ captam ab eo Oringin æ-quasset, quia et hiems instabat, ut nec tentare Ga-des, nec disjectum passim per provinciam exercitum Hasdrubalis consecitari posset, in citeriorem His-paniam omnes suas copias reduxit: dimissisque in hi-berna legionibus, L. Scipione fratre Romam misso, et Hannone hostium imperatore, ceterisque nobili-bus captivis, ipse Tarragonem concessit. Eodem anno classis Romana, cum M. Valerio Lævino pro-

consule ex Sicilia in Africam transmissa, in Uticensi U. C. 545.  
 Karthaginiensique agro late populationes fecit : ex-  
 tremis finibus Karthaginiensium circa ipsa mœnia  
 Uticæ prædæ actæ sunt. Repetentibus Siciliam  
 classis Punica (septuaginta erant longæ naves) ob-  
 currit : decem et septem naves ex iis captæ sunt,  
 quatuor in alto mersæ : cetera fusa ac fugata clas-  
 sis. Terra marique victor Romanus cum magna  
 omnis generis præda Lilybæum repetit. Toto inde  
 mari pulsis hostium navibus, magni commeatus fru-  
 menti Romam subvecti.

V. Principio æstatis ejus, qua hæc sunt gesta, P. Res Græ-  
 Sulpicius proconsul et Attalus rex quum Æginæ  
 (sicut ante dictum est) hibernassent, Lemnum inde,  
 classe juncta, Romanæ quinque et viginti quinque-  
 remes, regiæ quinque et triginta, transmiserunt. Et  
 Philippus, ut, seu terra seu mari obviam eundum  
 hosti foret, paratus ad omnes conatus esset, ipse  
 Demetriadem ad mare descendit : Larissam diem ad  
 conveniendum exercitui edixit. Undique ab sociis  
 legationes Demetriadem ad famam regis convene-  
 runt. Sustulerant enim animos Ætolii, quum ab  
 Romana societate, tum post Attali adventum, fini-  
 timosque depopulabantur : nec Acarnanes solum  
 Bœotique, et qui Eubœam incolunt, in magno metu  
 erant : sed Achæi quoque, quos super Ætolicum  
 bellum Machanidas etiam Lacedæmonius tyrannus,  
 haud procul Argivorum fine positis castris, terre-  
 bat : hi omnes suis quisque urbibus, quæ pericula  
 terra marique portendebantur, memorantes, auxilia  
 regem orabant. Ne ex regno quidem ipsius tran-  
 quillæ nunciabantur res : et Scerdilædum Pleura-  
 tumque motos esse, et Thracum maxime Mædos, si

A. C. 207.

**U.C. 545.** quod longinquum bellum regem occupasset, proxima  
**A.C. 207.** Macedoniae incursuros. Bœoti quidem et interiores

Græciæ populi, Thermopylarum saltum, ubi angustæ fauces coartant iter, fossa valloque intercludi ab Ætolis, nunciabant, ne transitum ad sociorum urbes tuendas Philippo darent. Vel segnem ducem tot excitare tumultus circumfusi poterant. Legationes dimittit, pollicitus, prout tempus ac res se daret, omnibus laturum se auxilium: in præsentia, quæ maxime urgebat res, Peparethum præsidium urbi mittit; unde adlatum erat, Attalum, ab Lemno classe transmissa, omnem circa urbem agrum depopulatum. Polyphantam cum modica manu in Bœotiam, Menippum item quemdam ex regiis ducibus cum mille peltastis (pelta cætræ hand dissimilis est) Chalcidem mittit: additi quingenti Agrianum, ut omnes insulæ partes tueri possent: ipse Scotussam est profectus: eodemque ab Larissa Macedonum copias traduci jussit. Eo nunciatum est, concilium Ætolis Heracleam indictum, regemque Attalum, ad consultandum de summa belli, venturum. Hunc conventum ut turbaret subito adventu, magnis itineribus Heracleam duxit: et concilio quidem dismisso jam venit; segetibus tamen, quæ prope matritatem erant, maxime in sinu Ænianum vastatis, Scotussam copias reducit. Ibi exercitu omni relicto, cum cohorte regia Demetriadem sese recipit. Inde ut ad omnes hostium motus posset obcurrere, in Phocidein, atque Eubœam, et Peparethum mittit, qui loca alta eligerent, unde editi ignes adparerent: ipse in Tisæo (mons est in altitudinem ingentem cacuminis editi) speculam posuit: ut ignibus procul sublatis signum, ubi quid molirentur hostes, mo-

Philippus  
socios hor-  
tatur ac  
tuetur.

mento temporis acciperet. Romanus imperator et U. C. 545.  
 Attalus rex a Peparetho Nicæam trajecerunt: inde A. C. 207.  
 classem in Eubœam ad urbem Oreum transmittunt:  
 quæ ab Demetriaco sinu Chalcidem et Euripum pe-  
 tenti ad lœvam prima urbium Eubœæ posita est.  
 Ita inter Attalum ac Sulpicium convenit, ut Ro-  
 mani a mari, regii a terra obpugnarent.

VI. Quatriduo post, quam adpulsa classis est, Oreum ca-  
 urbem adgressi sunt: id tempus occultis cum Pla- piunt Ro-  
 tore, qui a Philippo præpositus urbi erat, conlo- mani.  
 quiis absumtum est. Duas arcas urbs habet, unam  
 inminentem mari, altera urbis media est: cuniculo  
 inde via ad mare dicit, quam a mari turris quinque  
 tabulariorum, egregium propugnaculum, claudebat.  
 Ibi primo atrocissimum contractum est certamen,  
 et turre instructa omni genere telorum, et tormentis  
 machiniisque ad obpugnandam eam ex navibus ex-  
 positis. Quum omnium animos oculosque id certa-  
 men avertisset, porta maritimæ arcis Plator Roma-  
 nos accepit, momentoque arx occupata est. Oppi-  
 dani, pulsi inde in medium urbem, ad alteram ten-  
 dere arcem. Et ibi positi erant, qui fores portæ  
 objicerent: ita exclusi in medio cæduntur capiun-  
 turque. Macedonum præsidium congregatum sub  
 arcis muro stetit; nec fuga effuse petita, nec per-  
 tinaciter prælio inito. Eos Plator, venia a Sulpicio  
 inpetrata, in naves inpositos ad Demetrium Phthio-  
 tidis exposuit: ipse ad Attalum se recepit. Sul-  
 picius, tam facili ad Oreum successu elatus, Chalci- Chalcidem  
 dem inde protinus victri classe petit: ubi haud- frustra ten-  
 quaquam ad spem eventus respondit. Ex patenti tant.

U. C. 545. buerit : sed haud facile alia infestior classi statio  
 A. C. 207. est : nam et venti ab utriusque terræ præaltis montibus subiti ac procellosi se dejiciunt, et fretum ipsum Euripi non septies die, sicut fama fert, temporibus statis reciprocatur : sed temere in modum venti, nunc huc, nunc illuc verso mari, velut monte præcipiti devolutus torrens rapitur : ita nec nocte, nec die quies navibus datur. Quum classem tam infesta statio accepit, tum et oppidum, alia parte clausum mari, alia ab terra egregie munitum, præsidioque valido firmatum, et præcipue fide præfectorum principumque, quæ fluxa et vana apud Oreum fuerat, stabile atque inexpugnabile fuit. Id prudenter, ut in temere suscepta re, Romanus fecit, quod, circumspectis difficultatibus, ne frustra tempus tereret, celeriter abstitit incepto, classemque inde ad Cynum Locridis (emporium id est urbis Opuntiorum mille passuum a mari sitæ) trajecit.

VII. Philippum et ignes ab Oreo editi monuerant, sed serius Platoris fraude e specula elati : et inpari maritimis viribus haud facilis erat in insulam classi accessus : ita res per eunctationem omissa. Ad Chalcidis auxilium, ubi signum accepit, impiger est motus : nam et ipsa Chalcis, quamquam ejusdem insulæ urbs est, tamen adeo arto interscinditur freto, ut ponte continentij jungatur, terraque aditum faciliorem, quam mari, habeat. Igitur Philippus, dejecto præsidio, fusisque Ætolis, qui saltum Thermopilarum insidebant, quum ab Demetriade Scotussam, inde de tertia vigilia profectus, trepidos hostes Heracleam compulisset, ipse uno die Phocidis Elatiam millia amplius sexaginta contendit. Eodem ferme die ab Attalo rege Opuntiorum urbs

Opuntiorum urbs  
capta ab  
Attalo.

capta diripiebatur: concesserat eam prædam regi U. C. 545.  
Sulpicius, quia Oreum paucos ante dies ab Romano  
milite, expertibus regiis, direptum fuerat. Quum  
Romana classis eo se recepisset, Attalus, ignarus  
adventus Philippi, pecuniis a principibus exigendis  
terebat tempus: adeoque improvisa res fuit, ut, nisi  
Cretensium quidam, forte pabulatum ab urbe lon-  
gius progressi, agmen hostium procul conspexissent,  
obprimi potuerit. Attalus inermis atque incompo- Attalus fere  
situs cursu effuso mare ac naves petit: et molienti- a Philippo  
bus ab terra naves Philippus supervenit, tumultum- obpresso.  
que etiam ex terra nauticis præbuit: inde Opuntem  
rediit, Deos hominesque accusans, quod tantæ rei  
fortunam ex oculis prope raptam amisisset. Opun-  
tii quoque ab eadem ira increpiti, quod, quum tra-  
here obsidionem in adventum suum potuissent, viso  
statim hoste, prope in voluntariam ditionem con-  
cessissent. Compositis circa Opuntem rebus, To-  
ronem est profectus. Et Attalus primo Oreum se  
recepit: inde, quum fama accidisset, Prusiam Bi-  
thyniæ regem in fines regni sui transgressum, omis-  
sis rebus atque Ætolico bello, in Asiam trajecit.  
Et Sulpicius Æginam classem recepit, unde initio  
veris profectus erat. Haud majore certamine, quam  
Opuntem Attalus ceperat, Philippus Toronem cepit.  
Incolebant urbem eam profugi ab Thebis Phthioti-  
cis: urbe sua capta a Philippo, quum in fidem  
Ætolorum perfugissent, sedem eis Ætolii eam dede-  
rant, urbis vastatæ ac desertæ priore ejusdem Phi-  
lippi bello. Tum ab Torone, sicut paullo ante dic-  
tum est, recepta profectus, Tritonon et Drymas,  
Doridis parva atque ignobilia oppida, cepit: inde  
Elatiam, jussis ibi se opperiri Ptolemæi Rhodio-

U.C. 545. rumque legatis, venit. Ubi quum de finiendo Ætolo-  
A.C. 207. lico bello ageretur, (adfuerant enim legati nuper  
Machani- Heracleæ concilio Romanorum Ætolorumque) nun-  
das repres- cius adfertur, Machanidam Olympiorum sollemnè  
sus.

ludicrum parantes Eleos adgredi statuisse. Præver-  
tendum id ratus, legatis cum benigno responso di-  
missis, se neque caussam ejus belli fuisse, nec moram  
(si modo æqua et honesta conditione liceat) paci fac-  
turum, cum expedito agmine profectus per Bœotia-  
m, Megara, atque inde Corinthum descendit: unde,  
commeatibus sumtis, Phliunta Pheneumque petit.  
Et jam, quum Heræam venisset, audito, Machani-  
dam, fama adventus sui territum, refugisse Lacedæ-  
monem, Ægium se ad concilium Achæorum rece-  
pit: simul classem Punicam, ut mari quoque ali-  
quid posset, adcitam, ibi ratus se inventurum. Pau-  
cis ante diebus in Phœceas trajecerant Pœni: inde  
portus Acarnanum petierant, quum ab Oreo pro-  
fectum Attalum Romanosque audissent, veriti ne  
ad se iretur, et intra Rhium (fauces eæ sunt Co-  
rinthii sinus) obprimerentur.

VIII. Philippus mœrebat quidem et angebatur,  
quum ad omnia ipse raptim isset, nulli tamen se rei  
in tempore obcurrisse, et rapientem omnia ex oculis  
elusisse celeritatem suam fortunam. In concilio au-  
tem, dissimulans ægritudinem, elato animo disse-  
ruit: testatus Deos hominesque, se nullo loco, nec  
tempore defuisse, quin, ubi hostium arma concrepuis-  
sent, eo, quanta maxima posset celeritate, tenderet:  
sed vix rationem iniri posse, utrum ab se audacius, an  
fugacius ab hostibus geratur bellum. Sic ab Opunte  
Attalum, sic Sulpicium a Chalcide, sic eis ipsis diebus  
Machanidam e manibus suis elapsum. Sed non semper

*felicem esse fugam : nec pro difficulti id bellum haben-* U. C. 545.  
*dum, in quo, si modo congressus cum hostibus sis, vice-* A. C. 207.  
*ris. Quod primum esset, confessionem se hostium ha-*  
*bere, nequaquam pares esse sibi : brevi et victorian*  
*haud dubiam habiturum, nec meliore eventu eos secum,*  
*quam spe, pugnaturos. Læti regem socii audierunt.*  
Reddidit inde Achæis Heræam et Triphyliam. Ali-  
pheram autem Megalopolitis, quod suorum fuisse  
finium satis probabant, restituit : inde, navibus ac-  
ceptis ab Achæis, (erant autem tres quadriremes et  
biremes totidem) Anticyram trajecit : inde quin-  
queremibus septem, et lembis viginti amplius, quos,  
ut adjungeret Karthaginiensium classi, niserat in  
Corinthium sinum, profectus ad Erythras Ætolor-  
um, quæ prope Eupalium sunt, exseusionem fecit.  
Haud fefellit Ætolos : nam, hominum quod aut in  
agris, aut in propinquis castellis Potidaniæ atque  
Apolloniæ fuit, in silvas montesque refugit. Pe-  
cora, quæ inter festinationem abigi nequierant, sunt  
direpta et in naves compulsa. Cum his ceteraque  
præda, Nicia prætore Achæorum Ægium misso,  
quum Corinthum petisset, pedestres inde copias per  
Boëtiā terra duci jussit : ipse, ab Cenchreis præ-  
ter terram Atticam super Sunium navigans, inter  
medias prope hostium classes, Chalcidem pervenit :  
inde, conlaudata fide ac virtute, quod neque timor,  
neque spes flexissent eorum animos ; hortatusque  
in posterum, ut eadem constantia permanerent in  
societate, si suam, quam Oritanorum atque Opun-  
tiorum, fortunam mallent ; ab Chalcide Oreum na-  
vigator, principumque iis, qui fugere capta urbe,  
quam se Romanis tradere, maluerant, summa re-  
rum et custodia urbis permissa, ipse Demetriadēm

U. C. 545. ab Eubœa, unde primo ad opem ferendam sociis  
A. C. 207<sup>o</sup>. prefectus erat, trajecit. Cassandreae deinde centum  
navium longarum carinis positis, contractaque ad  
effectum ejus operis multitudine fabrorum navalium,  
quia res in Græcia tranquillas et prefectio Attali  
fecerat, et in tempore laborantibus sociis latum ab  
• se auxilium, retro in regnum concessit, ut Dardanis  
bellum inferret.

IX. Extremo æstatis ejus, qua hæc in Græcia  
gesta sunt, quum Q. Fabius Maximi filius legatus  
ab M. Livio consule Români ad senatum nuncias-  
set, consulem satis præsidii Galliæ provinciæ cre-  
dere L. Porciū cum suis legionibus esse: dece-  
dere se inde, ac deduci exercitum consularem posse;  
Patres non M. Livium tantum redire ad urbem, sed  
collegam quoque ejus C. Claudiū jussérunt. Id  
modo in decreto interfuit, quod M. Livii exercitum  
reduci, Neronis legiones Hannibali obpositas ma-  
nere in provincia jussérunt. Inter consules ita pér  
literas convenit, ut, quemadmodum uno animo rem-  
publicam gessissent, ita, quamquam ex diversis re-  
gionibus convenienter, uno tempore ad urbem ac-  
cederent. Prænesti qui prior venisset, collegam ibi  
opperiri jussus. Forte ita evenit, ut eodem die  
ambo Prænesti venirent: inde præmisso edicto, ut  
triduo post frequens senatus ad ædem Bellonæ ades-  
set, omni multitudine obviam effusa, ad urbem ac-  
cessere. Non salutabant modo universi circumfusi,  
sed, contingere pro se quisque victrees dextras con-  
sulum cupientes, alii gratulabantur, alii gratias age-  
bant, quod eorum opera incolumis res publica esset.  
In senatu quum more omnium imperatorum, expo-  
sit is rebus ab se gestis, postulassent, ut, pro re-

publica fortiter feliciterque administrata, et Diis in- U.C. 545.  
mortalibus haberetur honos, et ipsis triumphantibus A.C. 207.  
urbem inire liceret; Se vero ea, quæ postularent, de-  
cernere, Patres, merito Deorum primum, dein, secun-  
dum Deos, consulum, responderunt; et supplicatione  
amborum nomine, et triumpho utriusque decreto, in-  
ter ipsos, ne, quumi bellum communi animo gessis-  
sent, triumphum separarent, ita convenit: ut, quo- Consulum  
niam et in provincia M. Livii res gesta esset, et eo die, triumphus.  
quo pugnatum foret, ejus forte auspicium fuisse, et  
exercitus Livianus deductus Romam venisset, Neronis  
deduci non potuisset de provincia, ut M. Livium,  
quadrigis urbem ineuntem, milites sequerentur; C.  
Claudius equo sine militibus invehetur. Ita conso-  
ciatus triumphus, quum utriusque, tum magis ei, qui,  
quantum merito anteibat, tantum honore collegæ  
cesserat, gloriam auxit: illum equitem aiebant sex  
dierum spatio transcurrisse longitudinem Italæ: et eo  
die cum Hasdrubale in Gallia signis conlatis pugnasse,  
quo eum castra adversus sese in Apulia posita habere  
Hannibal credidisset. Ita unum consulem pro utraque  
parte Italæ adversus duos duces, duos imperatores,  
hinc consilium suum, hinc corpus obposuisse. Nonen  
Neronis satis fuisse ad continentum castris Hanniba-  
lem: Hasdrubalem vero, qua alia re, quam adventu  
ejus, obrutum atque extinctum esse? Itaque iret alter  
consul sublimis curru multijugis, si vellet, equis. Uno  
equo per urbem verum triumphum vehi: Neronemque,  
etiam si pedes incedat, vel parta eo bello, vel spreta eo  
triumpho gloria, memorabilem fore. Hi sermones  
spectantium Neronem usque in Capitolium prose-  
cuti sunt. Pecuniam in ærarium tulerunt sester-  
tiū tricies, octoginta millia æris: militibus M.

**U.C. 545.** Livius quinquagenos senos asses divisit: tantum-  
**A.C. 207.** dem C. Claudius absentibus militibus suis est pol-  
 licitus, quum ad exercitum redisset. Notatum, eo  
 die plura carmina militaribus jocis in C. Claudium,  
 quam in consulem suum, jactata. Equites L. Ve-  
 turium et Q. Cæciliū legatos magnis tulisse laudi-  
 bus, hortatosque esse plebem, ut eos consules in  
 proximum annum crearent: adjecisse equitum præ-  
 rogativæ auctoritatē consules, postero die in con-  
 cione, quam forti fidelique duorum præcipue legato-  
 rum opera usi essent, commemorantes.

X. Quum comitiorum tempus adpeteret, et per  
 dictatorem comitia haberi placuissest, C. Claudius  
 consul M. Livium collegam dictatorem dixit: Li-  
 vius Q. Cæciliū magistrum equitum: a M. Livio  
 dictatore creati consules L. Veturius, Q. Cæcilius;  
 is ipse, qui tum erat magister equitum. Inde præ-  
 torum comitia habita: creati C. Servilius, M. Cæ-  
 cilius Metellus, Ti. Claudius Asellus, Q. Mamilius  
 Turinus, qui tum ædilis plebis erat. Comitiis per-  
 fectis, dictator, magistratu abdicato, dimissoque ex-  
 exercitu, in Etruriam provinciam ex senatusconsulto  
 est profectus ad quæstiones habendas: qui Etrusco-  
 rum Umbrorumve populi defectionis ab Romanis  
 ad Hasdrubalem sub adventum ejus consilia agitas-  
 sent, quique cum auxiliis, aut commeatu, aut ope  
 aliqua juvissent. Hæc eo anno domi militæque  
 gesta. Ludi Romani ter toti instaurati ab ædilibus  
 curulibus, Cn. Servilio Cæpione, Ser. Cornelio  
 Lentulo. Item ludi plebeii semel toti instaurati ab  
 ædilibus plebis, M. Pomponio Mathone, et Q. Ma-  
 milio Turino. Tertiodecimo anno Punici belli, L.  
 Veturio Philone et Q. Cæcilio Metello consulibus,

Brutti<sup>i</sup> ambobus, ut cum Hannibale bellum gere- U. C. 545.  
 rent, provincia decreta. Prætores exinde sortiti A. C. 207.  
 sunt: M. Cæcilius Metellus urbanam, Q. Mamilius  
 peregrinam, C. Servilius Siciliam, Ti. Claudius Sar-  
 diniam. Exercitus ita divisi: consulm alteri, quem  
 C. Claudius prioris anni consul, alteri, quem Q.  
 Claudius proprætor (eæ binæ legiones erant) ha-  
 buissent exercitum: in Etruria duas volonum le-  
 giones a C. Terentio proprætore M. Livius pro-  
 consul, cui prorogatum in annum imperium erat,  
 acciperet: et Q. Mamilio, ut, collegæ jurisdictione  
 tradita, Galliam cum exercitu, cui L. Porcius pro-  
 prætor præfuerat, obtineret, decretum est: jussus-  
 que populari agros Gallorum, qui ad Pœnos sub ad-  
 ventum Hasdrubalis defecissent. C. Servilio cum  
 Cannensibus duabus legionibus, sicut C. Mamilius  
 tenuerat, Sicilia tuenda data. Ex Sardinia vetus  
 exercitus, cui A. Hostilius præfuerat, deportatus:  
 novam legionem, quam Ti. Claudius trajiceret se-  
 cum, consules conscripserunt. Q. Claudio, ut Ta-  
 rentum, C. Hostilio Tubulo, ut Capuam provin-  
 ciam haberet, prorogatum in annum imperium est.  
 M. Valerius proconsul, qui tuendæ circa Siciliam  
 maritimæ oræ præfuerat, triginta navibus C. Servilio  
 præbitis, cum cetera omni classe redire ad urbem  
 jussus.

XI. In civitate tanto discrimine belli sollicita,  
 quum omnium secundorum adversorumque caussas  
 in Deos verterent, multa prodigia nunciabantur;  
 Tarracinae Jovis ædem, Satrici Matris Matutæ de-  
 cœlo tactam. Satricanos haud minus terrebant in  
 ædem Jovis foribus ipsis duo perlapsi angues. Ab  
 Antio nunciatum est, cruentas spicas metentibus

U.C. 546. visas esse. Cære porcus biceps, et agnus mas idem-  
A. C. 206. que femina natus erat. Et Albæ duo soles visos  
referebant: et nocte Fregellis lucem obortam. Et  
bos in agro Romano locutus, et ara Neptuni multo  
sudore manasse in circo Flaminio dicebatur: et  
ædes Cereris, Salutis, Quirini de cœlo tactæ. Pro-  
digia consules hostiis majoribus procurare jussi,  
et supplicationem unum diem habere. Ea ex se-  
natusconsulto facta. Plus omnibus aut nunciatis  
peregre, aut visi domi prodigiis, terruit animos ho-  
minum ignis in æde Vestæ extinctus: cæsaque fla-  
gro est Vestalis, cuius custodia noctis ejus fuerat,  
jussu P. Licinii pontificis. Id quamquam, nihil  
portendentibus Deis, ceterum negligentia humana  
acciderat, tamen et hostiis majoribus procurari, et  
supplicationem ad Vestæ haberi placuit. Prius-  
quam proficiserentur consules ad bellum, moniti  
ab senatu sunt, *ut in agros reducendæ plebis curam*  
*haberent.* *Deūm benignitate submotum bellum ab*  
*urbe Romana et Latio esse, et posse sine metu in agris*  
*habitari.* *Minime convenire, Siciliæ, quam Italiae,* co-  
lendæ majorem curam esse. Sed res haudquaquam  
erat populo facilis, et liberis cultoribus bello absum-  
tis, et inopia servitiorum, et pecore direpto, villis-  
que dirutis aut incensis: magna tamen pars aucto-  
ritate consulum compulsa in agros remigravit. Mo-  
verant autem hujusce rei mentionem Placentinorum  
et Cremonensium legati, querentes, agrum suum ab  
adcolis Gallis incursti ac vastari, magnamque par-  
tem colonorum suorum dilapsam esse, et infrequen-  
tes se urbes, agrum vastum ac desertum habere.  
Mamilio prætori mandatum, ut colonias ab hoste  
tueretur. Consules ex senatusconsulto edixerunt,

nt, qui cives Cremonenses atque Placentini essent, U. C. 546.  
ante certam diem in colonias reverterentur: prin- A. C. 206.  
cipio deinde veris et ipsi ad bellum profecti sunt.  
Q. Cæcilius consul exercitum ab C. Nerone, L. Ve-  
turius ab Q. Claudio proprætore accepit, novisque  
militibus, quos ipse conscriperat, supplevit. In  
Consentinum agrum consules exercitum duxerunt,  
passimique depopulati, quum agmen jam grave præ-  
da esset, in saltu angusto a Bruttis jaculatoribus-  
que Numidis turbati sunt; ita ut non præda, sed  
armati quoqne in periculo fuerint: major tamen  
tumultus, quam pugna fuit: et præmissa præda,  
incolumes et legiones in loca tuta evasere. Inde in  
Lucanos profecti: ea sine certamine tota gens in  
ditionem populi Romani rediit.

XII. Cum Hannibale nihil eo anno rei gestum est: nam neque ipse se obtulit in tam recenti vul-  
nere publico privatoque, neque lacessierunt quietum  
Romani: tantam inesse vim, etsi omnia alia circa  
eum ruerent, in uno illo duce censebant. Ac ne- Laus Han-  
scio, an mirabilior adversis, quam secundis rebus,  
fuerit: quippe qui, quum et in hostium terra per nibalis.  
annos tredecim, tam procul ab domo, varia fortuna  
bellum gereret exercitu non suo civili, sed mixto ex  
conluvione omnium gentium, quibus non lex, non  
mos, non lingua communis; aliis habitus, alia ves-  
tis, alia arma, alii ritus, alia sacra, alii prope Dei  
essent; ita quodam uno vinculo copulaverit eos, ut  
nulla nec inter ipsos, nec adversus ducem seditio  
extiterit; quum et pecunia sæpe in stipendum, et  
commeatus in hostium agro deessent: quorum in-  
opia priore Punico bello multa infanda inter du-  
ces militesque commissa fuerant. Post Hasdrubalis

U. C. 546. vero exercitum cum duce, in quibus spes omnis re-  
A. C. 206.

posita victoriæ fuerat, deletum, cedendoque in an-  
gulum Bruttium cetera Italia concessum, cui non  
videatur mirabile, nullum motum in castris factum?  
nam ad cetera id quoque accesserat, ut ne alendi  
quidem exercitus, nisi ex Bruttio agro, spes esset;  
qui, ut omnis coleretur, exiguis tamen tanto alendo  
exercitui erat; tum magnam partem juventutis ab-  
stractam a cultu agrorum bellum occupaverat, et  
mos vitio etiam insitus genti per latrocinia militiam  
exercendi: nec ab domo quidquam mittebatur, de  
Hispania retinenda sollicitis, tamquam omnia pros-  
pera in Italia essent. In Hispania res quadam ex  
parte eamdem fortunam, quadam longe disparem  
habebant: eamdem, quod prælio victi Karthagini-  
enses, duce amisso, in ultimam Hispaniæ oram us-  
que ad Oceanum compulsi erant: disparem autem,  
quod Hispania, non quam Italia modo, sed quam  
ulla pars terrarum, bello reparando aptior erat, lo-  
corum hominumque ingenii: itaque ergo prima  
Romanis inita provinciarum, quæ quidem continen-  
tis sint, postrema omnium, nostra demum ætate,  
ductu auspicioque Augusti Cæsaris, perdomita est.  
Ibi tum Hasdrubal Gisgonis, maximus clarissimus-  
que eo bello secundum Barcinos dux, regressus ab

Hasdrubal Gadibus, rebellandi spem adjuvante Magone Ha-  
cum Magone bel- milcaris filio, delectibus per ulteriorem Hispaniam  
lum in- habitis, ad quinquaginta millia peditum, et quatuor  
staurat. millia et quingentos equites armavit. De equestri-  
bus copiis ferme inter auctores convenit: peditum  
septuaginta millia quidam adducta ad Silpiam urbem  
scribunt. Ibi super campos patentes duo duces Pœni  
ea mente, ne detractarent certamen, consederunt.

XIII. Scipio, quum ad eum fama tanti comparati U. C. 546.  
 exercitus perlata esset, neque Romanis legionibus A. C. 206.  
 tantæ se parem fore multitudini ratus, ut non in  
 speciem saltem obponerentur barbarorum auxilia,  
 neque in iis tamen tantum virium ponendum, ut  
 mutando fidem, quæ clavis causa fuisset patri pa-  
 truoque, magnum momentum facerent, præmisso  
 Silano ad Colcham, duodetriginta oppidis regnan-  
 tem, ut equites peditesque ab eo, quos se per hie-  
 mem conscripturum pollicitus erat, acciperet, ipse  
 ab Tarracone profectus, protinus ab sociis, qui ad-  
 colunt viam, modica contrahendo auxilia, Castulo-  
 nem pervenit. Eo adducta ab Silano auxilia, tria  
 millia peditum et quingenti equites: inde ad Bæcu-  
 lam urbem progressus omni exercitu civium, socio-  
 rum, peditum equitumque quinque et quadraginta  
 millibus. Castra ponentes eos Mago et Masinissa  
 cum omni equitatū adgressi sunt: turbassentque  
 munientes, ni abditi post tumulum, opportune ad  
 id positum, ab Scipione equites improviso in effusos  
 incurrisserint. Hi promptissimum quemque, et proxime  
 vallum, atque in ipsos munitores primum invec-  
 tum, vixdum prælio inito, fuderunt: cum ceteris,  
 qui sub signis atque ordine agminis incesserant,  
 longior et diu ambigua pugna fuit: sed quum ab  
 stationibus primum expeditæ cohortes, deinde ex  
 opere deducti milites, atque arma capere jussi plures  
 et integri fessis, magnumque jam agmen armatorum  
 a castris in prælinum rueret, terga haud dubie ver-  
 tunt Pœni Numidæque. Et primo turmatim abi-  
 bant, nihil propter pavorem festinationemve confu-  
 sis ordinibus: dein, postquam acrius ultimis incide-  
 bat Romanus, neque sustineri inpetus poterat, nihil

Scipioauxi-  
lia ab sociis  
contrahit.

U.C. 546. jam ordinum memores, passim, qua cuique proximum fuit, in fugam effunduntur. Et quamquam eo  
A.C. 206. prælio aliquantum et Romanis aucti et deminuti hostibus animi erant, tamen numquam aliquot in sequentes dies ab excursionibus equitum levisque armaturæ cessatum est.

XIV. Ubi satis tentatæ per hæc levia certamina vires sunt, prior Hasdrubal in aciem copias eduxit; deinde et Romani processere: sed utraque acies pro vallo stetit instructa: et quum ab neutrīs pugna cœpta esset, jam die ad occasum inclinante, a Pœno prius, deinde ab Romano in castra copiæ reductæ. Hoc idem per dies aliquot factum: prior semper Pœnus copias castris educebat; prior fassis stando signum receptui dabat: ab neutra parte procursum, telumve missum, aut vox ulla orta: mediam aciem hinc Romani, illinc Karthaginienses mixti Afris, cornua socii tenebant; erant autem utrimque Hispani pro cornibus: ante Punicam aciem elephantí castellorum procul speciem præbebant. Jam hoc in utrisque castris sermonis erat, ita, ut instructi stetissent, pugnaturos: medias acies Romanum Pœnumque, quos inter belli caussa esset, pari robore animorum armorumque concursuros. Scipio ubi hæc obstinate credita animadvertisit, omnia de industria in eum diem, quo pugnaturus erat, mutavit. Tesseram vesperi per castra dedit, ut ante lucem viri equique curati et pransi essent: armatus eques frenatos instratosque teneret equos. Vixdum satis certa luce, equitatum omnem cum levi armatura in stationes Punicas innisit: inde confestim ipse cum gravi agmine legionum procedit, præter opinionem destinatam suorum hostiumque, Romano milite cor-

nibus firmatis, sociis in medium aciem acceptis. U.C. 546.  
 Hasdrubal, clamore equitum excitatus, ut ex tabernaculo prosiluit, tumultumque ante vallum et trepidationem suorum, et procul signa legionum fulgentia, plenosque hostium campos vidi, equitatum omnem extemplo in equites emittit: ipse cum peditum agmine castris egreditur: nec ex ordine solito quidquam acie instruenda mutat. Equitum jam diu an-  
 ceps pugna erat: nec ipsa per se decerni poterat, quia pulsis (quod prope in vicem fiebat) in aciem peditum tutus receptus erat: sed ubi jam haud plus quingentos passus acies inter sese aberant, signo receptui dato, Scipio, patefactisque ordinibus, equitatum omnem levemque armaturam, in medium acceptam divisamque in partes duas, in subsidiis post cornua locat. Inde, ubi incipiendæ jam pugnæ tempus erat, Hispanos (ea media acies fuit) presso gradu incedere jubet: ipse e dextro cornu (ibi namque præerat) nuucium ad Silanum et Marcium mittit, ut cornu extenderent in sinistra parte, quemadmodum se tendentem a dextra vidissent: et cum expeditis peditum equitumque prius pugnam consererent cum hoste, quam coire inter se mediæ acies possent. Ita diductis cornibus, cum ternis peditum cohortibus, ternisque equitum turmis, ad hoc velitibus, citato gradu in hostem ducebant, sequentibus in obliquum aliis. Sinus in medio erat, quia segnius Hispanorum signa incedebant: et iam conflixerant cornua, quum, quod roboris in acie hostium erat, Pœni veterani Afrique nondum ad teli conjectum venissent, neque in cornua, ut adjuvarent pugnantes, discurrere auderent, ne aperirent medium aciem venienti ex adverso

U. C. 546. hosti. Cornua ancipiti prælio urgebantur: eques,  
 A. C. 206. levisque armatura, velites, circumductis alis in la-  
 tera incurrebant; cohortes a fronte urgebant, ut  
 abrumperent cornua a cetera acie.

XV. Et quum ab omni parte haudquaquam par  
 pugna erat, tum quod turba Baliarium tironumque  
 Hispanorum Romano Latinoque militi objecta erat,  
 et, procedente jam die, vires etiam deficere Hasdrubal  
 exercitum cœperant, obpressos matutino tu-  
 multu coactosque, priusquam cibo corpora firma-  
 rent, raptim in aciem exire. Ad id sedulo diem  
 extraxerat Scipio, ut sera pugna esset: nam ab  
 septima demum hora peditum signa cornibus incu-  
 currerunt: ad medias acies aliquanto serius pervenit  
 pugna: ita ut prius æstus a meridiano sole, labor-  
 que standi sub armis, et simul fames sitisque cor-  
 pora adficerent, quam manus cum hoste consererent.  
 Itaque steterunt scutis innisi: nam super cetera  
 elephanti etiani, tumultuoso genere pugnæ equitum  
 velitumque et levis armaturæ consternati, e corni-  
 bus in medium aciem sese intulerant. Fessi igitur  
 corporibus animisque retulere pedem, ordines ta-  
 men servantes, haud secus, quam si imperio ducis  
 cederent integra acies. Sed quum eo ipso acrius,  
 ubi inclinatam sensere rem, victores se undique in-  
 veherent, nec facile inpetus sustineri posset; quam-  
 quam retinebat, obsistebatque cedentibus Hasdrubal,  
*ab tergo esse colles tutumque receptum, si modice se reciperen-*  
*t, clamitans, tamen, vincente verecundiā metu, (quum proximus quisque hostem cede-*  
*ret) terga extemplo data, atque in fugam sese om-*  
*nnes effuderunt. Ac primo consistere signa in radi-*  
*cibus collum, ac revocare in ordines militem cœpe-*

rant; cunctantibus in adversum collem erigere a- U.C. 546.  
ciem Romanis: inde ut inferri in pigre signa vide- A.C. 206.  
runt, integrata fuga, in castra pavidi compelluntur.  
Nec procul vallo Romanus aberat: cepissetque  
tanto in petu castra, ni se ex vehementi sole, qualis  
inter graves imbre nubes effulget, tanta vis aquæ  
dejecisset, ut vix in castra sua receperint se vic-  
tores; quosdam etiam religio cepерit ulterius quid-  
quam eo die conandi. Karthaginienses, quamquam  
fessos labore ac vulneribus nox imberque ad neces-  
sariam quietem vocabat, tamen, quia metus et peri-  
culum cessandi non dabat tempus, prima luce ob-  
pugnaturis hostibus castra, saxis undique circa ex  
propinquis vallibus congestis augent vallum, muni-  
mento sese, quando in armis parum præsidii foret,  
defensuri. Sed transitio sociorum, fuga ut tutior  
mora videretur, fecit. Principium defectionis ab  
Attane regulo Turdetanorum factum est: is cum  
magna popularium manu transfugit: inde duo mu-  
nita oppida cum præsidiis tradita a præfectis Ro-  
mano. Et ne latius, inclinatis semel ad defectio-  
nem animis, serperet res, silentio proximæ noctis  
Hasdrubal castra movet.

XVI. Scipio, ut prima luce, qui in stationibus Fusos per-  
erant, retulerunt, profectos hostes, præmisso equi- sequitur.  
tatu signa ferri jubet: adeoque citato agmine ducti  
sunt, ut, si via recta vestigia sequentes issent, haud  
dubie adsecuturi fuerint: ducibus est creditum, bre-  
vius aliud esse iter ad Bætim fluvium, ut transeun-  
tes adgredierentur. Hasdrubal, clauso transitu flu-  
minis, ad oceanum flectit: et jam inde fugientium  
modo effusi abibant; idque ab legionibus Romanis  
aliquantum intervalli fecit. Eques levisque arma-

U. C. 546. tura, nunc ab tergo, nunc ab lateribus obcurrendo.

A. C. 206. fatigabat morabaturque : sed quum ad crebros tumultus signa consisterent, et nunc equestria, nunc cum velitibus auxiliisque peditum prælia consarent, supervenerunt legiones. Inde non jam pugna, sed trucidatio velut pecorum fieri ; donec ipse dux fugæ auctor in proximos colles cum sex millibus ferme semiermum evasit : ceteri cæsi captique. Castra tumultuaria raptim Pœni tunulo editissimo communierunt : atque inde, cum hostis nequidquam subire iniquo adscensu conatus esset, haud difficul-

Hasdrubal ter sese tutati sunt. Sed obsidio in loco nudo at-  
Gades fu- que inopi vix in paucos dies tolerabilis erat : itaque  
git. transitiones ad hostem fiebant. Postremo dux ipse,

navibus acceptis, (nec procul inde aberat mare) nocte relicto exercitu, Gades perfugit. Scipio, fuga ducis hostium audita, decem millia peditum, mille equites relinquit Silano ad castrorum obsidionem : ipse cum ceteris copiis, septuagesimis castris, protinus caassis regulorum civitatumque cognoscendis, ut præmia ad veram meritorum æstimationem tribui

Masinissa possent, Tarracōnem rediit. Post profectionem ejus inclinat ad Roma- Masinissa, cum Silano clam congressus, ut ad nova nos.

consilia gentem quoque suam obedientem haberet, cum paucis popularibus in Africam trajecit ; non tam evidenti eo tempore subitæ mutationis caussa, quam documento post id tempus constantissimæ ad ultimam senectam fidei, ne tum quidem eum sine probabili caussa fecisse. Mago inde, remissis ab Hasdrubale navibus, Gades petit. Ceteri, deserti ab ducibus, pars transitione, pars fuga, dissipati per proximas civitates sunt : nulla manus numero aut viribus insignis. Hoc maxime modo, ductu atque

auspicio P. Scipionis, pulsi Hispania Karthaginien- U. C. 546.  
ses sunt; tertiodecimo anno, post bellum initum; A. C. 206.;  
quinto, quam P. Scipio provinciam et exercitum ac- Pulsi His-  
cepit. Haud multo post Silanus, debellatum re- pania Pœni.  
ferens, Tarragonem ad Scipionem rediit.

XVII. L. Scipio cum multis nobilibus captiis Scipio jam  
nuncius receptæ Hispaniæ Romam est missus: et Africam et  
quam ceteri lætitia gloriaque ingenti eam rem vulgo nem spec- Karthagi-  
ferrent, unus, qui gesserat, inexplebilis virtutis ve- tat.  
ræque laudis, parvum instar eorum, quæ spe ac  
magnitudine animi concepisset, receptas Hispanias  
ducebat: jam Africam magnamque Karthaginem,  
et in suum decus nomenque velut consummatam  
ejus belli gloriam spectabat. Itaque, præmoliendas  
sibi ratus jam res conciliandosque regum gentium-  
que animos, Syphacem primum regem statuit ten-  
tare. Masæsylorum is rex erat. Masæsyli, gens Syphacem  
adfinis Mauris, in regionem Hispaniæ, maxime qua sibi conci-  
sita Nova Karthago est, spectant. Fœdus ea tem- liare statuit.  
pestate regi cum Karthaginiensibus erat, quod haud  
gravius ei sanctiusque, quam vulgo barbaris, quibus  
ex fortuna pendet fides, ratus fore, oratorem ad  
eum C. Lælium cum donis mittit. Quibus barbarus  
lætus, et quia res tum prosperæ ubique Romanis,  
Pœnis in Italia adversæ, in Hispania nullæ jam  
erant, amicitiam se Romanorum accipere adiuit:  
firmandæ ejus fidem nec dare, nec accipere, nisi  
cum ipso coram duce Romano. Ita Lælius, in id  
modo fide ab rege accepta, tutum adventum fore, ad  
Scipionem rediit. Magnum in omnia momentum  
Syphax affectanti res Africæ erat, opulentissimus  
ejus terræ rex, bello jam expertus ipsos Karthagini-  
enses, finibus etiam regni apte ad Hispaniam, quod

U.C. 546. freto exiguo dirimuntur, positis. Dignam itaque  
 A.C. 206. rem Scipio ratus, quæ, quoniam non aliter posset,  
 In Afric- magno periculo peteretur, L. Marcio Tarracone, M.  
 eam tra- Silano Karthagine Nova, quo pedibus ab Tarracone  
 jicit. itineribus magnis ierat, ad præsidium Hispaniæ re-  
 lictis, ipse cum C. Lælio duabus quinqueremibus ab  
 Karthagine profectus tranquillo mari plurimum re-  
 mis, interdum et leni adjuvante vento, in Africam  
 trajecit. Forte ita incidit, ut eo ipso tempore Has-  
 drubal pulsus Hispania, septem triremibus portum  
 invectus, anchoris positis terræ adipicaret naves ;  
 quum conspectæ duæ quinqueremes haud cuiquam  
 dubio, quin hostium essent, obprimique a pluribus,  
 priusquam portum intrarent, possent, nihil aliud,  
 quam tumultum ac trepidationem simul militum ac  
 vautarum, nequidquam armaque et naves expedien-  
 tium, fecerunt : percussa enim ex alto vela paullo  
 acriori vento prius in portum intulerunt quinqueremes,  
 quam Pœni anchoras molirentur : nec ultra  
 tumultum ciere quisquam in regio portu audebat.  
 Itaque prior in terram Hasdrubal, mox Scipio et  
 Lælius egressi, ad regem pergunt.

Hasdrubal et Scipio eodem tecto re- cipiuntur. XVIII. Magnificumque id Syphaci (nec erat ali- ter) visum, duorum opulentissimorum ea tempes- tate duces populorum uno die suam pacem amici- tiamque petentes venisse. Utrumque in hospitium invitat ; et, quoniam fors eos sub uno tecto esse, atque ad eosdem penates, voluisse : contrahere ad conloquium dirimendarum simultatium caussa est conatus ; Scipione abnuente, aut privatim sibi ullum cum Pœno odium esse, quod conloquendo fini- ret, aut de republica se cum hoste agere quidquam injussu senatus posse. Illud magno opere tendente

rege, ne alter hospitum exclusus mensa videretur, U. C. 546.  
 ut in animum induceret ad easdem venire epulas, A. C. 206.  
 haud abnuit. Cœnatumque simul apud regem est :  
 et eodem etiam lecto Scipio atque Hasdrubal (quia  
 ita cordi erat regi) adecubuerunt. Tanta autem in-  
 erat comitas Scipioni, atque ad omnia naturalis in-  
 genii dexteritas, ut non Syphacem modo, barbarum  
 insuetumque moribus Romanis, sed hostem etiam  
 infestissimum, facunde adloquendo sibi conciliaret,  
*mirabiliorumque sibi eum virum congresso coram visum*  
*præ se ferebat, quam bello rebus gestis.* Nec dubi-  
 tare, quin *Syphax regnumque ejus jam in Romanorum*  
*essent potestate : eam artem illi viro ad conciliandos*  
*animos esse.* Itaque non, quo modo Hispaniæ amissæ  
 sint, quærendum magis Karthaginiensibus esse, quam,  
 quo modo Africam retineant, cogitandum. Non pere-  
 grinabundum, neque circa amœnas oras vagantem tan-  
 tum ducem Romanum, relictæ provincia novæ ditionis,  
 relictis exercitibus, duabus navibus in Africam traje-  
 cisse sese in hostilem terram, regiam in fidem inexper-  
 tam : sed potinndæ Africæ spem adfectantem. Hoc  
 eum jam pridem volutare in animo, hoc palam fremere,  
 quod non, quemadmodum Hannibal in Italia, sic Sci-  
 pio in Africa bellum gereret. Scipio, fœdere icto Redit in  
 cum Syphace, profectus ex Africa, dubiusque et ple- Hispaniam  
 rumque saevis in alto jactatus ventis, die quarto No- Scipio.  
 vae Karthaginis portum tenuit.

XIX. Hispaniæ sicut a bello Punico quietæ erant, ita quasdam civitates, propter conscientiam culpæ, metu magis, quam fide, quietas esse adparebat: quarum maxime insignes et magnitudine et noxa Illiturgi et Castulo erant. Castulo, quum prosperis rebus socii fuissent, post cæsos cum exer-

U. C. 546. citibus Scipiones defecerant ad Poenos. Illiturgi-  
A. C. 206. tani prodendis, qui ex illa clade ad eos perfugerant, interficiendisque, scelus etiam defectioni addiderant. In eos populos primo adventu, quum dubiæ Hispaniæ essent, merito magis, quam utiliter, sævitum foret. Tunc, jam tranquillis rebus, quia tempus expetendæ pœnæ videbatur venisse, ad citum ab Tarracone L. Marcium cum tertia parte copiarum ad Castulonem obpugnandum mittit: ipse cum cetero exercitu quintis ferme ad Illiturgin castris perobpugnat. Illiturgin venit. Clausæ erant portæ, omniaque instructa et parata ad obpugnationem arcendam: adeo conscientia, quid se meritos scirent, pro indicto eis bello fuerat. Hinc et hortari milites Scipio orsus est. *Ipsos claudendis portis indicasse Hispanos, quid, ut timerent, meriti essent: itaque multo infestioribus animis cum iis, quam cum Karthaginiensibus, bellum gerendum esse.* Quippe cum illis prope sine ira de imperio et gloria certari; ab his perfidiæ et crudelitatis et sceleris pœnas expetendas esse. Venisse tempus, quo et nefandam commilitonum necem, et in semet ipsos, si eodem fuga delati forent, instructam fraudem ulciscerentur: et in omne tempus gravi documento sancirent, ne quis umquam Romanum civem militemre in ulla fortuna opportunum injuriae duceret. Ab hac cohortatione ducis incitati, scalas electis per manipulos viris dividunt: partitoque exercitu, ita ut parti alteri Lælius præesset legatus, duobus simul locis ancipiti terrore urbem adgrediuntur. Non dux unus, aut plures principes oppidanos, sed suus ipsorum ex conscientia culpæ metus ad defendendam inpigre urbem hortatur: et meminerant, et admonebant alii alios, supplicium ex se, non victoriam,

*peti. Ubi quisque mortem obpeteret, id referre; utrum U.C. 546.  
in pugna et in acie, ubi Mars communis et victum sæpe A.C. 206.  
erigeret, et adfligeret victorem; an postmodo, cremata  
et diruta urbe, ante ora captarum conjugum libero-  
rumque, inter verbera et vincula, omnia fœda atque in-  
digna passi, exspirarent.* Igitur non militaris modo  
ætas, aut viri tantum, sed feminæ puerique supra  
animi corporisque vires adsunt: propugnantibus tela  
ministrant, saxa in muros munientibus gerunt. Non  
libertas solum agebatur, quæ virorum fortium tan-  
tum pectora acuit; sed ultima omnium supplicia,  
et fœda mors ob oculos erat. Accendebantur animi  
et certamine laboris ac periculi, atque ipso inter se  
conspectu. Itaque tanto ardore certamen initum  
est, ut domitor ille totius Hispaniæ exercitus, ab  
unius oppidi juventute sæpe repulsus a muris, haud  
satis decoro prælio trepidaret. Id ubi vidit Scipio,  
veritus, ne vanis conatibus suorum et hostibus cres-  
ceret animus, et segnior miles fieret, sibimet conan-  
dum ac partem periculi capessendam esse ratus, in-  
crepita ignavia militum, ferri scalas jubet: se ipsum,  
si ceteri cunctentur, escensurum minatur. Jam subi-  
erat haud mediocri periculo mœnia, quum clamor  
undique ab sollicitis vicem imperatoris militibus  
sublatus, scalæque multis simul partibus erigi cœp-  
tæ. Et ex altera parte Lælius instat. Tum victa  
oppidanorum vis, dejectisque propugnatoribus occu-  
pantur nuiri: arx etiam ab ea parte, qua inexpug-  
nabilis videbatur, inter tumultum capta est.

XX. Transfugæ Afri, qui tum inter auxilia Ro-  
mana erant, et oppidanis in ea tuenda, unde pericu-  
lum videbatur, versis, et Romanis subeuntibus, qua  
adire poterant, conspexerunt editissimam urbis par-

U. C. 546. tem, quia rupe præalta tegebatur, neque opere ullo  
A. C. 206. munitam, et ab defensoribus vacuam: levium cor-

porum homines, et multa exercitatione pernicium,  
clavos secum ferreos portantes, qua per inæqualiter  
eminentia rupis poterant, scandunt: sicubi nimis  
arduum et leve saxum obcurrerbat, clavos per modica  
intervalla figentes, quum velut gradus fecissent, pri-  
mi sequentes extrahentes manu, postremi sublevan-  
tes eos, qui præirent, in suimum evadunt: inde  
decurrunt cum clamore in urbem jam captam ab

**Oppidani ad inter-  
necionem delentur.** Romanis. Tum vero adparuit, ab ira et ab odio  
urbem obpugnatam esse: nemo capiendi vivos, ne-  
mo, patentibus ad direptionem omnibus, prædæ me-  
mor est.

Trucidant inerimes juxta atque armatos,  
feminas pariter ac viros: usque ad infantium cædem  
ira crudelis pervenit. Ignem deinde tectis injiciunt,  
ac diruunt, quæ incendio absumi nequeunt: adeo  
vestigia quoque urbis exstinguere, ac delere memo-  
riam hostium sedis, cordi est. Castulonem inde  
Scipio exercitum ducit: quam urbem non Hispani  
modo convenæ, sed Punici etiam exercitus ex dissipa-  
ta passim fuga reliquæ tutabantur: sed adven-  
tum Scipionis prævenerat fama clidis Illiturgitanor-  
um, terrorque inde ac desperatio invaserat; et in  
diversis caassis, quum sibi quisque consultum sine  
alterius respectu vellet, primo tacita suspicio, deinde  
aperta discordia secessionem inter Karthaginenses  
**Castulo- nem de-  
ditione re-  
cipit.** atque Hispanos fecit. His Cerdubellus propalam  
deditioñis auctor. Himilco Punicis auxiliaribus præ-  
erat: quos urbemque, clam fide accepta, Cerdubel-  
lus Romano prodit. Minior ea victoria fuit: nec  
tantumdem noxæ admissum erat, et aliquantum iræ  
lenierat voluntaria deditio.

XXI. **Marcus** inde in barbaros, si qui nondum U. C. 546.  
perdomiti erant, sub jus ditionemque redigendos A. C. 206.  
missus. **Scipio Karthaginem**, ad vota solvenda Diis, Gladiato-  
munusque gladiatorium, quod mortis caussa patris taculum  
patruique paraverat, edendum, rediit. **Gladiatorium** edit Scipio.  
spectaculum fuit non ex eo genere hominum, ex  
quo lanistis comparare mos est, servorum, quive  
venalem sanguinem habent. Voluntaria omnis et  
gratuita opera pugnantium fuit: nam alii missi ab  
regulis sunt ad specimen insitae genti virtutis ostendendum: alii ipsi professi, se pugnaturos in gratiam  
ducis: alios æmulatio et eertamen, ut provocarent,  
provocatique hand abnuerent, traxit: quidam, quas  
disceptando controversias finire nequiverant, aut no-  
luerant, pacto inter se, ut victorem res sequeretur,  
ferro decreverunt. Neque obscuri generis homines,  
sed clari illustresque, Corbis et Orsua patruelis fra-  
tres, de principatu civitatis, quam Ibem vocabant,  
ambigentes, ferro se certaturos professi sunt. Cor-  
bis major erat ætate. Orsuæ pater princeps proxime  
fuerat, a fratre majore post mortem ejus principatu accepto. Quum verbis disceptare Scipio vellet,  
ac sedare iras; negatum id ambo dicere communibus cognatis, nec alium Deorum hominumve,  
quam Martem, se judicem habituros esse. Robore  
major, minor flore ætatis ferox, mortem in certa-  
mine, quam ut alter alterius imperio subjiceretur  
præoptantes, quum dirimi ab tanta rabie nequirent,  
insigne spectaculum exercitui præbuere documen-  
tumque, quantum cupiditas imperii malum inter  
mortales esset. Major usu armorum et astu facile  
stolidas vires minoris superavit. Huic gladiatorum

U. C. 546. spectaculo ludi funebres additi pro copia, et provin-  
A. C. 206. ciali et castrensi adparatu.

**XXII.** Res interim nihilominus ab legatis gerebantur. **Marcius** Astapam obpugnat. **Astapa** urbs erat, Karthaginiensium semper partis: neque id tam dignum ira erat, quam quod, extra necessitates belli, præcipuum in Romanos gerebant odium: nec urbem aut situ aut munimento tutam habebant, quæ ferociores iis animos faceret: sed ingenia incolarum latrocino læta, ut excursiones in finitimum agrum sociorum populi Rōmāni facerent, inpulerant, et vagos milites Romanos lixasque et mercatores exciperent: magnum etiam comitatum, quia paucis parum tutum fuerat, transgredientem fines, positis insidiis circumventum, iniquo loco interfecerunt. Ad hanc urbem obpugnandam quum admotus exercitus esset, oppidani conscientia scelerum, quia nec deditio tuta ad tam infestos videbatur, nec spes mœnibus aut armis tuendæ salutis erat, facinus inse ac suos fœdum ac ferum consiscunt. Locum in foro destinant, quo pretiosissima rerum suarum congererent: super eum cuinulum conjuges ac liberos considere quum jussissent, ligna circa exstruunt, fascesque virgultorum conjiciunt. Quinquaginta deinde armatis juvenibus præcipiunt, *ut, donec incertus eventus pugnæ esset, præsidium eo loco fortunarum suarum corporumque, quæ cariora fortunis essent, servarent.* Si rem inclinatam viderent, atque in eo jam esse, ut urbs caperetur; scirent omnes, quos eentes in prælium cernerent, mortem in ipsa pugna obituros.

**Astapen-  
sium fu-  
ror.**

*Illos se per Deos superos inferosque orare, ut memores U. C. 546.  
libertatis, quæ illo die aut morte honesta, aut servitute A. C. 206.  
infami finienda esset, nihil relinquerent, in quod sævire  
iratus hostis posset. Ferrum ignemque in manibus esse.  
Amicæ ac fideles potius ea, quæ peritura essent, absu-  
merent manus, quam insultarent superbo ludibrio hos-  
tes. His adhortationibus exsecratio dira adjecta, si  
quem a proposito spes mollitiave animi flexisset:  
inde concitato agmine patentibus portis ingenti tu-  
multu erumpunt. Neque erat ulla satis firma statio  
obposita; quia nihil minus, quam ut egredi mœni-  
bus auderent, timeri poterat: perpaucæ equitum  
turmæ, levisque armatura repente e castris ad id  
ipsum emissâ obcurrit. Acerior inpetu atque animis,  
quam compositior ullo ordine, pugna fuit. Itaque  
pulsus eques, qui primus hosti se obtulerat, terro-  
rem intulit levi armaturæ: pugnatumque sub ipso  
vallo foret, ni robur legionum, per exiguo ad instru-  
endum dato tempore, aciem direxisset. Ibi quoque  
trepidatum parumper circa signa est, quum cæci fu-  
rore in vulnera ac ferrum vecordi audacia ruerent:  
dein vetus miles, adversus temerarios inpetus perti-  
nax, cæde primorum insequentes subpressit: cona-  
tus paullo post ultiro inferre pedem, ut neminem  
cedere, atque obstinatos mori in vestigio quemque  
suo vidit; patefacta acie (quod ut facere posset,  
multitudo armatorum facile suppeditabat) cornua  
hostium amplexus, in orbem pugnantes ad unum  
omnes occidit.*

**XXIII.** Atque hæc tanien hostium iratorum, ac Pueri et fe-  
tum maxime dimicantium, jure belli in armatos re-  
pugnantesque edebantur: fœdior alia in urbe tru-  
cidatio erat, quum turbam feminarum puerorumque  
minæ a suis in urbe trucidati.

U.C. 546. inbellem inermemque cives sui cæderent, et in suc-  
A.C. 206. censem rogum semianima pleraque injicerent cor-  
pora, rivique sanguinis flammam orientem restin-  
guerent: postremo ipsi, cæde miseranda suorum fa-  
tigati, cum armis medio se incendio injecerunt. Jam  
cædi perpetratæ victores Romani supervenerunt: ac  
primo conspectu tam fœdæ rei mirabundi parumper  
obstupuerunt: dein quum aurum argentumque, cu-  
mulo rerum aliarum interfulgens, aviditate ingenii  
humani, rapere ex igne vellent, conrepti alii flamma  
sunt, alii ambusti adflatu vaporis: quum receptus  
primis, urgente ingenti turba, non esset. Ita Astapa,  
sine præda militum, ferro ignique absumta est. Mar-  
cius, ceteris ejus regionis metu in ditionem ac-  
ceptis, victorem exercitum Karthaginem ad Scipio-  
nem reduxit. Per eos ipsos dies perfugæ a Gadibus  
venerunt, pollicentes, urbem Punicumque præsi-  
dium, quod in ea urbe esset, et imperatorem præsi-  
dii cum classe prodituros esse. Mago ibi ex fuga  
substiterat, navibusque in oceano conlectis, aliquan-  
tum auxiliorum et trans fretum ex Africa ora, et ex  
proximis Hispaniæ locis per Hannonem præfectum  
coegerat. Fide accepta dataque perfugis, et Mar-  
cius eo cum expeditis cohortibus, et Lælius cum  
septem triremibus, quinqueremi una, est missus, ut  
terra marique communi consilio rem gererent.

Scipionis  
morbus.

XXIV. Scipio ipse gravi morbo implicitus, gra-  
viore tamen fama, quum ad id quisque, quod audi-  
erat, (insita hominum libidine alendi de industria  
ruinores) adjiceret aliquid, provinciam omnem ac  
maxime longinqua ejus turbavit: adparuitque, quan-  
tam excitatura molem vera fuisset clades, quum va-  
nus rumor tantas procellas excivisset: non socii in

fide, non exercitus in officio mansit. Mandonius et U C. 546.  
Indibilis, qnibus (quia regnum sibi Hispaniæ, pulsis A. C. 206.  
inde Karthaginiensibus, destinarant animis) nihil  
pro spe contigerat, concitatis popularibus (Lacetani  
autem erant) et juventute Celtiberorum excita,  
agrum Suissetanum Sedetanumque sociorum populi  
Romani hostiliter depopulati sunt. Civilis alias fu- Seditio ex-  
ror in castris ad Sucronem ortus. Octo ibi millia ercitus ad  
militum erant; præsidium gentibus, quæ cis Iberum  
incolunt, inpositum. Motæ autem eorum mentes  
sunt non tum prium, quum de vita imperatoris  
dubii rumores adlati sunt; sed jam ante, licentia ex  
diutino, ut fit, otio conlecta, et nonnihil, quod in  
hostico laxius rapto suetis vivere artiores in pace  
res erant. Ac primo sermones tantum occulti sere-  
bantur, *si bellum in provincia esset, quid sese inter pa-*  
*catos facere? si debellatum jam et confecta provincia*  
*esset, cur in Italiam non revelli?* Flagitatum quoque  
stipendum procacius, quam ex more et modestia  
militari, erat; et ab custodibus probra in circum-  
euntes vigilias tribunos jacta: et noctu quidam præ-  
datum in agrum circa pacatum ierant: postremo  
interdiu ac propalam sine commeatu ab signis abi-  
bant: omnia libidine ac licentia militum, nihil in-  
stituto ac disciplina militiæ, aut imperio eorum, qui  
præerant, gerebatur: forma tamen Romanorum  
castrorum constabat una ea spe, quod tribunos ex  
contagione furoris haud expertes seditionis defectio-  
nisque rati fore, et jura reddere in principiis sine-  
bant, et signum ab eis petebant, et in stationes ac  
vigilias in ordinem ibant; et, ut vim imperii abstu-  
lerant, ita speciem dicto parentium, ultro sibi im-  
perantes, servabant. Erupit deinde seditio, post-

U. C. 546. quam reprehendere atque improbare tribunos ea,  
 A. C. 206. quæ fierent, et conari obviam ire, et propalam ab-  
 nuere, furoris eorum se futuros socios, senserunt.  
 Engatis itaque ex principiis, ac post paullo e castris  
 tribunis, ad principes seditionis, gregarios milites,  
 C. Albium Calenum et C. Atrium Umbrum, dela-  
 tum omnium consensu imperium est: qui, nequa-  
 quam tribuniciis contenti ornamenti, insignia etiam  
 summi imperii, fasces securesque, adtractare ausi:  
 neque venit in mentem, suis tergis suisque cervici-  
 bus virgas illas securesque imminere, quas ad me-  
 tum aliorum præfarent. Mors Scipionis falso cre-  
 dita occæcabat animos: sub cuius vulgatam mox  
 famam non dubitabant totam Hispaniam arsuram  
 bello: in eo tumultu et sociis pecunias imperari, et  
 diripi propinquas urbes posse: et, turbatis rebus,  
 quum omnia omnes auderent, minus insignia fore,  
 quæ ipsi fecissent.

XXV. Quum aliqui subinde recentes nuncios, non  
 mortis modo, sed etiam funeris, exspectarent, neque  
 superveniret quisquam, evanesceretque temere ortus  
 rumor; tum primi auctores requiri coepi: et, sub-  
 trahente se quoque, ut credidisse potius temere,  
 quam finxisse, rem talem videri posset, destituti du-  
 ces jam sua ipsi insignia, et pro vana imagine im-  
 perii, quod gererent, veram justamque mox in se  
 versuram potestatem horrebant. Stupente ita sedi-  
 tione, quum vivere primo, mox etiam valere Scipio-  
 nem, certi auctores adferrent, tribuni militum sep-  
 tem ab ipso Scipione missi sunt. Ad quorum pri-  
 mum adventum exasperati animi; mox, ipsis pla-  
 cido sermone permulcentibus notos, cum quibus  
 congressi erant, leniti sunt: circameuntes enim

tentoria primo, deinde in principiis prætorioque, U. C. 546.  
ubi sermones inter se serentium circulos vidissent,  
adloquebantur, percunctantes magis, quæ caussa iræ  
consternationisque subitæ foret, quam factum accu-  
santes. Vulgo stipendium non datum ad diem jacta-  
batur: et, quum eodem tempore, quo scelus Illiturgi-  
tanorum exstisset, post duorum imperatorum duorum-  
que exercituum stragem, sua virtute defensum nomen  
Romnum ac retenta provincia esset: Illiturgitanos  
pænam noxæ meritam habere; suis recte factis gra-  
tiam qui exsolvat, non esse. Talia querentes æqua  
orare, seque ea relatuos ad imperatorem, responde-  
bant: lætari, quod nihil tristius, nec insinabilius es-  
set: et P. Scipionem Deum benignitate, et rempubli-  
cam esse gratiæ referendæ. Scipionem bellis adsuetum,  
ad seditionum procellas rudem, sollicitum ha-  
bebbat res, ne aut exercitus peccando, aut ipse puni-  
endo, modum excederet: in præsentia, ut cœpisset,  
leniter agi placuit, et, missis circa stipendiarias civi-  
tates exactoribus, stipendi spem propinquam facere.  
Edictum subinde propositum, ut ad stipendum pe-  
tendum convenirent Karthaginem; seu carptim par-  
tes, seu universi mallent. Tranquillam seditionem,  
jam per se languescentem, repentina quies rebellan-  
tiū Hispanorum fecit: redierant enim in fines,  
omisso incepto, Mandonius et Indibilis, postquam  
vivere Scipionem adlatum est: nec jam erat aut  
civis, aut externus, cum quo furorem suum conso-  
ciarent. Omnia circumspectantes consilia nihil re-  
liqui habebant, præter non tutissimum a malis con-  
siliis receptum, ut imperatoris vel justæ iræ, vel non  
desperandæ clementiæ sese coniitterent: etiam  
hostibus eum ignovisse, cum quibus ferro dimicas-

U. C. 546. set. Suam seditionem sine vulnere, sine sanguine  
 A. C. 206. fuisse: nec ipsam atrocem, nec atroci pœna dignam: ut ingenia humana sunt ad suam cuique levandam culpam nimio plus facunda. Illa dubitatio erat, singulæne cohortes, an universi, ad stipendium petendum irent: inclinavit sententia, quod tutius censebant, universos ire.

XXVI. Per eosdem dies, quibus hæc illi consultabant, consilium de iis Karthagini erat: certabaturque sententiis, utrum in auctores tantum seditionis (erant autem hi numero haud plus, quam quinque et triginta) animadverteretur, an plurium suppicio vindicanda tam fœdi exempli defectio magis, quam seditio, esset. Vicit sententia lenior, ut, unde orta culpa esset, ibi pœna consisteteret: ad multitudinem castigationem satis esse. Consilio dimisso, ut id actum videretur, expeditio adversus Mandonium Indibilemque edicitur exercitui, qui Karthagine erat, et cibaria dierum aliquot parare jubentur: tribunis septem, qui et antea Sucronem ad lenientiam seditionem ierant, obviam exercitui missis, quina nomina principum seditionis edita sunt; ut eos, per idoneos homines benigno vultu ac sermone in hospitium invitatos sopitosque vino, vincirent. Haud procul jam Karthagine aberant, quum ex obviis auditum, postero die omnem exercitum cum M. Silano in Lacetanos proficiisci, non metu modo omni, qui tacitus insidebat animis, liberavit eos, sed lætitiam ingentem fecit: quod magis habituri solum imperatorem, quam ipsi futuri in potestate ejus essent. Sub occasum solis urbem ingressi sunt, exercitumque alterum parantem omnia ad iter videbunt. Excepti sermonibus de industria compositis,

*lætum opportunumque adventum eorum imperatori U. C. 546.  
esse, quod sub ipsam profectionem alterius exercitus A. C. 206.  
venissent, corpora curant. A tribunis sine ullo tu-  
multu auctores seditionis, per idoneos homines per-  
ducti in hospitia, comprehensi ac vinci sunt. Vi-  
gilia quarta inpedimenta exercitus, cuius simulaba-  
tur iter, proficisci cœpere; sub lucem signa mota,  
et ad portam retentum agmen, custodesque circa  
omnes portas missi, ne quis urbe egrederetur. Vo-  
cati deinde ad concionem, qui pridie venerant, fero-  
citer in forum ad tribunal imperatoris, ut ultiro ter-  
rituri subclamationibus, concurrunt. Simul et im-  
perator in tribunal escendit, et reducti armati a  
portis inermi se concioni ab tergo circumfuderunt:  
tum omnis ferocia concidit, et, ut postea fateban-  
tur, nihil æque eos terruit, quam præter spem robur  
et color imperatoris, quem adfectum visuros credi-  
derant, vultusque, qualem ne in acie quidem aie-  
bant meminisse. Sedit tacitus paullisper, donec  
nunciatum est, deductos in forum auctores seditio-  
nis, et parata jam omnia esse.*

XXVII. Tum, silentio per præconem facto, ita Oratio Sci-  
cœpit: *Numquam mihi defuturam orationem, qua ex- pionis ad  
erцитum meum adloquerer, credidi: non quo verba um-  
quam potius, quam res, exercuerim; sed quia prope a seditiones.  
pueritia in castris habitus, adsueram militaribus inge-  
niis. Ad vos quemadmodum loquar, nec consilium, nec  
oratio suppeditat: quos ne quo nomine quidem adpel-  
lare debeam, scio. Cives? qui a patria vestra descis-  
tis: an milites? qui imperium auspiciumque abnuistis,  
sacramenti religionem rupistis: hostes? corpora, ora,  
vestitum, habitum civium agnosco: facta, dicta, con-  
silia, animos hostium video. Quid enim vos, nisi quod*

**U. C. 546.** *Ilergetes et Lacetani, aut optastis aliud, aut sperastis?*

**A. C. 206.** *Et illi tamen Mandonium atque Indibilem, regiae nobilitatis viros, duces furoris secuti sunt: vos auspicium et imperium ad Umbrum Atrium et Calenum Albium detulistis. Negate, vos id omnes fecisse, aut factum voluisse, milites; paucorum eum furorem atque amentiam esse: libenter credam negantibus: nec enim ea sunt commissa, quæ vulgata in omnem exercitum sine piaculis ingentibus expiari possint. Invitus ea, tamquam vulnera, adtingo: sed nisi tacta tractataque sanari non possunt. Evidet, pulsis Hispania Karthaginiensibus, nullum locum tota provincia, nullos homines credebam esse, ubi vita invisa esset mea: sic me non solum adversus socios gesseram, sed etiam adversus hostes. In castris en meis (quantum me opinio fefeller?) fama mortis meæ non accepta solum, sed etiam exspectata est. Non quod ego vulgari facinus per omnes velim, (evidet si totum exercitum meum mortem mihi optasse crederem, hic statim ante oculos restros morerer; nec me vita juraret, invisa civibus et militibus meis) sed multitudo omnis, sicut natura maris, per se immobilis est, renti et curvæ cinct; ita aut tranquillum, aut procellæ in vobis sunt: et causa atque origo omnis furoris penes auctores est; vos contagione insanistis. Qui mihi ne hodie quidem scire videmini, quo amentiæ progressi sitis; quid facinoris in me, quid in patriam parentesque ac liberos restros, quid in Deos, sacramenti testes, quid adversus auspicia, sub quibus militatis, quid adversus morem militiae disciplinamque majorum, quid adversus summi imperii majestatem ausi sitis. De me ipso taceo: temere potius, quam avide, credideritis: denique ego sim, cuius imperii tælere exercitum minime mirandum sit: patria quid de vobis*

meruerat, quam cum *Mandonio et Indibili consociando* U.C. 546.  
*consilia prodebatis?* Quid *populus Romanus, quum* A.C. 206.  
*imperium, ablatum ab tribunis suffragio populi creatis,*  
*ad homines privatos detulisti?* quum, eo ipso non  
*contenti, si pro tribunis illos haberetis, fasces impera-*  
*toris vestri ad eos, quibus servus, cui imperarent, num-*  
*quam fuerat, Romanus exercitus detulisti.* In præto-  
*rio tetenderunt Albius et Atrius: classicum apud eos*  
*cecinis: signum ab iis petitum est: sederunt in tribu-*  
*nali P. Scipionis: lictor adparuit: submoto incesse-  
*runt: fasces cum securibus prælati sunt. Lapidès*  
*pluere, et fulmina jaci de cælo, et insuetos fætus ani-*  
*malia edere, vos portenta esse putatis: hoc est porten-*  
*tum, quod nullis hostiis, nullis supplicationibus, sine*  
*sanguine eorum, qui tantum facinus ausi sunt, expiari*  
*possit.**

XXVIII. Atque ego (quamquam nullum scelus ra-  
tionem habet) tamen, ut in re nefaria, quæ mens, quod  
*consilium restrum fuerit, scire velim. Rheygium quon-*  
*dam in præsidium missa legio, imperfectis per scelus*  
*principibus civitatis, urbem opulentam per decem annos*  
*tenuit: propter quod facinus tota legio, millia homi-*  
*num quatuor, in foro Romæ securi percussi sunt. Sed*  
*illi primum, non Atrium Umbrum semilixam, nominis*  
*etiam abominandi ducem, sed Decium Jubellium tri-*  
*benum mœlitum secuti sunt: nec cum Pyrrho, nec cum*  
*Samnitibus aut Lucanis, hostibus populi Romani, se*  
*conjunverunt: vos cum *Mandonio et Indibili consilia**  
*communicastis, et arma consociaturi fuistis. Illi, sicut*  
*Campani Capuam, Tuscis veteribus cultoribus adem-*  
*tam, Mamertini in Sicilia Messanam, sic Rheygium ha-*  
*bituri perpetuam sedem erant; nec populum Roma-*  
*num, nec socios populi Romani ultro lacessituri bello.*  
*Sucronemne vos domicilium habituri eratis? ubi si vos*

U. C. 546. *decedens confecta provincia imperator relinquerem,*  
 A. C. 206. *Deum hominumque fidem implorare debebatis, quod non  
     rediretis ad conjuges liberosque vestros. Sed horum quo-  
     que memoriam, sicut patriæ meique, ejeceritis ex animis  
     vestris. Viam consiliis celerati, sed non ad ultimum de-  
     mentis, exsequi volo. Mene vivo, et cetero incolumi ex-  
     ercitu, cum quo ego die uno Karthaginem cepi, cum quo  
     quatuor imperatores, quatuor exercitus Karthaginien-  
     sium fudi, fugari, Hispania expuli, vos octo millia homi-  
     num, minoris certe omnes pretii, quam Albius et Atrius  
     sunt, quibus vos subjecistis, Hispaniam provinciam po-  
     pulo Romano erupturi eratis? Amolior et amoveo no-  
     men meum: nihil ultra facile creditam mortem meam  
     a vobis violatus sim. Quid? si ego morerer, mecum  
     exspiratura respublica, mecum casurum imperium po-  
     puli Romani erat? ne istuc Jupiter optimus maximus  
     sirit, urbem, auspicato Diis auctoribus in æternum  
     conditam, fragili huic et mortali corpori æqualem esse.  
     Flaminio, Paullo, Graccho, Postumio Albino, M.  
     Marcello, T. Quinctio Crispino, Cn. Fulvio, Scipioni-  
     bus meis, tot tam præclaris imperatoribus uno bello  
     absunitis, superstes est populus Romanus, eritque, mille  
     aliis nunc ferro, nunc morbo morientibus, meo unius  
     funere elata populi Romani esset respublica? Vos ipsi  
     hic in Hispania, patre et patruo meo, duabus impera-  
     toribus, imperfectis, Septimum Marcium ducem vobis  
     adversus exsultantes recenti victoria Pœnos delegistis:  
     et sic loquor, tamquam sine duce Hispaniae futuræ fue-  
     rint. M. Silanus, eodem jure, eodem imperio mecum  
     in provinciam missus, L. Scipio frater meus, et C.  
     Lælius, legati, vindices majestatis imperii deessent?  
     Utrum exercitus exercitui, an duces ducibus, an digni-  
     tas, an caussa comparari poterat? quibus si omnibus  
     superiores essetis, arma cum Pœnis contra patriam,*

contra cives vestros ferretis? Africam Italæ, Kartha- U. C. 546.  
ginem urbi Romanæ imperare velletis? Quam ob A. C. 206.  
noxam patriæ?

XXIX. Coriolanum quondam damnatio injusta,  
miserum et indignum exsillum, ut iret ad obpugnan-  
dam patriam, inpulit: revocavit tamen a publico par-  
ricidio privata pietas. Vos qui dolor, quæ ira incita-  
vit? Stipendiumne diebus paucis imperatore ægro se-  
rius numeratum satis digna caussa fuit, cur patriæ in-  
diceretis bellum? cur ad Ilergetes descisceretis a po-  
pulo Romano? cur nihil divinarum humanarumve re-  
rum inviolatum vobis esset? Insanistis profecto, mili-  
tes: nec major in corpus meum vis morbi, quam in  
vestras mentes, invasit. Horret animus referre, quid  
crediderint homines, quid speraverint, quid optaverint.  
Auferat omnia irrita oblivio, si potest: si non, utcum-  
que silentium tegat. Non negaverim, tristem atrocem-  
que vobis visam orationem mean; quanto creditis  
facta vestra atrociora esse, quam dicta mea? et me  
ea, quæ fecistis, pati æquum censem: vos ne dici qui-  
dem omnia æquo animo ferretis? Sed ne ea quidem  
ipsa ultra exprobrabuntur: utinam tam facile vos ob-  
liviscamini eorum, quam ego obliviscar. Itaque, quod  
ad vos universos adtinet, si erroris pœnitet, satis super-  
que pœnarum habeo. Albius Calenus, et Atrius Um-  
ber, et ceteri nefariæ seditionis auctores, sanguine lu-  
ent, quod admirunt. Vobis supplicii eorum specta-  
culum non modo non acerbum, sed lætum etiam, si  
sana mens rediit, debet esse: de nullis enim, quam de  
vobis, infestius aut inimicius consuluerunt. Vix finem  
dicendi fecerat, quum ex præparato simul omnium  
rerum terror oculis auribusque est obfusus. Exer-  
citus, qui corona concionem circumdederat, gladiis

U.C. 546. ad scuta concrepuit: præconis audita vox citantis  
 A.C. 206. nomina damnatorum in consilio. Nudi in medium  
 Duces se- protrahebantur: et simul omnis adparatus supplicii  
 ditionis pœ- expromebatur: deligati ad palum, virgisque cæsi,  
 nas dant. et securi percussi, adeo torpentibus metu, qui ad-  
 erant, ut non modo ferocior vox adversus atrocita-  
 tem pœnæ, sed ne gemitus quidem, exaudiretur.  
 Tracti inde de medio omnes, purgatoque loco citati  
 milites nominatim apud tribunos militum in verba  
 P. Scipionis jurarunt, stipendumque ad nomen sin-  
 gulis persolutum est. Hunc finem exitumque se-  
 ditio militum cœpta apud Sucronem habuit.

XXX. Per idem tempus ad Bætim fluvium Han-  
 no, præfectus Magonis, missus a Gadibus, cum  
 parva manu Afrorum, mercede Hispanos sollici-  
 tando ad quatuor millia juvēnum armavit: castris  
 deinde exutus ab L. Marcio, maxima parte militum  
 inter tumultū captorū castrorum, quibusdam  
 etiam in fuga amissis, palatos persequente equite,  
 cum paucis ipse effugit. Dum hæc ad Bætim flu-  
 vium geruntur, Lælius interim, freto in oceanum  
 evectus, ad Carteiam classe accessit. Urbs ea in  
 ora oceani sita est, ubi primum e fauibus angustis  
 panditur mare. Gades, sine certamine, proditione  
 recipiendi, ultro qui eam rem pollicerentur, in cas-  
 tra Romana venientibus, spes, sicut ante dictum  
 est, fuerat: patet facta immatura proditio est, com-  
 prehensosque omnes Mago Adherbali prætori Kar-  
 thaginem devehendos tradit. Adherbal, conjuratis  
 in quinqueremem inpositis, præmissaque ea, quia  
 tardior, quam triremis, erat, ipse cum octo triremi-  
 bus modico intervallo sequitur. Jam fretum intra-  
 bat quinqueremis, quum Lælius, et ipse in quinque-

remi e portu Carteiæ, sequentibus septem triremi- U. C. 546.  
 bus, evectus, in Adherbalem ac triremes invehitur, A. C. 206.  
 quinqueremem satis credens deprensam rapido in et Lælii  
 freto, in aduersuni æstum reciprocari non posse. Adherbalis  
 Pœnus in re subita parumper incertus trepidavit,  
 utrum quinqueremem sequeretur, an in hostes rostra  
 converteret. Ipsa cunctatio facultatem detractandæ  
 pugnae ademit: jam enim sub ictu teli erant, et un-  
 dique instabant hostes: æstus quoque arbitrium  
 moderandi naves ademerat: neque erat navalii pug-  
 na similis: quippe ubi nihil voluntarium, nihil artis  
 aut consilii esset. Una natura freti, æstusque to-  
 tius certaminis potens, suis, alienis navibus nequid-  
 quam remigio in contrarium tendentes invehebat, ut  
 fugientem navem videres retro vortice intortam vic-  
 toribus inlatam; et sequentem, si in contrarium  
 tractum incidisset maris, fugientis modo sese aver-  
 tentem. Jam in ipsa pugna hæc, quum infesto  
 rostro peteret hostium navem, obliqua ipsa ictum  
 alterius rostri accipiebat: illa, quum transversa ob-  
 jiceretur hosti, repente intorta in proram circum-  
 agebatur. Quum inter triremes, fortuna regente,  
 anceps prœlium misceretur, quinqueremis Romana,  
 seu pondere tenacior, seu pluribus remorum ordinib-  
 us scindentibus vortices, quum facilius regeretur,  
 duas triremes subpressit, unius prælata in petu late-  
 ris alterius remos detersit: ceterasque, quas indepta  
 esset, mulcasset, ni cum reliquis quinque navibus  
 Adherbal velis in Africam transmisisset.

**XXXI.** Lælius, victor Carteiam revectus, audi-  
 tis, quæ acta Gadibus erant, patefactam proditio-  
 nem, conjuratosque missos Karthaginem, spem ad  
 irritum redactam, qua venissent, nunciis ad L. Mar-

U. C. 546. cium missis, nisi si terere frustra tempus sedendo ad  
 A. C. 206. Gades vellent, redeundum ad imperatorem esse, ad-  
 sentiente Marcio, paucos post dies ambo Karthagi-  
 nem rediere. Ad quorum discessum non respiravit  
 modo Mago, quum terra marique ancipiti metu ur-  
 geretur; sed etiam, audita rebellione Ilergetum,  
 spem recuperandæ Hispaniæ nactus, nuncios Kar-  
 thaginem ad senatum mittit; qui, simul seditionem  
 civilem in castris Romanis, simul defectionem so-  
 ciorum in majus verbis extollentes, hortarentur, ut  
 auxilia mitterent, quibus traditum a patribus impe-  
 Mandonius et  
 Indibilis  
 copias  
 contra-  
 hunt.  
 riūm Hispaniæ repeti posset. Mandonius et Indi-  
 bilis, in fines regressi, paullisper, dum, quidnam de  
 seditione statueretur, scirent, suspensi quieverunt;  
 si civium errori ignosceretur, non diffidentes sibi  
 quoque ignosci posse: postquam vulgata est atroci-  
 tas supplicii, suam quoque noxam pari pœna æsti-  
 matam rati, vocatis rursus ad arma popularibus,  
 contractisque, quæ ante habuerant, auxiliis, in Se-  
 detanum agrum, ubi principio defectionis stativa  
 habuerant, cum viginti millibus peditum, duobus  
 millibus equitum et quingentis transcenderunt.

XXXII. Scipio, quum fide solvendi pariter om-  
 nibus noxiis innoxiisque stipendii, tum vultu ac ser-  
 mone in omnes placato, facile reconciliatis militum  
 animis, priusquam castra ab Karthagine moveret,  
 concione advocata, multis verbis in perfidiam rebel-

Oratio Sci-  
 lantium regulorum invictus, nequaquam eodem animo  
 pionis ad  
 milites.  
*se ire professus est ad vindicandum id scelus, quo ci-  
 vilem errorem nuper sanaverit. Tum se, haud secus  
 quam viscera secantem sua, cum gemitu et lacrimis  
 triginta hominum capitibus expiisse octo millium seu  
 imprudentiam, seu noxam: nunc læto et erecto animo*

ad cædem Ilergetum ire. Non enim eos, neque natos U. C. 546.  
in eadem terra, nec ulla secum societate junctos esse : A. C. 206.  
eam, quæ sola fuerit, fidei atque amicitiæ ipsos per  
scelus rupisse. In exercitu suo se, præterquam quod  
omnes cives, aut socios Latinique nominis videat, etiam  
eo moveri, quod nemo fere sit miles, qui non aut a  
patruo suo Cn. Scipione, qui primus Romani nominis  
in eam provinciam venerit, aut a patre consule, aut a  
se sit ex Italia advectus. Scipionum nomini auspiciis-  
que omnes adsuetos, quos secum in patriam ad meritum  
triumphum deducere velit : quos consulatum petenti,  
velut si omnium communis agatur honos, adfuturos  
speret. Quod ad expeditionem adtineat, quæ instet,  
in memorem esse rerum suarum gestarum, qui id bellum  
ducat. Magonis, Hercule, sibi, qui extra orbem ter-  
rarum in circuinfuscum oceano insulam cum paucis per-  
fugerit navibus, majorem curam esse, quam Ilerge-  
tum : quippe illic et ducem Karthaginiensem, et quan-  
tumcumque Punicum præsidium esse ; hic latrones, lu-  
tronumque duces : quibus ut ad populandos finitimorum  
agros, tectaque urenda, et rapienda pecora aliqua vis-  
sit, ita in acie ac signis conlatis nullam esse : magis  
velocitate ad fugam, quam armis fretos, pugnaturos  
esse. Itaque non, quod ullum inde periculum, aut  
semen majoris belli videat, ideo se, priusquam provin-  
cia decedat, obprimendos Ilergetes duxisse : sed pri-  
num, ne impunita tam scelerata defectio esset : deinde,  
ne quis in provincia, simul virtute tanta et felicitate  
perdomita, relictus hostis dici posset. Proinde Deis  
bene jurantibus sequerentur, non tam ad bellum geren-  
dum, (neque enim cum pari hoste certamen esse) quam  
ad expetendas ab hominibus scelestis pœnas.

XXXIII. Ab hac oratione diuissos ad iter se

U. C. 546. comparare in diem posterum jubet, profectusque  
A. C. 206. decimis castris pervenit ad Iberum flumen. Inde,  
superato amni, die quarto in conspectu hostium po-  
suit castra. Campus ante montibus circa septus  
erat: in eam vallem Scipio quum pecora, rapta ple-  
raque ex hostium agris, propelli ad irritandam feri-  
tatem barbarorum jussisset, velites subsidio misit:  
a quibus ubi per procurationem commissa pugna  
esset, Lælum cum equitatu inpetum ex occulto fa-  
cere jubet. Mons opportune prominens equitum  
insidias texit: nec ulla mora pugnæ facta est.  
Hispani in conspecta procul pecora, velites in His-  
panos præda occupatos incurrere. Primo missilibus  
territavere: deinde, emissis levibus telis, quæ irri-  
tare magis, quam decernere, pugnam poterant, gla-  
dios nudant, et conlato pede res cœpta geri est:  
ancepsque pedestre certamen erat, nisi equites su-  
pervenissent: neque ex adverso tantum inlati ob-  
vios obtrivere, sed circumvecti etiam quidam per  
infima clivi ab tergo se, ut plerosque intercluderent,  
objecerunt: majorque cædes fuit, quam quantam  
edere levia per excursiones prælia solent. Ira ma-  
gis accensa adverso prælio barbaris est, quam in-  
minuti animi: itaque, ne perculti viderentur, prima  
luce postero die in aciem processere. Non capiebat  
omnes copias angusta, sicut ante dictum est, vallis:  
duæ ferme peditum partes, omnis equitatus in aciem  
descendit: quod reliquum peditum erat, obliquo  
constituerunt colle. Scipio, pro se esse loci angu-  
stias ratus, et quod in arto pugna Romano aptior,  
quam Hispano militi, futura videbatur, et quod in  
eum locum detracta hostium acies esset, qui non  
emnem multitudinem eorum caperet, novo etiam

consilio adjecit animum : equitem nec se posse cir- U. C. 546.  
 cum dare cornibus in tam angusto spatio ; et hosti, A. C. 206.  
 quem cum pedite eduxisset, inutilem fore. Itaque  
 imperat Lælio, ut per colles quam occultissimo iti-  
 nere circumducat equites, segregetque, quantum  
 possit, equestrem a pedestri pugnam. Ipse omnia  
 signa peditum in hostes vertit : quatuor cohortes in  
 fronte statuit, quia latius pandere aciem non pote-  
 rat. Moram pugnandi nullam fecit, ut ipso cer-  
 tamine averteret ab conspectu transeuntium per  
 colles equitum : neque ante circumductos sensere,  
 quam tumultum equestris pugnæ ab tergo accepere.  
 Ita duo prælia erant: duæ peditum acies, duo equi-  
 tatus per longitudinem campi (quia misceri ex ge-  
 nere utroque prælium angustiæ non patiebantur)  
 pugnabant. Hispanorum quum neque pedes equiti,  
 nec eques pediti auxilio esset, pedes fiducia equitis  
 temere commissus campo cæderetur, eques circum-  
 ventus nec peditem a fronte, (jam enim stratæ pe-  
 destres copiæ erant) nec ab tergo equitem sustine-  
 ret, et ipsi, quum diu in orbem sese stantibus equis  
 defendissent, ad unum omnes cæsi sunt : nec quis-  
 quam peditum equitumque superfuit, qui in valle  
 pugnaverunt. Tertia pars, quæ in colle ad specta-  
 culum magis tutum, quam ad partem pugnæ capes-  
 sendam, steterat, et locum et tempus ad fugiendum  
 habuit: inter eos et reguli ipsi fugerunt; prius-  
 quam tota circumveniretur acies, inter tumultum  
 elapsi.

XXXIV. Castra eodem die Hispanorum, præter  
 reliquam prædam, cum tribus ferme millibus homi-  
 num capiuntur. Romani sociique ad mille ducenti  
 eo prælio ceciderunt: vulnerata amplius tria millia

U. C. 546. hominum: minus cruenta victoria fuisset, si paten-  
A. C. 206.

Mando-  
nius ad  
Scipio-  
nem sup-  
plex ve-  
nit.  
Ignoscit  
ei et fratri  
Scipio.

tiore campo, et ad fugam capessendam facili foret pugnatum. Indibilis, abjectis belli consiliis, nihil tutius in afflictis rebus experta fide et clementia Scipionis ratus, Mandonium fratrem ad eum mittit: qui, advolutus genibus, fatalem rabiem temporis ejus accusat, quum velut contagione quadam pestifera, non *Ilergetes modo et Lacetani, sed castra quoque Romana insanierint.* Suam quidem et fratribus et reliquorum popularium eam conditionem esse, ut aut, si ita videatur, reddant spiritum P. Scipioni, ab eodem illo acceptum: aut servati bis uni debitam vitam pro eo in perpetuum devoreant. Antea in causa sua fiduciam sibi fuisse, nondum experta clementia ejus: nunc contra, nullam in causa, omnem in misericordia victoris spem positam habere. Mos vetustus erat Romanis, cum quo nec foedere, nec aequis legibus jungeretur amicitia, non prius imperio in eum tamquam pacatum uti, quam omnia divina humanaque dedidisset, obsides accepti, arma ademta, praesidia urbibus inposita forent. Scipio, multis invectus in praesente Mandonium absentemque Indibilem verbis, illos quidem merito perisse ipsorum muleficio, ait: *victuros suo atque populi Romani beneficio.* Ceterum, se neque arma iis ademturum, (quippe ea pignora timentium rebellionem esse, se libera arma relinquere, solutosque metu animos) neque se in obsides innoxios; sed in ipsis, si defecerint, servitum: nec ab inermi, sed ab armato hoste, penas expediturum. Utramque fortunam expertis permittere sese, utrum propitios, an iratos, habere Romanos mallent. Ita dimissus Mandonius; pecunia tantummodo imperata, ex qua stipendum militi praestari posset: ipse, Marcio in ul-

teriorem Hispaniam præmisso, Silano Tarraconem U.C. 546.  
reniſſo, paucos moratus dies, dum imperatam pe- A.C. 206-  
cuniām Illegetes pernumerarent, cum expeditis Mar-  
cium jam adpropinquantem oceano adsequitur.

XXXV. Inchoata res jam ante de Masinissa aliis  
atque aliis de cauſis dilata erat, quod Numida cum  
ipso utique congredi Scipione volebat, atque ejus  
dextra fidem sancire: ea tum itineris tam longi ac  
tam devii cauſa Scipioni fuit. Masinissa quum Masinissæ  
Gadibus esset, certior adventare eum a Marcio fac- et Scipio-  
tus, cauſando conrumpi equos inclusos in insula, quiū.  
penuriamque omnium rerum et facere ceteris, et  
ipsos sentire, ad hoc equitem marcescere desidia,  
Magonem perpulit, ut se trajicere in continentem  
ad depopulandos proximos Hispaniæ agros patere-  
tur. Transgressus tres principes Numidarum præ-  
mittit, ad tempus locumque conloquio statuendum;  
duos pro obsidibus retineri a Scipione jubet: re-  
missio tertio, qui, quo jussus erat, adduceret Masi-  
nissam, cum paucis in conloquium venerunt. Ce-  
perat jam ante Numidam ex fama rerum gestarum  
admiratio viri: substitueratque animo speciem quo-  
que corporis amplam ac magnificam: ceterum ma-  
jor præsentis veneratio cepit; et, præterquam quod  
suapte natura multa majestas inerat, adornabat pro-  
missa cæsaries, habitusque corporis non cultus mun-  
ditiis, sed virilis vere ac militaris, et ætas in medio  
virium robore; quod plenius nitidiusque ex morbo  
velut renovatus flos juventæ faciebat. Prope adto-  
nitus ipso congressu Numida, *gratias de fratribus filio*  
*remisso agit.* Ex eo tempore, adfirmat, *eam se quæ-*  
*sisse occasionem, quam tandem oblatam Deūm immor-*  
*talium beneficio non omiserit.* Cupere se illi populo-

*U. C. 546. que Romano operam navare, ita ut nemo unus exter-*  
*A. C. 206. nus magis enise adjuverit rem Romanam. Id se, etiamsi*  
*jampridem vellet, minus præstare in Hispania, aliena*  
*atque ignota terra, potuisse: in qua autem genitus*  
*educatusque in spem paterni regni esset, facile præsta-*  
*turum. Siquidem eumdem Scipionem ducem in Afri-*  
*cam mittant Romani, satis sperare per brevis ævi Kar-*  
*thaginem esse. Lætus eum Scipio vidit audivitque;*  
*quum caput rerum in omni hostium equitatu Masi-*  
*nissam fuisse sciret, et ipse juvenis specimen animi*  
*præ se ferret. Fide data acceptaque, profectus retro*  
*Tarragonen est. Masinissa permissu Romanorum,*  
*ne sine caussa trajecisse in continentem videretur,*  
*populatus proximos agros Gades rediit.*

Mago ju-  
betur in  
Italiam  
ire.

XXXVI. Magoni, desperatis in Hispania rebus, in quarum spem seditio primum militaris, deinde defectio Indibilis animos ejus sustulerant, paranti trajicere in Africam, nunciatum ab Karthagine est, jubere senatum, ut classem, quam Gadibus haberet, in Italiam trajiceret: conducta ibi Gallorum ac Ligurum quanta maxima posset juventute, coniungeret se Hannibali: neu senescere bellum, maximo in petu, majore fortuna cœptum, sineret. Ad eam rem et a Karthagine pecunia Magoni advecta est: et ipse, quantam potuit, a Gaditanis exegit, non ærario modo eorum, sed etiam templis spoliatis, et privatim omnibus coactis aurum argentumque in publicum conferre. Quum prætervehheretur Hispaniæ oram, haud procul Karthagine Nova expositis in terram militibus, proximos depopulatus agros, inde ad urbem classem adpulit: ibi quum interdiu milites in navibus tenuisset, nocte in litus expositos ad partem eam muri, qua capta Karthago ab Ro-

Carthagi-  
nem No-  
vam frus-  
tra tentat.

manis fuerat, ducit: nec præsidio satis valido ur- U.C. 546.  
 bem teneri ratus, et aliquos oppidanorum ad spem A.C. 206.  
 novandi res aliquid moturos. Ceterum nuncii ex  
 agris trepidi simul populationem agrestiumque fu-  
 gam et hostium adventum adtulerant: et visa in-  
 terdiu classis erat, nec sine caussa electam ante ur-  
 bem stationem adparebat: itaque instructi armati-  
 que intra portam, ad stagnum ac mare versam, con-  
 tinebantur. Ubi effusi hostes, mixta inter milites  
 navalis turba, ad muros tumultu majore, quam vi,  
 subierunt, patefacta repente porta, Romani cum  
 clamore erumpunt: turbatosque hostes, et ad pri-  
 mum incursum conjectumque telorum aversos, us-  
 que ad litus cum multa cæde persequuntur: nec,  
 nisi naves litori adpulsæ trepidos accepissent, super-  
 fuissest pugnæ aut fugæ quisquam. In ipsis quoque  
 trepidatum navibus est, dum, ne hostes cum suis  
 simul inrumperent, trahunt scalas, orasque et anco-  
 ras, ne in moliendo mora esset, præcidunt: multi-  
 que adnantes navibus, incerto præ tenebris, quid  
 aut peterent aut vitarent, foede interierunt. Postero  
 die quum classis inde retro ad oceanum, unde vene-  
 rat, fugisset, ad octingenti homines cæsi inter mu-  
 rum litusque, et ad duo millia armorum inventa.

XXXVII. Mago, quum Gades repetisset, exclu-  
 sus inde, ad Cimbim (haud procul a Gadibus is lo-  
 cus abest) classe adpulsa, mittendis legatis, queren-  
 doque, quod portæ sibi socio atque amico clausæ  
 forent, purgantibus iis, multitudinis concursu fac-  
 tum, infestæ ob direpta quædam abs concidenti-  
 bus naves militibus, ad conloquium suffetes eorum,  
 qui summus Pœnis est magistratus, cum quæstore  
 elicuit, laceratosque verberibus cruci adfigi jussit:

U. C. 546. inde navibus ad Pityusam insulam, centum millia  
A. C. 206. ferme a continenti, (Pœni tum eam incolebant) tra-

jecit: itaque classis bona cum pace accepta est, nec commeatus modo benigne præbiti, sed in supplementum classis juventus armaque data: quorum fiducia Pœnus in Baliares insulas (quinquaginta inde millia absunt) transmisit. Duæ sunt Baliares insulæ, major altera atque opulentior armis virisque: et portum habet, ubi commode hibernaturum se (et jam extremum autumni erat) credebat: ceterum, haud secus quam si Romani eam insulam incolerent, hostiliter classi obcursum est. Fundis ut nunc plurimum, ita tunc solo eo telo utebantur: nec quisquam alterius gentis unus tantum ea arte, quantum inter alios omnes Baliares excellunt: itaque tanta vis lapidum creberrimæ grandinis modo in propinquantem jam terræ classem effusa est, ut, intrare portum non ausi, averterent in altum naves.

Minore potitur. In minorem inde Baliarium insulam trajecerunt, fertilem agro; viris, armis haud æque validam. Itaque egressi navibus supra portum loco munito castra locant: ac, sine certamine urbe agroque potiti, duobus millibus auxiliarium inde conscriptis, missisque Karthaginem, ad hibernandum naves subduxerunt. Post Magonis ab oceani ora discessum, Gaditani Romanis deduntur.

Scipio Ro- XXXVIII. Hæc in Hispania P. Scipionis ductu-  
mam re- auspicioque gesta. Ipse, L. Lentulo et L. Manlio  
dit. Acidino provincia tradita, decem navibus Romani  
rediit: et, senatu extra urbem dato in æde Bellonæ,  
quas res in Hispania gessisset, disseruit: quoties  
signis conlatis dimicasset, quot oppida ex hostibus  
vi cepisset, quas gentes in ditionem populi Romani

Transmit-  
tit in Ba-  
liares in-  
sulas.

Minore  
potitur.

redegisset: *adversus quatuor se imperatores, quatuor U. C. 546.*  
*victores exercitus in Hispaniam isse: neminem Kar-*<sup>A. C. 206.</sup>  
*thaginiensem in iis terris reliquisse.* Ob has res  
 gestas magis tentata est triumphi spes, quam petita  
 pertinaciter; quia neminem ad eam diem trium-  
 phasse, qui sine magistratu res gessisset, constabat.  
 Senatu misso, urbem est ingressus, argenteique præ-  
 se in ærarium tulit quatuordecim millia pondo tre-  
 centa quadraginta duo, et signati argenti magnum  
 numerum. Comitia inde creandis consulibus habuit  
**L. Veturius Philo**: centuriæque omnes ingenti fa-  
 vore **P. Scipionem consulem** dixerunt: collega ad-  
 ditur ei **P. Licinius Crassus** pontifex maximus. Ce-  
 terum, comitia majore, quam ulla per id bellum,  
 celebrata frequentia, proditum memoriæ est. Con-  
 veneerant undique non suffragandi modo, sed etiam  
 spectandi caussa **P. Scipionis**: concurrebantque et  
 domum frequentes, et in Capitolium ad inmolantem  
 eum, quum centum bubus votis in Hispania Jovi  
 sacrificaret: spondebantque animis, sicut **C. Luta-**  
**tius superius** bellum Punicum finisset, ita id, quod  
 instaret, **P. Cornelium** finitum; atque, ut Hispa-  
 nia omni Pœnos expulisset, sic Italia pulsurum  
 esse: Africamque ei, perinde ac debellatum in Ita-  
 lia foret, provinciam destinabant. Prætoria inde  
 comitia habita: creati duo, qui tum ædiles plebis  
 erant, **Sp. Lucretius** et **Cn. Octavius**, et ex privatis  
**Cn. Servilius Cæpio** et **L. Æmilius Papus**. Quar-<sup>U. C. 547.</sup>  
 todecimo anno Punici belli **P. Cornelius Scipio** et  
**P. Licinius Crassus** ut consulatum inierunt, nomi-  
 natæ consulibus provinciæ sunt, Sicilia Scipioni ex-  
 tra sortem, concedente collega, quia sacrorum cura  
 pontificem maximum in Italia retinebat; **Bruttii**

U. C. 547. Crasso. Tum prætoriæ provinciæ in sortem con-  
A. C. 205. jectæ: urbana Cn. Servilio obtigit, Ariminum (ita  
Galliam adpellabant) Sp. Lucretio, Sicilia L. Æmilio,  
Cn. Octavio Sardinia. Senatus in Capitolio ha-  
bitus: ibi, referente P. Scipione, senatusconsultum  
factum est, ut, quos ludos inter seditionem milita-  
rem in Hispania vovisset, ex ea pecunia, quam ipse  
in ærarium detulisset, faceret.

Legato-  
rum Sa-  
guntino-  
rum in se-  
natu ora-  
tio.

XXXIX. Tum Saguntinorum legatos in sena-  
tum introduxit. Ex eis maximus natu: *Etsi nihil*  
*ultra malorum est, Patres conscripti, quam quod passi*  
*sumus, ut ad ultimum fidem vobis præstaremus; tamen*  
*ea vestra merita, imperatorumque vestrorum erga nos*  
*fuerunt, ut nos cladium nostrarum non pœniteat. Bel-*  
*lum propter nos suscepistis: susceptum quartumdeci-*  
*mum annum tam pertinaciter geritis, ut saepe ad ulti-*  
*mum discrimin et ipsi veneritis, et populum Karthagi-*  
*niensem adduxeritis. Quum in Italia tam atrox bel-*  
*lum et Hannibalem hostem haberetis, consulē cum*  
*exercitu in Hispaniam, velut ad conligendas reliquias*  
*naufragii nostri, misistis. P. et Cn. Cornelii, ex quo*  
*in provinciam venerunt, nullo tempore destiterunt, quæ*  
*nobis secunda, quæque adversa hostibus nostris essent,*  
*facere. Jam omnium primum oppidum nobis resti-*  
*tuerunt: per omnem Hispaniam cives nostros venum-*  
*datos, dimissis, qui conquirerent, ex servitute in liber-*  
*tatem restituerunt. Quum jam prope esset, ut optabi-*  
*lem ex miserrima fortunam haberemus; P. et Cn.*  
*Cornelii imperatores vestri luctuosius nobis quoque,*  
*quam vobis, perierunt. Tum vero ad hoc retracti ex*  
*distantibus locis in sedem antiquam videbamur, ut ite-*  
*rum periremus, et alterum excidium patriæ videremus:*  
*nec ad perniciem nostram Karthaginiensi utique aut*

duce aut exercitu opus esse ; ab Turdulis nos veterrimis U. C. 547.  
hostibus, qui prioris quoque excidii caussa nobis fuerant, exstingui posse : quum ex insperato repente missis nobis P. hunc Scipionem : quem, fortunatissimi omnium Saguntinorum videmur, quia consulem declaratum videmus, ac vidisse nos civibus nostris renuntiatur sumus, spem omnem salutemque nostram : qui, quum plurimas hostium vestrorum cepisset in Hispania urbes, ubique ex captorum numero excretos Saguntinos in patriam remisit ; postremo Turdetaniam, adeo infestam nobis, ut illa gente incolumi stare Saguntum non posset, ita bello adfixit, ut non modo nobis, (absit verbo invidia) ne posteris quidem timenda nostris esset. Deletam urbem cernimus eorum, quorum in gratiam Saguntum deleverat Hannibal : vectigal ex agro eorum capimus, quod nobis non fructu jucundius est, quam ultione. Ob haec, quibus majora neque sperare, neque optare ab Diis immortalibus poteramus, gratias actum nos decem legatos Saguntinus senatus populusque ad vos misit : simul gratulatum, quod ita res hos annos in Hispania atque Italia gessistis, ut Hispaniam non Ibero amne tenus, sed qua terrarum ultimas finit oceanus, domitam armis habeatis : Italiæ, nisi quatenus vallum castrorum cingit, nihil reliqueritis Pæno. Jovi optimo maximo, præsidi Capitolinæ arcis, non grates tantum ob haec agere jussi sumus, sed donum hoc etiam, si vos permitteretis, coronam auream in Capitolium victoriæ ergo ferre. Id uti permittatis, quæsumus : utique, si vobis ita videtur, quæ nobis imperatores vestri commoda tribuerunt, ea rata atque perpetua auctoritate vestra faciatis. Senatus legatis Saguntinis respondit, Et dirutum et restitutum Saguntum fidei socialis utrimque servatæ documentum omnibus

U. C. 547. *gentibus fore. Suos imperatores recte, et ordine, et ex A. C. 205.* voluntate senatus fecisse, quod Saguntum restituerint, civesque Saguntinos servitio exemerint: quæque alia eis benigne fecerint, ea senatum ita voluisse fieri: donum permittere, ut in Capitolio ponerent. Locus inde lautiaque legatis præberi jussa, et munera ergo in singulos dari ne minus dena millia æris. Legationes deinde ceteræ in senatum introductæ, auditæque. Et potentibus Saguntinis, ut, quatenus tuto possent, Italiam spectatum irent, duces dati, literæque per oppida missæ, ut Hispanos comiter acciperent. Tum de republica, de exercitibus scribendis, de provinciis relatuni.

**Scipio Africam provinciam destinat sibi.** XL. Quum Africam novam provinciam extra sortem P. Scipioni destinari homines fama ferrent, et ipse, nulla jam modica gloria contentus, non ad gerendum modo bellum, sed ad finiendum, diceret se consulem declaratum esse: neque aliter id fieri posse, quam si ipse in Africam exercitum transportaret, et, acturum se id per populum, aperte ferret, si senatus adversaretur, id consilium haudquaquam primis Patrum cum placeret, ceterique per metum aut ambitionem mussarent; Q. Fabius Maximus rotatur ei Fa-bius. gatus sententiam, *Scio, inquit, multis vestrū vide ri, Patres conscripti, rem actam hodierno die agi, et frustra habiturum orationem, qui, tamquam de integra re, de Africa provincia sententiam dixerit. Ego autem primum illud ignoror, quemadmodum jam certa provincia Africa consulis viri fortis ac strenui sit, quam nec senatus censuit in hunc annum provinciam esse, nec populus jussit: deinde, si est, consulem pccare arbitror, qui, de re transacta simulando se referre, senatum ludibrio habet, non senatorem modo, qui, de*

quo consulitur, suo loco dicit sententiam. Atque ego U. C. 547.  
 certum habeo, dissentienti mihi ab ista festinatione in A. C. 205.  
*Africam trajiciendi, duarum rerum subeundam opinionem esse; unius, insitæ ingenio meo cunctationis; quam metum pigritiamque homines adolescentes sane adpellent, dum ne pœniteat, adhuc aliorum speciosiora primo adspectu consilia semper visa, mea usu meliora: alterius, obtrectationis atque invidiæ adversus crescentem in dies gloriam fortissimi consulis.* A qua suspicione si me neque vita acta et mores mei, neque dictatura cum quinque consulatibus, tantumque gloriæ belli domique partæ vindicat, ut propius fastidium ejus sim, quam desiderium; ætas saltem liberet: quæ enim mihi æmulationis cum eo esse potest, qui ne filio quidem meo æqualis sit? Me dictatorem, quum vigerem adhuc viribus, et in cursu maximarum rerum essem, recusantem nemo aut in senatu, aut ad populum audivit, quo minus insectanti me magistro equitum, quod fando numquam ante auditum erat, imperium mecum æquaretur. Rebus, quam verbis, adsequi malui, ut, qui aliorum judicio mihi comparatus erat, sua mox confessione me sibi præferret: nedum ego, perfunctus honoribus, certamina mihi atque æmulationes cum adolescenti florentissimo proponam: videlicet ut mihi jam vivendo, non solum rebus gerendis fesso, si huic negata fuerit, Africa provincia decernatur. Cun ea gloria, quæ parta est, vivendum atque moriendum est. Vincere ego prohibui Hannibalem, ut a vobis, quorum vigent nunc vires, etiam vinci posset.

XLI. Illud te mihi ignoscere, P. Cornelii, æquum erit, si, quum in me ipso numquam pluris famam hominum, quam rempublicam, fecerim, ne tuam quidem gloriam bono publico præponam: quamquam, si aut

**U.C.** 547. *bellum nullum in Italia, aut is hostis esset, ex quo victo*

**A.C.** 205. *nihil gloriæ quæreretur, qui te in Italia retineret, etsi*

*id bono publico faceret, simul cum bello materiam*  
*gloriæ tue isse eruptum videri posset. Quum vero*  
*Hannibal hostis incolumi exercitu quartumdecimum an-*  
*num Italiam obsideat, pœnitabit te, P. Cornelii, gloriæ*  
*tue, si hostem eum, qui tot funerum, tot cladium nobis*  
*caussa fuit, tu consul Italia expuleris, et, sicut penes*  
*C. Lutatium prioris Punici perpetrati belli titulus fuit,*  
*ita penes te hujus fuerit? Nisi aut Hamilcar Hanni-*  
*bali dux est præferendus, aut illud bellum huic, aut*  
*victoria illa major clariorque, quam hæc, (modo con-*  
*tingat, ut te consule vincamus) futura est. Ab Drepa-*  
*nis atque Eryce detraxisse Hamilcarem, quam Italia*  
*expulisse Pœnos atque Hannibalem, malis? Ne tu qui-*  
*dem, etsi magis partam, quam speratam, gloriam am-*  
*pletearis, Hispania potius, quam Italia, bello liberata*  
*gloriatus fueris. Nondum is est Hannibal, quem non*  
*magis timuisse videatur, quam contempsisse, qui aliud*  
*bellum maluerit. Quin igitur ad hoc adcingeris, nec*  
*per istos circuitus, ut, quum in Africam trajeceras, se-*  
*culturum te illuc Hannibalem spores potius, quam recto*  
*hinc itinere, ubi Hannibal est, co bellum intendis?*  
*Egregiam istam palmam belli Punici patrati petis?*  
*Hoc et natura prius est, tua quum defenderis, aliena*  
*ire obpugnatum. Pax ante in Italia, quam bellum in*  
*Africa sit: et nobis prius decedat timor, quam ultro*  
*aliis inferatur. Si utrumque tuo ductu auspicioque*  
*fieri potest, Hannibale hic victo, illuc Karthaginem ex-*  
*pugna: si altera utra Victoria noris consulibus relinqui-*  
*da est; prior quum major clariorque, tum caussa etiam*  
*insequentis fuerit. Nam nunc quidem præterquam quod*  
*et in Italia et in Africa duos diversos exercitus ulere*

ærarium non potest: præterquam quod, unde classes U. C. 547.  
 tueamur, unde commeatibus præbendis subficiamus, ni- A. C. 205.  
 hil reliqui est; quid? periculi tandem, quantum adea-  
 tur, quem fallit? P. Licinius in Italia, P. Scipio bel-  
 lumi in Africa geret. Quid? si (quod omnes Dii omen  
 avertant, et dicere etiam reformidat animus, sed, quæ  
 acciderunt, accidere possunt) et victor Hannibal ire  
 ad urbem pergit; tum demum te consulē ex A-  
 frica, sicut Q. Fulvium a Capua, arcessemus? Quid?  
 quod in Africa quoque Mars communis belli erit? Do-  
 mus tibi tua, pater patruusque, intra triginta dies cum  
 exercitibus cæsi, documento sint; ubi per aliquot an-  
 nos, maximis rebus terra marique gerendis, amplissi-  
 mum nomen apud exteras gentes populi Romani ves-  
 træque familiæ fecerant. Dies me deficiat, si reges  
 imperatoresque, temere in hostium terras transgressos  
 cum maximis cladibus suis exercituumque suorum, nu-  
 merare velim. Athenienses, prudentissima cirtas, bel-  
 lo domi relicto, auctore æque inpigro ac nobili juvne,  
 magna classe in Siciliam transmissa, una navalī pugna  
 florentem rempublicam suam in perpetuum adfixerunt.

**XLII.** Externa et nimis antiqua repeto. *Africa* eadem ista et *M. Atilius*, insigne utriusque fortunæ exemplum, nobis documento sint. Næ tibi, *P. Cornelii*, quum ex alto Africam conspexeris, ludus et jocns fuisse Hispaniæ tuæ videbuntur. Quid enim simile? pacato mari præter oram Italiæ Galliæque rectus Emporias, in urbem sociorum, classem adpulisti: expositos mili-  
 tes, per tutissima omnia, ad socios et amicos populi Romani Tarracōnem duxisti: ab Tarracōne deinde iter per præsidia Romana: circa Iberum exercitus pa-  
 tris patruique tui, post amissos imperatores ferociores et calamitate ipsa: dux tumultuarius quidem ille *L.*

U.C. 547. *Marcius, et militari suffragio ad tempus lectus, ceterum, si nobilitas ac justi honores adornarent, claris imperatoribus qualibet arte belli par: olpugnata per summum otium Karthago, nullo trium Punicorum exercituum socios defendente.* Cetera, neque ea elevo, nullo tamen modo *Africo bello comparanda*; ubi non portus ullus classi nostræ apertus, non ager pacatus, non civitas socia, non rex amicus, non consistendi usquam locus, non procedendi. Quacumque circumspexeris, hostilia omnia atque infesta. *An Syphaci Numidisque credis? satis sit semel creditum.* Non semper temeritas est felix: et *fraus fidem in parvis sibi præstruit*, ut, quum operæ pretium sit, cum mercede magna fallat. Non hostes patrem patruumque tuum armis prius, quam *Celtiberi socii fraude*, circumvenerunt: nec tibi ipsi a *Magone et Hasdrubale*, hostium ducibus, quantum ab *Indibili et Mandonio* in fidem acceptis, periculi fuit. *Numidis tu credere potes, defectionem militum tuorum expertus?* Et *Syphax et Masinissa se, quam Karthaginienses, malunt potentes in Africa esse: Karthaginienses, quam quemquam alium.* Nunc illos æmulatio inter sese et omnes caussæ certaminum acidunt, quia procul externus metus est. Ostende Romana arma, exercitum alienigenam; velut ad commune restinguendum incendium concurrent. Aliter iidem illi Karthaginienses Hispaniam defenderunt: aliter mænia patriæ, templa Deūm, aras et focos, defendent; quum ennes in prælium parida prosequetur conjux, et parvi liberi obcursabunt. Quid porro? Si satis confisi Karthaginienses consensu Africæ, fide sociorum regum, mænibus suis, quum tuo exercitusque tui præsidio nudatam Italianam viderint, ipsi ultro norum exercitum in Italianam aut ex Africa miserint; aut Magonem, quem, a Ba-

*liaribus classe transmissa, jam præter oram Ligurum U. C. 547.*  
*Alpinorum vectari constat, Hannibali se conjungere A. C. 205.*  
*jusserint? Nempe in eodem terrore erimus, in quo nu-*  
*per fuimus, quum Hasdrubal in Italiam transcendit:*  
*quem tu, qui non solum Karthaginem, sed omnem A-*  
*fricam, exercitu tuo es clausurus, e manibus tuis in Ita-*  
*liam emisisti. Victum a te dices: eo quidem minus*  
*vellem, et id tua, non reipublicæ solum, caussa, iter*  
*datum victo in Italiam esse. Patere, nos omnia, quæ*  
*prospera tibi ac populi Romani imperio evenere, tuo*  
*consilio adsignare; adversa casibus incertis belli et for-*  
*tunæ delegare. Quo melior fortiorque es, eo magis ta-*  
*lem præsidem sibi patria atque universa Italia retinet.*  
*Non potes ne ipse quidem dissimulare, ubi Hannibal sit,*  
*ibi caput atque arcem hujus belli esse: quippe qui præ*  
*te feras, eam tibi caussam trajiciendi in Africam esse,*  
*ut Hannibalem eo trahas. Sive igitur hic, sive illuc,*  
*cum Hannibale est tibi futura res. Utrum ergo tandem*  
*firmior eris in Africa solus, an hic, tuo collegæque tui*  
*exercitu conjuncto? ne Cluvilius quidem et Livius con-*  
*sules tam recenti exemplo, quantum id intersit, docu-*  
*mento sunt? Quid? Hannibalem utrum tandem extre-*  
*mus angulus agri Brutii, frustra jam diu poscentem ab*  
*domo auxilia, an propinqua Karthago et tota socia*  
*Africa potentiores armis virisque faciet? Quod istud*  
*consilium est, ibi malle decernere, ubi tuæ dimidio mi-*  
*nores copiæ sint, hostium multo majores, quam ubi duo-*  
*bus exercitibus adversus unum, tot proliis et tam diu-*  
*turna et gravi militia fessum, pugnandum sit? Quam*  
*compar consilium tuum parentis tui consilio sit, reputa.*  
*Ille, consul profectus in Hispaniam, ut Hannibali ab*  
*Alpibus descendenti obcurreret, in Italiam ex provincia*  
*rediit: tu, quum Hannibal in Italia sit, relinquere Ita-*

U. C. 547. *liam paras; non quia reipublicæ id utile, sed quia tibi*  
 A. C. 205. *amplum et gloriosum censes esse: sicut quum, provin-  
 cia et exercitu relicto, sine lege, sine senatusconsulto,  
 duabus navibus populi Romani imperator fortunam  
 publicam et majestatem imperii, quæ tum in tuo capite  
 periclitabantur, commisisti. Ego P. Cornelium, Pa-  
 tres conscripti, recipublicæ nobisque, non sibi ipsi pri-  
 vativi creatum consulem existimo: exercitusque ad cus-  
 todiam urbis atque Italiæ scriptos esse, non quos regio  
 more per superbiam consules, quo terrarum relint, tra-  
 jificant.*

XLIII. Quum oratione ad tempus parata Fabius,  
 tum auctoritate et inveterata prudentiae fama, mag-  
 nam partem senatus, et seniores maxime, movisset,  
 pluresque consilium senis, quam animum adolescen-  
 tis ferocem, laudarent; Scipio ita locutus fertur:  
 Fabio re-  
 spondet  
 Scipio.  
*Et ipse Q. Fabius principio orationis, Patres conscripti,  
 commemoravit, in sententia sua posse obtrectationem  
 suspectam esse. Cujus ego rei non tam ipse ausim tan-  
 tum virum insimulare, quam ea suspicio, vitio oratio-  
 nis, an rei, haud sane purgata est. Sic enim honores  
 suos et famam rerum gestarum extulit verbis, ad ex-  
 stinguendum invidiæ crimen, tamquam mihi ab infimo  
 quoque periculum sit, ne mecum amuletur: et non ab  
 eo, qui, quia super ceteros excellat, quo me quoque  
 niti non dissimulo, me sibi æquari nolit: sic senem se  
 perfunctum honoribus, et me infra ætatem filii etiam  
 sui posuit; tamquam non longius, quam quantum vi-  
 tæ humanæ spatium est, cupiditas gloriæ extendatur,  
 maximaque pars ejus in memoriam ac posteritatem pro-  
 mineat. Maximo cuique id accidere animo certum ha-  
 beo, ut se non cum præsentibus modo, sed cum omnis  
 ævi claris viris, comparent. Evidem haud dissimulo,*

me tuas, Q. Fabi, laudes non adsequi solum velle, sed, U. C. 547.  
 (bona venia tua dixerim) si possim, etiam exsuperare. Il- A. C. 205.  
 lud nec tibi in me, neu mihi in minoribus natu animi sit,  
 ut nolimus, quemquam nostri similem evadere civem : id  
 enim non eorum modo, quibus inviderimus, sed reipub-  
 licæ, et pene omnis generis humani, detrimentum sit.  
 Commemoravit, quantum essem periculi aditus, si in  
 Africam trajicerem : ut meam quoque, non solum rei-  
 publicæ et exercitus, vicem videretur sollicitus. Unde  
 hac repente cura de me exorta ? quum puter patruus-  
 que meus imperfecti, quum duo exercitus eorum prope  
 occidione occisi essent, quum amissæ Hispaniæ, quum  
 quatuor exercitus Pœnorum, quatuorque duces omnia  
 metu armisque tenerent, quum quæsitus ad id bellum  
 imperator nemo se ostenderet, præter me, nemo profi-  
 teri nomen ansus esset, quum mihi quatuor et viginti  
 annos nato detulisset imperium populus Romanus ; quid  
 ita tum nemo ætatem meam, vim hostium, difficultatem  
 belli, patris patruique recentem cladem commemora-  
 bat ? Utrum major aliqua nunc in Africa calamitas  
 accepta est, quam tunc in Hispania erat ? An majores  
 nunc sunt exercitus in Africa, duces plures meliores-  
 que, quam tunc in Hispania fuerunt ? An ætas mea  
 tunc maturior bello gerendo fuit, quam nunc est ? An  
 cum Karthaginiensi hoste in Hispania, quam in Africa,  
 bellum geri optius est ? Facile est, post fusos fugatos-  
 que quatuor exercitus Punicos, post tot urbes vi captas,  
 aut metu subactas in ditionem, post perdomita omnia  
 usque ad oceanum, tot regulos, tot særvas gentes, post  
 receptam totam Hispaniam, ita ut vestigium nullum  
 belli reliquum sit, elevare meas res gestas : tam, Her-  
 cule, quam, si victor ex Africa reñierim, ea ipsa ele-  
 vare, quæ nunc, retinendi mei caussa, ut terribilia ca-

**U**C. 547. *dem rideantur, verbis extolluntur.* Negat aditum esse  
**A. C. 205.** *in Africam, negat ullos patere portus.* M. Atilium  
*captum in Africa commemorat; tamquam M. Ati-*  
*lius primo accessu ad Africam offenditerit: neque re-*  
*cordatur, illi ipsi tam infelici imperatori patuisse ta-*  
*men portus Africæ, et res egregias primo anno gessisse,*  
*et, quantum ad Karthaginienses duces adtinet, invic-*  
*tum ad ultimum permansisse.* Nihil igitur me isto tu  
*exemplo terrueris: si hoc bello, non priore, si nuper,*  
*et non annis ante quadraginta, ista clades accepta foret,*  
*qui ego minus in Africam, Regulo capto, quam, Sci-*  
*pionibus occisis, in Hispaniam trajicerem?* Nec felicius  
*Xanthippum Lacedæmonium Karthagini, quam*  
*me patriæ meæ sinerem natum esse: cresceretque mihi*  
*ex eo ipso fiducia, quod possit in hominis unius virtute*  
*tantum momenti esse.* At etiam Athenienses audiendi  
*sunt, temere in Siciliam, omisso domi bello, transgressi.*  
*Cur ergo, quoniam Græcas fabulas enarrare vacat, non*  
*Agathoclem potius, Syracusanum regem, quum diu*  
*Sicilia Punico bello ureretur, transgressum in hanc*  
*eamdem Africam, avertisse eo bellum, unde reverat,*  
*refers?*

**XLIV.** *Sed quid, ulti metum inferre hosti, et ab*  
*se remoto periculo alium in discrimin adlucere, quale*  
*sit, veteribus externisque exemplis admonere opus est?*  
*Majus præsentiusre ullum exemplum esse, quam Han-*  
*nibal, potest?* Multum interest, alienos populere fines,  
*an tuos uri, exscindi, videoas: plus animi est inferenti*  
*periculum, quam propulsanti.* Ad hoc major ignotu-  
*rum rerum est terror: bona malaque hostium ex pro-*  
*pinquo ingressus fines adspicias.* Non speraverat Han-  
*nibal fore, ut tot in Italia populi ad se deficerent, quot*  
*defecerunt post Cannensem cladem; quanto minus quid-*

quam in Africa Karthaginiensibus firmum ac stabile U. C. 547.  
sit, infidis sociis, gravibus ac superbis dominis? Ad A. C. 205.  
hoc nos, etiam deserti ab sociis, viribus nostris, milite  
Romano, stetimus. Karthaginiensi nihil civilis roboris  
est: mercede paratos milites habent, Afros Numidas-  
que, levissima fidei mutandæ ingenia. Hic modo nihil  
moræ sit, una et trajecisse me audietis, et ardere bello  
Africam, et molientem hinc Hannibalem, et obsideri  
Karthaginem: lætiores et frequentiores ex Africa ex-  
spectate nuncios, quam ex Hispania accipiebatis. Has  
mihi spes subjicit fortuna populi Romani, Dii fæderis  
ab hoste violati testes, Syphax et Masinissa reges: quo-  
rum ego fidei ita innitar, ut bene tutus a perfidia sim.  
Multæ, quæ nunc ex intervallo non adparent, bellum  
aperiet: et id est viri et ducis, non deesse fortunæ præ-  
benti se, et oblata casu flectere ad consilium. Habebo,  
Q. Fabi, parem, quem das, Hannibalem; sed illum  
potius ego traham, quam ille me retineat. In sua  
terra cogam pugnare eum, et Karthago præmium vic-  
toriæ erit, quam semiruta Bruttiorum castella. Ne  
quid interim, dum trajicio, dum expono exercitum in  
Africa, dum castra ad Karthaginem promoveo, res-  
publica hic detrimenti capiat, quod tu, Q. Fabi, quum  
victor tota Italia volitaret Hannibal, potuisti præstare,  
hoc vide ne contumeliosum sit, concusso jam et pene  
fructo Hannibale, negare, posse P. Licinium consulem  
virum fortissimum præstare: qui, ne a sacris absit pon-  
tifex maximus, ideo in sortem tam longinquæ provinciæ  
non venit. Si, Hercule, nihilo maturius hoc, quo ego  
censeo, modo perficeretur bellum; tamen ad dignitatem  
populi Romani, famamque apud reges gentesque exter-  
nas pertinebat, non ad defendendam modo Italiam, sed  
ad inferenda etiam Africæ arma, videri nobis animum

U.C. 547. esse; nec hoc credi vulgarique, quod Hannibal ausus  
A. C. 205. sit, neminem ducem Romanorum audere; et priore  
Punico bello, tum quum de Sicilia certaretur, toties  
Africam ab nostris exercitibusque et classibus obpugna-  
tam; nunc, quum de Italia certetur, Africam pacatam  
esse. Requiescat aliquando vexata tam diu Italia:  
uratur evasteturque in vicem Africa. Castra Romana  
potius Karthaginis portis iumineant, quam nos iterum  
vallum hostium ex mænibus nostris videamus. Africa  
sit reliqui belli sedes: illuc terror fugaque, populatio  
agrorum, defectio sociorum, ceteræ belli clades, quæ in  
nos per quatuordecim annos ingruerunt, vertantur.  
Quæ ad rem publicam pertinent, et bellum, quod instat,  
et provincias, de quibus agitur, dixisse satis est. Illa  
longa oratio, nec ad vos pertinens sit, si, quemadmodum  
Q. Fabius meas res gestas in Hispania elevavit, sic et  
ego contra gloriam ejus eludere, et meam verbis extol-  
lere velim. Neutrum faciam, Patres conscripti: et, si  
ulla alia re, modestia certe et temperando linguae ado-  
lescens senem vicero. Ita et vixi, et res gessi, ut tac-  
tus ea opinione, quam vestra sponte conceptam animis  
haberetis, facile contentus essem.

XLV. Minus æquis animis auditus est Scipio,  
quia vulgatum erat, si apud senatum non obtinuisse-  
set, ut provincia Africa sibi decerneretur, ad po-  
pulum extemplo laturum: itaque Q. Fulvius, qui  
eonsul quater et censor fuerat, postulavit a consule,  
ut palam in senatu diceret, permetteretne *Patribus*, ut  
de prorinciis decernerent? statusque eo esset, quod  
censuissent, an ad populum latus? Quum Scipio  
respondisset, se, quod e republica esset, facturum;  
tum Fulvius, Non ego ignarus, quid responsurus fac-  
turusve esses, quæsivi, quippe quum præ te feras, ten-

*tare magis, quam consulere senatum, et, ni provinciam U. C. 547.  
tibi, quam volueris, extemplo decernamus, paratam ro-*  
*gationem habeas. Itaque a vobis, tribuni plebis, pos-*  
*tulo, inquit, ut sententiam mihi ideo non dicenti, quod,*  
*etsi in meam sententiam discedatur, non sit ratum ha-*  
*biturus consul, auxilio sitis. Inde altercatio orta,*  
*quum consul negaret, æquum esse tribunos interce-*  
*dere, quo minus suo quisque loco senator rogatus*  
*sententiam diceret. Tribuni ita decreverunt, Si*  
*consul senatui de provinciis permittit, stari eo, quod*  
*senatus censuerit, placet; nec de ea re ferri ad popu-*  
*lum patiemur: si non permittit, qui de ea re senten-*  
*tiam recusabit dicere, auxilio erimus. Consul diem*  
*ad conloquendum cum collega petiit. Postero die*  
*permissum senatui est. Provinciae ita decretæ: al-*  
*teri consuli Sicilia et triginta rostratae naves, quas*  
*C. Servilius superiore anno habuisset: permissum-*  
*que, ut in Africam, si id e republica esse censeret,*  
*trajiceret: alteri Bruttii et bellum cum Hannibale,*  
*cum eo exercitu, quem L. Veturius, aut Q. Cæci-*  
*lius: hi et sortirentur inter se, compararentve, uter*  
*in Bruttiis duabus legionibus, quas consul reliqui-*  
*set, rem gereret: imperiumque in annum proroga-*  
*retur, cui ea provincia evenisset: et ceteris, præter*  
*consules prætoresque, qui exercitibus provinciisque*  
*præfuturi erant, prorogata imperia. Q. Cæilio*  
*sorte evenit, ut cum consule in Bruttiis adversus*  
*Hannibalem bellum gereret. Ludi deinde Scipionis*  
*magna frequentia et favore spectantium celebrati.*  
*Legati, Delphos ad donum ex præda Hasdrubalis*  
*portandum missi, M. Pomponius Matho et Q. Ca-*  
*tius, tulerunt corouam auream ducentum pondo, et*  
*simulacra spoliorum, ex mille pondo argenti facta.*

V. C. 547. Scipio, quum, ut delectum haberet, neque inpetras-  
 A. C. 205. set, neque magnopere tetendisset, ut voluntarios  
     ducere sibi milites liceret, tenuit: et, quia impensæ  
     negaverat reipublicæ futuram classem, ut, quæ ab  
     sociis darentur ad novas fabricandas naves, accipe-  
 Etruriæ populi <sup>Sef-</sup> ret. Etruriæ primum populi, pro suis quisque facul-  
     pionem in tatibus, consulem adjuturos polliciti. Cærites fru-  
     ornanda mentum sociis navalibus commeatumque omnis ge-  
     classe ju- neris; Populonienses ferrum; Tarquinienses linteæ  
     vant. in vela; Volaterrani interamenta navium et frumen-  
     tum; Arretini triginta millia scutorum, galeas toti-  
     dem, pila, gæsa, hastas longas, millium quinqua-  
     ginta summam pari cujusque generis numero exple-  
     tuos, secures, rutra, falces, alveolos, molas, quan-  
     tum in quadraginta longas naves opus esset, tritici  
     centum et viginti millia modiūm, et in viaticum de-  
     curionibus remigibusque conlaturos: Perusini, Clu-  
     sini, Rusellani abiectem in fabricandas naves, et fru-  
     menti magnum numerum: abiecte ex publicis silvis  
     est usus. Umbriæ populi, et præter hos Nursini, et  
     Reatini, et Amiternini, Sabinusque ager omnis, mi-  
     lites polliciti. Marsi, Peligni, Marrucinique, multi  
     voluntarii nomina in classem dederunt. Camertes,  
     quum æquo fœdere cum Romanis essent, cohortem  
     armatam sexcentorum hominum miserunt. Triginta  
     navium carinæ, viginti quinqueremes, decem quadri-  
     remes, quuni essent positæ, ipse ita instituit operi, ut  
     die quadragesimo quinto, quam ex silvis detracta  
     materia erat, naves instructæ armatæque in aquam  
     deductæ sint.

XLVI. Profectus in Siciliam est triginta navibus  
     longis, voluntariorum septem ferme millibus in na-  
     ves inpositis. Et P. Licinius in Bruttios ad duos

exercitus consulares venit: ex eis eum sibi sumsit, U.C. 547.  
 queni L. Veturius consul habuerat. Metello, ut, A.C. 205.  
 quibus præfuisset legionibus, iis præcesset, (facilius  
 cum adsuetis imperio rem gesturum ratus) permisit.  
 Et prætores diversi in provincias profecti. Et, quia  
 pecunia ad bellum deerat, agri Campani regionem,  
 a fossa Græca ad mare versam, vendere quæstores  
 jussi; indicio quoque permisso, qui ager civis Cam-  
 panii fuisset, ut is publicus populi Romani esset: in-  
 dici præmium constitutum, quantæ pecuniae ager in-  
 dicatus esset, pars decima. Et Cn. Servilio prætori  
 urbis negotium datum, ut Campani cives, ubi cui-  
 que ex senatusconsulto licceret habitare, ibi habita-  
 rent; animadverteretque in eos, qui alibi habitarent.  
 Eadem æstate Mago, Hamilcaris filius, ex minore  
 Baliae insula, ubi hibernarat, juventute lecta in  
 classem inposita, in Italiam triginta fermie rostratis Mago in  
 navibus et multis onerariis, duodecim millia pedi- Liguriam  
 tum, duo ferme equitum trajecit: Genuamque, nul- adpellit.  
 lis præsidiis maritimam oram tutantibus, repentina  
 adventu cepit: inde ad oram Ligurum Alpinorum, si-  
 quos ibi motus facere posset, classem adpulit. In-  
 gauni (Ligurum ea gens est) bellum ea tempestate  
 gerebant cum Epanteriis montanis. Igitur Pœnus,  
 Savone oppido Alpino præda deposita, et decem lon-  
 gis navibus in statione ad præsidium relictis, ceteris  
 Karthaginem missis ad tuendam maritimam oram,  
 quia fama erat Scipionem trajecturum esse, ipse,  
 societate cum Ingaunis, quorum gratiam malebat,  
 composita, montanos instituit obpugnare. Et cres-  
 cebat exercitus in dies, ad famam nominis ejus Gal-  
 lis undique confluentibus. Ea literis cognita Sp.  
 Læcretii, ne frustra, Hasdrubale cum exercitu deleto

U. C. 547. biennio ante, forent lætati, si par aliud inde bellum,  
A. C. 205. duce tantum mutato, oriretur, curam ingentem accenderunt Patribus. Itaque et M. Livium proconsulem ex Etruria volonum exercitum admoveere Ariminum jusserunt, et Cn. Servilio prætori negotium datum, ut, si e republica censeret esse, urbanas legiones, cui imperio videretur dato, ex urbe duci juberet. M. Valerius Lævinus Arretium eas legiones duxit. Eisdem diebus naves onerarias Pœnorum ad octoginta circa Sardiniam ab Cn. Octavio, qui provinciæ præerat, captas, Cœlius frumento misso ad Hannibalem commeatuque onustas, Valerius prædam Etruscam Ligurumque montanorum captivos Karthaginem perportantes, tradit. In Bruttiis nihil ferme anno eo memorabile gestum. Pestilentia incesserat pari clade in Romanos Pœnosque: nisi quod Punicum exercitum super morbum etiam fames adseeit. Propter Junonis Laciniæ templum æstatem Hannibal egit; ibique aram condidit dedicavitque, cum ingenti rerum ab se gestarum titulo, Punicis Græcisque literis insculpto.

---

## EPITOME LIBRI XXIX.

---

**E**X Sicilia C. Lælius in Africam a Scipione missus ingentem prædam reportavit, et mandata Masinissæ Scipioni exposuit, conquerentis, quod nondum exercitum in Africam trajecisset. Bellum in Hispania finitum, victore Romano, quod Indibilis excitaverat; ipse in acie occisus, Mandonius exposcentibus Romanis a suis deditus est. Magoni, qui in Gallia et Liguribus erat, ex Africa et militum ampla manus missa, et pecunia, quibus auxilia conduceret: præceptumque, ut se Hannibali jungeret. Scipio a Syracusis in Bruttios trajecit, et Locros, pulso Punico præsidio, fugatoque Hannibale, recepit. Pax cum Philippo facta est. Idæa mater deportata est Romam a Pessinunte oppido Phrygiae, carmine in libris Sibyllinis invento, pelli Italia alienigenam hostem posse, si mater Idæa deportata Romam esset: tradita autem est Romanis per Attalum regem Asiæ. Lapis erat, quem matrem Deum incolæ dicebant. Excepit P. Scipio Nasica Cn. filius, ejus, qui in Hispania perierat, vir optimus a senatu judicatus, adolescens nondum quæstorius, quoniam ita responsum jubebat: ut numen id ab optimo viro recipereetur consecrareturque. Locrenses legatos Romam miserunt, qui de inpotentia Q. Pleminii legati queren-  
tentur, quod pecuniam Proserpinæ abstulerat, et liberos eorum ac conjuges stupraverat. Pleminius, in catenis Romam perductus, in carcere mortuus est. Quum fal-sus rumor de P. Scipione proconsole, qui in Sicilia

*erat, in urbem perlatus esset, tamquam is luxuriaretur; missis ob hoc legatis a senatu, qui explorarent, an ea vera essent, purgatus infamia Scipio in Africam trajecit, senatus permissu. Syphax, accepta in matrimonium filia Hasdrubalis Gisgonis, amicitiae, quam cum Scipione ipse junxerat, renunciavit. Masinissa, rex Massyliorum, dum pro Karthaginiensibus in Hispania militat, amisso patre Gala, de regno exciderat: quo per bellum s<sup>e</sup>pe repetito, aliquot praeliis a Syphace rege Numidarum victus, in totum privatus est: et cum ducentis equitibus exsul Scipioni se junxit: et cum eo primo statim bello Hannonem Hamilcaris filium cum ampla manu intereruit. Scipio, adventu Hasdrubalis et Syphacis, qui prope cum centum millibus armatorum venerant, ab obsidione Uticæ depulsus, hiberna communirit. Sempronius consul in agro Crotonensi prospere adversus Hannibalem pugnavit. Lustrum a censoribus conditum est: censa sunt civium capita ducenta quatuordecim millia. Inter censores, M. Livium et Claudium Neronem, notabilis discordia fuit: nam et Claudius Livio collegæ equum ademit, quod a populo damnatus actusque in exsiliū fuerat; et Livius Claudio, quod falsum in se testimonium dixisset, et quod non bona fide secum in gratiam redisset. Idem omnes tribus, extra unam, ærarias reliquit, quod et innocentem se damnassent, et postea consulem censorisque fecissent.*

---

# T. LIVII PATAVINI

## LIBER XXIX.

---

**S**CIPIO, postquam in Siciliam venit, voluntarios U. C. 547. milites ordinavit centuriavitque: ex iis trecen- A. C. 203. tos juvenes, florentes aetate et virium robore, inermes circa se habebat, ignorantes, quem ad usum, neque centuriati, neque armati, servarentur. Tum ex totius Siciliae juniorum numero principes genere et fortuna trecentos equites, qui secum in Africam trajicerent, legit: diemque iis, qua equis armisque instructi atque ornati adessent, edixit. Gravis ea militia, procul domo, terra marique multos labores, magna pericula adlatura videbatur; neque ipsos modo, sed parentes cognatosque eorum ea cura angebat. Ubi dies, quae dicta erat, advenit, arma equosque ostenderunt: tum Scipio, *renunciari sibi*, dixit, *quosdam equites Siculorum, tamquam gravem et duram, horrere eam militiam. Si qui ita animati essent, malle eos sibi jam tum fateri, quam postmodo querentes, segnes atque inutiles milites reipublicae esse. Exprimerent, quid sentirent: cum bona venia se auditurum.* Ubi ex his unus ausus est dicere, sc̄ prorsus, si sibi, *utrum velit, liberum esset, nolle militare;* tum Scipio ei, *Quoniam igitur, adolescens, quid sentires, non dissimulasti, ricarium tibi expediam, cui tu arma equumque et cetera instrumenta militiae tradas, et tecum hinc*

**U. C. 547.** *extempo domum ducas, exerceas, docendum cures equo*  
**A. C. 205.** *armisque.*

Læto conditionem accipienti unum ex trecentis, quos inermes habebat, tradit. Ubi hoc modo exauktoratum equitem cum gratia imperatoris ceteri viderunt, se quisque excusare, et vicarium accipere. Ita trecentis Siculis Romani equites substituti, sine publica impensa. Docendorum atque exercendorum curam Siculi habuerunt: quia edictum imperatoris erat, ipsum militaturum, qui ita non fecisset. Egregiam hanc alam equitum evasisse ferunt, multisque prœliis rempublicam adjuvisse. Legiones inde quum inspiceret, plurimorum stipendiorum ex iis milites delegit; maxime qui sub duce Marcello militaverant: quos quum optima disciplina institutos credebat, tum etiam ab longa Syracusarum obsidione peritissimos esse urbium obpugnandarum: nihil enim parvum, sed Karthaginis jam excidia agitabat animo. Inde exercitum per oppida dispergit: frumentum Siculorum civitatibus imperat; ex Italia advecto parcit: veteres naves reficit, et cum iis C. Lælium in Africam prædatum mittit; novas Panormi subducit, quia ex viridi materia raptim factæ erant, ut in siccо hibernarent. Præparatis omnibus ad bellum, Syracusas, nondum ex magnis belli motibus satis tranquillas, venit. Græci res a quibusdam Italici generis, eadem vi, qua per bellum ceperant, retinentibus, concessas sibi ab senatu, repetebant. Onnium primum ratus tueri publicam fidem, partim edicto, partim judiciis etiam in pertinaces ad obtinendam injuriam redditis, suas res Syracusanis restituit. Non ipsis tantum ea res, sed omnibus Siciliæ populis, grata fuit; eoque enisius ad bellum adjuverunt. Eadem æstate in Hispania coortum

**Scipio res Siciliæ : componit.**

**Bellum in Hispania.**

ingens bellum, conciente Ilergete Indibili, nulla alia U. C. 347.  
de caussa, quam per admirationem Scipionis con- A. C. 205.  
temtu imperatorum aliorum orto. *Eum superesse  
unum ducem Romanis, ceteris ab Hannibale interfectis,  
rebatur: eo nec in Hispania cæsis Scipionibus alium,  
quem mitterent, habuisse: et, postquam in Italia gra-  
vius bellum urgeret, adversus Hannibalem eum arcessi-  
tum: præterquam quod nomina tantum ducum in His-  
pania Romani haberent, exercitum quoque inde veterem  
deductum.* Trepida omnia, ut inconditam turbam ti-  
ronum, esse: numquam talem occasionem liberandæ  
*Hispaniæ fore.* Servitum ad eam diem aut Kartha-  
giniensibus, aut Romanis: nec in ricem his aut illis,  
sed interdum utrisque simul. Pulsos ab Romanis Kar-  
thaginienses; ab Hispanis, si consentirent, pelli Ro-  
manos posse: ut ab onni externo imperio soluta in  
perpetuum Hispania in patrios rediret mores ritusque.  
Hæc aliaque dicendo non populares modo, sed Au-  
setanos quoque, vicinam gentem, concitat, et alias  
finitimos sibi atque illis populos: itaque intra pau-  
cos dies triginta millia peditum, quatuor ferme equi-  
tum in Sedetanum agrum, quo edictum erat, conve-  
nerunt.

II. Romani quoque imperatores, L. Lentulus et  
L. Manlius Acidinus, ne gliseret prima negligendo  
bellum, junctis et ipsi exercitibus, per agrum Ause-  
tanum, hostico, tamquam pacato, clementer ductis  
militibus, ad sedem hostium pervenere: trium mil-  
lium spatio procul a castris eorum posuerunt castra.  
Primo per legatos nequidquam tentatum, ut dis-  
cederetur ab armis: dein, quum in pabulatores Ro-  
manos inpetus repente ab equitibus Hispanis factus  
esset, submisso ab statione Romana equitatu, præ-

U.C. 547. lium equestre fuit, haud sane memorando in partem  
 A.C. 205.<sup>Prælio</sup> ullam eventu. Sole oriente, postero die armati invicti Hispani. structique omnes mille ferme passus procul a castris pani.

Romanis aciem ostendere. Medii Ausetani erant: cornua dextrum Ilergetes, laevum ignobiles tenebant Hispani populi. Inter cornua et medium aciem intervalla patentia satis late fecerant; qua equitatum, ubi tempus esset, emitterent. Et Romani, more suo exercitum quum instruxissent, id modo hostium imitati sunt, ut inter legiones et ipsi patentes equiti relinquerent vias. Ceterum Lentulus, ei parti usum equitis fore ratus, quæ prior in dehiscentem intervallis hostium aciem equites emisisset, Ser. Cornelio tribuno militum imperat, equites per patentes in hostium acie vias permittere equos jubeat: ipse, cœpta parum prospere pedestri pugna, tantum moratus, dum cedenti duodecimæ legioni, quæ in laeo cornu adversus Ilergetes locata erat, tertiam decimam legionem ex subsidiis in primam aciem firmamentum dicit; postquam æquata ibi pugna est, ad L. Manlium, inter prima signa hortantem, ac subsidia, quibus res postulabat locis, inducentem, venit: indicat tuta ab laeo cornu esse: jam missum ab se Cornelium Servium procella equestri hostes circumfusurum. Vix hæc dicta dederat, quum Romani equites, in medios invecti hostes, simul pedestres acies turbarunt, simul equitibus Hispanorum viam inmittendi equos clauiserent. Itaque, omissa pugna equestri, ad pedestrem Hispani descenderunt. Romani imperatores, ut turbatos hostium ordines, et trepidationem pavoremque, et fluctuantia viderunt signa, hortantur, orant milites, *ut percuslos invadant, neu restitui aciem patientur:* non sustinuissent tam in-

festum inpetum barbari, ni regulus ipse Indibilis U.C. 547.  
 eum equitibus ad pedes degressis ante prima signa A.C. 205.  
 peditum se objecisset. Ibi aliquamdiu atrox pugna  
 stetit: tandem postquam ii, qui circa regem, semi- Indibilis  
 necem restantem, deinde pilo terræ adfixum, pugna- occisus,  
 bant, obruti telis obcubuerunt, tum fuga passim  
 cœpta, pluresque cæsi, quia equos condescendi  
 equitibus spatiū non fuerat, et quia perculis acriter institerunt Romani: nec ante abscessum est,  
 quam castris quoque exuerunt hostem. Tredecim  
 millia Hispanorum cæsa eo die, octingenti ferme  
 capti. Romanorum socrorumque paullo amplius  
 ducenti, maxime in lævo cornu, ceciderunt. Pulsi  
 castris Hispani, aut qui ex prælio effugerant, sparsi  
 primo per agros, deinde in suas quisque civitates re-  
 dierunt.

III. Tum a Mandonio evocati in concilium, con- Dedunt se  
 questique ibi clades suas, increpitis auctoribus belli, Hispani.  
 legatos mittendos ad arma tradenda deditonemque  
 faciendam censuerunt. Quibus, culpam in aucto-  
 rem belli Indibilem, ceterosque principes, quorum  
 plerique in acie cecidissent, conferentibus, tradenti-  
 busque arma, et deditentibus sese, responsum est: *In*  
*deditonem ita accipi eos, si Mandonium ceterosque belli*  
*concitores tradidissent vivos: sin minus, exercitus se in*  
*agrum Ilergetum Ausetanorumque, et deinceps aliorum*  
*populorum ducturos.* Hæc dicta legatis, renunciata-  
 que in concilium. Ibi Mandonius ceterique princi- Mandonius  
 pes comprehensi et traditi ad supplicium. Hispaniæ traditus ad  
 populis redditā pax: stipendium ejus anni duplex et suppli-  
 cium. frumentum sex mensium imperatum, sagaue et togæ  
 exercitui, et obsides ab triginta fernie populis ac-  
 cepti. Ita Hispaniæ rebellantis tumultu, haud mag-

U. C. 547. no motu, intra paucos dies concito et compresso, in  
 A. C. 205. Africam omnis terror versus. C. Lælius nocte ad  
 Lælius  
 classe  
 Africam  
 populatur. Hipponem Regium cum accessisset, luce prima ad  
 populandum agrum sub signis milites sociosque na-  
 vales duxit. Omnibus, pacis modo incuriose agen-  
 tibus, magna clades inlata: nuncique trepidi Kar-  
 thaginiem terrore ingenti complevere, classem Ro-  
 manam Scipionemque imperatorem (et fama fuerat  
 jam in Siciliam transgressum) advenisse. Nec quot  
 naves vidissent, nec quanta manus agros populare-  
 tur, satis guari, omnia in majus, metu augente, ac-  
 cipiebant: itaque primo terror pavorque, dein mœ-  
 stitia animos incessit: *tantum fortunam mutasse, ut,*  
*qui modo ipsi exercitum ante mænia Romana habuissent*  
*victores, stratisque tot hostium exercitibus, omnes Italæ*  
*populos aut vi aut voluntate in deditioñem accepissent;*  
*ii, verso Marte, Africæ populationes et obsidionem Kar-*  
*thaginiis visuri forent, nequaquam pari ad patienda ea*  
*robore, ac Romani fuissent. Illis Romanum plebem,*  
*illis Latium juventutem præbuisse; majorem semper*  
*frequentioremque pro tot cæsis exercitibus subolescen-*  
*tem. Suam plebem inbellem in urbe, inbellem in agris*  
*esse: mercede parari auxilia ex Afri, gente ad omnem*  
*auram spei mobili atque infida. Jam reges, Syphacem*  
*post conloquium cum Scipione alienatum; Masinissam*  
*aperta defectione infestissimum hostem: nihil usquam*  
*spei, nihil auxilii esse. Nec Magonem ex Gallia mo-*  
*vere tumultus quidquam, nec conjungere sese Hannibali:*  
*et Hannibalem ipsum jam et fama senescere, et viribus.*

IV. In hæc deflenda prolapsos ab recenti nuncio  
 animos rursus terror instans revocavit ad consultan-  
 dum, quonam modo obviam præsentibus periculis  
 iretur. Delectus raptim in urbe agrisque haberí

placet, mittere ad conducenda Afrorum auxilia, mu- U. C. 547.  
 nire urbein, frumentum convehere, tela, arma pa- A. C. 205.  
 rare, instruere naves ac mittere ad Hipponeum ad-  
 versus Romanam classem. Jam hæc agentibus  
 nuncius tandem venit, Lælium, non Scipionem, co-  
 piisque, quantæ ad incursiones agrorum, satis sint,  
 transvectas; summæ belli molem adhuc in Sicilia  
 esse. Ita respiratum, mittique ad Syphacem lega-  
 tiones, aliosque regulos, firmandæ societatis caussa,  
 cœptæ. Ad Philippum quoque missi, qui ducenta  
 argenti talenta pollicerentur, ut in Siciliam aut in  
 Italiam trajiceret. Missi et ad duos imperatores in  
 Italiam, ut omni terrore Scipionem retinerent: ad  
 Magonem non legati modo, sed viginti quinque naves  
 longæ, sex millia peditum, octingenti equites, sep-  
 tem elephanti, ad hoc magna pecunia ad conducen-  
 da auxilia, quibus fretus propius urbem Romanam  
 exercitum admoveret, conjungeretque se Hannibali.  
 Hæc Karthagine parabant agitabantque. Ad Læ-  
 lium prædas ingentes ex agro inermi ac nudo præ-  
 sidiis agentem Masinissa, fama Romauæ classis ex-  
 citus, cum equitibus paucis venit. Is segniter rem *Masinissa*  
*agi ab Scipione* questus, *quod tum non jam exercitum* <sup>ad Lælium</sup> *venit.*  
*in Africam trajecisset, perculis Karthaginiensibus, Sy-*  
*phace inpedito finitimis bellis, quem incertum hærere;*  
*si spatium ad sua, ut velit, componenda detur, nihil*  
*sincera fide cum Romanis acturum. Hortaretur, ac*  
*stimularet Scipionem, ne cessaret. Se, quamquam reg-*  
*no pulsus esset, cum haud contempnendis copiis adfutu-*  
*rum peditum equitumque. Nec ipsi Lælio morandum*  
*in Africa esse: classem credere profectam a Kartha-*  
*gine, cum qua, absente Scipione, non satis tutum esse*  
*contrahi certamen.*

**U.C. 547.** V. Ab hoc sermone dimisso Masinissa, Lælius  
**A. C. 205.**

postero die naves præda onustas ab Hippone solvit, revectusque in Siciliam mandata Masinissæ Scipioni exposuit. Eisdem ferme diebus naves, quæ ab Karthagine ad Magonem missæ erant, inter Albingau nos Ligures Genuamque accesserunt. In iis locis tum forte Mago tenebat classem: qui, legatorum auditis verbis, jubentium exercitus quam maximos

**Magonis** comparare, extemplo Gallorum et Ligurum (nam-  
cum **Ligu-**  
ribus Gal- que utriusque gentis ingens ibi multitudo erat) con-  
lisque cilium habuit: *et, missum se ad eos vindicandos in li-*  
consilia. *bertatem, ait, et, ut ipsi cernant, mitti sibi ab domo*  
*præsidia: sed, quantis viribus, quanto exercitu id bel-*  
*lum geratur, in eorum potestate esse. Duos exercitus*  
*Romanos, unum in Gallia, alterum in Etruria esse:*  
*satis scire, Sp. Lucretium se cum M. Livio juncturum:*  
*multa millia ipsis etiam armanda esse, ut duobus duci-*  
*bus, duobus exercitibus Romanis resistatur. Galli, sum-*  
*mam ad id suam voluntatem esse, dicere: sed, quum*  
*una castra Romana intra fines, altera in finitima terra*  
*Etruria prope in conspectu habeant, si palum fiat auxi-*  
*liis adjutum ab sese Pænum, extemplo infestos utrim-*  
*que exercitus in agrum suum incursuros. Ea ab Gallis*  
*desideraret, quibus occulte adjuvari posset. Liguri-*  
*bus, quod procul agro urbibusque eorum castra Romana*  
*sint, libera consilia esse: illos armare juventutem, et*  
*capessere pro parte bellum, æquum esse. Ligures haud*  
*abnuere: tempus modo duorum mensium petere ad*  
*delectus habendos. Interim Mago milites, Gallis di-*  
*missis, clam per agros eorum mercede conducere:*  
*commeatus quoque omnis generis occulte ad eum a*  
*Gallis populis mittebantur. M. Livius exercitum*  
*volonum ex Etruria in Galliam traducit: junctusque*

Lucretio, si se Mago ex Liguribus propius urbem U. C. 547.  
moveat, obviam ire parat: si Pœnus sub angulo A. C. 205.  
Alpium quietus se contineat, et ipse in eadem re-  
gione circa Ariminum Italæ præsidio futurus.

VI. Post reditum ex Africa C. Lælii, et Scipione  
stimulato Masinissæ adhortationibus, et militibus,  
prædam ex hostium terra cernentibus tota classe  
efferri, accensis, ad trajiciendum quam primum, in-  
tervenit majori minor cogitatio, Locros urbem reci- Loci re-  
piendi, quæ sub defectionem Italæ desciverat et ipsa cepti.  
ad Pœnos. Spes autem affectandæ ejus rei ex mi-  
nima re adfulsit. Latrociniis magis, quam justo  
bello, in Bruttiis gerebantur res; principio ab Nu-  
midis facto, et Bruttiis, non societate magis Punica,  
quam suopte ingenio, congruentibus in eum morem.  
Postremo Romani quoque, jam contagione quadam  
rapto gaudentes, quantum per duces licebat, excur-  
siones in hostium agros facere. Ab iis egressi qui-  
dam urbem Locrenses circumventi, Rhegiumque  
abstracti fuerant: in eo captivorum numero fabri  
quidam fuere, adsueti forte apud Pœnos mercede  
opus in arce Locorum facere. Ii, cogniti ab Lo-  
crensium principibus, qui pulsi ab adversa factione,  
quæ Hannibali Locros tradiderat, Rhegium se con-  
tulerant, quum cetera percunctantibus, (ut mos est,  
qui diu absunt) quæ domi agerentur, exposuissent,  
spem fecerunt, si redemti ac remissi forent, areem  
se iis tradituros: ibi se habitare, fidemque sibi rerum  
omnium inter Karthaginienses esse. Itaque, ut qui  
simul desiderio patriæ angerentur, simul cupiditate  
inimicos ulciscendi arderent, redemitis exemplo iis  
remissisque, quum ordinem agendæ rei composuis-

U.C. 547. sent, signaque, quæ procul edita observarent, ipsi  
A.C. 205. ad Scipionem Syracusas profecti, apud quem pars  
exsulum erat, referentes ibi promissa captivorum,  
quum spem ab effectu haud abhorrentem consuli fe-  
cissent; tribuni militum cum iis M. Sergius et P.  
Matienus missi, jussique ab Regino tria milia mili-  
tum Locros ducere: et Q. Pleminio proprætori  
scriptum, ut rei agendæ adesset. Profecti ab Regino,  
scalas ad editam altitudinem arcis fabricatas  
portantes, media ferme nocte ex eo loco, unde con-  
venerat, signum dedere proditoribus arcis: qui pa-  
rati intentique, et ipsi scalas ad id ipsum factas  
quum demisissent, pluribusque simul locis scanden-  
tes accepissent, priusquam clamor oriretur, in vigiles  
Pœnorum, ut in nullo tali metu, sopitos inpetus est  
factus: quorum gemitus primo morientium exaudi-  
tus; deinde subita consternatio ex somno et tumultu  
quum caussa ignoraretur; postremo certior res,  
aliis excitantibus alios; jamque *ad arma* pro se quis-  
que vocabat: *hostes in arce esse, et cædi vigiles*: ob-  
pressisque forent Romani, nequaquam numero pares,  
ni clamor, ab iis, qui extra arcem erant, sublatus,  
incertum, unde accidisset, (omnia vana augente noc-  
turno tumultu) fecisset. Itaque velut plena jam  
hostium arce territi Pœni, omissa certamine, in alte-  
ram arcem (duæ sunt haud multum inter se distantes)  
confugiunt. Oppidani urbem habebant, victoribus  
præmium in medio positam. Ex arcibus duabus  
præliis quotidie levibus certabatur. Q. Pleminius  
Romano, Hamilcar Punico præsidio præerat: arces-  
sentes ex propinquis locis subsidia copias augebant.  
Ipse postremo veniebat Hannibal: nec sustinuerint

Romani, nisi Locrensum multitudo, exacerbata su- U. C. 547.  
perbia atque avaritia Pœnorum, ad Romanos incli- A. C. 205.  
nasset.

VII. Scipioni ut nunciatum est, in majore diserimine Locris rem verti, ipsumque Hannibalem adventare; ne præsidium etiam periclitaretur, haud facili inde receptu, et ipse a Messana, L. Scipione fratre in præsidio ibi relicto, quum primum æstu freatum inclinatum est, naves mari secundo misit. Et Hannibal, a Butroto amni (haud procul is ab urbe Locris abest) nuncio præmisso, ut sui luce prima sunima vi prælium cum Romanis ac Locrensibus consererent, dum ipse, aversis omnibus in eum tumultum, ab tergo urbem incautam adgredederetur, ubi luce cœptam invenit pugnam, ipse nec in arcem se includere, turba locum artum impediturus, voluit; neque scalas, quibus scanderet muros, adtulerat: sarcinis in acervum conjectis, quum haud procul muris ad terrorem hostium aciem ostendisset, cum equitibus Numidis circumequitabat urbem, dum scalæ, quæque alia ad obpugnandum opus erant, parantur, ad visendum qua maxime parte adgredetur: progressus ad murum, scorpione icto, qui proximus eum forte steterat, territus inde tam periculoso casu, receptui canere quum jussisset, castra procul ab ietu teli communiit. Classis Romana a Messana Locros, aliquot horis die superante, accessit: expositi omnes e navibus, et ante occasum solis urbem ingressi sunt. Postero die cœpta ex arce a Pœnis pugna; et Hannibal, jam scalis aliisque omnibus ad obpugnationem paratis, subibat muros: quum repente in eum, nihil minus quam tale quidquam timentem, patesfacta porta crumpunt Romani:

U. C. 547. ad ducentos improvidos, quum invasissent, occidunt:  
 A. C. 205. ceteros Hannibal, ut consulem adesse sensit, in cas-  
 tra recipit; nuncioque misso ad eos, qui in arce  
 erant, ut sibimet ipsi consulerent, nocte motis cas-  
 tris abiit. Et qui in arce erant, igni injecto tectis,  
 quæ tenebant, ut is tumultus bosteni moraretur, ag-  
 men suorum fugæ simili cursu ante noctem adsecuti  
 sunt.

VIII. Scipio, ut et arcem relictam ab hostibus et  
 vacua vidit castra, vocatos ad concionem Locrenses  
 graviter ob defectionem incusavit: de auctoribus  
 supplicium sumsit, bonaque eorum alterius factionis  
 principibus, ob egregiam fidem adversus Romanos,  
 concessit. *Publice nec dare, nec eripere se quidquam*  
*Locrensisbus, dixit, Romam mitterent legatos: quam*  
*senatus æquum censuisset, eam fortunam habituros. Il-*  
*lud satis scire, etsi male de populo Romano meriti*  
*essent, in meliore statu sub iratis Romanis futuros,*  
*quam sub amicis Karthaginiensibus fuerint.* Ipse, Q.  
 Pleminio legato prædioque, quod arcem ceperat, ad  
 tuendam urbem relicto, cum quibus venerat copiis,  
 Pleminius Messanam trajecit. Ita superbe et crudeliter habiti  
 præf. Lo-  
 cris crude-  
 liter se ge-  
 rit.      Locrenses ab Karthaginiensibus post defectionem  
 ab Romanis fuerant, ut modicas injurias non æquo  
 modo animo pati, sed prope lubenti possent: verum  
 enimvero tantum Pleminius Hamilcarem præsidii  
 præfectum, tantum præsidiarii milites Romani Pœ-  
 nos scelere atque avaritia superaverunt, ut non ar-  
 mis, sed vitiis videretur certari: nihil omnium, quæ  
 inopi invisas opes potentioris faciunt, prætermissum  
 in oppidanos est ab duce, aut a militibus: in corpora  
 ipsorum, in liberos, in conjuges infandæ contumeliae  
 Ejus ava- editæ. Nam avaritia ne sacrorum quidem spolia-  
 ritia.

tione abstinuit: nec alia modo templa violata, sed U. C. 547.  
 Proserpinæ etiam, intacti omni ætate, thesauri; præ- A. C. 205.  
 terquam quod a Pyrrho, qui cum magno piaculo sa-  
 crilegii sui manubias retulit, spoliati dicebantur.  
 Ergo sicut ante regiæ naves, laceratæ naufragiis,  
 nihil in terram integri, præter sacram pecuniam  
 Deæ, quam asportabant, extulerant; tum quoque  
 alio genere cladis eadem illa pecunia omnibus con-  
 tactis ea violatione templi furorem objecit, atque  
 inter se ducem in ducem, militem in militem rabie  
 hostili vertit.

IX. Summæ rei Pleminius præerat: militum pars Pugna inter  
 sub eo, quam ipse ab Regino abduxerat, pars sub milites  
 tribunis erat. Rapto poculo argenteo ex oppidani Romanos.  
 domo Pleminii miles fugiens, sequentibus quorum  
 erat, obvius forte Sergio et Matieno tribunis mili-  
 tum fuit: cui quum jussu tribunorum adeintum  
 poculum esset, jurgium inde et clamor, pugna pos-  
 tremo orta inter Pleminii milites, tribunorunque;  
 ut suis quisque opportunus advenerat, multitudine  
 simul ac tumultu crescente. Victi Pleminii milites  
 quum ad Pleminium, cruorem ac vulnera ostentan-  
 tes, non sine vociferatione atque indignatione con-  
 currissent, probra in eum ipsum jactata in jurgiis  
 referentes; accensus ira domo sese proripuit, voca-  
 toisque tribunos nudari, ac virgas expediri jubet.  
 Dum spoliandis iis (repugnabant enim, militemque  
 implorabant) tempore teritur, repente milites, fero-  
 ces recenti victoria, ex omnibus locis, velut aduersus  
 hostes ad arma conclamatum esset, concurrerunt:  
 et, quum violata jam virgis corpora tribunorum vi-  
 disserint, tum vero in multo inpotentiores subito ra-  
 biem accensi, sine respectu, non majestatis modo,

U. C. 547. sed etiam humanitatis, in legatum inpetum, lictoribus prius indignum in modum mulcatis, faciunt: A. C. 205. tum ipsum, ab suis interceptum et seclusum, hostiliter lacerant, et prope exsanguem, naso auribusque mutilatis, relinquunt. His Messanam nunciatis, Scipio, post paucos dies Locros hexeri advectus, quum caussam Pleminii et tribunorum audisset, Pleminio noxa liberato, relichtoque in ejusdem loci praesidio, tribunnis sontibus judicatis, et in vincula conjectis, ut Romam ad senatum mitterentur, Messanam atque inde Syracusas rediit. Pleminius inpotens irae, neglectam ab Scipione et nimis leviter latam suam injuriam ratus, nec quemquam aestimare alium eam litem posse, nisi qui atrocitatem ejus patiendo sensisset, tribunos adtrahi ad se jussit; laceratosque omnibus, quae pati corpus ullum potest, suppliciis interfecit: nec satiatus vivorum pena, insepultos projectit. Simili crudelitate et in Locrensum principes est usus, quos ad conquerendas injurias ad P. Scipionem profectos audivit: et, quae antea per libidinem atque avaritiam foeda exempla in socios ediderat, tunc ab ira multiplicia edere: infamiae atque invidiae non sibi modo, sed etiam imperatori, esse.

Licinii exercitus morbo adfectus. X. Jam comitorum adpetebat tempus, quum P. Licinii consulis literae Romam adlatae, se exercitumque suum gravi morbo adfectari: nec sisti potuisse, ni eadem vis mali, aut gravior etiam, in hostes ingruisset. Itaque, quoniam ipse venire ad comitia non posset, si ita Patribus videretur, se Q. Cæcilium Metellum dictatorem comitorum caussa dicturum: exercitum Q. Cæcilii dimitti, e republica esse. Nam neque usum ejus ullum in praesentia esse, quum Hannibal jam in hiberna suos receperit; et tanta incesserit in ea castra vis mor-

*bi, ut, nisi mature dimittantur, nemo omnium supersfuiturus videatur: ea consuli a Patribus facienda, ut e republica fideque sua duceret, permissa. Civitatem eo tempore repens religio invaserat, invento carmine in libris Sibyllinis, propter crebrius eo anno de cœle lapidatum inspectis. Quandoque hostis alienigena terræ Italiæ bellum intulisset, eum pelli Italia vincique posse, si mater Idæa a Pessinunte Romam advecta foret. Id carmen ab decemviris inventum eo magis Patres movit, quod et legati, qui donum Delphos portaverant, referebant: et sacrificantes ipsos Pythio Apollini litavisse, et responsum oraculo editum, majorem multo victoriam, quam cuius ex spoliis dona portarent, adesse populo Romano. In ejusdem spei summam conferebant P. Scipionis velut præsagientem animum de fine belli, quod depoposcerisset provinciam Africam. Itaque quo maturius fatis, ominibus, oraculisque portendentis sese victoriæ compotes fierent, id cogitare, quæ ratio transportandæ Romam Deæ esset.*

XI. Nullas dum in Asia civitates socias habebat Mater Idæa populus Romanus: tamen memores, Æsculapium ex Asia pe- quoque ex Græcia quondam, haudum ullo fœdere titur. sociata, valetudinis populi caussa arcessitum, et jam cum Attalo rege, propter commune adversus Philip- pum bellum, cœptam amicitiam esse, facturum eum, quæ possit, populi Romani caussa, legatos ad eum decernunt, M. Valerium Lævinum, qui bis consul fuerat, ac res in Græcia gesserat, M. Cæciliū Metellum prætorium, Ser. Sulpiciū Galbam ædilitium, duos quæstорios, Cn. Tremellium Flaccum, et M. Valerium Faltonem. His quinque naves quinquemates,

U. C. 547. ut ex dignitate populi Romani adirent eas terras, ad  
A. C. 205. quas concilianda majestas nomini Romano esset,  
decernunt. Legati Asiam petentes protinus Delphos  
quum escendissent, oraculum adierunt, consulentes,  
ad quod negotium domo missi essent, perficiendi  
ejus, quam sibi spem populoque Romano portende-  
ret. Responsum esse ferunt, *Per Attalum regem  
compotes ejus fore, quod peterent: quum Romam Deam  
deverissent, tum curarent, ut eam, qui vir optimus  
Romæ esset, hospitio exciperet.* Pergaenum ad regem  
venerunt. Is legatos comiter acceptos Pessinuntiem  
in Phrygiam deduxit: sacrumque iis lapidem, quam  
matrem Deum esse incolae dicebant, tradidit, ac de-  
portare Romam jussit. Præmissus ab legatis M.  
Valerius Falto nunciavit, Deam ad portari: quærend-  
dum virum optimum in civitate esse, qui eam rite  
hospitio exciperet. Q. Cæcilius Metellus dictator  
ab consule in Bruttiis comitiorum caussa dictus,  
exercitusque ejus dimissus: magister equitum L.  
Veturius Philo. Comitia per dictatorem habita.  
Consules facti M. Cornelius Cethagus, P. Semipro-  
nius Tuditanus absens, quum provinciam Græciam  
haberet. Prætores inde creati, Ti. Claudius Nero,  
M. Marcius Ralla, L. Scribonius Libo, M. Pompo-  
nius Matho. Comitiis peractis, dictator sese magis-  
tratu abdicavit. Ludi Romani ter, plebeii septies  
instaurati. Curules erant ædiles Cn. et L. Cornelii  
Lentuli. Lucius Hispaniam provinciam habebat:  
absens creatus, absens cum honorem gessit. Ti.  
Claudius Asellus et M. Junius Pennus plebeii ædiles  
fuerunt. Ædem Virtutis eo anno ad portam Cape-  
nam M. Marcellus dedicavit, septimodecimo anno

postquam a patre ejus primo consulatu vota in Gal- U.C. 517.  
lia ad Clastidium fuerat. Et flamen Martialis eo A.C. 205.  
anno est mortuus M. Æmilius Regillus.

XII. Neglectæ eo biennio res in Graecia erant : itaque Philippus Ætolos, desertos ab Romanis, cui Ætoli pa-  
uni fidebant auxilio, quibus voluit conditionibus, ad cem cum  
petendam et paciscendam subegit pacem : quod nisi ciunt.  
omni vi perficere maturasset, bellantem eum cum  
Ætolis P. Sempronius proconsul, successor imperii  
missus Sulpicio, cum decem millibus peditum, et  
mille equitibus, et triginta quinque rostratis navibus  
(haud parvum momentum ad opem ferendam sociis)  
obpressisset. Vixdum pace facta, nuncius regi ve-  
nit, Romanos Dyrrachium venisse : Parthinosque et  
propinquas alias gentes motas esse ad spem novandi  
res: Dimallumque obpugnari. Eo se verterant Ro-  
mani ab Ætolorum, quo missi erant, auxilio, irati,  
quod sine auctoritate sua adversus fœdus cum rege  
pacem fecissent. Ea quum audisset Philippus, ne  
qui motus major in finitimis gentibus populisque  
oriretur, magnis itineribus Apolloniam contendit ;  
quo Sempronius se receperat, misso Lætorio legato  
cum parte copiarum et quindecim navibus in Æto-  
liam, et ad visendas res, pacemque, si posset, tur-  
bandam. Philippus agros Apolloniatum vastavit,  
et, ad urbem admotis copiis, potestatem pugnæ Ro-  
mano fecit : quem postquam quietum muros tan-  
tummodo tueri vidit, nec satis fidens viribus, ut ur-  
bem obpugnaret, et cum Romanis quoque, sicut  
cum Ætolis, cupiens pacem, si posset, sin minus,  
inducias facere, nihil ultra irritatis novo certamine  
odis, in regnum se recepit. Per idem tempus, tæ-  
dio diutini belli, Epirotæ, tentata prius Romanorum Itemque  
Romani.

U.C. 547. voluntate, legatos de pace communi ad Philippum  
 A.C. 205. misere; satis confidere, conventuram eam, adfir-  
 mantes, si ad conloquiun cum P. Sempronio impe-  
 ratore Romano venisset. Facile inpetratum, (ne-  
 que enim ne ipsius quidem regis abhorrebat animus)  
 ut in Epirum transiret. Phœnice urbs est Epi :  
 ibi prius conlocutus rex cum Aëropo, et Darda, et  
 Philippo Epirotarum prætoribus, postea cum P.  
 Sempronio congreditur. Adfuit conloquio et Amy-  
 nander Athamanum rex, et magistratus alii Epirota-  
 rum et Acarnanum. Primus Philippus prætor verba  
 fecit, et petiit simul ab rege et ab imperatore Ro-  
 mano, ut finem belli facerent, darentque eam Epi-  
 rotis veniani. P. Sempronius conditiones pacis  
 dixit, ut Parthini, et Dimalluni, et Bargulum, et  
 Eugenium Romanorum essent. Atintania, si, mis-  
 sis Romam legatis, ab senatu inpetrasset, Macedoni  
 accederet. In eas conditiones quum pax conveni-  
 ret, ab rege fœderi adscripti, Prusia Bithyniæ rex,  
 Achæi, Bœoti, Thessali, Acarnanes, Epirotæ : ab  
 Romanis, Ilienses, Attalns rex, Pleuratus, Nabis  
 Lacedæmoniorum tyrannus, Elei, Messenii, Athe-  
 nienses. Hæc conscripta consignataque sunt, et in  
 duos menses induciae factæ, donec Romam mitteren-  
 tur legati, ut populus in has conditiones pacem ju-  
 beret: jussuruntque omnes tribus: quia, verso in  
 Africam bello, omnibus aliis in præsentia levari vo-  
 lebant bellis. P. Sempronius, pace facta, ad consul-  
 latum Romam decessit.

U.C. 548. XIII. P. Sempronio, M. Cornelio consulibus  
 A.C. 204. (quintusdecimus is annus Punici belli erat) provin-  
 ciæ, Cornelio Etruria cum vetere exercitu, Sempro-  
 nio Brutii, ut novas scriberet legiones, decretæ.

Prætoribus, M. Marcio urbana, L. Scribonio Liboni U. C. 548.  
A. C. 204.  
peregrina, et eidem Gallia, M. Pomponio Mathoni Sicilia, Ti. Claudio Neroni Sardinia evenit. P. Scipioni cum eo exercitu, cum ea classe, quam habebat, prorogatum in annum imperium est: item P. Licinio, ut Bruttios cum duabus legionibus obtineret, quoad eum in provincia cum imperio morari consuli e republica visum esset. Et M. Livio, et Sp. Lucretio, cum binis legionibus, quibus adversus Magonem Galliæ præsidio fuissent, prorogatum imperium est. Et Cn. Octavio, ut, cum Sardiniam legionemque Ti. Claudio tradidisset, ipse navibus longis quadraginta maritimam oram, quibus finibus senatus censuisset, tutaretur. M. Pomponio prætori in Sicilia Cannensis exercitus duæ legiones decretae. T. Quinctius Tarentum, C. Hostilius Tubulus Capuam, proprætores, sicut priore anno, cum vetere uterque præsidio, obtinerent. De Hispaniæ imperio, quos in eam provinciam duos proconsules mitti placeret, latum ad populum est. Omnes tribus eosdem, L. Cornelium Lentulum et L. Manlium Acidinum, proconsules, sicut priore anno tenuissent, obtainere eas provincias jussérunt. Consules delectum habere instituerunt, et ad novas scribendas in Bruttios legiones, et in ceterorum (ita enim jussi ab senatu erant) exercituum supplementum.

XIV. Quamquam nondum aperte Africa provincia decreta erat, (occultantibus id, credo, Patribus, ne præscicerent Karthaginienses) tamen in eam spem erecta civitas erat, in Africa eo anno debellatum iri, finemque bello Punico adesse. Inpleverat ea res superstitionum animos, pronique et ad nuncianda, et ad credenda prodigia erant: eo plura vul-

U.C. 548. gabantur. *Duos soles visos : et nocte interluxisse : et A. C. 204.* *fæem Setiæ ab ortu solis ad occidentem porrigi visam.*

*Tarracina portam, Anagniæ et portam et multis locis murum de cælo tactum. In æde Junonis Sospitæ Lanurii cum horrendo fragore strepitum editum.* Eorum procurandorum caussa diem unum supplicatio fuit : et novemdiale sacrum, quod de cælo lapidatum esset, factum. Eo accessit consultatio de matre Idæa accipienda, quam præterquam quod M. Valerius, unus ex legatis prægressus, actutum in Italia fore nunciaverat, recens nuncius aderat, Tarracinæ jam esse. Haud parvæ rei iudicium senatum tenebat, qui vir optimus in civitate esset. Veram certe victoriam ejus rei sibi quisque mallet, quam ulla imperia honoresve, suffragio seu Patrum, seu plebis delatos.

P. Scipio  
judicatus  
vir optimus.

P. Scipionem, Cn. filium, ejus qui in Hispania ceciderat, adolescentem nondum quæstorum, judicaverunt in tota civitate virum bonorum optimum esse :

Obviam  
it matri  
deûm,  
cum ma-  
tronis.

id quibus virtutibus inducti ita judicarint, sicut proditum a proximis memoriae temporum illorum scriptoribus libens posteris traderem ; ita meas opiniones, conjectando rem vetustate obrutam, non interponam. P. Cornelius cum omnibus matronis Ostiam ire jussus obviam Deæ, isque eam de nave accipere, et in terram elatam tradere ferendam matronis. Postquam navis ad ostium amnis Tiberini accessit, sicut erat jussus, in salum nave evectus, ab sacerdotibus Deam accepit, extulitque in terram. Matronæ primores civitatis, inter quas unius Claudiæ Quintæ insigne est nomen, accepere : cui dubia (ut traditur) antea fama clariorem ad posteros tam religioso ministerio pudicitiam fecit. Eæ per manus, succeden-tes deinceps aliæ aliis, omni effusa civitate obviam,

thuribulis ante januas positis, qua præferebatur, at- U. C. 543.  
que accenso thure, precantibus, ut volens propitia- A. C. 204.  
que urbem Romanam iniret, in ædem Victoriæ, quæ  
est in Palatio, pertulere Deam pridie Idus Aprilis;  
isque dies festus fuit: populus frequens dona Deæ  
in Palatium tulit, lectisterniumque et ludi fuere,  
Megalesia adpellata.

Megalesia.

XV. Quum de supplemento legionum, quæ in  
provinciis erant, ageretur; *tempus esse*, a quibusdam  
senatoribus subiectum est, *quæ dubiis in rebus utcum-  
que tolerata essent*, ea, *demto jam tandem Deūm be-  
nignitate metu, non ultra pati*. Erectis exspectatione  
Patribus, subjecerunt: *colonias Latinas duodecim,*  
*quæ Q. Fabio et Q. Fulvio consulibus abnuissent milites*  
*dare, eas annum jam ferme sextum vacationem militiæ,*  
*quasi honoris et beneficii caussa, habere: quum interim*  
*boni obedientesque socii, pro fide atque obsequio in po-  
pulum Romanum, continuis omnium annorum delecti-  
bus exhausti essent.* Sub hanc vocem non memoria  
magis Patribus renovata rei prope jam oblitteratae,  
quam ira irritata est: itaque, nihil prius referre  
consules passi, decreverunt, *ut consules magistratus* S. C. de co-  
*denosque principes Nepete, Sutrio, Ardea, Calibus,* loniis quæ  
*Alba, Carseolis, Sora, Suessa, Setia, Circeiis, Narnia,* milites non  
*Interamna, (eæ namque coloniæ in ea caussa erant)* dederant.  
*Romani excirent: iis imperarent, quantum quæque ea-  
rum coloniarum militum plurimum dedisset populo Ro-  
mano, ex quo hostes in Italia essent, duplicatum ejus*  
*summæ numerum peditum daret, et equites centenos vi-  
cenos: si qua eum numerum equitum exple re non pos-  
set, pro equite uno tres pedites liceret dare: pedites.*  
*equitesque quam locupletissimi legerentur, mitterentur-  
que, ubicumque extra Italiam supplemento opus esset.*

**U. C. 548.** *Si qui ex iis recusarent, retineri ejus coloniæ magistratus legatosque placere: neque, si postularent, senatum*

**A. C. 204.** *dari, priusquam imperata fecissent: stipendium præterea iis coloniis in millia æris asses singulos imperari exigique quotannis: censumque in iis coloniis agi ex formula ab Romanis censoribus data: dari autem placere eamdem, quam populo Romano: deferrique Romanam ab juratis censoribus coloniarum, priusquam magistratu abirent. Ex hoc senatusconsulto, adeitis Romanam magistratibus primoribusque earum coloniarum, consules quum militem stipendiumque imperassent, alii aliis magis recusare ac reclamare: negare tantum militum effici posse: vix, si simplum ex formula imperetur, ensuros. Orare atque obsecrare, ut sibi, senatum adire ac deprecari liceret: nihil se, quare perire merito deberent, admisisse: sed, si pereundum etiam foret, neque suum delictum, neque iram populi Romani, ut plus militum darent, quam haberent, posse efficere. Consules obstinati manere legatos Romæ jubent; magistratus ire domos ad delectus habendos: nisi summa militum, quæ imperata esset, Romam adducta, neminem iis senatum daturum. Ita præcisa spe senatum adeundi deprecandique, delectus in iis duodecim coloniis, per longam vacationem numero juniorum aucto, haud difficulter est perfectus.*

*Privatis  
jubetur  
reddi con-  
lata pecu-  
nia.*

- XVI. Altera item res, prope æque longo neglecta silentio, relata a M. Valerio Lævino est: qui, privatis conlatas pecunias, se ac M. Claudio consulibus, reddi tandem, æquum esse dixit: nec mirari quemquam debere, in publica obligata fide suam præcipuam curans esse. Nam, præterquam quod aliquid propriæ ad consulem ejus anni, quo conlatæ pecuniæ essent, pertineret,

*etiam se auctorem ita conferendi fuisse, inopi aerario, U. C. 548.  
nec plebe ad tributum sufficiente. Grata ea Patribus A. C. 204.  
admonitio fuit: jussisque referre consulibus, deere-  
verunt, ut tribus pensionibus ea pecunia solveretur:  
primam praesentem ii, qui tum essent, duas tertii et  
quinti consules numerarent. Omnes deinde alias cu-  
ras una occupavit, postquam Loerensium clades,  
quae ignoratae ad eam diem fuerant, legatorum ad-  
ventu vulgatae sunt: nec tam Q. Pleminii scelus,  
quam Scipionis in eo aut ambitio aut negligentia  
iras hominum irritavit. Decem legati Loerenium,  
obsiti squalore et sordibus, in comitio sedentibus  
consulibus velamenta supplicum, ramos oleae, (ut  
Græcis mos est) porrigentes, ante tribunal cum fle-  
bili vociferatione humili procubuerunt. Quærerentibus  
consulibus Locrenses se dixerunt esse, ea passos a Q.  
Pleminio legato Romanisque militibus, quæ pati ne  
Karthaginienses quidem velit populus Romanus. Ro-  
gare, uti sibi patres adeundi, deplorandique aerumnas  
suas potestatem facerent.*

XVII. Senatu dato, maximus natu ex iis: *Scio, Lorensianum  
quanti aestimentur nostræ apud vos querelæ, Patres um legati  
conscripti, plurimum in eo momenti esse, si probe scia- deplorant  
tis, et quomodo prodiit Locri Hannibali sint, et quo- fortunas  
modo, pulso Hannibal's præsidio, restituti in ditionem suas.  
restram: quippe si et culpa defectionis procul a publico  
consilio absit, et redditum in vestram ditionem adpareat,  
non voluntate solum, sed ope etiam ac virtute nostra;  
magis indignemini, bonis ac fideilibus sociis tam atroces  
atque indignas injurias ab legato vestro militibusque  
fieri. Sed ego caussam utriusque defectionis nostræ in  
aliud tempus differendam arbitror esse, duarum rerum  
gratia: unius, ut coram P. Scipione, qui Locros rece-*

U. C. 548. pit, omnium nobis recte perperamque factorum testis,  
 A. C. 204. agatur; alterius, quod, qualescumque sumus, tamen  
 haec, quae passi sumus, pati non debuimus. Non possu-  
 mus dissimulare, Patres conscripti, nos, quum præsi-  
 dium Punicum in arce nostra haberemus, multa fœda  
 et indigna, et a præfecto præsidii Hamilcare, et ab  
 Numidis Afrisque passos esse. Sed quid illa sunt, con-  
 lata cum iis, quae hodie patimur? Cum bona venia,  
 quæso, audiatis, Patres conscripti, id, quod invitus di-  
 cam. In discrimine est nunc humanum omne genus,  
 utrum vos, an Karthaginenses principes terrarum vi-  
 deat: si ex iis, quæ Locrenses aut ab illis passi sumus,  
 aut a vestro præsidio nunc quum maxime patimur,  
 astimandum Romanum ac Punicum imperium sit;  
 nemo non illis sibi, quam vos, dominos præoptet. Et  
 tamen videte, quemadmodum Locrenses in vos animutè  
 sint. Quum a Karthaginensibus injurias tanto mino-  
 res acciperemus, ad vestrum imperatorem configimus:  
 quum a vestro præsidio plusquam hostilia patiamur,  
 nusquam alio, quam ad vos, querelas detulimus. Aut  
 ros respicietis perditas res nostras, Patres conscripti,  
 aut ne ab Diis quidem immortalibus quod precemur,  
 quidquam superest. Q. Pleminius legatus missus est  
 cum præsidio ad recipiendos a Karthaginensibus Loc-  
 ros, et cum eodem ibi relictus est præsidio. In hoc  
 legato vestro (dant enim animum ad loquendum libere  
 ultimæ miseriæ) nec hominis quidquam est, Patres con-  
 scripti, præter figuram et speciem; neque Romani ci-  
 vis, præter habitum, vestitumque, et sonum Latinæ lin-  
 guæ. Pestis ac bellua inmanis, quales fretum quon-  
 dam, quo ab Sicilia dividimur, ad perniciem narigan-  
 tum circumsedisse fabulæ ferunt. At si scelus, libidi-  
 nemque, et avaritiam solus ipse exercere in socios res-

*U. C. 548.  
A. C. 204.*

*tro*s satis haberet, unam profundam quidem voraginem tamen patientia nostra exploreremus: nunc omnes centuriones militesque vestros (adeo in promiscuo licentiam atque improbitatem esse voluit) Pleminios fecit: omnes rapiunt, spoliant, verberant, vulnerant, occidunt: constuprant matronas, virgincs, ingenuos, raptos ex complexu parentum. Quotidie capitur urbs nostra, quotidie diripitur; dies noctesque omnia passim mulierum puerorumque, qui rapiuntur atque asportantur, ploratibus sonant. Miretur, qui sciatur, quomodo aut nos ad patiendum subficiamus, aut illos, qui faciunt, nondum tantarum injuriarum satietas ceperit. Neque ego exse- qui possum, nec vobis operæ est audire singula, quæ passi sumus: communiter omnia amplectar. Nego domum ullam Locris; nego quemquam hominem expertem injuriæ esse; nego ullum genus sceleris, libidinis, avaritiae superessc, quod in ullo, qui pati potuerit, prætermissum sit. Vix ratio iniri potest, uter casus civitatis sit detestabilior, quum hostes bello urbem cepere, an quum exitibilis tyrannus vi atque armis obpressit. Omnia, quæ captæ urbes patiuntur, passi sumus, et quum maxime patimur, Patres conscripti; omnia, quæ crudelissimi atque importunitissimi tyranni sceleris in obpresso cives edunt, Pleminius in nos, liberosque nostros, et conjuges, edidit.

XVIII. Unum est, de quo nominatim et nos queri religio infixa animis cogat, et vos audire, et exsolvere rempublicam vestram religione, si ita robis ridebitur, velimus, Patres conscripti. Vidimus enim, cum quanta ceremonia non vestros solum colatis Deos, sed etiam externos accipiatis. Fanum est apud nos Proserpinæ, de cuius sanctitate templi credo aliquam famam ad vos pervenisse Pyrrhi bello: qui quum, ex Sicilia rediens,

U.C. 548. *Locros classe præterreheretur, inter alia fæda, quæ A.C. 204.* propter fidem erga vos in civitatem nostram facinora edidit, thesauros quoque Proserpinæ, intactos ad eam diem, spoliavit: atque ita, pecunia in naves inposita, ipse terra est profectus. Quid ergo evenit, Patres conscripti? *Classis postero die fædissima tempestate lace-rata, omnesque naves, quæ sacrum pecuniam habuerunt, in litora nostra ejectæ sunt.* Qua tanta clade edoctus tandem Deos esse superbissimus rex, pecuniam omnem conquisitam in thesauros Proserpinæ referri jussit: nec tamen illi umquam postea prosperi quidquam evenit: pulsusque Italia, ignobili atque inhonesta morte, temere nocte ingressus Argos, obcubuit. Hæc quum audisset legatus vester, tribunique militum, et mille alia, quæ non augendæ religionis caussa, sed præsentis Deæ numine sæpe comperta nobis majoribusque nostris, referebantur; ausi sunt nihilominus sacrilegas admovere manus intactis illis thesauris, et nefanda præda se ipsos ac domos contaminare suas et milites vestros: quibus, per, vos, fidem vestram, Patres conscripti, priusquam eorum scelus expietis, neque in Italia, neque in Africa quidquam rei gesseritis; ne, quod piaculum commiserunt, non suo solum sanguine, sed etiam publica clade luant. Quamquam ne nunc quidem, Patres conscripti, aut in ducibus, aut in militibus vestris cessat ira Deæ. Aliquoties jam inter se signis conlatis concucurrerunt: dux alterius partis Pleminius, alterius duo tribuni militum erant: non acrius cum Karthaginiensibus, quam inter se ipsi, ferro dimicaverunt: præbuissentque occasionem furore suo Locros recipiendi Hannibali, ni aditus ab nobis Scipio intervenisset. At, Hercule, milites contactos sacrilegio furor agitat: in ducibus ipsis puniendis nullum Deæ numen adparuit? Immo ibi

*præsens maxime fuit. Virgis cæsi tribuni ab legato U. C. 548.  
sunt. Legatus deinde insidiis tribunorum interceptus,  
A. C. 204.  
præterquam quod toto corpore laceratus, naso quoque  
auribusque decisus, exsanguis est relictus : recreatus de-  
inde legatus ex vulneribus, tribunos militum in vincula  
conjectos, dein verberatos, servilibusque omnibus suppli-  
ciis cruciatos trucidando occidit ; mortuos deinde pro-  
hibuit sepeliri. Has Dea pœnas a templi sui spoliato-  
ribus habet : nec ante desinet omnibus eos agitare furiis,  
quam reposita sacra pecunia in thesauris fuerit. Ma-  
jores quondam nostri, gravi Crotoniensium bello, quia  
extra urbem templum est, transferre in urbem eam pe-  
cuniam voluerunt : noctu audita ex delubro vox est,  
abstinerent manus : Deam sua templa defensuram.  
Quia movendi inde thesauros incussa erat religio, muro  
circundare templum voluerunt : ad aliquantum jam  
altitudinis excitata erant mænia, quum subito conlapsa  
ruina sunt. Sed et nunc, et sœpe alias Dea suam se-  
dem, suumque templum aut tutata est, aut a violatori-  
bus gravia piacula exegit : nostras injurias nec potest,  
nec possit aliis ulcisci, quam vos, Patres conscripti.  
Ad vos vestramque fidem supplices configimus : nihil  
nostra interest, utrum sub illo legato, sub illo præsidio  
Locros esse sinatis, an irato Hannibali et Pœnis ad  
supplicium dedatis. Non postulamus, ut extemplo no-  
bis, ut de absente, ut indicta caussa credatis. Veniat,  
coram ipse audiat, ipse diluat. Si quidquam sceleris,  
quod homo in homines edere potest, in nos prætermisit;  
non recusamus, quin et nos omnia eadem iterum, si  
pati possumus, patiamur ; et ille omni divino humano-  
que liberetur scelere.*

XIX. Hæc quin ab legatis dicta essent, quæsis-  
setque ab iis Q. Fabius, detulissentne eas querelas-

U.C. 548. ad P. Scipionem; responderunt, missos legatos esse;  
 A.C. 204. sed eum belli adparatu occupatum esse: et in Africam  
 Fabii sententia a-  
 trox in Sci-  
 pionem. aut jam trajecisse, aut intra paucos dies trajecturum.  
 Et, legati gratia quanta esset apud imperatorem, ex-  
 pertos esse: quum, inter eum et tribunos cognita caussa,  
 tribunos in vincula conjecerit; legatum æque sontem,  
 aut magis etiam, in ea potestate reliquerit. Jussis ex-  
 cedere e templo legatis, non Pleminius modo, sed  
 etiam Scipio, principum orationibus lacerari: ante  
 omnes Q. Fabius, natum enim ad conrumpendam  
 disciplinam militarem, arguere. Sic et in Hispania  
 plus prope per seditionem militum, quam bello, amis-  
 sum: externo et regio more et indulgere licentiae mili-  
 tum, et sævire in eos. Sententiam deinde æque trucem  
 orationi adjecit. Pleminium legatum vinctum Ro-  
 manam deportari placere, et ex vinculis caussum dicere:  
 ac, si vera forent, quæ Locrenses quererentur, in car-  
 cere necari, bonaque ejus publicari. P. Scipionem, quod  
 de provincia decessisset injussu senatus, rerocari: agi-  
 que cum tribunis plebis, ut de imperio ejus abrogando  
 ferrent ad populum. Locrensibus coram senatum re-  
 spondere, Quas injurias sibi factas quererentur, eas  
 neque senatum, neque populum Romanum factas velle.  
 Viros bonos, sociosque, et amicos eos adpellari: liberos,  
 conjuges, quæque alia erepta essent, restitui: pecuniam,  
 quanta ex thesauris Proserpinæ sublata esset, conqueriri,  
 duplamque pecuniam in thesauros reponi: et sacrum  
 piaculare fieri, ita ut prius ad collegium pontificum  
 referretur, quod sacri thesauri moti, violati essent, quæ  
 piacula, quibus Diis, quibus hostiis, fieri placeret. Mi-  
 lites, qui Locris essent, omnes in Siciliam transportari:  
 quatuor cohortes sociorum Latini nominis in præsidium  
 Locros adduci. Perrogari eo die sententiæ, accensis

studiis pro Scipione et adversus Scipionem, non po- U. C. 548.  
 tuere. Præter Pleminii facinus Locrensumque cla- A. C. 204.  
 dem, ipsius etiam imperatoris non Romanus modo, Objectus  
 sed ne militaris quidem cultus jactabatur: *cum pallio* Scipioni  
*crepidisque inambulare in gymnasio, libellis eum palæ-*  
*træque operam dare: æque segniter molliterque cohorte* cultus li-  
*totam Syracusarum amænitate frui: Karthaginem* centior.  
*atque Hannibalem excidisse de memoria: exercitum*  
*omnem licentia corruptum, qualis Sucrone in Hispania*  
*fuerit, qualis nunc Locris, sociis magis, quam hosti,*  
*metuendum.*

XX. Hæc quamquam partim vera, partim mixta, coque similia veris jactabantur, vicit tamen Q. Me- Metelli sen-  
 telli sententia: qui, de ceteris Maximo adsensus, de tentia de  
 Scipionis caussa dissensit. Qui enim convenire, quem Scipione.  
 modo civitas juvenem admodum recuperandæ Hispaniæ delegerit ducem, quem, recepta ab hostibus Hispania, ad inponendum Punico bello finem creaverit consulem, spe destinaverit Hannibalem ex Italia detracturum, Africam subacturum, eum repente, tamquam Q. Ple-  
 minium, indicta caussa prope damnatum, ex prorincia revocari? quum ea, quæ in se nefarie facta Locrenses quererentur, ne præsente quidem Scipione facta dice-  
 rent, neque aliud quam patientia, aut pudor, quod le-  
 gato pepercisset, insimuluri possit? Sibi placere, M. Pomponium prætorem, cui Sicilia provincia sorte even-  
 issset, triduo proximo in provinciam proficiisci: con-  
 sules decem legatos, quos iis videretur, ex senatu legere,  
 quos cum prætore mitterent, et duos tribunos plebei,  
 atque ædilem: cum eo consilio prætorem cognoscere:  
 si ea, quæ Locrenses facta quererentur, jussu aut vo-  
 luntate P. Scipionis facta essent, ut eum de provincia  
 decidere juberent. Si P. Scipio jam in Africam tra-

U. C. 548. *jecisset, tribuni plebis atque ædilis cum duobus legatis,*  
 A. C. 204. *quos maxime prætor idoneos censisset, in Africam proficiscerentur : tribuni atque ædilis, qui reducerent inde Scipionem : legati, qui exercitui præcessent, donec novus imperator ad eum exercitum venisset. Sin M. Pomponius et decem legati comperissent, neque jussu, neque voluntate P. Scipionis ea facta esse, ut ad exercitum Scipio maneret, bellumque, ut proposuisset, gereret.* Hoc facto senatusconsulto, cum tribunis plebis actum est, ut compararent inter se, aut sorte legerent, qui duo cum prætore ac legatis irent. Ad collegium pontificum relatum de expiandis, quæ Locris in templo Proserpinæ tacta, violata, elataque inde essent. Tribuni plebis cum prætore et decem legatis profecti M. Claudius Marcellus et M. Cincius Alimentus : iis ædilis plebis datus, quem, si aut in Sicilia prætori dicto audiens non esset Scipio, aut jam in Africam trajecisset, prendere tribuni juberent, ac jure sacrosanctæ potestatis reducerent. Prius Locros ire, quam Messanam, consilium erat.

XXI. Ceterum duplex fama est, quod ad Pleminium adtinet : alii, auditis, quæ Romæ acta essent, in exsilium Neapolim euntem forte in Q. Metellum, unum ex legatis, incidisse, et ab eo Rhegium vi retractum tradunt : alii, ab ipso Scipione legatum cum triginta nobilissimis equitum missum, qui Q.

Pleminius in vincula conjectus. Pleminium in catenas, et cum eo seditionis principes, conjicerent. Ii omnes, seu ante Scipionis, seu tum prætoris jussu, traditi in custodiam Rheginis.

Prætor legatique Locros profecti primam, sicut mandatum erat, religionis curam habuere : omnem enim sacram pecuniam, quæque apud Pleminium, quæque apud milites erat, conquisitam, cum-

Sacra pecunia in  
thesauris Proserpinæ reponitut

ea quam ipsi secum adtulerant, in thesauris repo- U.C. 548.  
suerunt, ac piaculare sacrum fecerunt: tum vocatos A. C. 204.  
ad concionem milites prætor signa extra urbem ef-  
ferre jubet, castraque in campo locat, cum gravi  
edicto, *Si quis miles aut in urbe restitisset, aut secum*  
*extulisset, quod suum non esset.* *Locrensibus se per-*  
*mittere, ut, quod sui quisque cognosset, prehenderet: si*  
*quid non compareret, repeteret.* *Ante omnia, libera*  
*corpora placere sine mora Locrensibus restitui: non*  
*levi defuncturum pœna, qui non restituisset.* *Locren-*  
*sium deinde concionem habuit, atque, iis libertatem*  
*legesque suas populum Romanum senatumque restituere,*  
*dixit.* *Si qui Pleminium aliumve quem accusare vel-*  
*let, Rheygium se sequeretur.* *Si de P. Scipione publice*  
*queri vellent, ea, quæ Locris nefarie in Deos homines-*  
*que facta essent, jussu aut voluntate P. Scipionis facta*  
*esse, legatos mitterent Messanam; ibi se cum consilio*  
*cogniturum.* *Locrenses prætori legatisque, et sena-*  
*tui ac populo Romano gratias egere: se ad Plemi-*  
*nium accusandum ituros.* *Scipionem, quamquam pa-*  
*rum injuriis civitatis suæ doluerit, eum esse virum,*  
*quem amicum sibi, quam inimicum, malint esse: pro*  
*certo se habere, neque jussu, neque voluntate P. Scipio-*  
*nis tot tam nefanda commissa: aut Pleminio nimium,*  
*aut sibi parum creditum.* *Natura insitum quibusdam*  
*esse, ut magis peccari nolint, quam satis animi ad vin-*  
*dicanda peccata habeant.* Et prætori et consilio haud  
mediocre onus demtum erat de Scipione cognos-  
cendi. Pleminium, et ad duo et triginta homines  
cum eo damnaverunt, atque in catenis Romam mise-  
runt: ipsi ad Scipionem profecti sunt, ut ea quoque,  
quæ vulgata sermonibus erant de cultu ac desidia

U. C. 548. imperatoris solutaque militiae disciplina, comperta  
A. C. 204. oculis perferrent Romam.

Scipio res, XXII. Venientibus eis Syracusas, Scipio res, non  
non verba, verba, ad purgandum sese paravit: exercitum om-  
ad purgan- dum se nem eo convenire, classem expediri jussit, tamquam  
parat. dimicandum eo die terra marique cum Karthaginien-  
sibus esset. Quo die venerunt, hospitio comiter ac-  
ceptis postero die terrestrem navalemque exercitus,  
non instructos modo, sed hos decurrentes, classem  
in portu, simulacrum et ipsam edentem navalis pug-  
næ, ostendit: tum circa armamentaria et horrea  
aliumque belli adparatum visendum prætor legatique  
ducti. Tantaque admiratio singularum universa-  
rumque rerum incussa, ut satis crederent, aut illo  
duce atque exercitu vinci Karthaginiensem popu-  
lum, aut nullo alio posse: juberentque, quod Dii  
bene verterent, trajicere, et spei conceptæ, quo die  
illum omnes centuriæ priorem consulem dixissent,  
primo quoque tempore compotem populum Roma-  
num facere: adeoque lætis inde animis profecti sunt,  
tamquam victoriam, non belli magnificum adpara-

Pleminius tum, nunciaturi Romam essent. Pleminius, quique  
in vinculis moritur. in eadem caussa erant, postquam Romam est ven-  
tum, extemplo in carcерem conditi: ac primo pro-  
ducti ad populum ab tribunis, apud præoccupatos  
Locrensum clade animos, nullum misericordiaे lo-  
cum habuerunt: postea, quum sæpius produceren-  
tur, jam senescente invidia, molliebantur iræ: et  
ipsa deformitas Pleminii memoriaque absentis Sci-  
pionis favorem ad vulgum conciliabat. Mortuus ta-  
men prius in vinculis est, quam judicium de eo po-  
puli perficeretur. Hunc Pleminium Clodius Lici-

nius in libro tertio rerum Romanarum refert, iudis U. C. 548.  
votivis, quos Romæ Africanus iterum consul facie- A. C. 204.  
bat, conatum per quosdam, quos pretio conruperat,  
aliquot locis urbem incendere, ut frangendi carceris  
fugiendique haberet occasionem: patefacto dein sce-  
lere, delegatum in Tullianum ex senatusconsulto.  
De Scipione nusquam, nisi in senatu, actum: ubi  
omnes legati et tribuni, classem eam, exereitum,  
ducemque verbis extollentes, efficerunt, ut senatus  
censeret, primo quoque tempore in Africam traji-  
ciendum; Scipionique permitteretur, ut ex iis exer-  
citibus, qui in Sicilia essent, ipse legeret, quos in  
Africam secum trajiceret, quos provinciae relinque-  
ret præsidio.

XXIII. Dum hæc apud Romanos geruntur, Kar-  
thaginienses quoque, quum, speculis per promonto-  
ria omnia positis, percunctantes paventesque ad sin-  
gulos nuncios sollicitam hiemem egissent, haud par-  
vum et ipsi tuendæ Africæ momentum adjecerunt  
societatem Syphacis regis, cuius maxime fiducia tra-  
jectum in Africam Romanum crediderunt. Erat  
Hasdrubali Gisgonis filio non hospitium modo cum  
rege, de quo ante dictum est, quum ex Hispania  
forte in idem tempus Scipio atque Hasdrubal conve- Hasdruba-  
nerunt: sed mentio quoque inchoata adfinitatis, ut lis filiam  
rex duceret filiam Hasdrubalis. Ad eam rem con- phax.  
summandam tempusque nuptiis statuendum (jam  
enim et nubilis erat virgo) profectus Hasdrubal, ut  
accensum cupiditate (et sunt ante omnes Numidæ  
barbaros effusi in Venerein) sensit, virginem ab  
Karthagine arcessit, maturatque nuptias: et inter  
aliam gratulationem, ut publicum quoque fædus pri-  
vato adjiceretur, societas inter populum Karthagi-

U. C. 548. niensem regemque, data ultro citroque fide, eosdem  
A. C. 204. amicos inimicosque habituros, jurejurando adfirmatur. Ceterum Hasdrubal, memor et cum Scipione initæ regi societatis, et quam vana et mutabilia barbarorum ingenia essent, veritus, ne, si trajiceret in Africam Scipio, parvum vinculum eæ nuptiæ essent, dum accensum recenti amore Numidam habet, pellit, blanditiis quoque puellæ adhibitis, ut legatos Scipioni in Siciliam ad Scipionem mittat, per quos moneat amicitiam eum, *Ne prioribus suis promissis fretus in Africam traxiciat.* Se et nuptiis civis Karthaginiensis, filiæ Hasdrubalis, quem viderit apud se in hospitio, et publico etiam fædere cum populo Karthaginiensi junctum. Optare primum, ut procul ab Africa, sicut adhuc fecerint, bellum Romani cum Karthaginiensibus gerant, ne sibi interesse certaminibus eorum, armaque aut hæc, aut illa, abnuentem alteram societatem, sequi necesse sit. Si non abstineat Africa Scipio, et Karthagini exercitum admoveat, sibi necessarium fore, et pro terra Africa, in qua et ipse sit genitus, et pro patria conjugis suæ, proque parente ac penatibus dimicare.

**XXIV.** Cum his mandatis ab rege legati ad Scipionem missi, Syracusis eum convenerunt. Scipio, quamquam magno momento rerum in Africa gerendarum magnaue spe destitutus erat, legatis propere, priusquam res vulgaretur, remissis in Africam, literas dat ad regem, quibus etiam atque etiam monet eum, *Ne jura hospitii secum, neu cum populo Romano initæ societatis, neu fas, fidem, dextras, Deos testes atque arbitros conventorum, fallat.* Ceterum, quam sedulo dissimilat apud milites, si sileretur, quid petentes venissent, periculum tes Scipio.

erat, ne vera eo ipso, quod celarentur, sua sponte U.C. 548.  
magis emanarent, timorque in exercitum incideret, A.C. 204.  
ne simul cum rege et Karthaginiensibus foret bel-  
landum, avertit a vero falsis præoccupando mentes  
hominum. Et, vocatis ad concionem militibus,  
*Non ultra esse cunctandum*, ait. *Instare, ut in Africam*  
*quamprimum trajiciat, socios reges. Masinissam prius*  
*ipsum ad Lælium venisse, querentem, quod cunctando*  
*tempus tereretur: nunc Syphacem mittere legatos, idem*  
*admirantem, quæ tam diuturnæ moræ sit caussa: pos-*  
*tulantemque, ut aut trajiciatur tandem in Africam ex-*  
*ercitus, aut, si mutata consilia sint, certior fiat, ut et*  
*ipse sibi ac regno suo possit consulere. Itaque, paratis*  
*jam omnibus instructisque, et re jam non ultra recipiente*  
*cunctationem, in animo sibi esse, Lilybæum*  
*classe traducta, eodemque omnibus peditum equitumque*  
*copiis contractis, quæ prima dies cursum navibus daret,*  
*Deis bene juvantibus, in Africam trajicere. Literas*  
ad M. Pomponium mittit, ut, si ei videretur, Lily- It Lilybæ-  
bæum veniret: ut communiter consulenter, quas <sup>um.</sup>  
potissimum legiones, et quantum militum numerum  
in Africam trajiceret: item circum oram omnem  
maritimam misit, ut naves onerariae conprehensæ  
Lilybæum omnes contraherentur. Quidquid militum  
naviumque in Sicilia erat, quum Lilybæum con-  
venissent, et nec urbs multitudinem hominum, nec  
portus naves caperet, tantus omnibus ardor erat in  
Africam trajiciendi, ut non ad bellum duci videren-  
tur, sed ad certa victoriæ præmia: præcipue, qui  
superabant ex Cannensi exercitu, milites, illo, non  
alio duce, credebant, navata reipublicæ opera, finire  
se militiam ignominiosam posse. Et Scipio minime

U. C. 543. id genus militum adspernabatur: ut qui neque ad  
 A. C. 204. Cannas ignavia eorum cladem acceptam sciret, neque ullos æque veteres milites in exercitu Romano esse, expertosque non variis proeliis modo, sed urbis etiam obpugnandis. Quinta et sexta Cannenses erant legiones: eas se trajecturum in Africam quum dixisset, singulos milites inspexit: relictisque, quos non idoneos credebat, in locum eorum subjecit, quos secum ex Italia adduxerat; supplevitque ita eas legiones, ut singulæ sena millia et ducentos pedites, trecentos haberent equites: sociorum item Latini nominis pedites equitesque de exercitu Cannensi legit.

XXV. Quantum militum in Africam transportatum sit, non parvo numero inter auctores discrepat. Alibi decem millia peditum, duo millia et duecentos equites, alibi sedecim millia peditum, mille et sexcentos equites; alibi parte plus dimidia rem auctam, quinque et triginta millia peditum equitumque in naves inposita invenio: quidam non adjecere numerum: inter quos me ipse in re dubia ponи malim. Cœlius, ut abstinet numero, ita ad immensum multitudinis speciem auget. Volucres ad terram delapsas clamore militum ait, tantamque multitudinem concendisse naves, ut nemo mortalium, aut in Italia, aut Copiæ na- in Sicilia, relinqui videretur. Milites ut in naves or-  
 ves con- dine ac sine tumultu concenderent, ipse eam sibi  
 scandunt. curam sumsit: nauticos C. Lælius, qui classis præfec-  
 tus erat, in navibus, ante concendere coactos, con-  
 tinuit. Commeatus inponendi M. Pomponio præ-  
 tori cura data: quinque et quadraginta dierum ciba-  
 ria, e quibus quindecim dierum cocta, inposita. Ut

omnes jam in navibus erant, scaphas circummisit, U. C. 548.  
ut ex navibus gubernatoresque et magistri navium et A. C. 204.  
bini milites in forum convenirent ad imperia acci-  
pienda. Postquam convenerunt, primum ab iis quæ-  
sivit, si aquam hominibus jumentisque in totidem  
dies, quot frumentum, inposuissent. Ubi responde-  
runt, aquam dierum quinque et quadraginta in navi-  
bus esse; tum edixit militibus, ut silentium quieti  
nautis sine certamine ad ministeria exsequenda bene  
obedientes præstarent: cum viginti rostratis se ac  
L. Scipionem ab dextro cornu, laevum, totidem ros-  
tratas, et C. Lælium præfectum classis cum M. Por-  
cio Catone (quæstor is tum erat) onerariis futurum  
præsidio. Lumina in navibus singula rostratae, bina  
onerariæ haberent: in prætoria nave insigne noc-  
turnum trium luminum fore. Emporia ut peterent,  
gubernatoribus edixit. Fertilissimus ager, eoque  
abundans omnium copia rerum est regio, et inbelles  
(quod plerumque in uberi agro evenit) barbari sunt:  
priusque, quam Karthagine subveniretur, obprimi  
videbantur posse. Iis editis imperiis, redire ad na-  
ves jussi: et postero die, Deis bene juvantibus, sig-  
no dato solvere naves.

**XXVI.** Multæ classes Romanæ e Sicilia atqne  
ipso illo portu profectæ erant. Ceterum non eo  
bello solum, (nec id mirum, præ datum enim tan-  
tummodo pleræque classes ierant) sed ne priore qui-  
dem, ulla profectio tanti spectaculi fuit: quanquam  
si magnitudine classis æstimaretur, et bini consules  
cum binis exercitibus ante trajecerant; et prope  
totidem rostratae in illis classibus fuerant, quot one-  
rariis Scipio tum trajiciebat: nam, præter quadra-  
ginta longas naves, quadringentis ferme onerariis ex-

U. C. 548. eritum transvexit. Sed et bellum bello, secundum  
 ▲. C. 20<sup>4</sup>. priore, ut atrocius Romanis videretur, quum quod  
 in Italia bellabatur, tum ingentes strages tot exer-  
 cituum, simul cæsis ducibus, effecerant: et Scipio  
 dux, partim factis fortibus, partim suapte fortuna qua-  
 dam ingentis ad incrementa gloriæ celebratus, con-  
 verterat animos: simul et mens ipsa trajiciendi,  
 nulli ante eo bello duci tentata, quod ad Hanniba-  
 lem detrahendum ex Italia, transferendumque et  
 finiendum in Africa bellum, se transire vulgaverat.  
 Concurrerat ad spectaculum in portum omnis turba,  
 non habitantium modo Lilybæi, sed legationum om-  
 nium ex Sicilia: quæ et ad prosequendum Scipio-  
 nem officii caussa convenerant, et prætorem provin-  
 ciæ M. Pomponium secutæ fuerant: ad hoc legio-  
 nes, quæ in Sicilia relinquebantur, ad prosequendos  
 commilitones processerant: nec classis modo pro-  
 spectantibns e terra, sed terra etiam omnis circa re-  
 ferta turba spectaculo navigantibus erat.

Scipionis  
precatio.

XXVII. Ubi inluxit, Scipio e prætoria nave, si-  
 lentio per præconem facto, *Divi Divæque*, inquit,  
*maria terrasque qui colitis, vos precor quæsoque, uti,*  
*quæ in meo imperio gesta sunt, geruntur, postque ge-*  
*rentur, ea mihi, populo plebique Romanæ, sociis nomi-*  
*nique Latino, qui populi Romani, quique meam sectam,*  
*imperium, auspiciumque terra, mari, amnibusque se-*  
*quentur, bene verruncent: eaque vos omnia bene juve-*  
*tis: bonis auctibus auxitis: salvos incolumesque, victis*  
*perduellibus victores, spoliis decoratos, præda onustos*  
*triumphantessque, mecum domos reduces sistatis: inimi-*  
*corum hostiumque ulciscendorum copiam faxitis: quæ-*  
*que populus Karthaginiensis in civitatem nostram fa-*  
*cere molitus est, ea ut mihi populoque Romano in civi-*

tatem *Karthaginiensium exempla edendi facultatem* U. C. 548.  
*detis.* Secundum eas preces cruda exta victimæ, uti A. C. 204.  
 mos est, in mare porrigit, tubaque signum dedit pro-  
 fificendi. Vento secundo vehementi satis profecti,  
 celeriter e conspectu terræ ablati sunt: et a meridie  
 nebula occipit, ita ut vix concursus navium inter se  
 vitarent: lenior ventus in alto factus: noctem inse-  
 quentem eadem caligo obtinuit: sole orto est dis-  
 cussa, et addita vis vento. Jam terram cernebant:  
 haud ita multo post gubernator Scipioni ait, *non plus*  
*quinque millia passuum Africam abesse: Mercurii pro-*  
*montorium se cernere: si jubeat eo dirigi, jam in portu*  
*fore omnem classem.* Scipio, ut in conspectu terra  
 fuit, precatus, uti bono rcpuplicæ suoque Africam  
 viderit, dare vela, et alium infra navibus accessum  
 petere jubet. Vento eodem ferebantur: ceterum  
 nebula sub idem ferme tempus, quo pridie, exorta  
 conspectum terræ adenit, et ventus premente nebula  
 cecidit. Nox deinde incertiora omnia fecit: itaque  
 ancoras, ne aut inter se concurrerent naves, aut ter-  
 ræ inferrentur, jecere. Ubi inluxit, ventus idem  
 coortus, nebula disjecta, aperuit omnia Africæ litora.  
 Scipio, quod esset proximum promontorium, per-  
 cunctatus, quum Pulchri promontorium id vocari Ad Pulchri  
 audisset, *Placet omen, inquit; huc dirigite naves.* Eo prom. ad-  
 classis decurrit: copiæ omnes in terram expositæ  
 sunt. Prosperam navigationem sine terrore ac tu-  
 multu fuisse, permultis Græcis Latinisque auctori-  
 bus credidi: Cœlius unus præterquam quod non  
 mersas fluctibus naves, ceteros omnes cœlestes ma-  
 ritimosque terrores, postremo abreptam tempestate  
 ab Africa classem ad insulam Ægimurum, inde ægre  
 connectum cursum, exponit: et, prope obrutis navi-

U.C. 548. bus, injussu imperatoris, scaphis, haud secus quam  
A. C. 204. naufragos, milites sine armis cum ingenti tumultu  
in terram evasisse.

Terror in Africa. **XXVIII.** Expositis copiis, Romani castra in

proximis tumulis metantur. Jam non in maritimos modo agros, conspectu primum classis, dein tumultu egredientium in terram, pavor terrorque pervenerat, sed in ipsas urbes: neque enim hominum modo turba, mulierum puerorumque agminibus inmixta, omnes passim compleverat vias, sed pecora quoque præ se agrestes agebant; ut relinqu subito Africam diceret. Urbibus vero ipsis majorem, quam quem secum adtulerant, terrorem inferebant: præcipue Karthaginis prope ut captæ tumultus fuit. Nam post M. Atilium Regulum et L. Manlium consules, annis prope quinquaginta, nullum Romanum exercitum viderant, præter prædatorias classes, quibus exscensiones in agros maritimos factæ erant: raptisque, quæ obvia fors fecerat, prius recursum semper ad naves, quam clamor agrestes conciret, fuerat: eo major tum fuga pavorque in urbe fuit. Et, Hercule, neque exercitus domi validus, neque dux, quem obponerent, erat. Hasdrubal, Gisgonis filius, genere, fama, divitiis, regia tum etiam adfinitate, longe primus civitatis erat: sed eum ab illo ipso Scipione aliquot præliis fusum pulsumque in Hispania meminerant: nec magis ducem duci parem, quam tumultuarium exercitum suum Romano exercitui esse. Itaque, velut si urbem extemplo adgressurus Scipio foret, ita ad arma est conclamatum: portæque raptim clausæ, et armati in muris, vigiliæque et stationes dispositæ, ac nocte insequentí vigilatum est. Postero die quingenti equites, specula-

tum ad mare turbadosque egredientes ex navibus U. C. 548.  
missi, in stationes Romanorum inciderunt: jam enim A. C. 204.  
Scipio, classe Uticam missa, ipse haud ita multum  
progressus a mari, tumulos proximos ceperat;  
equites et in stationibus locis idoneis posuerat, et  
per agros miserat prædatum.

**XXIX.** Ii cum Karthaginiensi equitatu prælium Scipio agros  
quam coniunxisserent, paucos in ipso certamine, ple- populatur,  
rosque fugientes persecuti (in quibus præfectum quo- victo equi-  
que Hannonem, nobilem juvenem) occiderunt. Sci- tatu Kar-  
pio non agros modo circa vastavit, sed urbem etiam  
proximam Afrorum satis opulentam cepit: ubi præ- thaginiensi.  
ter cetera, quæ extemplo in naves onerarias inpo-  
sita, missaque in Siciliam erant, octo millia libero-  
rum servorumque capitum sunt capta. Lætissimus Masinissa  
tamen Romanis in principio rerum gerendarum ad- ad Roma-  
ventus fuit Masinissæ: quem quidam cum ducentis nos venit.  
haud amplius equitibus, plerique cum duūm millium  
equitatu tradunt venisse. Ceterum quum longe  
maximus omnium ætatis suæ regum hic fuerit, plu-  
rimumque rem Romanam juverit, operæ pretium  
videtur excedere paullulum ad enarrandum, quam  
varia fortuna usus sit in amittendo recuperandoque  
paterno regno. Militanti pro Karthaginiensibus in Ejus varia  
Hispania pater ei moritur: Galæ nomen erat. Reg- fortuna.  
num ad fratrem regis Oesalecm, pergrandem natu,  
(mos ita apud Numidas est) pervenit: haud multo  
post, Oesalce quoque mortuo, major ex duobus filiis  
eius Capusa, puero admodum altero, paternum im-  
perium accepit. Ceterum quum magis jure gentis,  
quam auctoritate inter suos aut viribus, obtineret  
regnum; exstitit quidam, Mezetulus nomine, non  
alienus sanguine regibus, familiæ semper inimicæ,

U. C. 548. ac de imperio varia fortuna cum iis, qui tum ob-  
 A. C. 204. tinebant, certantis. Is, concitatis popularibus, apud  
 quos, invidia regum, magnæ auctoritatis erat, cas-  
 tris palam positis, descendere regem in aciem, ac  
 dimicare de regno coëgit: in eo prælio Capusa cum  
 multis principum cecidit, gens Massylorum omnis in  
 ditionem imperiumque Mezetuli concessit: regio ta-  
 men nomine abstinuit: contentusque nomine modico  
 tutoris, puerum Lacumacen, qui stirpis regiæ super-  
 erat, regem adpellat. Karthaginiensem nobilem  
 feminam, sororis filiam Hannibal, quæ proxime  
 Cœsalci regi nupta fuerat, matrimonio sibi jungit,  
 spe Karthaginiensium societatis; et cum Syphace  
 hospitium vetustum legatis missis renovat, omnia ea  
 auxilia præparans adversus Masinissam.

XXX. Et Masinissa, audita morte patrui, dein  
 nece fratri patruelis, ex Hispania in Mauritaniam  
 (Bocchar ea tempestate rex Maurorum erat) traji-  
 cit: ab eo supplex infimis precibus auxilium itineri,  
 quoniam bello non poterat, quatuor millia Mauro-  
 rum impetravit. Cum iis, præmisso nuncio ad pa-  
 ternos suosque amicos, quum ad fines regni perve-  
 nisset, quingenti ferme Numidæ ad eum convene-  
 runt. Igitur Mauris inde, sicut convenerat, retro  
 ad regem reniisis, quamquam aliquanto minor spe  
 multitudo, nec cum qua tantam rem adgredi satis  
 auderet, conveniret; ratus agendo ac moliendo vires  
 quoque ad agendum aliquid conlecturum, profici-  
 centi ad Syphacem Lacumaci regulo ad Thapsum  
 obcurrit. Trepidum agmen quum in urbem refugis-  
 set, urbem Masinissa primo inpetu capit: ex regiis  
 alios tradentes se recipit, alios vim parantes occidit:  
 pars maxima cum ipso puero inter tumultum ad Sy-

phacem, quo primum intenderant iter, pervenerunt. U. C. 543.  
 Fama hujus modicæ rei, in principio rerum prospere A. C. 204.  
 actæ, convertit ad Masinissam Numidas : adflue-  
 bantque undique ex agris vicisque veteres milites  
 Galæ, et invitabant juvenem ad recuperandum pater-  
 num regnum. Numero militum aliquantum Meze-  
 tulus superabat: nam et ipse eum exercitum, quo  
 Capusam vicerat, et ex receptis post cædem regis  
 aliquot habebat: et puer Lacumaces ab Syphace  
 auxilia ingentia adduxerat: quindecim millia pedi-  
 tum Mezetulo, decem millia equitum erant. Qui-  
 buscum Masinissa, nequaquam tantum peditum  
 equitumve habens, acie conflixit: vicit tamen et  
 veterum militum virtus, et prudentia inter Romana  
 et Punica arma exercitati ducis. Regulus cum tu-  
 tore et exigua Masæsylorum manu in Karthaginien-  
 sium agrum perfugit. Ita recuperato regno paterno,  
 Masinissa, quia sibi adversus Syphacem haud paullo  
 majorem restare dimicationem cernebat, optimum  
 ratus cum fratre patruele gratiam reconciliare, mis-  
 sis, qui et puero spem facerent, si in fidem Masinis-  
 sæ sese permisisset, futurum in eodem honore, quo  
 apud Galam Cœsalces quondam fuisset; et qui Me-  
 zetulo, præter inpunitatem, sua omnia cum fide re-  
 stitui sponderent; ambo præoptantes exilio modi-  
 cam domi fortunam (omnia, ne id fieret, Karthagi-  
 niensibus de industria agentibus) ad sese perduxit.

XXXI. Hasdrubal tum forte, quum hæc gereban-  
 tur, apud Syphacem erat: qui Numidæ, haud sane Syphacem  
 multum ad se pertinere credenti, utrum penes Lacu-  
 macen, an Masinissam, regnum Massylorum esset, Hasdrubal  
 falli eum magnopere, ait, si Masinissam eisdem in Masinis-  
 sam insti-  
 tentum fore, quibus patrem Galam, aut patruum ejus gat.

U. C. 548. *Æsalcem, credit: multo majorem indolem in eo animi*  
 A. C. 204. *ingeniique esse, quam in ullo gentis ejus umquam fuisse.* Sæpe eum in Hispania rarae inter homines virtutis specimen dedisse sociis pariter hostibusque: et Syphacem, et Karthaginienses, nisi orientem illum ignem obpressissent, ingenti mox incendio, quum jam nullam opem ferre possent, arsuros. Adhuc teneras et fragiles ejus vires esse, vixdum coalescens forentis regnum. Instando stimulandoque pervincit, ut exercitum ad fines Massylorum admoveat; atque in agro, de quo sæpe cum Gala non verbis modo disceptatum, sed etiam armis certatum fuerat, tamquam haud dubie juris sui, castra locet. Si quis arceat, id quod maxime opus sit, acie dimicaturum: sin per metum agro cedatur, in medium regnum eundum: aut sine certamine concessuros in ditionem ejus Massylos, aut nequam pares futuros armis.

Syphax vincit Masinissam. His vocibus incitatus Syphax Masinissæ bellum infert, et primo certamine Massylos fundit fugatque. Masinissa cum paucis equitibus ex acie in montem (Balbum incolæ vocant) perfugit: familiæ aliquot cum mapalibus pecoribusque suis (ea pecunia illis est) persecuti sunt regem: cetera Massylorum multitudo in ditionem Syphacis concessit. Quem cuperant exsules montem, herbidus aquosusque est; et, quia pecori bonus alendo erat, hominum quoque, carne ac lacte, vescentium, abunde subficiebat alimentis. Inde nocturnis primo ac furtivis incursionibus, deinde aperto latrocínio, infesta omnia circa esse: maxime urbi Karthaginiensis ager, quia et plus prædæ, quam inter Numidas, et latrocinium tutius erat: jamque adeo licenter eludebant, ut ad mare devectam prædam venderent mercatoribus, adpellentibus naves ad

id ipsum; pluresque, quam justo sæpe in bello, U. C. 548.  
Karthaginiensium eaderent caperenturque. Deplo- A. C. 204.  
rabant ea apud Syphacem Karthaginienses, infen-  
sumque et ipsum ad reliquias belli persequendas in-  
stigabant: sed vix regium videbatur, latronem va-  
gum in montibus consecitari.

XXXII. Bocehar, ex præfectis regiis vir acer et  
inpiger, ad id delectus: ei data quatuor millia peditum,  
duo equitum: præmiorumque ingentium spe  
oneratus, si caput Masinissæ retulisset, aut vivum  
(id vero inæstimabile gaudium fore) cepisset, palatios  
incurioseque agentes improviso adortus, pecorum  
hominumque ingenti multitudine a præsidio ar-  
matorum exclusa, Masinissam ipsum cum paucis in  
verticem montis compellit. Inde, prope ut jam de-  
bellato, nec præda modo pecorum hominumque cap-  
torum missa ad regem, sed copiis etiam, ut aliquan-  
to majoribus, quam pro reliquiis belli, remissis, eum  
quingentis haud amplius peditibus ducentisque equi-  
tibus, degressum jugis Masinissam persecutus, in valle  
arta, fauibus utrimque obsessis, inclusus: ibi ingens  
cædes Massylorum facta. Masinissa cum quinqua-  
ginta haud amplius equitibus per amfractus montis  
ignotos sequentibus se eripuit. Tenuit tamen vesti-  
gia Bocchar: adeptusque eum patentibus prope Clupeam  
urbem campis, ita circumvenit, ut, præter qua-  
tuor equites, omnes ad unum interficeret: cum iis  
ipsum quoque Masinissam saucium prope e manibus  
inter tumultum amisit. In conspectu erant fugien-  
tes; ala equitum, dispersa toto campo, quibusdam,  
ut obcurrerent, per obliqua tendentibus, quinque  
hostes sequebatur: amnis ingens fugientes accepit,  
(neque enim cunctanter, ut quos major metus urge-

U. C. 548. ret, immiserant equos) raptique gurgite, et in obli-

A. C. 204. quum prælati : duobus in conspectu hostium in præ-  
Insilit Masinissa rapidum gurgitem haustis, ipse periisse creditus : at  
in flu- duo reliqui equites cum eo inter virgulta ulterioris  
vium, un- ripæ emerserunt. Is finis Bocchari sequendi fuit,  
de cum duobus nec ingredi flumen auso, nec habere credenti se jam,  
emergit. quem sequeretur. Inde vanus auctor absumti Ma-

sinissæ ad regem rediit ; missique, qui Karthaginem  
gaudium ingens nunciarent : totaque Africa fama  
mortis Masinissæ repleta varie animos adfecit. Ma-

In spelun- sinissa in spelunca occulta, quum herbis curaret vul-  
ca latens, nus, duorum equitum latrocinio per dies aliquot  
vulnus curat. vixit : ubi primum ducta cicatrix, patique posse visa  
jactationem, audacia ingenti pergit ire ad regnum  
repetendum : atque, in ipso itinere haud plus qua-  
draginta equitibus conlectis, quum in Massylos, pa-  
lam jam quis esset ferens, venisset, tantum motum  
quum favore pristino, tum gaudio insperato, quod,  
quem periisse crediderant, incolumem cernebant, fe-  
cit, ut intra paucos dies sex millia peditum armato-  
rum, quatuor equitum, ad eum convenirent : jam-  
que non in possessione modo paterni regni esset,  
sed etiam socios Karthaginiensium populos Masæ-  
sylorumque fines (id Syphacis regnum erat) vasta-  
ret : inde, irritato ad bellum Syphace, inter Cirtam  
Hipponemque in jugis opportunorum ad omnia mon-  
tium consedit.

Syphax  
adversus  
cum con-  
tendit.

XXXIII. Majorem igitur eam rem Syphax ratus,  
quam ut per præfectum ageret, cum filio juvene (no-  
men Veriminæ erat) parte exercitus missa, imperat,  
ut, circumducto agmine, in se intentum hostem ab  
tergo invadat. Nocte profectus Vermina, qui ex  
occulto adgressurus erat : Syphax antem interdiu

aperto itinere, ut qui, signis conlatis, acie dimicatu- U.C. 548.  
rus esset, movit castra. Ubi tempus visum est, quo A.C. 204.  
pervenisse jam circummissi videri poterant, et ipse  
leni clivo ferente ad hostem, quum multitudine fre-  
tus, tum præparatis ab tergo iusidiis, per adversum  
montem erectam aciem ducit. Masinissa fiducia  
maxime loci, quo multo æquiore pugnaturus erat, et  
ipse dirigit suos. Atrox prælium et diu anceps fuit;  
loco et virtute militum Masinissam, multitudine, quæ  
nimio major erat, Syphacem juvante. Ea multitudo  
divisa, quum pars a fronte urgeret, pars a tergo se  
circumfudisset, victoram haud dubiam Syphaci de-  
dit: et ne effugium quidem patebat hinc a fronte,  
hinc ab tergo inclusis: Itaque ceteri pedites equi-  
tesque cæsi aut capti: ducentos ferme equites Masi-  
nissa circa se congregatos, divisosque turnatim in  
tres partes, erumpere jubet; loco prædicto, in quem  
ex dissipata convenienter fuga. Ipse, quia intende-  
rat, inter media tela hostium evasit: duæ turmæ  
hæsere: altera metu dedita hosti; pertinacior in dit:  
repugnando telis obruta et confixa est. Verminam  
prope vestigiis instantem, in alia atque alia flectendo  
itinera eludens, tædio et desperatione tandem fes-  
sum, absistere sequendo coëgit: ipse cum sexaginta  
equitibus ad minorem Syrtim pervenit. Ibi cum  
conscientia egregia sæpe repetiti regni paterni, inter  
Punica Emporia gentemque Garamantum omne tem-  
pus, usque ad C. Lælii classisque Romanæ adven-  
tum in Africam, consumisit. Hæc animum incli-  
nant, ut cum modico potius, quam cum magno præ-  
sidio equitum, ad Scipionem quoque postea venisse  
Masinissam credam: quippe illa regnantis multi-  
tudo, hæc paucitas exsulis fortunæ conveniens est.

U.C. 548. XXXIV. Karthaginienses, ala equitum cum præfecto amissa, alio equitatu per novum delectum comparato, Hannonem Hamilcaris filium præficiunt. A.C. 204. Karthaginienses novum equitatum sibi comparant. Hasdrubalem subinde ac Syphacem per literas nunciosque, postremo etiam per legatos, arcessunt: Hasdrubalem opem ferre prope circum sessæ patriæ jubent: Syphacem orant, ut Karthagini, ut universæ Africæ subveniat. Ad Uticam tum castra Scipio, ferme mille passus ab urbe, habebat, translata a mari, ubi paucos dies stativa conjuncta classi fuerant. Hanno, nequaquam satis valido, non modo ad lacessendum hostem, sed ne ad tuendos quidem a populationibus agros, equitatu accepto, id omnium primum egit, ut per conquisitionem numerum equitum augeret: nec aliarum gentium adspernatus, maxime tamen Numidas (id longe primum equitum in Africa est genus) conducit. Jam ad quatuor millia equitum habebat, quum Saleram nomine urbem occupavit; quindecim ferme millia ab Romanis castris. Quod ubi Scipioni relatum est, *Æstiva subtectis equitatus!* (inquit) *sint vel plures; dum talem ducem habeant:* eoque minus sibi cessandum ratus, quo illi segnius rem agerent, Masinissam cum equitatu præmissum portis obequitare, atque hostem ad pugnam elicere, jubet: ubi omnis multitudo se effudisset, graviorque jam in certamine esset, quam ut facile sustineri posset, cederet paullatim; se in tempore pugnæ obventurum. Tantum moratus, quantum satis temporis prægresso visum ad eliciendos hostes, cum Romano equitatu secutus, tegentibus tumulis, qui peropportune circa viæ flexus obpositi erant, occultus processit. Masinissa, ex composito, proelia in- nunc terrentis, nunc timentis modo, aut ipsis ob- euntur.

equitabat portis, aut cedendo, quum timoris simula- U. C. 549.  
tio audaciam hosti faceret, ad insequendum temere A. C. 204.  
eliciebat. Nondum omnes egressi erant, varieque  
dux fatigabatur, alios vino et somno graves arma  
capere, et frenare equos cogendo, aliis, ne sparsi et  
inconditi sine ordine, sine signis omnibus portis ex-  
currerent, obsistendo. Primo incante se evehentes  
Masinissa excipiebat: mox plures simul conferti  
porta effusi æquaverant certamien: postremo, jam  
omnis equitatus prælio quum adesset, sustineri ultra  
nequiere. Non tamen effusa fuga Masinissa, sed  
cedendo sensim, inpetus eorum excipiebat: donec  
ad tumulos tegentes Romanum equitatum pertraxit.  
Inde exorti equites, et ipsi integris viribus, et recen-  
tibus equis, Hannoni Afrisque pugnando ac sequen-  
do fessis se circumfudere: et Masinissa, flexis su-  
bito equis, in pugnam rediit. Mille ferme, qui  
primi agminis fuerant, ut quibus haud facilis recep-  
tus fuit, cum ipso duce Hannone interclusi atque  
interfecti sunt: ceteros, ducis præcipue territos  
cæde, effuse fugientes per tria millia passuum victo-  
res secuti, ad duo præterea millia equitum aut cepe-  
runt, aut occiderunt: inter eos satis constabat, non  
minus ducentos Karthaginiensium equites fuisse, et  
dixitiis quosdam et genere inlustres.

XXXV. Eodem forte, quo hæc gesta sunt, die  
naves, quæ prædam in Siciliam vixerant, cum com-  
meatu redire; velut ominatæ, ad prædam alteram  
repetendani sese venisse. Duos eodem nomine Kar-  
thaginiensium duces duobus equestribus præliis in-  
terfectos, non omnes auctores sunt: veriti, credo,  
ne falleret bis relata eadem res. Cœlius quidem et  
Valerius captuni etiam Hannonem tradunt. Scipio

U. C. 548. præfectos equitesque, prout cujusque opera fuerat,

A. C. 204. ante omnes Masinissam, insignibus donis donat: et,

firmo præsidio Saleræ inposito, ipse cum cetero exercitu profectus, non agris modo, quacumque incep-

**Scipio po-** populatur Africam. que expugnatis, late fuso terrore belli, septimo die,

quam profectus erat, magnam vim hominum et pecoris et omnis generis prædæ trahens, in castra redit;

gravesque iterum hostilibus spoliis naves dimittit. Inde, omissis expeditionibus parvis populationibusque, ad obpugnandam Uticam omnes bell vires convertit: eam deinde, si cepisset, sedem ad cetera exsequenda habiturus. Simul et a classe na-

Uticam obpugnat. vales socii, qua ex parte urbs mari adluitur, simul

et terrestris exercitus ab inminente prope ipsis mœnibus tumulo est admotus. Tormenta machinasque et advexerat secum, et ex Sicilia missa cum

commeatibus erant: et nova in armamentario, multis talium operum artificibus de industria inclusis, fiebant. Uticensibus tanta undique mole circum sessis in Karthaginiensi populo, Karthaginiensibus in Hasdrubale ita, si is movisset Syphacem, spes omnis erat: sed desiderio indigentium auxilii tardius cuncta movebantur. Hasdrubal, intentissima

Hasdrubalis et Syphacis ingentes copiæ. conquistione quam ad triginta millia peditum, tria equitum confecisset, non tamen ante adventum Syphacis castra propius hostem movere est ausus. Sy-

phax cum quinquaginta millibus peditum, decem equitum advenit: confestimque motis ab Karthagine castris, haud procul Utica munitionibusque Romanis consedit. Quorum adventus hoc tamen momenti fecit, ut Scipio, quem quadraginta ferme dies nequidquam omnia experiens obsedisset Uti-

Scipio re- cedit ab Utica.

cam, abscederet inde irrito incepto : et (jam enim U. C. 548.  
hiems instabat) castra hiberna in promontorio, quod A. C. 204.  
tenui jugo continentis adhaerens in aliquantum maris  
spatium extenditur, communit : uno vallo et navalia  
castra amplectitur : jugo medio legionum castris in-  
positis, litus ad septentrionem versum subductæ na-  
ves navalesque socii tenebant : meridianam vallem  
ad alterum litus devexam equitatus. Hæc in Africa  
usque ad extremum autumni gesta.

**XXXVI.** Præter convectum undique ex populatis  
circa agris frumentum, commeatusque ex Sicilia at-  
que Italia advectos, Cn. Octavius proprætor ex Sar-  
dinia ab Ti. Claudio prætore, cujus ea provincia  
erat, ingentem vim frumenti advexit : horreaque  
non solum, quæ jani facta erant, repleta, sed nova  
ædificata. Vestimenta exercitui deerant: id man-  
datum Octavio, ut cum prætore ageret, si quid ex  
ea provincia comparari ac mitti posset: ea quoque  
haud segniter curata res. Mille ducentæ togæ brevi  
spatio, et duodecim millia tunicarum missa. Æstate  
ea, qua hæc in Africa gesta sunt, P. Sempronius Sempro-  
consul, cui Brutii provincia erat, in agro Crotoni-  
ensi cum Hannibale in ipso itinere tumultuario pœ-  
lio conflixit: agminibus magis, quam acie, pugna-  
tum est. Romani pulsi, et tumultu verius, quam  
pugna, ad mille et ducenti de exercitu consulis in-  
terfecti: in castra trepide redditum. Neque obpug-  
nare tamen ea hostes ausi: ceterum silentio proximi-  
mæ noctis profectus inde consul, præmisso nuncio  
ad P. Licinium proconsulem, ut suas legiones ad-  
moveret, copias conjunxit: ita duo duces, duo ex-  
ercitus ad Hannibalem redierunt: nec mora dimi-  
candi facta est: quum consuli duplicatæ vires, Pœno

nus cos.  
cum Han-  
nibale male  
pugnat.

U. C. 548. recens victoria animo esset. In primam aciem suas A. C. 204. legiones Sempronius induxit: in subsidiis locatae P. Hanniba-  
lem acie Licinii legiones. Consul principio pugnæ ædem For-  
vincit.

fortunæ Primigeniæ vovit, si eo die hostes fudisset: composque ejus voti fuit. Fusi ac fugati Pœni: supra quatuor millia armatorum cæsa: paullo minus trecenti vivi capti, et equi quadraginta, et undecim militaria signa. Perculsum adverso prælio Hannibal

Cornelius Etruriā in officio continet. Crotonem exercitum abduxit. Eodem tempore M. Cornelius consul in altera parte Italæ non tam armis, quam judiciorum terrore, Etruriā continent, totam ferme ad Magonem, ac per eum ad spem novandi res, versam. Eas quæstiones ex senatuscon- sulto minime ambitiose habuit: multique nobiles Etrusci, qui aut ipsi ierant, aut miserant ad Magonen de populorum suorum defectione, primo præ- sentes erant condemnati; postea, conscientia sibi met ipsi exsiliū consciencentes, quum absentes dam- nati essent, corporibus subtractis, bona tantum, quæ publicari poterant, pignoranda pœnæ præbebant.

Livii et  
Claudii  
censura.

XXXVII. Dum hæc consules diversis regioni- bus agunt, censores interim Romæ M. Livius et C. Claudius senatum recitaverunt. Princeps iterum lectus Q. Fabius Maximus: notati septem; nemo tamen, qui sella curuli sedisset. Sarta tecta acriter et cum summa fide exegerunt: viam e foro Boario ad Veneris, et circa foros publicos, et ædem Matris Magnæ in Palatio faciendam locaverunt. Vectigal etiam novum ex salario annona statuerunt: sextante sal et Romæ et per totam Italiam erat. Romæ pretio eodem, pluris in foris et conciliabulis, et alio alibi pretio præbendum locaverunt. Id vectigal commentum alterum ex censoribus satis credebant,

populo iratum, quod iniquo judicio quondam dam- U. C. 548.  
natus esset: et in pretio salis maxime oneratas tri- A. C. 204.  
bus, quarum opera damnatus erat, credebant: inde  
Salinatori Livio inditum cognomen. Lustrum con-  
ditum serius, quia per provincias dimiserunt cen-  
sores, ut civium Romanorum in exercitibus, quan-  
tus ubique esset, referretur numerus. Censa cum  
iis ducenta decem quatuor millia hominum: condi-  
dit lustrum C. Claudius Nero. Duodecim deinde  
coloniarum, (quod numquam antea factum erat)  
deferentibus ipsarum coloniarum censoribus, cen-  
sum acceperunt: ut, quantum numero militum,  
quantum pecunia valerent, in publicis tabulis mo-  
numenta exstarent. Equitum deinde census agi  
cœptus est: et ambo forte censores equum publi-  
cum habebant. Quum ad tribum Polliam ventum Certamen  
est, in qua M. Livii nomen erat, et præco cunctare-  
notarum  
inter cen-  
tur citare ipsum censorem; Cita, inquit Nero, M. sores.  
*Livium*: et, sive ex residua et vetere similitate, sive  
intempestiva jactatione severitatis inflatus, M. Li-  
vium, quia populi judicio esset damnatus, equum  
vendere jussit. Item M. Livius, quum ad tribum  
Arniensem et nomen collegæ ventum est, vendere  
equum C. Claudium jussit, duarum rerum caussa;  
unius, quod falsum adversus se testimonium dixis-  
set; alterius, quod non sincera fide secum in gra-  
tiam redisset. Itaque ibi fœdum certamen inqui-  
nandi famam alterius, cum suæ famæ damno, fac-  
tum est. Exitu censuræ quum in leges jurasset C.  
Claudius, et in ærarium escendisset, inter nomina  
eorum, quos ærarios relinquebat, dedit collegæ no-  
men. Deinde M. Livius in ærarium venit, et, præ-  
ter Mæciam tribum, quæ se nec condemnasset, ne-

U.C. 548. que condemnatum aut consulem aut censorem fecisset, A. C. 204. populum Romanum omnem, quatuor et triginta tribus, ærarios reliquit: quod et innocentem se condemnassent, et condemnatum consulem et censorem fecissent: neque inficiari possent, aut judicio semel, aut comitiis bis ab se peccatum esse. Inter quatuor et triginta tribus et C. Claudium ærarium fore: quod si exemplum haberet bis eundem ærarium relinquendi, C. Claudium nominatim se inter ærarios fuisse relictum. Pravum certamen notarum inter censores: castigatio inconstantiae populi censoria, et gravitate temporum illorum digna. In invidia censores quum essent, crescendi ex his ratus esse occasionem Cn. Bæbius tribunus plebis diem ad populum utriusque dixit. Ea res consensu Patrum discussa est, ne postea obnoxia populari auræ censura esset.

XXXVIII. Eadem æstate in Bruttiiis Clampetia a consule vi capta, Consentia et Pandosia, et ignobiles aliæ civitates, voluntate in ditionem venerunt. Et, quum comitiorum jam adpeteret tempus, Cornelium potius ex Etruria, ubi nihil belli erat, Romam adciri placuit. Is consules C. Servilium Cæpionem et C. Servilium Geminum creavit. Inde præatoria comitia habita: creati P. Cornelius Lentulus, P. Quintilius Varus, P. Ælius Pætus, P. Villius Tappulus. Hi duo, quum ædiles plebis essent, prætores creati sunt. Consul, comitiis perfectis, ad exercitum in Etruriam rediit. Sacerdotes eo anno mortui, atque in locum eorum subfecti; Ti. Veturius Philo flamen Martialis, in locum M. Æmilii Regilli, qui priore anno mortuus erat, creatus inauguratusque: et in M. Pomponii Mathonis auguris et de-

cemviri locum creati, decemvir M. Aurelius Cotta,<sup>U.C. 548.</sup> augur Ti. Sempronius Gracchus admodum adoles-<sup>A.C. 204.</sup> cens, quod tunc perrarum in mandandis sacerdotiis erat. Quadrigæ aureæ eo anno in Capitolio positæ ab ædilibus curulibus, C. Livio et M. Servilio Geminio. Et ludi Romani biduum instaurati. Idem per biduum plebeii ab ædilibus P. Ælio, P. Villio: et Jovis epulum fuit ludorum caussa.

---

## EPITOME LIBRI XXX.

---

**I**N Africa Scipio Karthaginienses et eundem Syphacem Numidarum regem Hasdrubalemque pluribus præliis vicit, adjuvante Masinissa, binaque hostium castra expugnavit: in quibus quadraginta millia hominum ferro ignique consumita sunt. Syphacem per C. Lælum et Masinissam cepit. Masinissa Sophonisbam, uxorem Syphacis, filiam Hasdrubalis, captam statim adamavit, et, nuptiis factis, uxorem habuit: castigatus a Scipione venenum ei misit: quo hausto illa decessit. Effectumque est multis Scipionis victoriis, ut Karthaginienses, in desperationem acti, in auxilium publicæ salutis Hannibalem ex Italia revocarent: isque, anno decimosexto Italia decedens, in Africam trajecit, tentavitque per conloquium pacem cum Scipione componere: et, quum de conditionibus pacis non convenisset, acie victus est. Pax Karthaginiensibus data est petentibus. Hannibal Gisgonem, pacem dissuadentem, manu sua detraxit: excusata deinde temeritate facti, ipse pacem suasit. Mago, qui bello in agro Insubrium cum Romanis confixerat, vulneratus, dum in Africam per legatos revocatus revertitur, ex vulnere mortuus est. Masinissæ regnum restitutum est. Reversus in urbem Scipio amplissimum nobilissimumque egit triumphum, quem Q. Terentius Culleo senator pileatus secutus est. Scipio Africanus (incertum militari prius favore, an populari aura ita cognominatus) primus certe hic imperator victæ a se nomine gentis nobilitatus est.

---

## T. LIVII PATAVINI

### LIBER XXX.

---

CN. SERVILIUS CÆPIO et C. Servilius Gemi- U. C. 549.  
nus consules, (sextus decimus is annus belli A. C. 203.  
Punici erat) quum de republica belloque et provin-  
ciis ad senatum retulissent, censuerunt Patres, ut  
consules inter se compararent, sortirentur, uter  
Bruttios adversus Hannibalem, uter Etruriam ac  
Ligures provinciam haberet: cui Bruttii evenissent,  
exercitum a P. Sempronio acciperet. P. Sempro-  
nius (ei quoque enim proconsuli imperium in an-  
num prorogabatur) P. Licinio succederet: is Ro- Laus P.  
niam reverteretur, bello quoque bonus habitus ad  
Licinii.  
cetera, quibus nemo ea tempestate instructior civis  
habebatur, congestis omnibus humanis a natura for-  
tunaque bonis. Nobilis idem ac dives erat: forma  
viribusque corporis excellebat. Facundissimus ha-  
bebatur, seu caussa oranda, seu in senatu ad popu-  
lum suadendi ac dissuadendi locus esset: juris pon-  
tificii peritissimus. Super hæc, bellicæ quoque lau-  
dis consulatus compotem fecerat. Quod in Bruttis  
provincia, idem in Etruria ac Liguribus decretum:  
M. Cornelius novo consuli tradere exercitum jussus:  
ipse, prorogato imperio, Galliam provinciam obti-  
nere cum legionibus iis, quas prætor L. Scribonius  
priore anno habuisset. Sortiti deinde provincias:  
Cæpioni Bruttii, Servilio Gemino Etruria evenit,

U. C. 549. Tum prætorum provinciæ in sortem conjectæ. Ju-  
A. C. 203. risdictionem urbanani Pætus Ålius, Sardiniam P.  
Lentulus, Siciliam P. Villius, Ariminum cum duabus  
legionibus (sub Lucretio Spurio eæ fuerant) Quin-  
tilius Varus est sortitus. Et Lucretio prorogatum  
imperium, ut Genuam oppidum a Magone Pœno di-  
rutum exædificaret. P. Scipioni, non temporis, sed  
rei gerendæ fine, donec debellatum in Africa foret,  
prorogatum imperium est: decretumque, ut suppli-  
catio fieret, quod is in Africam provinciam trajecis-  
set, ut ea res salutaris populo Romano ipsique duci  
atque exercitui esset.

II. In Siciliam tria millia militum sunt scripta:  
et, quia, quod roboris ea provincia habuerat, in  
Africam transvectum fuerat, ne qua classis ex Africa  
trajiceret, quadraginta navibus custodiri placuerat  
Siciliæ maritimam oram. Tredecim novas naves  
Villius secum in Siciliam duxit: ceteræ in Sicilia  
veteres refectæ. Huic classi M. Pomponius, prioris  
anni prætor, prorogato imperio præpositus, novos  
milites ex Italia advectos in naves inposuit. Parem  
navium numerum Cn. Octavio, prætori item prioris  
anni, cum pari jure imperii ad tueudam Sardiniae  
oram Patres decreverunt. Lentulus prætor duo  
millia militum dare in naves jussus. Et Italiae ora,  
quia incertum erat, quo missuri classem Karthagi-  
nienses forent, (videbantur autem, quidquid nuda-  
tum præsidiis esset, petituri) M. Marcio, prætori pri-  
oris anni, cum totidem navibus tuenda data est: tria  
millia militum in eam classem ex decreto Patrum  
consules scripserunt, et duas legiones urbanas ad in-  
certa belli. Hispaniæ cum exercitibus imperioque ve-  
teribus imperatoribus, L. Lentulo et L. Manlio Aci-

dino, decretæ. Viginti omnino legionibus, et centum U. C. 549,  
sexaginta navibus longis res Romana eo anno gesta. A. C. 203.  
Prætores in provincias ire jussi. Consulibus impe-  
ratum, priusquam ab urbe proficiserentur, ludos  
magnoſ facerent, quos T. Manlius Torquatus dicta-  
tor in quintum annum vovisset, si eodem statu res-  
publica staret. Et novas religiones excitabant in  
animis hominum prodigia, ex pluribus locis nun-  
ciata. Aurum in Capitolio corvi non lacerasse tan-  
tum rostris crediti, sed etiam edisse. Mures Antii  
coronam auream adrosere. Circa Capuam omnem  
agrū locustarum vis ingens, ita ut, unde advenis-  
sent, parum constaret, complevit. Equuleus Reate  
cum quinque pedibus natus. Anagniæ sparsi pri-  
mum ignes in cœlo, dein fax ingens arsit. Frusin-  
none arcus solem tenui linea amplexus est; circu-  
lum deinde ipsum major solis orbis extrinsecus in-  
clusit. Arpini terra campestri agro in ingentem si-  
num consedit. Consulum alteri, primam hostiam  
inmolanti, caput jocinoris defuit. Ea prodigia ma-  
joribus hostiis procurata: editi a collegio pontifi-  
cum Dii, quibus sacrificaretur.

III. Iis transactis, consules prætoresque in pro-  
vincias profecti: omnibus tamen, velut eam sortitis,  
Africæ cura erat; seu quia ibi summam rerum bel-  
lique verti cernebant; seu ut Scipioni gratificaren-  
tur, in quem tum omnis versa civitas erat. Itaque  
non ex Sardinia tantum, (sicut ante dictum est) sed  
ex Sicilia quoque et Hispania uestimenta, frumen-  
tumque, et arma etiam ex Sicilia, et omne genus  
commeatus eo portabantur. Nec Scipio ullo tem- Res gestæ  
pore hiemis belli opera remiserat, quæ multa simul in Africa.  
undique eum circumstabant. Uticam obsidebat:

U.C. 549. castra in conspectu Hasdrubalis erant. Karthaginienses deduxerant naves : classem paratam instru- tamque ad conimeatus intercipiendos habebant. Inter hæc ne Syphacis quidem reconciliandi curam ex animo miserat ; si forte jam satias amoris in uxore ex multa copia cepisset. Ab Syphace magis pacis cum Karthaginiensibus conditiones, ut Romani Africa, Pœni Italia excederent, quam, si bellaretur, spes ulla desciturum adferebatur. Hæc per nuncios magis equidem acta crediderim, (et ita pars major auctores sunt,) quam ipsum Syphacem, ut Antias Valerius prodit, in castra Romana ad conloquium venisse. Primo eas conditiones imperator Romanus vix auribus admisit : postea, ut caussa probabilis suis commeandi foret in castra hostium, mollius eadem illa abnuere, ac spem facere, sæpius ultiro ci- troque agitantibus rem conventuram. Hibernacula Karthaginiensium, congesta temere ex agris materia exædificata, lignea ferme tota erant. Numidæ præ- cipue arundine textis, storeaque pars maxima tectis, passim nullo ordine, quidam, ut sine imperio occu- patis locis, extra fossam etiam vallumque habita- bant. Hæc relata Scipioni spem fecerant castra hostium per occasionem incendi.

**IV.** Cum legatis, quos mitteret ad Syphacem, ca- lonum loco primos ordines spectatæ virtutis atque prudentiæ servili habitu mittebat ; qui, dum in con- loquio legati essent, vagi per castra, alius alia, adi- tuis exitusque omnes, situm formamque et universo- rum castrorum, et partium, qua Pœni, qua Numidæ haberent, quantum intervalli inter Hasdrubalis ac regia castra esset, specularentur : moremque simul noscerent stationum vigiliarumque : nocte, an inter-

Castra  
Hasdru-  
balis et  
Syphacis.

diu opportuniores insidianti essent. Et inter crebra U.C. 54. conloquia alii atque alii de industria, quo pluribus A.C. 203. omnia nota essent, mittebantur. Quum sæpius agitata res certiore spem pacis in dies et Syphaci et Karthaginiensibus per eum faceret; legati Romani vetitos se reverti ad imperatorem aiunt, nisi certum responsum detur. Proinde, seu ipsi staret jam sententia, seu consulendus Hasdrubal et Karthaginienses essent, consuleret. Tempus esse, aut pacem componi, aut bellum naviter geri. Dum consulitur Hasdrubal ab Syphace, ab Hasdrubale Karthaginienses; et speculatori omnia visendi, et Scipio ad comparanda ea, quæ in rem erant, tempus habuit: et ex mentione ac spe pacis negligentia, ut fit, apud Poenos Nundamque orta cavendi, ne quid hostile interim patarentur. Tandem relatum responsum, quibusdam (quia nimis cupere Romanus pacem videbatur) ini quis per occasionem adjectis; quæ peropportune cupienti tollere inducias Scipioni caussam præbuere: ac nuncio regis, quum relatiruni se ad consilium dixisset, postero die respondit, *Se uno frustra tendente, nulli alii pacem placuisse.* Renunciaret igitur, nullam aliam spem pacis, quam relictis Karthaginiensibus, Syphaci cum Romanis esse. Ita tollit inducias, ut libera fide incepta exsequeretur: deductisque navibus (et jam veris principium erat) machinas tormentaque, velut a mari adgressurus Uticam, inponit. Et duo millia militum ad capiendum, quem antea tenuerat, tumulum super Uticam mittit: simul ut ab eo, quod parabat, in alterius rei curam convertere ret hostium animos: simul ne qua, quum ipse ad Syphacem Hasdrubalemque profectus esset, eruptio ex urbe et inpetus in castra sua, reicta cum leví præsidio, fieret.

U.C. 549. V. His præparatis, advocatoque consilio, edicere  
 A.C. 203. exploratoribus jussis, quæ comperta adferrent, Ma-  
 Incensa a sinissaque, cui omnia hostium nota erant; postremo  
 Scipione. ipse, quid pararet in proximam noctem, proponit.  
 Tribunis edicit, ut, ubi, prætorio dimisso, signa  
 concinuissent, extemplo educerent castris legiones.  
 Ita, ut imperaverat, signa sub occasum solis efferri  
 sunt cœpta: ad primam ferme vigiliam agmen ex-  
 plicaverunt: media nocte (septem enim millia itine-  
 ris erant) modico gradu ad castra hostium perva-  
 tum. Ibi Scipio partem copiarum Lælio, Masinissamque ac Numidas, adtribuit: et castra Syphacis  
 invadere, ignesque conjicere jubet. Singulos deinde  
 separatim Lælium ac Masinissam, seductos obtestar-  
 tur, ut, quantum nox providentiae adimat, tantum dili-  
 gentia expleant curaque. Se Hasdrubalem Punicaque  
 castra adgressurum. Ceterum non ante cæpturum,  
 quam ignem in regiis castris conspexisset. Neque ea  
 res morata diu est: nam, ut proximis casis injectus  
 ignis hæsit, extemplo proxima quæque, et deinceps  
 continua amplexus, totis se passim dissipavit castris.  
 Et trepidatio quidem, quanta necesse erat, in noc-  
 turno effuso tam late incendio orta est: ceterum,  
 fortuitum, non hostilem ac bellicum, ignem rati esse,  
 sine armis ad restinguendum incendium effusi, in  
 armatos incidere hostes, maxime Numidas, ab Ma-  
 sinissa notitia regiorum castrorum ad exitus itine-  
 rum idoneis locis dispositos. Multos in ipsis cubi-  
 libus semisomnos hausit flamma: multi in præcipiti  
 fuga, ruentes super alios alii, in angustiis portarum  
 obtriti sunt.

VI. Relucentem flamمام primo vigiles Kartha-  
 giniensium, deinde excitati alii nocturno tumultu  
 quum conspexissent, ab eodem errore credere et ipsi

sua sponte incendium ortum : et clamor inter cæ- U.C. 54<sup>a</sup>.  
 dem et vulnera sublatus, an ex trepidatione noc- A.C. 203.  
 turna esset, confusus, sensum veri adimebat. Igitur  
 pro se quisque inermes, ut quibus nihil hostile sus-  
 pectum esset, omnibus portis, qua cuique proximum  
 erat, ea modo, quæ restinguendo igni forent, por-  
 tantes, in agmen Romanum ruebant. Quibus cæsis  
 omnibus, præterquam hostili odio, etiam ne quis  
 nuncius effingeret, extemplo Scipio neglectas, ut in  
 tali tumultu, portas invadit : ignibusque in proxima  
 tecta conjectis, effusa flamma primo veluti sparsa  
 pluribus locis reluxit, dein per continua serpens, uno  
 repente omnia incendio hausit. Ambusti homines  
 jumentaque fœda primum fuga, dein strage, obrue-  
 rant itinera portarum. Quos non obpresserat ignis,  
 ferro absunti : binaque castra clade una deleta.  
 Duces tamen ambo, et ex tot millibus armatorum  
 duo millia peditum et quingenti equites semiermes,  
 magna pars saucii, adflatique incendio, effugerunt.  
 Cæsa aut hausta flammis quadraginta millia homi-  
 num sunt, capta supra quinque millia : multi Kar-  
 thaginiensium nobiles, undecim senatores, signa mi-  
 litaria centum septuaginta quatuor, equi Numidici  
 supra duo millia septingenti, elephanti sex capti ;  
 octo flamma ferroque absunti, magnaque vis armo-  
 rum capta. Ea omnia imperator Vulcano sacrata  
 incendit.

VII. Hasdrubal ex fuga, cum paucis, Afrorum  
 urbem proximam petierat : eoque omnes, qui su-  
 pererant, vestigia ducis sequentes, se contulerant :  
 metu deinde, ne dederetur Scipioni, urbe excessit.  
 Mox eodem patentibus portis Romani accepti : nec  
 quidquam hostile, quia voluntate concesserant in

U. C. 549. ditionem, factum. Duæ subinde urbes captæ di-  
 A. C. 203. reptæque: ea præda, et quæ castris ex incensis et  
 igne rapta erat, militi concessa est. Syphax octo  
 millium ferme inde spatio loco communito consedit. Hasdrubal Karthaginem contendit, ne quid per me-  
 tum ex recenti clade mollius consuleretur: quo tan-  
 tus primo terror est adlatus, ut, omissa Utica, Kar-  
 thaginem crederent extemplo Scipionem obsessurum.  
 Senatum itaque suffetes (quod velut consulare impe-  
 rium apud eos erat) vocaverunt. Ibi e tribus (una  
 de pace legatos ad Scipionem decernebat: altera  
 Hannibalem ad tuendam ab exitiabili bello patriam  
 revocabat: tertia Romanæ in adversis rebus con-  
 stantiæ erat; reparandum exercitum, Syphacemque  
 hortandum, ne bello absisteret, censebat) hæc sen-  
 tentia, quia Hasdrubal præsens Barcinæque omnes  
 factionis bellum malebant, vicit. Inde delectus in  
 urbe agrisque haberi cœptus, et ad Syphacem legati  
 missi, summa ope et ipsum reparantem bellum:  
 quum uxor non jam, ut ante, blanditiis, satis poten-  
 tibus ad animum amantis, sed precibus et misericor-  
 dia valuisse, plena lacrimarum obtestans, ne patrem  
 suum patriamque proderet, iisdemque flammis Kar-  
 thaginem, quibus castra conflagrassent, absumi sine-  
 ret. Spem quoque opportune oblatam adferebant  
 legati: quatuor millia Celtiberorum circa urbem  
 nomine Abbam, ab conqueritoribus suis conducta in  
 Hispania, egregiæ juventutis, sibi obcurrisse: et  
 Hasdrubalem prope diem adfore cum manu haud-  
 quaquam contemnenda. Igitur non benigne modo  
 legatis respondit, sed ostendit etiam multitudinem  
 agrestium Numidarum, quibus per eosdem dies arma  
 equosque dedisset, et omnem juventutem adfirmat

excitum ex regno. *Scire incendio, non prælio,* U. C. 549.  
*cladem acceptam: eum bello inferiorem esse, qui armis* A. C. 203.  
*vincatur.* Hæc legatis responsa. Et post dies pau- Karthagini-  
cos rursus Hasdrubal et Syphax copias junxerunt: <sup>enses co-</sup>  
<sup>prias cum</sup> is omnis exercitus fuit triginta ferme millium arma- Syphace  
torum. <sup>jungunt.</sup>

VIII. Scipionem, velut jam debellato, quod ad Syphacem Karthaginensesque adtineret, Uticæ ob- pugnandæ intentum, jamque machinas admoventem muris, avertit fama redintegrati belli: modicisque præsidiis ad speciem modo obsidionis terra marique relictis, ipse cum robore exercitus ire ad hostes per- Eos prælio git. Primo in tumulo, quatuor ferme millia dis- vincit Sci- tante ab castris regiis, consedit: postero die cum pio. equitatu in Magnos (ita vocant) campos, subjectos ei tumulo, degressus, succedendo ad stationes hostium, lacesendoque levibus præliis, diem absumsit: et per insequens biduum tumultuosum hinc atque il- linc excursionibus in vicem, nihil dictu satis dignum fecerunt; quarto die utrimque in aciem descensum est. Romanus principes post hastatorum prima signa, in subsidiis triarios constituit: equitatum Italicum ab dextro cornu, ab lævo Numidas Masinissamque obposuit. Syphax Hasdrubalque, Numidicis adversus Italicum equitatum, Karthaginensis- bus contra Masinissam locatis, Celtiberos in medium aciem in adversa signa legionum accepere: ita instructi concurrunt. Primo in petu simul utraque cornua, et Numidæ et Karthaginenses pulsi: nam neque Numidæ, maxima pars agrestes, Romanum equitatum, neque Karthaginenses, et ipse novus miles, Masinissam, recenti super cetera victoria terribilem, sustinuere. Nudata utrimque cornibus Cel-

U. C. 549. tiberum acies stabat: quod nec in fuga salus illa  
 A. C. 203. ostendebatur locis ignotis, neque spes veniae ab Scipione erat; quem, bene meritum de se et gente sua, mercenariis armis in Africam obpugnatum venissent. Igitur, circumfusis undique hostibus, alii super alios cadentes, obstinati moriebantur: omnibusque in eos versis, aliquantum ad fugam temporis Syphax et Hasdrubal praeceperunt. Fatigatos cæde diutius, quam pugna, victores nox obpressit.

**IX.** Postero die Scipio Lælium Masinissamque, cum omni Romano et Numidico equitatu expeditisque militum, ad persequendos Syphacem atque Hasdrubalem mittit: ipse, cum robore exercitus, urbes circa, quæ omnes Karthaginiensium ditionis erant, partim spe, partim metu, partim vi subegit. Karthagini quidem erat ingens terror, et circumferentem arma Scipionem, omnibus finitimis raptim perdomitis, ipsam Karthaginem repente adgressurum credebant. Itaque et muri reficiebantur, propugnaculisque armabantur: et pro se quisque, quæ diutinae obsidioni tolerandæ sunt, ex agris convehit. Rara mentio est pacis, frequentior legatorum ad Hannibalem arcessendum mittendorum: pars maxima classem, quæ ad commeatus excipiendos parata erat, mittere jubent ad obprimendam stationem navium ad Uticam, incaute agentem: forsitan etiam navalia castra, relicta cum levi præsidio, obpressuros. In hoc consilium maxime inclinant: legatos tamen ad Hannibalem mittendos censem: quippe, classi ut felicissime gerantur res, parte aliqua levare Uticæ obsidionem: Karthaginem ipsam qui tueatur, neque imperatorem aliuni, quam Hannibalem, neque exercitum alium, quam Hannibal, superesse. De-

Terror  
Karthagi-  
ni.

duetæ ergo postero die naves, simul et legati in Ita- U.C. 549.  
 liam profecti, raptimque omnia, stimulante fortuna, A.C. 203.  
 agebantur: et, in quo quisque cessasset, prodi ab Legati mis-  
 se salutem omnium rebatur. Scipio, gravem jam candum  
 spoliis multarum urbium exercitum trahens, captivis leni- Hanniba-  
 aliaque præda in vetera castra ad Uticam missis,  
 iam in Karthaginem intentus, occupat relictum fuga  
 custodum Tuneta: abest ab Karthagine quindecimi  
 millia ferme passuum locus, quum operibus, tum  
 suapte natura tutus, qui et ab Karthagine conspici,  
 et præbere ipse prospectum, quum ad urbem, tum  
 ad circumfusum mare urbi, posset.

X. Inde, quum maxime vallum Romani jacerent, conspecta classis hostium est, Uticam Karthagine petens. Igitur, omissa opere, pronunciatum iter, signaque raptim ferri sunt cœpta: ne naves, in ter- Classem  
 ram et obsidionem versæ, ac minime navali prælio Romanam  
 aptæ, obprimierentur. Qui enim restitissent agili et invadunt  
 nautico instrumento aptæ et armatæ classi naves, Karthagi-  
 tormenta machinasque portantes, et aut in oneraria- nienses.  
 rum usum versæ, aut ita adpulsæ ad muros, ut pro  
 aggere ac pontibus præbere adscensus possent? Ita-  
 que Scipio, contra quam in navali certamine solet,  
 rostratis, quæ præsidio aliis esse poterant, in post-  
 remam aciem receptis prope terram, oneriarum  
 quadruplicem ordinem pro muro adversus hostem  
 obposuit: easque ipsas, ne in tumultu pugnæ tur-  
 bari ordines possent, malis antennisque de nave in  
 navem trajectis, ac validis funibus velut uno inter-  
 se vinculo inligatis, comprehendit: tabulasque super-  
 instravit, ut pervium ordinem faceret: et sub ipsis  
 pontibus intervalla fecit, qua procurrere speculato-  
 riæ naves in hostem, ac tuto recipi possent. His

U. C. 549. raptim pro tempore instructis, mille ferme delecti  
A. C. 203. propugnatores onerariis inponuntur: telorum maxime missilium, ut, quamvis longo certamine, subficerent, vis ingens congeritur. Ita parati atque intenti hostiem adventum obperiebantur. Karthaginienses, qui, si maturassent, omnia permixta turbatrepidantium primo inpetu obpressissent, percusserest terrestribus cladibus, atque inde ne in mari quidem, ubi ipsi plus poterant, satis fidentes, die segni navigatione absumto, sub occasum solis in portum (Ruscinona Afri vocant) classe adpulere: postero die sub ortum solis instruxere ab alto naves, velut ad justum prælium navale, et tamquam exituris contra Romanis. Quum dū stetissent, postquam nihil moveri ab hostibus viderunt, tum demum onerarias adgrediuntur. Erat res minime certamini navali similis, proxime speciem muros obpugnantium navium: altitudine aliquantum onerariæ superabant: ex rostratis Pœni vana pleraque (utpote supino jactu) tela in superiorem locum mittebant: gravior ac pondere ipso librator superne ex onerariis ictus erat. Speculatoriæ naves ac levia ipsa navigia, quæ sub constratis pontium per intervalla excurrebant, primo ipso tantum inpetu ac magnitudine rostratum obruebantur: deinde et propugnatoribus quoque incommodæ erant; quod permixtæ cum hostium navibus inhibere sape tela cogebant; metu ne ambiguo ictu suis inciderent: postremo asseres ferreo unco præfixi (harpagones vocant) ex Punicis navibus injici in Romanas cœpti. Quos quum neque ipsos, neque catenas, quibus suspensi injiciebantur, incidere possent; ut quæque retro inhibita rostrata onerariam hærentem unco traheret, scindi

videres vincula, quibus alia aliis innexa erat, seriem U. C. 549; aliam simul plurium navium trahi. Hoc maxime A. C. 203. modo lacerati quidem omnes pontes, et vix transsilendi in secundum ordinem navium spatium propugnatoribus datum est. Sex ferme onerariæ pup- Naves sex pibus abstractæ Karthaginem sunt: major quam abstrahunt. pro re lætitia, sed eo gratior, quod inter adsiduas clades ac lacrimas unum quantumcumque ex insperato gaudium adfulserat; cum eo, ut adpareret, haud procul exitio fuisse Romanam classem, ni cessatum a præfectis suarum navium foret, et Scipio in tempore subvenisset.

XI. Per cosdem forte dies, quum Lælius et Masinissa quintodecimo ferme die in Numidiā pervernissent, Massyli, regnum paternum Masinissæ, læti Masinissa ut ad regem diu desideratum concessere. Syphax, regnum re- cuperat. pulsis inde præfectis præsidiisque suis, vetere se continebat regno, neutquam quieturus. Stimulabant ægruni amore uxor sacerque: et ita viris equisque abundabat, ut subjectæ oculis regni per multos florētis annos vires etiam minus barbaro atque inpotenti animo spiritus possent facere. Igitur omni- Syphax bus, qui bello apti erant, in unum coactis equos, bellum re- parat. arma, tela dividit: equites in turmas, pedites in cohortes, sicut quondam ab Romanis centurionibus didicerat, distribuit. Exercitu haud minore, quam quem prius habuerat, ceterum omni prope novo atque incondito, ire ad hostes pergit. Et, castris in propinquō positis, primo pauei equites ex tuto speculantes ab stationibus progredi; inde jaculis submoti recurrere ad suos: inde excursiones in vicem fieri, et, quum pulsos indignatio accenderet, plures subire: quod irritamentum certaminū equestrium

U. C. 549. est, quum aut vincentibus spes, aut pulsis ira adgreditur.  
 A. C. 203. gat suos. Ita tum a paucis prælio accenso, omnem utrimque postremo equitatum certaminis studium effudit: ac, dum sincerum equestre prælium erat, Vincitur a multitudine Masæsylorum, ingentia agmina Syphace Lælio et emittente, sustineri vix poterat; deinde, ut pedes Masinissa. Romanus repentina per turmas suas viam dantes intercursu stabilem aciem fecit, absteruitque effuse invehentem sese hostem, primo barbari segnius permettere equos; deinde stare ac prope turbari novo genere pugnæ; postremo, non pediti solum cedere, sed ne equitem quidem sustinere, peditis præsidio audentem. Jam signa quoque legionum adpropinquabant: tum vero Masæsyli non modo primum impetum, sed ne conspectum quidem signorum atque armorum, tulerunt: tantum seu memoria priorum cladi, seu præsens terror valuit.

XII. Ibi Syphax, dum obequitat hostium turmis, si pudore, si periculo suo fugam sistere posset, equo graviter icto, effusus obprimitur capiturque, et vivus, lætum ante omnes Masinissæ præbiturus spectaculum, ad Lælium pertrahitur. Cirta caput regni Syphacis erat: eo se ingens hominum contulit vis. Cædes in eo prælio minor, quam victoria, fuit, quia equestri tantummodo prælio certatum fuerat: non plus quinque millia occisa, minus dimidium ejus hominum captum est, in petu in castra facto, quo perculta rege amissso multitudine se contulerat. Masinissa, *Sibi quidem, dicere, nihil esse in præsentia pulchrius, quam victorem, recuperatum tanto post intervallo, patrium invisere regnum: sed tam secundis, quam adversis, rebus non dari spatium ad cessandum.* Si se Lælius cum equitatu vinctoque Syphace Cirtam

*præcedere sinat, trepida omnia metu se oppressurum : U. C. 549.  
Lælium cum peditibus subsequi modicis itineribus posse.* A. C. 203.

Adsentiente Lælio, prægressus Cirtam, evocari ad conloquium principes Cirtensium jubet: sed apud ignaros regis casus, neque quæ acta essent promendo, nec minis, nec suadendo, ante valuit, quam rex vinctus in conspectum datus est. Tum ad spectaculum tam fœdum comploratio orta: et partim pavore mœnia sunt deserta, partim repellit consensu gratiam apud victorem quærantium patefactæ portæ. Et Masinissa, præsidio circa portas opportunaque mœnium dimisso, ne cui fugæ pateret exitus, ad regiam occupandam citato vadit equo. Intranti vestibulum in ipso limine Sophonisba, uxor Syphacis, filia Hasdrubalis Pœni, obcurrit: et, quum in medio agmine armatorum Masinissam insignem, quum armis, tum cetero habitu, conspexisset, regem esse (id quod erat) rata, genibus advoluta ejus: *Omnia quidem ut posses in nobis, Dii dederunt, virtusque et felicitas tua.* Sed, si captivæ apud dominum ritæ necisque suæ vocem supplicem mittere licet, si genua, si vetricem adtingere dextram, precor quæsoque per majestatem regiam, in qua paullo ante nos quoque fuimus, per gentis Numidarum nomen, quod tibi cum Syphace commune fuit, per hujusc regiæ Deos, qui te melioribus omnibus accipiunt, quam Syphacem hinc miserunt, hanc veniam supplici des, ut ipse, quodcumque fert animus, de captiva statuas, neque me in eujusquam Romani superbum ac crudele arbitrium venire sinas. Si nihil aliud, quam Syphacis uxor, fuisse, tamen Numidæ, atque in eadem tecum Africa geniti, quam alienigenæ et externi, fidem experiri mallem. Quid Karthaginiensi ab Romano, quid filiae Hasdrubalis timen-

Sophonisba  
Masinissæ  
supplicat.

U. C. 549. *dum sit, vides. Si nulla alia re potes, morte me ut  
A. C. 203. vindices ab Romanorum arbitrio, oro obtestorque.*

Forma erat insignis et florentissima ætas: itaque quum modo, dextram amplectens, in id, ne cui Romano traderetur, fidem exposceret, propiusque blandicias oratio esset, quam preces; non in misericordiam modo prolapsus est animus victoris, sed (ut est genus Numidarum in Venerem præceps) amore captivæ victor captus, data dextera in id, quod petebatur, obligandæ fidei, in regiam concedit. Institit deinde reputare secum ipse, quemadmodum promissi fidem præstaret; quod quum expedire non posset, ab amore temerarium atque inpudens mutuatur con-

Ducit eam silium. Nuptias in eum ipsum diem repente parari uxorem Masinissa.

jubet, ne quid relinqueret integri aut Lælio, aut ipsi Scipioni, consulendi velut in captivam, quæ Masinissæ jam nupta foret. Factis nuptiis supervenit Lælius: et adeo non dissimulavit improbare se factum, ut primo etiam cum Syphace et ceteris captivis detractam eam toro geniali mittere ad Scipionem conatus sit: victus deinde precibus Masinissæ orantis, ut arbitrium, utrius regum duorum fortunæ accessio Sophonisba esset, ad Scipionem rejiceret; misso Syphace et captivis, ceteras urbes Numidiæ, quæ præsidiis regiis tenebantur, adjuvante Masinissa, recipit.

*Syphax in castra Romana addicitur.* XIII. Syphacem in castra adduci, quum esset nunciatum, omnis velut ad spectaculum triumphi multitudo effusa est. Præcedebat ipse vinetus; sequebatur grex nobilium Numidarum. Tum, quantum quisque plurimum posset, magnitudini Syphacis, famæ gentis, victoram suam augendo, addebat: illum esse regem, cuius tantum majestati duo potentis-

simi in terris tribuerint populi, Romanus Karthagini- U.C. 549.  
ensisque, ut Scipio imperator suus ad amicitiam ejus A. C. 203.  
petendam, relictā provincia Hispania exercituque, dua-  
bus quinqueremibus in Africam navigaverit: Hasdrubal,  
Pænorum imperator, non ipse modo ad eum in  
regnum venerit, sed etiam filiam ei nuptum dederit.  
Habuisse eum uno tempore in potestate duos imperato-  
res, Pænum Romanumque. Sicut ab Diis immortali-  
bus pars utraque hostiis mactundis pacem petisset, ita  
ab eo utrumque pariter amicitiam petitam. Jam tan-  
tas habuisse opes, ut Masinissam regno pulsum eo re-  
degerit, ut vita ejus fama mortis et latebris, ferarum  
modo in silvis rapto viventis, tegeretur. His sermoni-  
bus circumstantium celebratus rex in prætorium ad  
Scipionem est perductus. Movit et Scipionem quum  
fortuna pristina viri præsenti fortunæ conlata, tum  
recordatio hospitii dextræque datæ, et foederis pub-  
lice ac privatim juncti. Eadem hæc et Syphaci Conloqui-  
anum dederunt in adloquendo victore: nam tur cum  
Scipione, quum Scipio, quid sibi voluisse, quereret, qui non  
societatem solum abnuisset Romanam, sed ultro bellum  
intulisset; tum ille, peccasse quidem sese atque insa-  
nisce, fatebatur; sed non tum demum, quum arma ad-  
versus populum Romanum cepisset; exitum sui furoris  
fuisse, non principium. Tunc se insanisse, tunc hos-  
pitia privata et publica fædera omnia ex animo ejecis-  
se, quum Karthaginiensem matronam domum accep-  
erit. Illis nuptialibus facibus regiam conflagrasse suam:  
illam furiam pestemque omnibus delinimentis animum  
suum avertisse atque alienasse: nec conquiesce, donec  
ipsa manibus suis nefaria sibi armu adversus hospitem  
atque amicum induerit. Perdito tamen atque ad-  
ficto sibi hoc in miseriis solatii esse, quod in omnium

U.C. 549. hominum inimicissimi sibi domum ac penates eamdem  
 A.C. 203. pestem ac furiam transisse videat: neque prudentior-  
 rem, neque constantiorem Masinissam, quam Sypha-  
 cem, esse, etiam juventa incautiorem: certe stultius  
 illum atque intemperantius eam, quam se, duxisse.

XIV. Hæc non hostili modo odio, sed amoris  
 etiam stimulis, amatam apud æmulum cernens,  
 quum dixisset; non mediocri cura Scipionis ani-  
 mum pepulit: et fidem criminibus raptæ prope inter  
 arma nuptiæ, neque consulto, neque exspectato Læ-  
 lio, faciebant; tamque præceps festinatio, ut, quo  
 die captam hostem vidisset, eodem matrimonio junc-  
 tam acciperet, et ad penates hostis sui nuptiale sa-  
 crum conficeret: eo fœdiora hæc videbantur Sci-  
 pioni, quod ipsum in Hispania juvenem nullius for-  
 ma pepulerat captivæ. Hæc secum volutanti Læ-  
 lius ac Masinissa supervenerunt; quos quum pariter  
 ambo et benigno vultu exceperisset, et egregiis laudi-  
 bus frequenti prætorio celebrasset; abductum in  
 secretum Masinissam sic adloquitur; *Aliqua te ex-  
 sam casti-  
 gat Scipio.* *Istimo, Masinissa, intuentem in me bona, et principio  
 in Hispania ad jungendam mecum amicitiam venisse,  
 et postea in Africa te ipsum spesque omnes tuas in  
 fidem meam commisisse. Atqui nulla earum virtus  
 est, propter quas adpetendus tibi visus sim, qua ego  
 æque, atque temperantia et continentia libidinum, glo-  
 riatus fuerim. Hanc te quoque ad ceteras tuas eximias  
 virtutes, Masinissa, adjecisse velim: non est, non (mihi  
 crede) tantum ab hostibus armatis ætati nostræ pericu-  
 lum, quantum ab circumfusis undique voluptatibus:  
 qui eas sua temperantia frenavit ac domuit, multo  
 majus decus majoremque victoriam sibi peperit, quam  
 nos Syphace victo habemus. Quæ, me absente, strenue*

*ac fortiter fecisti, libenter et commemoravi, et memini: U. C. 549.  
cetera te ipsum reputare tecum, quam, me dicente, A. C. 203.  
erubescere malo. Syphax populi Romani auspiciis  
victus captusque est. Itaque ipse, conjux, regnum,  
ager, oppida, homines qui incolunt, quidquid denique  
Syphacis fuit, præda populi Romani est; et regem  
conjugemque ejus, etiamsi non civis Karthaginiensis es-  
set, etiamsi non patrem ejus imperatorem hostium vide-  
remus, Romani oporteret mitti, ac senatus populique  
Romani de ea judicium atque arbitrium esse, quæ re-  
gem nobis socium alienasse, atque in arma egitte præ-  
cipitem dicatur. Vince animum: cave deformes multa  
bona uno vitio, et tot meritorum gratiam majore culpa,  
quam caussa culpæ est, corrumpas.*

XV. Masinissæ hæc audienti non rubor solum  
subfusus, sed lacrimæ etiam obortæ: et, quum se  
quidem in potestate futurum imperatoris dixisset, oras-  
setque eum, ut, quantum res sineret, fidei suæ temere  
obstrictæ consuleret; promisisse enim, sese in nullius  
potestatem eam traditurum, ex prætorio in taberna-  
culum suum confusus concessit. Ibi, arbitris remo-  
tis, quum crebro suspitu et gemitu, quod facile ab  
circumstantibus tabernaculum exaudiri posset, ali-  
quantum temporis consumisset; ingenti ad postre-  
num edito gemitu, fidum e servis vocat, sub cuius  
custodia regio more ad incerta fortunæ venenum  
erat, et mixtum in poculo ferre ad Sophonisbam  
jubet, ac simul nunciare; *Masinissam libenter pri-  
mam ei fidem præstaturum fuisse, quam vir uxori de-* Masinissa  
*buerit. Quoniam arbitrium ejus, qui possint, adimant,* venenum  
*secundam fidem præstare, ne viva in potestatem Roma-* mittit ad  
*norum veniat. Memor patris imperatoris, patriæque, et* Sophonis-  
*duorum regum, quibus nupta fuisset, sibi ipsa consule-* bam.

U. C. 549. ret. Hunc nuncium ac simul venenum ferens min-  
A. C. 203. ister quum ad Sophonisbam venisset, *Accipio*, in-

*quit, mptiale munus; neque ingratum, si nihil maius vir uxori præstare potuit. Hoc tamen nuncia, melius me moritoram fuisse, si non in funere meo nupsissem: non locuta est ferocius, quam acceptum poculum, nullo trepidationis signo dato, inpavide hausit. Quod ubi nunciatum est Scipioni, ne quid æger animi ferox juvenis gravius consuleret, adcitum eum extemplo nunc solatur; nunc, quod temeritatem temeritate alia huerit, tristiorumque rem, quam necesse fuerit, fecerit, leniter castigat.* Postero die, ut a præsenti motu averteret animum ejus, in tribunal escendit, et concionem advocari jussit. Ibi Masinissam, primi regem adpellatum, eximiisque ornatuni laudibus, aurea corona, aurea patera, sella curuli, et scipione eburneo, toga picta, et palmata tunica donat. Addit verbis honorem, *Neque magnificentius quidquam triumpho apud Romanos, neque triumphantibus ampliorem eo ornatu esse; quo unum omnium externorum dignum Masinissam populus Romanus ducat.* Lælium deinde, et ipsum conlaudatum, aurea corona donat: et alii militares viri, prout a quoque navata opera erat, donati. His honoribus mollitus regis animus, erectusque in spem propinquam, sublato Syphace, omnis Numidiæ potiundæ.

XVI. Scipio, C. Lælio cum Syphace aliisque captivis Romam misso, cum quibus et Masinissæ legati profecti sunt, ipse ad Tuneta rursum castra refert, et, quæ munimenta inchoaverat, permunit. Karthaginienses, non brevi solum, sed prope vano gaudio, ab satis prospera in præsens obpugnatione clas-

Scipio  
Masiniss-  
sam am-  
plissimis  
donis de-  
corat.

Kartha-  
ginienses  
pacem  
petunt.

sis perfusi, post famam capti Syphacis, in quo plus U.C. 549.  
prope, quam in Hasdrubale atque exercitu suo spei A.C. 203.  
reposuerant, perculti, jam nullo auctore belli ultra  
auditio, oratores ad pacem petendam mittunt tri-  
ginta seniorum principes: id erat sanctius apud il-  
los consilium, maximaque ad ipsum senatum regen-  
duni vis. Qui ubi in castra Romana et prætorium  
pervenerunt, more adulantium (accepto, credo, ritu  
ex ea regione, ex qua oriundi erant) procubuerunt.  
Conveniens oratio tam humili adulationi fuit, non  
culpam purgantium, sed transferentium initium cul-  
pæ in Hannibalem inpotentiaeque ejus fautores. Ve-  
niam civitati petebant, civium temeritate bis jam  
ante eversæ, incolumi futuræ iterum hostium bene-  
ficio. Imperium ex victis hostibus populum Roma-  
num, non perniciem, petere. Paratis obediente ser-  
vire, quæ vellet, imperaret. Scipio, et venisse ea spe  
in Africam se, ait, et spem suam prospero belli eventu  
auctam, victoriam se, non pacem, domum reportatu-  
rum esse: tamen, quum victoriam prope in manibus  
habeat, pacem non abnuere; ut omnes gentes sciunt,  
populum Romanum et suscipere juste bella, et finire.  
Leges pacis se has dicere. Captivos, et perfugas, et fu-  
gitivos restituant: exercitus ex Italia et Gallia dedu-  
cant: Hispania abstineant: insulis omnibus, quæ inter  
Italianam et Africam sunt, decedant: naves longas, præ-  
ter viginti, omnes tradant: tritici quingenta, hordei  
trecenta millia modiūn. Pecuniae summam quantam  
imperaverit, parum convenit: alibi quinque millia  
talentum, alibi quinque millia pondo argenti, alibi  
duplex stipendum militibus imperatum invenio. His  
conditionibus, inquit, placeatne pax, triduum ad con-  
sultandum dabitur. Si placuerit, mecum inducias fa-

Leges pacis  
a Scipione  
dictæ.

U. C. 549. cite, *Romam ad senatum mittite legatos.* Ita di-  
 A. C. 203. missi Karthaginienses, nullas recusandas conditio-  
 nes pacis quum censuissent, (quippe qui moram  
 temporis quererent, dum Hannibal in Africam tra-  
 jiceret,) legatos alios ad Scipionem, ut inducias fa-  
 cerent, alios Romam ad pacem petendam mittunt,  
 ducentes paucos in speciem captivos, perfugasque, et  
 fugitivos, quo inpetrabilior pax esset.

Lælius  
 cum cap-  
 tivis Ro-  
 mam ve-  
 nit.

XVII. Multis ante diebus Lælius, cum Syphace primoribusque Numidarum captivis, Roniam venit: quæque in Africa gesta essent, omnia exposuit or-  
 dine Patribus, ingenti omnium et in præsens lætitia,  
 et in futurum spe. Consulti inde Patres regem in custodiam Albani mittendum censuerunt: Lælium retinendum, donec legati Karthaginienses venirent. Supplicatio in quatriduum decreta est. P. Ælius prætor, senatu misso, et concione inde advocata, cum C. Lælio in Rostra escendit. Ibi vero audien-  
 tes, fusos Karthaginiensium exercitus, devictum et captum ingentis nominis regem, Numidiam omnem egregia victoria peragratam, tacitum continere gau-  
 dium non poterant, quin clamoribus, quibusque aliis multitudo solet, lætitiam inmodicam significant. Itaque prætor extemplo edixit, *Uti æditui ædes sacras omnes tota urbe aperirent, circumeundi, salutandique Deos, agendique grates per totum diem populo potestas*

Oratio le- fieret. Postero die legatos Masinissæ in senatum in-  
 gatorum Masinissæ troduxit. Gratulati primum senatui sunt, *quod P.*  
 in senatu. *Scipio prospere res in Africa gessisset:* deinde gratias egerunt, *quod Masinissam non adpellasset modo re-  
 gem, sed fecisset, restituendo in paternum regnum:* in quo post Syphacem sublatum, si ita Patribus visum esset, sine metu et certamine esset regnaturus. Dein,

*quod conlaudatum pro concione amplissimis decorasset U. C. 549.*  
*donis: quibus ne indignus esset, et dedisse operam Ma-*<sup>A. C. 293.</sup>  
*sinissam, et porro daturum esse. Petere, ut regium*  
*nomen ceteraque Scipionis beneficia et munera senatus*  
*decreto confirmaret: et, nisi molestum esset, illud quo-*  
*que petere Masinissam, ut Numidas captivos, qui Romæ*  
*in custodia essent, remitterent. Id sibi amplum apud*  
*populares futurum esse. Ad ea responsum legatis:*  
*Rerum gestarum in Africa prospere communem sibi*  
*cum rege gratulationem esse. Scipionem recte atque*  
*ordine videri fecisse, quod eum regem adpellaverit: et,*  
*quidquid aliud fecerit, quod cordi foret Masinissæ, ea*  
*Patres comprobare atque laudare. Munera, quæ le-*  
*gati ferrent regi, decreverunt: sagula purpurea duo*  
*cum fibulis aureis singulis, et lato clavo tunicis: et*  
*equos duo phalera'os: bina equestria arma cum lo-*  
*ricis: et tabernacula, militaremque supellectilem,*  
*qualem præberi consuli mos esset. Hæc regi præ-*  
*tor mittere jussus: legatis in singulos dona ne mi-*  
*nus quinūm millium, comitibus eorum millium æris:*  
*et vestimenta bina legatis, singula comitibus Numi-*  
*disque, qui ex custodia emissi redderentur regi: ad*  
*hoc ædes liberæ, loca, lautia legatis decreta.*

XVIII. Eadem æstate, qua hæc decreta Romæ,  
 et in Africa gesta sunt, P. Quintilius Varus prætor <sup>Prælium</sup>  
 et M. Cornelius proconsul in agro Insubrium Gallo-<sup>cum Ma-</sup>  
 rum <sup>gone.</sup> cum Magone Pœno signis conlatis pugnarunt.  
 Prætoris legiones in prima acie fuerunt: Cornelius  
 suas in subsidiis tenuit, ipse ad prima signa equo  
 advectus: proque duobus cornibus prætor ac pro-  
 consul milites ad inferenda in hostes signa summa  
 vi hortabantur. Postquam nihil commovebant, tum  
 Cornelio Quintilius: *Lentior, ut rides, fit pugna:*  
*et induratus præter spem resistendo hostium timor: ac,*

U.C. 549. ne vertat in audaciam, periculum est. Equestrem pro-  
A.C. 203. cellam excitemus, oportet, si turbare ac statu movere  
volumus. Itaque vel tu ad prima signa prælium sus-  
tine, ego inducam in pugnam equites: vel ego hic in  
prima acie rem geram, tu quatuor legionum equites in  
hostem emitte. Utram vellet prætor, muneris partem  
proconsule accipiente, Quintilius prætor cum filio,  
cui Marco prænomen erat, in pigro juvene, ad equi-  
tes pergit: jussosque escendere in equos repente in  
hostem emittit. Tumultum equestrem auxit clamor  
ab legionibus additus: nec stetisset hostium acies,  
ni Mago, ad primum equitum motum, paratos ele-  
phantos extemplo in prælium induxisset. Ad quo-  
rum stridorem odoremque et adspectum territi equi  
vanum equestre auxilium fecerunt: et ut permixtus,  
ubi cuspide uti et cominus gladio posset, roboris  
majoris Romanus eques erat; ita in ablatum paven-  
tibus procul equis melius ex intervallo Numidæ ja-  
culabantur. Simul et peditum legio duodecima,  
magna ex parte cæsa, pudore magis, quam viribus,  
tenebat locum: nec diutius tenuisset, ni ex subsidiis  
tertiadecima legio, in primam aciem inducta, præ-  
lium dubium excepisset. Mago quoque ex subsidiis  
Gallos integræ legioni obposuit. Quibus haud mag-  
no certamine fusis, hastati legionis undecimæ con-  
globant sese, atque elephantos jam peditum aciem  
turbantes invadunt: in quos quum pila confertos  
conjecissent, nullo ferme frustra emissso, omnes re-  
tro in aciem suorum averterunt: quatuor gravati  
vulneribus conruerunt. Tum prima commota hos-  
tium acies, simul omnibus peditibus, ut aversos vi-  
dere elephantos, ad angendum pavorem ac tumultum  
effusis: sed, donec stetit ante signa Mago, gradum  
sensim referentes ordines, tenorem pugnæ serva-

bant; postquam femine transfixo cadentem, auferri- U. C. 549.  
que ex prælio prope exsanguem videre, extemplo in A. C. 203.  
fugam omnes versi: ad quinque millia hostium eo Vincunt  
die cæsa, et signa militaria duo et viginti capta. Romani.  
Nec Romanis incruenta victoria fuit; duo millia et  
trecenti de exercitu prætoris, pars multo maxima ex  
legione duodecima, amissi: inde et tribuni militum  
duo, M. Cosconius, et M. Mænius; tertiae decimæ  
quoque legionis, quæ postremo prælio adfuerat,  
Cn. Helvius tribunus militum in restituenda pugna  
cecidit, et duo et viginti ferme equites inlustres,  
obtriti ab elephantis, cum centurionibus aliquot pe-  
rierunt: et longius certamen fuisset, ni vulnere du-  
cis concessa victoria esset.

XIX. Mago, proximæ noctis silentio profectus, Mago jus-  
quantum pati viæ per vulnus poterat, itineribus ex-  
tentis, ad mare in Ligures Ingaunos pervenit: ibi  
eum legati ab Karthagine, paucis ante diebus in si-  
num Gallicum adpulsis navibus, adierunt, jubentes,  
primo quoque tempore in Africam trajicere: *idem*  
*et fratrem ejus Hannibalem* (*nam ad eum quoque isse*  
*legatos eadem jubentes*) *facturum.* *Non in eo esse*  
*Karthaginiensium res, ut Galliam atque Italiam armis*  
*obtineant.* Mago, non imperio modo senatus peri-  
culoque patriæ motus, sed metuens etiam, ne victor  
hostis moranti instaret, Liguresque ipsi, relinquì  
Italianam a Pœnis ceruentes, ad eos, quorum mox in  
potestate futuri essent, deficerent, simul sperans le-  
niorem in navigatione, quam in via, jactationem vul- In naviga-  
neris fore, et curationi omnia commodiora, inpositis tione mori-  
copiis in naves profectus, vixdum superata Sardinia,  
ex vulnere moritur: naves quoque aliquot Pœnorum  
disjectæ in alto a classe Romana, quæ circa Sardi-

U.C. 549. niam erat, capiuntur. Hæc terra marique in parte  
 A. C. 203. Italiæ, quæ jacet ad Alpes, gesta. Consul C. Servilius, nulla memorabili re in provincia Etruria et Gallia (quoniam eo quoque processerat) gesta, patre C. Servilio et C. Lutatio ex servitute post sextum-decimum annum receptis, qui ad vicum Tanetum a Boiis capti fuerant, hinc patre, hinc Catulo lateri circumdatis, privato magis, quam publico decore insignis, Romam rediit. Latum ad populum est,  
*ne C. Servilio fraudi esset, quod patre, qui sella curuli sedisset, vivo, quum id ignoraret, tribunus plebis atque ædilis plebis fuisse, contra quam sanctum legibus erat.*  
 Hac rogatione perlata, in provinciam rediit. Ad Cn. Servilium consulem, qui in Bruttii erat, Consentia, Uffugum, Vergæ, Besidiæ, Hetriculum, Syphœum, Argentanum, Clampetia, multique alii ignobiles populi, senescere Punicum bellum cernentes, defecere. Idem consul cum Hannibale in agro Crotoniensi acie conflixit. Obscura ejus pugnæ fama est. Valerius Antias quinque millia hostium cæsa ait: quæ tanta res est, ut aut impudenter facta sit, aut negligenter prætermissa. Nihil certe ultra rei in Italia ab Hannibale gestum: nam ad eum quoque legati ab Karthagine, vocantes in Africam, iis forte diebus, quibus ad Magonem, venerunt.

Hanniba-  
 lis revo-  
 cati ex Ita-  
 lia dolor.   XX. Frendens gemensque, ac vix lacrimis tem-  
 perans, dicitur legatorum verba audisse: postquam  
 edita sunt mandata, *Jam non perplexe, inquit, sed*  
*palam revocant, qui, vetando supplementum et pecu-*  
*niam mitti, jampridem retrahebant.* Vicit ergo Han-  
 nibalem non populus Romanus toties cæsus fugatusque,  
 sed senatus Karthaginiensis obtractatione atque invi-  
 dia: neque hac deformitate redditus mei tam P. Scipio

*exsultabit atque efferet sese, quam Hanno, qui domum U.C. 549.  
nostram, quando alia re non potuit, ruina Karthaginis A.C. 203.  
obpressit. Jam hoc ipsum præsagiens animo, præpa-  
raverat ante naves : itaque, inutili militum turba præ-  
sidii specie in oppida Bruttii agri, quæ pauca magis  
metu, quam fide, continebantur, dimissa, quod ro-  
boris in exercitu erat, in Africam transvexit : multis  
Italici generis (quia in Africam secuturos abnuentes  
concesserant in Junonis Laciniæ delubrum, inviola-  
tum ad eam diem) in templo ipso fœde imperfectis.  
Raro quemquam alium, patriam exsiliī caussa relin-  
quentem, magis mœstum abisse ferunt, quam Hanni-  
balem hostium terra excedentem : respexisse sæpe  
Italiæ litora, et Deos hominesque accusantem, in se  
quoque ac suum ipsius caput exsecratum, *Quod non  
cruentum ab Cannensi victoria militem Romam duxi-  
set. Scipionem ire ad Karthaginem ausum, qui consul  
hostem in Italia Pænum non vidisset : se, centum mil-  
libus armatorum ad Trasimenum et Cannas cæsis,  
circa Casilinum, Cumasque, et Nolam consenuisse. Hæc  
accusans querensque, ex diutina possessione Italiæ  
est detractus.**

XXI. Romam per eosdem dies, et Magonem et Hannibalem profectos, adlatum est: cuius duplicitis gratulationis minuit lætitiam, et quod parum duces in retinendis iis (quum id mandatum ab senatu esset) aut animi, aut virium habuisse videbantur; et quod solliciti erant, omni belli mole in unum ducem exercitumque inclinata, quo evasura esset res. Per eosdem dies legati Saguntini venerunt, comprehensos cum pecunia adducentes Karthaginienses, qui ad conducenda auxilia in Hispaniam trajecissent: ducentum et quinquaginta auri, octingentum pondo

U.C. 549. argenti in vestibulo curiae posuerunt. Hominibus  
 A.C. 203. acceptis et in carcerem conditis, auro argentoque  
 reddito, gratiae legatis actae: atque insuper munera  
 data ac naves, quibus in Hispaniam reverterentur.  
 Mentio deinde ab senioribus facta est, *Segnius ho-*  
*mines bona, quam mala, sentire.* *Transitu in Italianam*  
*Hannibalis, quantum terroris pavorisque, sese nemini-*  
*nisse, quas deinde clades, quos luctus incidisse?* *Visa*  
*castra hostium e muris urbis: quae vota singulorum*  
*universorumque fuisse?* *quoties in conciliis voces, ma-*  
*nus ad cælum porrigentium, auditas;* *En umquam ille*  
*dies futurus esset, quo vacuam hostibus Italianam bona*  
*pace florentem visuri essent?* *Dedisse tandem id Deos*  
*sextodecimo demum anno: nec esse, qui Diis grates*  
*agendas censeant.* *Adeo ne advenientem quidem gra-*  
*tiam homines benigne accipere, nedum ut præterite sa-*  
*tis memores sint.* Conclamatum deinde ex omni parte

Supplica- curiae est, uti referret P. Ælius prætor: decretum-  
 tio Romæ que, ut quinque dies circa omnia pulvinaria suppli-  
 decreta ob discessum caretur, victimæque majores immolarentur centum  
 Hanniba- viginti. Jam dimisso Lælio legatisque Masinissæ,  
 lis.

quum Karthaginiensium legatos de pace ad sena-  
 tum venientes Puteolis visos, inde terra venturos  
 adlatum esset; revocari C. Lælium placuit, ut co-  
 ram co de pace ageretur. Q. Fulvius Gillo, legatus  
 Scipionis, Karthaginienses Romam adduxit: qui-  
 bus, vetitis ingredi urbem, hospitium in villa publica,  
 senatus ad ædem Bellonæ datus est.

XXII. Orationem eamdem ferme, quam apud  
 Scipionem, habuerunt; culpam omnem belli a pub-  
 licō consilio in Hannibalem vertentes. Eum injussu  
 Legati senatus non Alpes modo, sed Iberum quoque, transgres-  
 Karthagi- sum: nec Romanis solum, sed ante etiam Saguntinis,  
 nienses de pace.

*privato consilio bellum intulisse. Senatui ac populo U. C. 549.  
Karthaginiensi, si quis vere æstimet, fædus ad eam  
diem inviolatum esse cum Romanis. Itaque nihil aliud  
sibi mandatum esse, uti peterent, quam ut in ea pace,  
quæ postremo cum consule Lutatio facta esset, manere  
liceret. Quum, more tradito, Patribus potestatem  
interrogandi, si quis quid vellet, legatos, prætor  
fecisset; senioresque, qui fœderibus interfuerant,  
alia alii interrogarent, nec meminisse per ætatem  
(etenim omnes ferme juvenes erant) dicerent legati;  
conclamatum ex omni parte curiæ est, *Punica fraude  
electos, qui veterem pacem repeterent, cuius ipsi non  
meminissent.**

XXIII. Emotis deinde curia legatis, sententiæ  
interrogari cœptæ. M. Livius C. Servilium consu-  
lem, qui propior esset, arcessendum, ut coram eo de  
pace ageretur, censebat: quum de re majore, quam  
quanta ea esset, consultatio incidere non posset, non  
videri sibi, absente consulū altero, ambobusve, eam  
rem agi, satis ex dignitate populi Romani esse. Q.  
Metellus, qui triennio ante consul dictatorque fue-  
rat, *Quum P. Scipio, cædendo exercitus, agros popu-  
lando, in eam necessitatem compulisset hostes, ut sup-  
plices pacem peterent; et nemo omnium verius existi-  
mare posset, qua mente ea pax peteretur, quam is, qui  
ante portas Karthaginis bellum gereret; nullius alte-  
rius consilio, quam Scipionis, accipiendam abnuendam-  
ve pacem esse.* M. Valerius Lævinus, qui bis consul  
fuerat, *Speculatores, non legatos, venisse, arguebat:  
jubendosque Italia excedere, et custodes cum iis usque  
ad naues mittendos; Scipionique scribendum, ne bel-  
lum remitteret.* Lælius Fulviusque adjecerunt: *Et  
Scipionem in eo positam habuisse spem pacis, si Hanni-*

**U. C. 549.** *bal et Mago ex Italia non revocarentur. Omnia simu-*  
**A. C. 203.** *laturos Kurthaginienses, duces eos exercitusque exspec-*  
*tantes: deinde, quamvis recentium fæderum et Deo-*  
*rum omnium oblitos, bellum gesturos. Eo magis in*  
**Re infecta** Lævini sententiam discessum. Legati pace infecta,  
dimissi. ac prope sine responso, dimissi.

**Cn. Servi-** XXIV. Per eos dies Cn. Servilius consul, haud  
lius ex Si- dubius, quin pacatæ Italiæ penes se gloria esset,  
cilia revo- catur. velut pulsum ab se Hannibalem persequens, in Sici-  
liam, inde in Africam transiturus, trajecit. Quod  
ubi Romæ vulgatum est, primo censuerunt Patres,  
ut prætor scriberet consuli, senatum æquum censere,  
in Italianam reverti cum: deinde, quum prætor, spre-  
turum eum literas suas, diceret, dictator ad id ipsuni  
creatus P. Sulpicius, pro jure majoris imperii, con-  
sulem in Italianam revocavit: reliquum anni, cum M.  
Servilio magistro equitum, circumeundis Italiæ urbi-  
bus, quæ bello alienatæ fuerant, noscendisque sin-  
gularum caussis consumsit. Per induciarum tempus  
et ex Sardinia ab Lentulo prætore centum onerariæ  
naves, cum commeatu et viginti rostratarum præsi-  
dio, et ab hoste, et ab tempestatibus mari tuto, in  
Africam transmiserunt. Cn. Octavio ducentis one-  
rariis, triginta longis navibus ex Sicilia trajicienti,  
non eadem fortuna fuit. In conspectum ferme A-  
fricæ prospero cursu vectum primo destituit ventus;  
deinde versus in Africum turbavit, ac passim naves  
disjecit: ipse cum rostratis, per adversos fluctus in-  
genti remigum labore enitus, Apollinis promonto-  
rium tenuit: onerariæ, pars maxima ad Ægimurum  
(insula ea sinum ab alto claudit, in quo sita Kar-  
thago est, triginta ferme millia ab urbe) aliæ adver-  
sus urbem ipsam ad Calidas Aquas delatae sunt. Om-

Classis  
Romana  
disjecta  
vento.

nia in conspectu Karthaginis erant: itaque ex tota U.C. 543.  
urbe in forum concussum est. Magistratus senatum A.C. 203.  
vocare, populus in curiae vestibulo fremere, ne tanta  
ex oculis manibusque amitteretur præda. Quum qui-  
dam pacis petitæ, alii induciarum (necdum enim  
dies exierat) fidem obponerent, permixto pene sena-  
tus populique concilio, consensum est, ut classe  
quinquaginta navium Hasdrubal Ægimurum trajice- Naves one-  
ret: inde per litora portusque dispersas Romanas rariæ a Car-  
naves conligeret. Desertæ fuga nautarum, primum bus captæ.  
ab Ægimuro, dein ab Aquis onerariæ Karthaginem  
puppibus tractæ sunt.

XXV. Nondum reverterant ab Roma legati, ne- Legati Ro-  
que sciebatur, quæ senatus Romani de bello aut mani prope  
pace sententia esset; necdum induciarum dies exi- violati.  
erat: eo indignorem injuriam ratus Scipio, ab iis,  
qui petiissent pacem et inducias, et spem pacis et  
fidem induciarum violatam esse, legatos Karthagi-  
nem, L. Bæbium, L. Sergium, L. Fabium extemplo  
misit: qui, quum multitudinis concursu prope vio-  
lati essent, nec redditum tutiorem cernerent futurum,  
petierunt a magistratibus, quorum auxilio vis pro-  
hibita erat, ut naves mitterent, quæ se prosequeren-  
tur. Datæ triremes duæ, qnum ad Bagradam flu-  
men pervenissent, unde castra Romana conspicie-  
bantur, Karthaginem rediere. Classis Punica ad  
Uticam stationem habebat: ex ea tres quadriremes,  
seu clam misso a Karthagine nuncio, uti fieret, seu  
Hasdrubale, qui classi præerat, sine publica fraude  
auso facinus, quinqueremem Romanam superiantem  
promontorium ex alto repente adgressæ sunt: sed  
neque rostro ferire celeritate subterlabentem pote-  
rant, neque transilire armati ex humilioribus in al-

U. C. 549. tiorem navem; et defendebatur egregie, quoad tela  
 A. C. 203. subpeditarunt: quis defientibus, quum jam nulla  
 alia res eam, quam propinquitas terrae, multitudo-  
 que a castris in litus effusa, tueri potuisset; conci-  
 tam remis, quanto maximo in petu poterant, in  
 terram quum innisissent, navis tantum jaetura facta,  
 incolumes ipsi evaserunt. Ita alio super aliud sce-  
 lere quum haud dubie induciae ruptae essent, Lælius  
 Fulviusque ab Roma cum legatis Karthaginiensibus  
 supervenerunt: quibus Scipio, *Etsi non induciarum  
 modo fides a Karthaginiensibus, sed jus etiam gentium  
 in legatis violatum esset; tamen se nihil, nec institutis  
 populi Romani, nec suis moribus indignum, in iis factu-  
 rum esse*, quum dixisset, legatis dimissis, bellum pa-  
 rabat. Hannibali jam terræ adpropinquanti jussus  
 e nauticis unus escendere in malum, ut specularetur,  
 quam tenerent regionem, quum dixisset, sepulcrum  
 dirutum proram spectare, abominatus, prætervelhi  
 Ad Leptim jusso gubernatore, ad Leptim adpulit classem, atque  
 adpellit  
 Hannibal. ibi copias exposuit.

XXVI. Hæc eo anno in Africa gesta. Insequen-  
 tia excedunt in eum annum, quo M. Servilius Gemi-  
 nus qui tum magister equitum erat, et Ti. Claudius  
 Nero consules facti sunt. Ceterum exitu superioris  
 anni quum legati sociarum urbium ex Græcia questi-  
 essent, vastatos agros ab regiis præsidiis, profectos-  
 que in Macedoniam legatos ad res repetendas non  
 admissos ad Philippum regem: simul nunciassent,  
 quatuor millia militum cum Sopatro duce trajecta in  
 Africam dici, ut essent Karthaginiensibus præsidio,  
 Legati ad et pecuniae aliquantum una missum; legatos ad re-  
 Philip-  
 sum missi gem, qui hæc adversus fœdus facta videri Patribus  
 a Roma- nunciarent, mittendos censuit senatus. Missi C.  
 nis.

Terentius Varro, C. Mamilius, M. Aurelius: iis tres U.C. 549.  
 quinqueremes datæ. Annus insignis incendio in- A.C. 203.  
 genti, quo clivus Publicius ad solum exustus  
 est, et aquarum magnitudine: sed annonæ vili-  
 tas fuit, præterquam quod pace omnis Italia erat  
 aperta, etiam quod magnam vim frumenti, ex His-  
 pania missam, M. Valerius Falto et M. Fabius Bu-  
 teo ædiles curules quaternis æris vicatim populo de-  
 scripserunt. Eodem anno Q. Fabius Maximus mo- Q. Fabii  
 ritur, exactæ ætatis; siquidem verum est, augurem Maximi  
 duos et sexaginta annos fuisse, quod quidam aucto- mors et laudes.  
 res sunt. Vir certe fuit dignus tanto cognomine,  
 vel si novum ab eo inciperet. Superavit paternos  
 honores, avitos æquavit. Pluribus victoriis et ma-  
 joribus proeliis avus insignis Rullus; sed omnia  
 æquare unus hostis Hannibal potest. Cautior ta-  
 men, quam promptior, hic habitus fuit: et, sicut  
 dubites, utrum ingenio cunctator fuerit, an quia ita  
 bello proprie, quod tum gerebatur, aptum erat; sic  
 nihil certius est, quam unum hominem nobis cunc-  
 tando rem restituisse, sicut Ennius ait. Augur in  
 locum ejus inauguratus Q. Fabius Maximus, filius:  
 in ejusdem locum pontifex (nam dno sacerdotia ha-  
 buit) Ser. Sulpicius Galba. Ludi Romani diem  
 unum, plebeii ter toti instaurati ab ædilibus, M. Sex-  
 tio Sabino et Cn. Tremellio Flacco: ii ambo præ-  
 tores facti, et cum iis C. Livius Salinator et C. Au-  
 relius Cotta. Comitia ejus anni utrum C. Servilius  
 consul habuerit, an (quia eum res in Etruria tenuer-  
 int, quæstiones ex senatusconsulto de conjurationi-  
 bus principum habentem) dictator ab eo dictus P.  
 Sulpicius, incertum ut sit, diversi auctores faciunt.

XXVII. Principio insequentis anni, M. Servilius

U.C. 550. et Ti. Claudius, senatu in Capitolium vocato, de  
A.C. 202. provinciis retulerunt. Italiam atque Africam in  
sortem conjici, Africam ambo cupientes, volebant:  
ceterum, Q. Metello maxime admittente, neque data,  
neque negata est Africa. Consules jussi cum tribu-  
nis plebis agere, ut, si iis videretur, populum roga-  
rent, quem vellet in Africa bellum gerere. Omnes  
tribus P. Scipionem jusserunt. Nihilominus consu-  
les provinciam Africam (ita enim senatus decreve-  
rat) in sortem conjecterunt. Ti. Claudio Africa  
evenit, ut quinquaginta navium classem, omnes  
quinqueremes, in Africam trajiceret, parique impe-  
rio cum Scipione imperator esset. M. Servilius  
Etruriam sortitus: in eadem provincia et C. Servilio  
prorogatum imperium, si consulem manere ad ur-  
bem senatui placuisset. Prætores, M. Sextius Gal-  
liam est sortitus, ut duas legiones provinciamque  
traderet ei P. Quinetilius Varus; C. Livius Bruttios  
cum duabus legionibus, quibus P. Sempronius pro-  
consul priore anno præfuerat; Cn. Tremellius Sici-  
liam, ut ab P. Villio Tappulo prætore prioris anni  
provinciam et duas legiones acciperet; Villius pro-  
prætor viginti navibus longis, militibus mille, oram  
Siciliae tutaretur: inde M. Pomponius viginti navi-  
bus reliquis mille et quingentos milites Romam de-  
portaret. C. Aurelio Cottæ urbana evenit: ceteris,  
ita ut quisque obtinebant provincias exercitusque,  
prorogata imperia. Sexdecim non amplius eo anno  
legionibus defensum imperium est. Et ut placatis  
Diis omnia inciperent agerentque, ludos, quos, M.  
Claudio Marcello, T. Quintio consulibus, T. Man-  
lius dictator, quasque hostias majores voverat, si per  
quinquennium illud respublika eodem statu fuisset,

ut eos ludos consules, priusquam ad bellum profici- U. C. 550.  
cerentur, facerent. Ludi in circō per quatriduum A. C. 202.  
facti: hostiæque, quibus votæ erant Diis, cæsæ.

XXVIII. Inter hæc simul spes, simul cura in dies crescebat: nec satis certum constare apud animum poterat, utrum gaudio dignum esset, Hannibalem, post sextumdecimum annum ex Italia decedentem, vacuam possessionem ejus reliquisse populo Romano, an magis metuendum, quod incolumi exercitu in Africam transisset. *Locum nimirum, non periculum, Anxii Ro-*  
*mutatum; cujus tantæ dimicationis vatem, qui nuper mani ob*  
*decessisset, Q. Fabium haud frustra canere solitum, Hannibal transi*  
*graviorem in sua terra futurum hostem Hannibalem,*  
*quam in aliena fuisset: nec Scipioni aut cum Syphace,*  
*inconditæ barbariæ rege, cui Statorius semilixa ducere*  
*exercitus solitus sit, aut cum socero ejus Hasdrubale,*  
*fugacissimo duce, rem futuram, aut tumultuariis exer-*  
*citibus, ex agrestium semierni turba subito conlectis;*  
*sed cum Hannibale, prope nato in prætorio patris for-*  
*tissimi ducis, alito atque educato inter arma, puero*  
*quondam milite, vixdum juvene imperatore: qui senex*  
*vincendo factus, Hispanias, Gallias, Italiam ab Alpi-*  
*bus ad fretum monumentis ingentium rerum comple-*  
*set: ducere exercitum æqualem stipendiis suis, duratum*  
*omnium rerum patientia, quas vix fides fiat homines*  
*passos; perfusum millies crux Romano; exuvias non*  
*militum tantum, sed etiam imperatorum, portantem.*  
*Multos obcursum Scipioni in acie, qui prætores, qui*  
*imperatores, qui consules Romanos sua manu occidi-*  
*scent, muralibus vallaribusque insignes coronis, perva-*  
*gatos capta castra, captas urbes Romanas. Non esse*  
*hodie tot fasces magistratibus populi Romani, quot*  
*captos ex cæde imperatorum præferre posset Hannibal.*

U. C. 550. Has formidines agitando animis, ipsi curas et metus  
 A. C. 202. augebant etiam, quod, quum adsuissent per aliquot annos bellum ante oculos aliis atque aliis in Italæ partibus lenta spe, in nullum propinquum debellandi finem gerere, exercent omnium animos Scipio et Hannibal, velut ad supremum certamen comparati duces. Ii quoque, quibus ingens erat in Scipione fiducia et victoriæ spes, quo magis in propinquam eam inminebant animis, eo curæ intentioris erant. Haud dispar habitus animorum Karthaginiensibus erat: quos modo petisse pacem, intuentes Hannibalem ac rerum gestarum ejus magnitudinem, pœnitentebat: modo, quum respicerent, bis sese acie victos, Syphacem captum, pulsos se Hispania, pulsos Italia, atque ea omnia unius virtute et consilio Scipionis facta, velut fatalem eum ducem in exitium suum natum horrebant.

XXIX. Jam Adrametum venerat Hannibal: unde, ad reficiendum ex jactatione maritima militem paucis diebus sumtis, excitus pavidis nunciis, omnia circa Karthaginem obtineri armis, adferentium, magnis itineribus Zamat contendit. Zama quinque diernm iter ab Karthagine abest: inde præmissi speculatori a Scipione dimissi.

Speculatori a Scipione dimissi.

speculatores quum excepti a custodibus Romanis deducti ad Scipionem essent, traditos eos tribunis militum, jussosque omisso metu visere omnia, per castra, qua vellent, circumduci jussit: percunctatusque, satin' per commodum omnia explorassent, datis, qui prosequerentur, retro ad Hannibalem dimisit. Hannibal nihil quidem eorum, quæ nunciabantur, (nam et, Masinissam cum sex millibus peditum, quatuor equitum venisse eo ipso forte die, adferbant,) læto animo audiit, maxime hostis fiducia,

quæ non de nihilo profecto concepta est, perculsns. U. C. 550.  
 Itaque, quamquam et ipse caussa belli erat, et ad-  
 ventu suo turbaverat et pactas inducias, et spem  
 fœderum; tamen, si integer, quam si victus, peteret  
 pacem, æquiora impetrari posse ratus, nuncium ad  
 Scipionem misit, ut conloquendi secum potestatem  
 faceret. Id utrum sua sponte fecerit, an publico  
 consilio, neutrum cur adfirmeni, habeo. Valerius  
 Antias, primo prælio victum eum a Scipione, quo  
 duodecim millia armatorum in acie sunt cæsa, mille  
 et septingenti capti, legatum cum aliis decem legatis  
 tradit in castra ad Scipionem venisse. Ceterum  
 Scipio quum conloquium haud abnuisset, ambo ex  
 composito duces castra protulerunt, ut coire ex pro-  
 pinquo possent. Scipio hand procul Naraggara Conloqui-  
 urbe, tum ad cetera loco opportuno, tum quod <sup>um ducum</sup> de pæce.  
 aquatio intra teli conjectum erat, consedit. Hanni-  
 bal tumuluñ a quatuor nullibus inde, tutum com-  
 modumque alioquin, nisi quod longinquæ aquationis  
 erat, cepit: ibi in medio locus conspectus undique,  
 ne quid insidiarum esset, delectus.

XXX. Submotis pari spatio arniatis, cum singu-  
 lis interpretibus congressi sunt, non suæ modo æta-  
 tis maximi duces, sed oīnis ante se memoriæ, om-  
 nium gentium cuilibet regum imperatorumve pares.  
 Paullisper alter alterius conspectu, admiratione mu-  
 tua prope adtoniti conticuere. Tum Hannibal prior, Hannibalis  
*Si hoc ita fato datum erat, ut, qui primus bellum in-* oratio.  
*tuli populo Romano, quique toties prope in manibus*  
*victoriam habui, is ultro ad pacem petendam venirem;*  
*lætor te mihi sorte potissimum datum, a quo peterem.*  
*Tibi quoque inter multa egregia non in ultimis laudum*  
*hoc fuerit, Hannibalem, cui tot de Romanis ducibus*

U. C. 550. victoriam *Dii dedissent, tibi cessisse; teque huic bello,*  
A. C. 202. *restris prius, quam nostris, cladibus insigni, finem in-*  
*posuisse. Hoc quoque ludibrium casus ediderit fortu-*  
*na, ut, quum patre tuo consule ceperim arma, cum eo-*  
*dem primum Romano imperatore signa contulerim; ad*  
*filium ejus inermis ad pacem petendam veniam. Opti-*  
*nun quidem fuerat, eam patribus nostris mentem da-*  
*tam ab *Diis esse, ut et vos Italiae, et nos Africæ impe-**  
*rio contenti essemus: neque enim ne vobis quidem Sici-*  
*lia ac Sardinia satis digna pretia sunt pro tot classibus,*  
*tot exercitibus, tot tam egregius amissis ducibus. Sed*  
*præterita magis reprehendi possunt, quam corrigi. Ita*  
*aliena adipetivimus, ut de nostris dimicaremus, nec in*  
*Italia solum vobis bellum, nobis in Africa esset: sed et*  
*vos in portis vestris prope ac mænibus signa armaque*  
*hostium vidistis, et nos ab Karthagine fremitum castro-*  
*rum Romanorum exaudimus. Quod igitur nos maxime*  
*abominaremur, vos ante omnia optaretis, in meliore*  
*restra fortuna de pace agitur: agimus ii, quorum et*  
*maxime interest pacem esse, et qui quodcumque egeri-*  
*mus, ratum civitates nostræ habituræ sint: animo tan-*  
*tum nobis opus est non abhorrente a quietis consiliis.*  
*Quod ad me adtinet, jam ætas senem in patriam rever-*  
*tentem, unde puer profectus sum, jam secundæ, jam*  
*adversæ res, ita erudierunt, ut rationem sequi, quam*  
*fortunam, malum. Tuam et adolescentiam et perpe-*  
*tuam felicitatem, ferociora utraque, quam quietis opus*  
*est consiliis, metuo. Non temere incerta casuum reputat,*  
*quem fortuna numquam deccpit. Quod ego fui ad*  
*Trasimenum, ad Cannas, id tu hodie es. Vixdum mi-*  
*litari ætate imperio accepto, omnia audacissime inci-*  
*piwent nusquam fiffellit fortuna. Patris et patrui*  
*persecutus mortem, ab calamitate vestræ domus decus*

*insigne virtutis pietatisque eximiæ cepisti : amissas His-* U. C. 550.  
*panias reciperasti, quatuor inde Punicis exercitibus pul-*  
*sis : consul creatus, quum ceteris ad tutandam Italianam*  
*parum animi esset, transgressus in Africam, duobus hic*  
*exercitibus cæsis, binis eadem hora captis simul incensis-*  
*que castris, Syphace potentissimo rege capto, tot urbi-*  
*bus regni ejus, tot nostri imperii ereptis, me sextumde-*  
*cimum jam annum hærentem in possessione Italæ de-*  
*traxisti. Potest victoriam, inquam, malle, quam pa-*  
*cem, animus. Novi spiritus magis magnos, quam uti-*  
*les : et mihi talis aliquando fortuna adfulsit. Quod si*  
*in secundis rēbus bonam quoque mentem darent Dii ;*  
*non ea solum, quæ evenissent, sed etiam ea, quæ eve-*  
*nire possent, reputaremus. Ut omnium obliviſcaris*  
*aliorum, satis ego documenti in omnes casus sum.*  
*Quem modo, castris inter Anienem atque urbem reſ-*  
*trām positis, signa inferentem ad mænia Romana ;*  
*hic cernis, duobus fortissimis viris, fratribus clarissi-  
mis imperatoribus, orbatum, ante mænia prope obſessæ  
patriæ, quibus terrui reſtrām urbem, ea pro mea de-  
precantem. Maximæ cuique fortunæ minime creden-  
dum est. In bonis tuis rebus, nostris dubiis, tibi ampla  
ac speciosa danti est pax ; nobis petentibus magis ne-  
cessaria, quam honesta. Melior tutiorque est certa pax,  
quam sperata victoria : hæc in tua, illa in Deorum  
manu est. Ne tot annorum felicitatem in unius horæ  
dederis discriminem. Quum tuas vires, tum vim fortunæ  
Martemque belli communem, propone animo. Utrum-  
que ferrum, corpora humana erunt : nusquam minus,  
quam in bello, eventus respondent. Non tantum ad id,  
quod data pace jam habere potes, si prælio vincas, glo-  
riæ adjeceris : quantum ademeris, si quid adversi eve-  
niat. Simul parta ac sperata decora unius horæ for-*

U. C. 550. tuna evertere potest. Omnia in pace jungenda tuæ potestatis sunt, P. Cornelii: tunc ea habenda fortuna erit, quam Dii dederint. Inter pauca felicitatis virtutisque exempla M. Atilius quondam in hac eadem terra fuisse, si victor pacem petentibus dcdisset patribus nostris: non statuendo tandem felicitati modum, nec cohibendo efferentem se fortunam, quanto altius elatus erat, eo faedius conruit. Est quidem ejus, qui dat, non qui petit, conditiones dicere pacis: sed forsitan non indignissimus, qui nobismet ipsi multam inrogemus. Non recusamus, quin omnia, propter quæ bellum initum est, vestra sint, Sicilia, Sardinia, Hispania, quidquid insularum toto inter Africam Italianaque continentur mari. Karthaginienses, inclusi Africæ litoribus, vos (quando ita Diis placuit) externa etiam terra marique videamus regentes imperia. Haud negaverim, propter non nimis sincere petitam aut exspectatam nuper pacem, suspectam esse vobis Punicam fidem: multum, per quos petita sit, ad fidem tuendæ pacis pertinet, Scipio. Vestri quoque (ut audio) Patres non uihil etiam ob hoc, quia parum dignitatis in legatione erat, negaverunt pacem. Hannibal peto pacem: qui neque peterem, nisi utilem crederem; et propter eundem utilitatem tuebor eam, propter quam petui: et, quemadmodum, quia a me bellum cæptum est, ne quem ejus pæniteret, quoad ipsi invidere Dei, præstiti; ita adiutar, ne quem pacis per me partæ pænitiat.

Responso  
 Scipionis. XXXI. Adversus hæc imperator Romanus in hanc fere sententiam respondit. Non me fallebat, Hannibal, adventus tui spe Karthaginienses et præsentem induciarum fidem, et spem pacis turbasse; neque tu id sanc dissimulas, qui de conditionibus superioribus pacis omnia subtrahas, præter ea, quæ jam pridem in

nostra potestate sunt. Ceterum, sicut tibi curæ est, U. C. 550.  
 sentire cives tuos, quanto per te onere leventur: sic A. C. 202.  
 mihi laborandum est, ne, quæ tunc pepigerunt, hodie  
 subtracta ex conditionibus pacis, præmia perfidiæ ha-  
 beant. Indigni, quibus eadē pateat conditio, ut etiam  
 proposit vobis fraus, petitis. Neque patres nostri priores  
 de Sicilia, neque nos de Hispania fecimus bellum: et  
 tunc Mamertinorum sociorum periculum, et nunc Sa-  
 gunti excidium nobis pia ac justa induerunt arma. Vos  
 lacescisse, et tu ipse fateris, et Dei testes sunt: qui et  
 illius belli exitum secundum jus fasque dederunt, et hu-  
 jus dant et dabunt. Quod ad me adtinet, et humanæ  
 infirmitatis memini, et vim fortunæ reproto, et omnia,  
 quæcumque aginus, subjecta esse mille casibus scio.  
 Ceterum, quemadmodum superbe et violenter me fate-  
 rer facere, si prius, quam in Africam trajecisset, te  
 tua voluntate cedentem Italia, et, inposito in naves ex-  
 ercitū, ipsum venientem ad pacem petendam adspex-  
 ner; sic nunc, quum prope manu conserta restitantem  
 ac tergiversantem in Africam adtraxerim, nulla sum  
 tibi verecundia obstrictus. Proinde si quid ad ea in  
 quæ tum pax conventura videbatur, (quæ sint, nosti)  
 multæ navium cum commeatu per inducias expugnata-  
 rum legatorumque violatorum adjicitur, est, quod re-  
 feram ad consilium. Sin illa quoque gravia videntur,  
 bellum parate, quoniam pacem pati non potuistis. Ita  
 infecta pace, ex conloquio ad suos quum se recepis- Re infecta  
 sent, frustra verba jactata renunciant: armis decer- redeunt.  
 nendum esse, habendamque eam fortunam, quam  
 Dii dedissent.

XXXII. In castra ut est ventum, pronunciant Omnia pa-  
 ambo, Arma expedirent milites animosque ad supre- rantur ad  
 mum certamen, non in unum diem, sed in perpetuum, proelium.

U. C. 550. *si felicitas adisset, victores. Roma, an Karthago, iuræ*  
A. C. 202. *gentibus darent, ante crastinam noctem scituros : neque*  
*enim Africam, aut Italiam, sed orbem terrarum victoriæ*  
*præmium fore ; par periculum præmio, quibus ad-*  
*versæ pugnæ fortuna fuisse : nam neque Romanis*  
*effugium ullum patebat in aliena ignotaque terra :*  
*et Karthagini, supremo auxilio effuso, adesse vide-*  
*batur præsens excidium. Ad hoc discrimen proce-*  
*dunt postero die duorum opulentissimorum populo-*  
*rum duo longe clarissimi duces, duo fortissimi exer-*  
*citus, multa ante parta decora aut cumulaturi eo*  
*die, aut eversuri. Anceps igitur spes et metus mis-*  
*cebant animos : contemplantibusque modo suam,*  
*modo hostium aciem, quum oculis magis, quam rati-*  
*one, pensarent vires, simul læta, simul tristia ob-*  
*versabantur. Quæ ipsis sua sponte non subcurre-*  
*bant, ea duces admonendo atque hortando subjici-*  
*unt. Pœnus sedecim annorum in terra Italia res*  
*gestas, tot duces Romanos, tot exercitus occidione*  
*occisos, et sua cuique decora, ubi ad insignem ali-*  
*cujus pugnæ memoria militem venerat, referebat.*  
*Scipio Hispanias, et recentia in Africa prælia, et*  
*confessionem hostium, quod neque non petere pa-*  
*cem propter metum, neque manere in ea præ insita*  
*animis perfidia potuissent : ad hoc, conloquium Han-*  
*nibalis in secreto habitum, ac liberum fingenti, qua*  
*velit, flectit. Ominatur, quibus quondam auspiciis*  
*patres eorum pugnaverint ad Ægates insulas, ea*  
*illis exeuntibus in aciem portendisse Deos. Adesse*  
*finem belli ac laboris. In manibus esse prædam Kar-*  
*thagini, redditum domum in patriam, ad parentes, li-*  
*beros, conjuges, Penatesque Deos. Celsus hæc cor-*  
*pore, vultuque ita læto, ut viciisse jam crederes, di-*

cebat. Instruit deinde primos hastatos, post eos U.C. 550.  
principes: triariis postremam aciem clausit. A.C. 202.

XXXIII. Non confertas autem cohortes ante Acies sua quamque signa instruebat, sed manipulos aliquantum inter se distantes, ut esset spatium, quo elephanti hostium accepti nihil ordines turbarent. Lælum (cujus ante legati, eo anno quæstoris extra sortem ex senatusconsulto opera utebatur) cum Italicu[m] equitatu ab sinistro cornu, Masinissam Numidasque ab dextro obposuit: vias patentes inter manipulos antesignanorum velitibus (ea tunc levis armatura erat) complevit; dato præcepto, ut, ad impetum elephantorum, aut post rectos refugerent ordines, aut, in dextram lævamque discursu adplicantes se antesignanis, viam, qua inruerent in ancipitia tela, belluis darent. Hannibal ad terrorem primum Acies Hannibal. elephantos (octoginta autem crant, quot nulla umquam in acie ante habuerat) instruxit: deinde auxilia Ligurum Gallorumque, Balioribus Maurisque admixtis; in secunda acie Karthaginienses Afrosque et Macedonum legionem; modico inde intervallo relicto, subsidiariam aciem Italicoru[m] militum (Bruttii plerique erant, vi ac necessitate plures, quam sua voluntate, decedentem ex Italia seuti) instruxit. Equitatum etiam ipsum circumdedit cornibus: dextrum Karthaginienses, sinistrum Numidae tenuerunt. Varia adhortatio erat in exercitu inter tot homines, quibus non lingua, non mos, non lex, non arma, non vestitus habitusque, non caussa militandi eadem esset. Auxiliaribus et præsens, et multiplicata merces ex præda ostentatur. Galli proprio atque insito in Romanos odio accenduntur. Liguribus campi uberes Italiæ, deductis ex asperri-

U.C. 550. mis montibus, in spem victoriæ ostentantur. Mau-  
A. C. 202. ros Numidasque Masinissæ inpotenti futuro domi-  
natū terrct. Aliis aliæ spes ac metus jactantur.  
Karthaginiensibus mœnia patriæ, Dii Penates, se-  
pulera majorum, liberi cum parentibus, conjuges  
pavidæ, aut excidium servitiumque, aut imperium  
orbis terrarum, nihil aut in metum, aut in spem  
medium ostentatur. Quum maxime hæc imperator  
apud Karthaginienses, duces suarum gentium inter  
populares, plerique per interpretes inter inmixtos  
alienigenis, agerent, tubæ cornuaque ab Romanis  
cecinerunt: tantusque clamor ortus, ut elephanti in  
suos, sinistro maxime cornu, verterentur, Mauros  
ac Numidas. Addidit facile Masinissa percussis ter-  
rorem, nudavitque ab ea parte aciem equestri auxi-  
lio. Paucæ tamen bestiarum, intrepidæ in hostem  
actæ, inter velitum ordines cum multis suis vulneri-  
bus ingentem stragem edebant: resilientes enim ad  
manipulos velites, quum viam elephantis, ne obte-  
rerentur, fecissent; in ancipites ad ictum utrumque  
conjiciebant hastas; nec pila ab antesignanis cessa-  
bant; donec undique incidentibus telis exacti ex  
Romana acie, hi quoque in suo dextro cornu ipsos  
Karthaginiensium equites in fugam verterunt. Læ-  
lius, ut turbatos vidi hostes, addit percussis terro-  
rem.

XXXIV. Utrumque equite nudata erat Punica  
acies, quum pedes concurrit, nec spe, nec viribus  
jam par: ad hoc, dictu parva, sed magni eadem in  
re gerenda monimenti res, congruens clamor a Roma-  
nis, eoque major et terribilior; dissonæ illis, ut  
gentium multarum discrepantibus linguis, voces:  
pugna Romana stabilis, et suo et armorum pondere

in eunibentium in hostem: concursatio et velocitas U. C. 550.  
illinc major, quam vis. Igitur primo in petu ex- A. C. 202.  
templo movere loco hostium aciem Romani: ala  
deinde et umbonibus pulsantes, in submotos gradu  
in lato, aliquantum spatii, velut nullo resistente, in-  
cessere; urgentibus et novissimis primos, ut semel  
motam aciem sensere; quod ipsum vim magnam ad  
pellendum hostem addebat. Apud hostes, auxilia-  
res cedentes secunda acies, Afri et Karthaginienses,  
adeo non sustinebant, ut contra etiam, ne resisten-  
tes pertinaciter primos cädendo ad se perveniret  
hostis, pedem referrent. Igitur auxiliares terga  
dant repente: et, in suos versi, partim refugere in  
secundam aciem, partim non recipientes cädere, uti  
paullo ante non adjuti, et tunc exclusi. Et prope  
duo jam permixta prælia erant, quum Karthagini-  
enses simul cum hostibus, simul cum suis cogeren-  
tur conserere manus: non tamen ita perculsus ira-  
tosque in aciem accepere; sed, densatis ordinibus,  
in cornua vacuumque circa campum extra prælium  
ejecere, ne pavidos fuga vulneribusque milites in  
certam et integrum aciem miscerent. Ceterum tanta  
strages hominum armorumque locum, in quo stete-  
rant paullo ante auxiliares, compleverat, ut prope  
difficilior transitus esset, quam per confertos hostes  
fuerat. Itaque, qui primi erant, hastati, per cumu-  
los corporum armorumque et tabem sanguinis, qua  
quisque poterat, sequentes hostem, et signa et ordi-  
nes confuderunt: principum quoque signa fluctuari  
cœperant, vagam ante se cernendo aciem. Quod  
Scipio ubi vidit, receptui propere canere hastatis  
jussit: et, sauciis in postremam aciem subductis,  
principes triariosque in cornua inducit; quo tutior

U. C. 550. firmiorque media hastatorum acies esset. Ita no-  
A. C. 202. vum de integro prœlium ortum est: quippe ad ve-  
ros hostes perventum erat, et armorum genere, et  
usu militiæ, et fama rerum gestarum, et magnitu-  
dine vel spei vel periculi pares. Sed et numero Ro-  
manus superior erat, et animo: quod jam equites,  
jam elephantes fuderat: jam, prima acie pulsa, in  
secundam pugnabat.

**XXXV.** In tempore Lælius ac Masinissa, pulsos  
per aliquantum spatii secuti equites, revertentes in  
aversam hostium aciem incurrere. Is demum equi-  
tum inpetus fudit hostem: multi circumventi in  
acie cæsi: multi per patentem circa campum fuga  
sparsi, tenente omnia equitatu, passim interierunt.  
**Vincunt Romanī.** Karthaginiensium sociorumque cæsa eo die supra  
millia viginti: par ferme numerus captus est, cum  
signis militaribus centum triginta tribus, elephantis  
undecim. Victores ad duo millia cecidere. Han-  
nibal, cum paucis equitibus inter tumultum elapsus,  
Adrumetum perfugit: omnia et in prælio, et ante  
aciem, priusquam excederet pugna, expertus; et  
confessione etiam Scipionis, omniumque peritorum  
militiæ, illam laudem adeptus, singulari arte aciem  
eo die instruxisse. Elephantes in prima fronte:  
quorum fortuitus inpetus atque intolerabilis vis,  
signa sequi, et servare ordines, (in quo plurimum  
spei ponerent) Romanos prohiberet. Deinde auxi-  
liares ante Karthaginiensium aciem, ne homines  
mixti ex conluvione omnium gentium, quos non fi-  
des teneret, sed merces, liberum receptum fugæ ha-  
berent: simul primum ardorem atque inpetum ho-  
stium excipientes fatigarent; ac, si nihil aliud, vul-  
neribus suis ferrum hostile liebetarent. Tum, ubi

omnis spes esset, milites Karthaginienses Afrosque: U.C. 550.  
 ut, omniibus rebus aliis pares, eo, quod integri cum fassis ac sauciis pugnarent, superiores essent: Italicos, intervallo quoque diremto, incertos socii an hostes essent, in postremam aciem submotos. Hoc edito velut ultimo virtutis opere, Hannibal, quum Adrumetum refugisset, ad citusque inde Karthagini-<sup>A. C. 202.</sup> nem sexto ac trigesimo post anno, quam puer inde profectus erat, redisset, fassus in curia est, non prælio modo se, sed bello victum, nec spem salutis alibi, quam in pace inpetranda esse.

XXXVI. Scipio, confestim a prælio expugnatissimum hostium castris direptisque, cum ingenti præda ad mare ac naves rediit; nuncio adlato, P. Lentulum cum quinquaginta rostratis, centum onerariis, cum omni genere commeatus, ad Uticam accessisse. Admovendum igitur undique terrorem perculsæ Karthagini ratus, misso Lælio Romam cum victoriæ nuncio, Cn. Octavium terrestri itinere ducere legiones Karthaginem jubet: ipse, ad suam veterem nova Lentuli classe adjuncta, profectus ab Utica portum Karthaginis petit. Hand procul aberat, quum velata infulis ramisque oleæ Karthaginien-  
 sium obcurrit navis. Decem legati erant principes Karthagini-  
 civitatis, auctore Hannibale missi ad petendam pa-  
 cem pa-  
 cem: qui quum ad puppim prætoriæ navis accessis-  
 tunt. sent, velamenta supplicum porrigentes, orantes, in-  
 plorantesque fidem et misericordiam Scipionis; nul-  
 lum iis aliud responsuum datum, quam ut Tunetem  
 venirent; eo se moturum castra: ipse ab contem-  
 plato situ Karthaginis, non tam noscendi in præ-  
 sentia, quam deprimendi hostis caussa, Uticam, eo-  
 dem et Octavio revocato, rediit. Inde procedenti-

U.C. 550. bus ad Tunetem nuncius adlatus, Verminam, Sy-  
A.C. 202. phacis filium, cum equitibus pluribus, quam peditibus, venire Karthaginiensibus auxilio: pars exercitus cum omni equitatu Saturnalibus primis agmen adgressa, Numidas levi certamine fudit: exitu quoque fugae intercluso, a parte omni circumdatis equitibus, quindecim millia hominum cæsa; mille et ducenti vivi capti sunt, et equi Numidici mille et quingenti, signa militaria duo et septuaginta. Regulus ipse inter tumultum cum paucis effugit. Tum ad Tunetem eodem, quo antea, loco castra posita, legatique triginta Karthagine ad Scipionei venerunt: et illi quidem multo miserabilius, quam ante, (quo magis cogebat fortuna) egerunt: sed aliquanto minore cum misericordia ab recenti memoria perfidiæ auditii sunt. In consilio quamquam justa ira omnes ad delendam stimulabat Karthaginem; tamen, quum, et quanta res esset, et quam longi temporis obsidio tam munitæ et tam validæ urbis, repudarent, et ipsum Scipionem exspectatio successoris, venturi ad paratam alterius labore ac periculo finiti belli famam, sollicitaret, ad pacem omnium animi versi sunt.

Conditiones pacis a Scipione dictæ.

XXXVII. Postero die, revocatis legatis, et cum multa castigatione perfidiæ monitis, ut, tot cladibus edoicti, tandem Deos et jusjurandum esse crederent; conditiones pacis dictæ: *Ut liberi legibus suis viveant: quas urbes, quosque agros, quibusque finibus ante bellum tenuissent, tenerent, populandique finem eo die Romanus faceret. Perfugas, fugitivosque, et captivos omnes redderent Romanis, et nares rostratas, præter decem triremes, traderent, elephatosque, quos haberent domitos: neque domarent alios. Bellum nere in*

*Africa, nere extra Africam, injussu populi Romani ge-* U. C. 550.  
*rerent. Masinissæ res redderent, fædusque cum eo fa-* A. C. 202.  
*cerent. Frumentum stipendiumque auxiliis, donec ab*  
*Roma legati redissent, præstarent. Decem millia ta-*  
*lentum argenti, descripta pensionibus æquis in annos*  
*quinquaginta, solverent. Obsides centum arbitratu Scipionis darent: ne minores quatuordecim annis, neu tri-*  
*ginta majores. Inducias ita se daturum, si per priores*  
*inducias naves onerariæ captæ, quæque fuissent in na-*  
*vibus, restituerentur. Aliter nec inducias, nec spem*  
*pacis ullam esse. Has conditiones legati quum do-*  
*mum referre jussi in concione ederent, et Gisgo ad*  
*dissuadendam pacem processisset, audireturque a*  
*multitudine, inquieta eadem et inbelli: indignatus*  
*Hannibal, dici ea in tali tempore audirique, adrep-*  
*tum Gisgonem manu sua ex superiore loco detraxit. Gisgonem*  
*Quæ insueta liberæ civitati species quum fremitum contra pa-*  
*populi movisset, perturbatus militaris vir urbana dicere*  
*libertate, Novem, inquit, annorum a vobis profectus, nibal.*  
*post sextum et tricesimum annum redii. Militares*  
*artes, quas me a puero fortuna nunc privata, nunc*  
*publica docuit, probe videor scire. Urbis ac fori jura,*  
*leges, mores, vos me oportet doceatis. Excusata in-*  
*prudentia de pace multis verbis disseruit, quam nec*  
*iniqua, et necessaria esset. Id omnium maxime dif-*  
*ficile erat, quod ex navibus per inducias captis nihil,*  
*præter ipsas comparebat naves: neque inquisitio*  
*erat facilis, adversantibus paci, qui arguerentur.*  
*Placuit naves redi, et homines utique inquire. Ce-*  
*tera, quæ abessent, æstimanda Scipioni permitti:*  
*atque ita pecunia luere Karthaginienses. Sunt qui*  
*Hanubalem ex acie ad mare pervenisse, inde præ-*  
*parata nave ad regem Antiochum extemplo profec-*

U. C. 550. tum tradant: postulantique ante omnia Scipioni, ut  
 A. C. 202. Hannibal sibi traderetur, responsum esse, Hanniba-  
 lem in Africa non esse.

Induciae  
in tres  
menses.

**XXXVIII.** Postquam redierunt ad Scipionem le-  
 gati; quæ publica in navibus fuerant, ex publicis  
 descripta rationibus quæstores; quæ privata, profi-  
 teri domini jussi: pro ea summa pecuniæ viginti  
 quinque millia pondo argenti præsentia exacta: in-  
 duciæque Karthaginiensibus datæ in tres menses.  
 Additum, ne per induciarum tempus alio usquam,  
 quam Romam, mitterent legatos: et, quicunque  
 legati Karthaginem venissent, ne ante dimitterent  
 eos, quam Romanum imperatorem, qui, et quæ pe-  
 tentes venissent, certiore facerent. Cum legatis  
 Karthaginiensibus Romam missi L. Veturius Philo,  
 et M. Marcius Ralla, et L. Scipio imperatoris frater.  
 Per eos dies commeatus ex Sicilia Sardiniaque tan-  
 tam vilitatem annonæ effecerunt, ut pro vectura fru-  
 mentum mercator nautis relinqueret. Romæ ad  
 nuncium primum rebellionis Karthaginiensium tre-  
 pidatum fuerat; jussusque erat Ti. Claudius ma-  
 ture in Siciliam classem ducere, atque inde in Afri-  
 cam tracicere, et alter consul M. Servilius ad urbem  
 morari, donec, quo statu res in Africa essent, scire-  
 tur. Segniter omnia in comparanda deducendaque  
 classe ab Ti. Claudio consule facta erant; quod  
 Patres de pace Scipionis potius arbitrium esse, qui-  
 bus legibus daretur, quam consulis, censuerant. Pro-  
 digia quoque, nunciata sub ipsam famam rebellionis,  
 terrorem adtulerant. Cumis solis orbis minui visus,  
 et pluit lapideo imbri: et in Veliterno agro terra  
 ingentibus cavernis consedit, arboresque in profun-  
 dum haustæ. Ariciæ forum, et circa tabernæ, Fru-

sinone murus aliquot locis, et porta, de coelo tacta : U. C. 550.  
 et in Palatio lapidibus pluit. Id prodigium more A. C. 202.  
 patrio novem diali sacro, cetera hostiis majoribus  
 expiata : inter quæ etiam aquarum insolita magni-  
 tudo in religionem versa : nam ita abundavit Tibe-  
 ris, ut ludi Apollinares, circœ inundato, extra por-  
 tam Collinam ad ædem Erycinæ Veneris parati sint.  
 Ceterum ludorum ipso die, subita serenitate orta,  
 pompa, duci cœpta ad portam Collinam, revocata  
 deductaque in circum est, quum decessisse inde  
 aquam nunciatum esset : laetitiamque populo et lu-  
 dis celebritatem addidit sedes sua sollemni specta-  
 culo redditia.

XXXIX. Claudium consulem, profectum tandem Classis  
 ab urbe, inter portus Cosanum Lauretanumque atrox Claudiis  
 vis tempestatis adorta in metum ingentem adduxit. consulis  
 Populonios inde quum pervenisset, stetissetque ibi, tempestate  
 dum reliquum tempestatis exsæviret, Ilvam insulam, vexata.  
 et ab Ilva Corsicam, a Corsica in Sardiniam traje-  
 cit. Ibi superantem Insanos montes, multo et sæ-  
 vior et infestioribus locis tempestas adorta, disjecit  
 classem. Multæ quassatæ armamentisque spoliatae  
 naves : quædam fractæ. Ita vexata ac lacerata clas-  
 sis Carales tenuit, ubi dum subductæ reficiuntur  
 naves, hiems obpressit : circumactumque anni tem-  
 pus, et, nullo prorogante imperium, privatus Ti.  
 Claudius classem Romam reduxit. M. Servilius, ne  
 comitiorum caussa ad urbem revocaretur, dictatore  
 dicto C. Servilio Gemono, in provinciam est profec-  
 tus. Dictator magistrum equitum P. Ælium Pætum  
 dixit. Sæpe comitia indicta perfici tempestates pro-  
 hibuerunt : itaque, quum pridie Idus Martias vete-  
 res magistratu abissent, novi subfecti non essent,

U. C. 550. respublica sine curulibus magistratibus erat. T.  
 A. C. 202. Manlius Torquatus pontifex eo anno mortuus: in  
 locum ejus subfictus C. Sulpicius Galba. Ab L.  
 Licinio Lucullo et Q. Fulvio aedilibus curulibus ludi  
 Romani ter toti instaurati. Pecuniam ex aerario  
 scribæ viatoresque aedilitii clam egessisse per indi-  
 cem comperti, damnati sunt, non sine infamia Lu-  
 culli aedilis. P. Aelius Tubero et L. Laetorius aedi-  
 les plebis vitio creati, magistratu se abdicarunt,  
 quum ludos ludorumque caussa epulum Jovi fecis-  
 sent, et signa tria ex multaticio argento facta in  
 Capitolio posuissent. Cerealia ludos dictator et ma-  
 gister equitum ex senatusconsulto fecerunt.

U. C. 551. XL. Legati ex Africa Romani simul Karthagini-  
 A. C. 201. ensesque quum venissent Romam, senatus ad aedem  
 Bellonæ habitus est: ubi quum L. Veturius Philo,  
 pugnatum cum Hannibale esse suprema Karthagi-  
 niensibus pugna, finemque tandem lugubri bello in-  
 positum ingenti laetitia Patrum exposuisset; adjecit,  
 Verminam etiam, Syphacis filium, quæ parva bene-  
 gestæ rei accessio erat, devictum: in concionem  
 inde prodire jussus, gaudiumque id populo inpartire.  
 Tum patuere, facta gratulatione, omnia in urbe  
 templa, supplicationesque in triduum decretæ. Le-  
 gatis Karthaginiensium et Philippi regis (nam ii quo-  
 que venerant) potentibus, ut senatus sibi daretur,  
 responsum jussu Patrum ab dictatore est, consules  
 novos eis senatum datus esse. Coimitia inde ha-  
 bita: creati consules Cn. Cornelius Lentulus, P.  
 Aelius Pætus: prætores, M. Junius Pennus, cui sors  
 urbana evenit; M. Valerius Falto Bruttios, M. Fa-  
 bius Buteo Sardiniam, P. Aelius Tubero Siciliam  
 est sortitus. De provinciis consulum nihil ante pla-

cebat agi, quam legati Philippi regis et Karthagi-  
niensium auditii essent: belli finem alterius, prin-  
cipium alterius prospiciebant animis. Cn. Lentu-  
lus consul cupiditate flagrabat provinciae Africæ;  
seu bellum foret, facilem victoram, seu jam finire-  
tur, finiti tanti belli se consule gloriam petens. Ne-  
gare itaque prius quidquam agi passurum, quam sibi  
Africa decreta esset, concedente collega, moderato  
viro et prudenti; qui gloriae ejus certamen cum Sci-  
pione, præterquam quod iuicium esset, etiam inpar  
futurum cernebat. Q. Minucius Thermus et M.  
Acilius Glabrio, tribuni plebis, *rem, priore anno ne-*  
*quidquam tentatam ab Ti. Claudio consule, Cn. Corne-*  
*lium tentare aiebant. Ex auctoritate Patrum latum*  
*ad populum esse, cuius vellent imperium in Africa esse.*  
*Omnes quinque et triginta tribus P. Scipioni id im-*  
*perium decesserunt. Multis contentionibus, et in senatu*  
et ad populum acta res, postremo eo deducta est, ut  
senatui permetterent. Patres igitur jurati (ita enim  
convenerat) censuerunt, uti consules provincias inter  
se compararent, sortirenturve, uter Italiam, uter  
classem navium quinquaginta haberet. Cui classis  
obvenisset, in Siciliam navigaret: si pax cum Kar-  
thaginiensibus componi nequisset, in Africam traji-  
ceret. Consul mari, Scipio eodem, quo adhuc, jure  
imperii terra rem gereret. Si conditiones conveni-  
rent pacis, tribuni plebis populum rogarent, utrum  
consulem, an P. Scipionem, juberent pacem dare;  
et quem, si deportandus exercitus victor ex Africa  
esset, deportare. Si pacem per P. Scipionem dari,  
atque ab eodem exercitum deportari jussissent, ne  
consul ex Sicilia in Africam trajiceret. Alter con-  
sul, cui Italia evenisset, duas legiones a M. Sextio  
prætore acciperet.

U. C. 551. XLI. P. Scipioni cum exercitibus, quos haberet,  
 A. C. 201. in provincia Africa prorogatum imperium. Prætori  
 M. Valerio Faltoni duæ legiones in Bruttiis, quibus  
 C. Livius priore anno præfuerat, decretæ. P. Ælius  
 prætor duas legiones in Sicilia ab Cn. Treniello ac-  
 ciperet. Legio una M. Fabio in Sardiniam, quam  
 P. Lentulus pro prætore habuisset, decernitur. M.  
 Servilio prioris anni consuli, cum suis duabus item  
 legionibus, in Etruria prorogatum imperium est.  
 Quod ad Hispanias adtineret, aliquot jam annos ibi  
 L. Cornelium Lentulum et L. Manlium Acidinum  
 esse: uti consules cum tribunis agerent, si eis vide-  
 retur, ut plebem rogarent, cui juberent in Hispania  
 imperium esse: is ex duobus exercitibus in unam  
 legionem conscriberet Romanos milites, et in quin-  
 decim cohortes socios Latini nominis, quibus pro-  
 vinciani obtineret: veteres milites L. Cornelius et  
 L. Manlius in Italiam deportarent. Cornelio con-  
 suli quinquaginta navium classis ex duabus classi-  
 bus, Cn. Octavii, quæ in Africa esset, P. Villii, quæ  
 Siciliæ oram tuebatur, decreta: ut, quas naves vel-  
 let, deligeret. P. Scipio quadraginta longas naves  
 haberet, quas habuisset: quibus si Cn. Octavium,  
 sicut præfuisset, præesse vellet, Octavio pro prætore  
 in eum annum imperium esset: si Lælium præfice-  
 ret, Octavius Romam decederet: reduceretque na-  
 ves, quibus consuli usus non esset. Et M. Fabio in  
 Sardiniam decem longæ naves decretæ. Et consules  
 duas legiones urbanas scribere jussi: ut quatuorde-  
 cim legionibus eo anno, centum navibus longis res-  
 publica administraretur.

Legati  
Philippi.

XLII. Tum de legatis Philippi et Karthaginien-  
 sium actum. Priores Macedonas introduci placuit:  
 quorum varia oratio fuit; partim purgantium, quæ

questi erant missi ad regem a Roma legati de popu- U. C. 551.  
 latione sociorum; partim ultiro accusantium quidem A. C. 201.  
 et socios populi Romani, sed multo infestius M.  
 Aurelium; (quem ex tribus ad se missis legatis, de-  
 lectu habito, substitisse, et se bello lacessisse contra  
 fœdus, et sœpe eum præfectis suis signis conlati  
 pugnasse) partim postulantum, ut Macedones dux-  
 que eorum Sopater, qui apud Hannibalem mercede  
 militassent, captique in vinculis essent, sibi restitue-  
 rentur. Adversus ea M. Furius, missus ad id ipsum  
 ab Aurelio ex Macedonia, disseruit, *Aurelium relic-  
 tum, ne socii populi Romani, fessi populationibus atque  
 injuria, ad regem deficerent, finibus sociorum non ex-  
 cessisse: dedisse operam, ne in pune in agros eorum  
 transcederent populatores. Sopatrum ex purpuratis  
 et propinquis regis esse: eum cum quatuor millibus  
*Macedonum et pecunia missum nuper in Africam esse,  
 Hannibali Karthaginiensibusque auxilio.* De his rebus  
 interrogati Macedones, quum perplexe responderent  
 ipsi, ante responsum tulerunt, *Bellum querere regem, Cum tristi-  
 et, si pergit, prope diem inventurum. Dupliciter ab responsu  
 eo fœdus violatum: et quod socii populi Romani in-  
 jurias fecerit, bello armisque lacessierit: et quod hostes  
 auxiliis et pecunia juverit. Et P. Scipionem recte at-  
 que ordine videri fecisse et facere, quod eos, qui arma  
 contra populum Romanum ferentes capti sunt, hostium  
 numero in vinculis habeat: et M. Aurelium e republica  
 facere, gratumque id senatui esse, quod socios populi  
 Romani, quando jure fœderis non posset, armis tuear-  
 tur. Cum hoc tam tristi responso dimissis Macedo-  
 nibus, legati Karthaginienses vocati: quorum æta- Legati Kar-  
 tibus dignitatibusque conspectis, (nam longe priui thaginien-  
 civitatis erant) tum pro se quisque dicere, vere de ducti in se-  
 natum.**

U.C. 551. pace agi. Insignis tamen inter ceteros Hasdrubal  
A.C. 201. erat, (Hædum populares cognomine adpellabant) pacis semper auctor, adversusque factioni Barcinæ. Eo tum plus illi auctoritatis fuit, belli culpam in paucorum cupiditatem a republica transferenti : qui quum varia oratione usus esset, nunc purgando crimina, nunc quædam fatendo, ne inpudenter certa negantibus difficilior venia esset, nunc monendo etiam Patres conscriptos, ut rebus secundis modeste ac moderate uterentur ; *Si se atque Hannonem audissent Karthaginienses, et tempore uti voluissent, datus fuisse pacis conditiones : quas tunc peterent.* Raro simul hominibus bonam fortunam bonamque mentem dari. Populum Romanum eo invictum esse, quod in secundis rebus sapere et consulere meminerit : et, Hercule, mirandum fuisse, si aliter facerent. Ex insolentia, quibus nova bona fortuna sit, inpotentes lætitiae insanire. Populo Romano usitata ac prope jam obsoleta ex rictoria gaudia esse, ac plus pene parcendo victis, quam vincendo, imperium auxisse. Ceterorum miserabilior oratio fuit, commemorantium, *Ex quantis opibus quo recidissent Karthaginiensium res : nihil eis, qui modo orbem prope terrarum obtinuissent armis, superesse, præter Karthaginis mænia. Iis inclusos, non terra, non mari quidquam sui juris cernere.* Urbem quoque ipsam ac penates ita habituros, si non in ea quoque, quo nihil ulterius sit, sævire populus Romanus relit. Quum flecti misericordia Patres adpareret, senatorum unum infestum perfidiæ Karthaginensium subclamassem ferunt, *Per quos Deos fædus icturi essent, quum eos, per quos ante ictum esset, fæfelliissent ? Per eosdem, inquit Hasdrubal, qui tam infesti sunt fædera violantibus.*

XLIII. Inclinatis omnium ad pacem animis, Cn. U. C. 551.  
 Lentulus consul, cui classis provincia erat, senatus- A. C. 201.  
 consulto intercessit. Tum M<sup>·</sup>. Acilius et Q. Minu- Plebisci-  
 cius tribuni plebis ad populum tulerunt, *Vellent, ju-*<sup>tum de</sup>  
*berentne senatum decernere, ut cum Karthaginiensibus*  
*pax fieret; et quem eam pacem dare, quemque ex*  
*Africa exercitus deportare juberent?* De pace uti ro-  
 gassent, omnes tribus jusserunt: pacem dare P. Sci-  
 pionem, eumdem exercitus deportare. Ex hac ro-  
 gatione senatus decrevit, ut P. Scipio ex decem le- S. C. de  
 gatorum sententia pacem cum populo Karthagini-<sup>pace.</sup>  
 ensi, quibus legibus ei videretur, faceret. Gratias  
 deinde Patribus egere Karthaginienses, petierunt-  
 que, ut sibi in urbem introire, et conloqui cum civi-  
 bus suis liceret, qui capti in publica custodia essent:  
 esse in iis partim propinquos amicosque suos, nobi-  
 les homines; partim ad quos mandata a propinquis  
 haberent. Quibus conventis, quum rursus peterent,  
 ut sibi, quos vellent, ex iis redimendi potestas fie-  
 ret; jussi nomina edere; et, quum ducentos ferme  
 ederent, senatusconsultum est, *Ut legati Romani*  
*ducentos ex captivis, quos Karthaginienses vellent, ad*  
*P. Cornelium Scipionem in Africam deportarent; nun-*  
*ciarentque ei, ut, si pax convenisset, sine pretio eos*  
*Karthaginiensibus redderet.* Feciales quum in Afri- Feciales.  
 cam ad fœdus feriendum ire juberentur; ipsis postu-  
 lantibus, senatusconsultum in hæc verba factum est:  
*Ut privos lapides silices, privasque verbenas secum fer-*  
*rent: ut prætor Romanus his imperaret, ut fœdus fe-*  
*rissent, illi prætorem sagmina poscerent.* Herbæ id  
 genus ex arce sumtum dari facialibus solet. Ita di- Pax.  
 missi ab Roma Karthaginienses, quum in Africam  
 venissent ad Scipionem, quibus ante dictum est le-

U.C. 551. gibus, pacem fecerunt. Naves longas, elephantos,  
A.C. 201. perfugas, fugitivos, captivorum quatuor millia tradi-  
derunt: inter quos Q. Terentius Culleo senator feit.

**Incensæ naves.** Naves proiectas in altum incendi jussit: quingentas  
quingentæ fuisse omnis generis, quæ remis agerentur, quidam  
tradunt: quarum conspectum repente incendium  
tam lugubre fuisse Pœnisi, quam si tum ipsa Kar-  
thago arderet. De perfugis gravius, quam de fugi-  
tivis, consultum; nominis Latini qui erant, securi  
percussi, Romani in crucem sublati.

**XLIV.** Annis ante quadraginta pax cum Kartha-  
giniensibus postremo facta erat, Q. Lutatio, A.  
Manlio consulibus: bellum initum annis post tribus  
et viginti, P. Cornelio, Ti. Sempronio consulibus.  
Finitum est septimodecimo anno, Cn. Cornelio, P.  
Ælio Pæto consulibus. Sæpe postea ferunt Scipio-  
nem dixisse, Ti. Claudii primum cupiditatem, deinde  
Cn. Cornelii, fuisse in mora, quo minus id bellum  
exitio Karthaginis finiret. Karthagini quum prima  
conlatio pecuniæ diutino bello exhaustis difficilis vi-  
deretur, mœstitiaque et fletus in curia esset, riden-

**Risus Hanniba-  
lis in pub-  
lico fletu.** tem Hannibalem ferunt conspectum: cuius quum  
Hasdrubal Hædus risum increparet in publico fletu,  
quum ipse lacrimarum caussa esset; *Si, quemadmo-  
dum oris habitus cernitur oculis, inquit, sic et animus  
intus cerni posset, facile vobis adpareret, non læti, sed  
prope amentis malis cordis hunc, quem increpatis,  
risum esse: qui tamen nequaquam adeo est intempesti-  
vus, quam vestræ istæ absurdæ atque abhorrentes lacri-  
mæ sunt. Tunc flesse decuit, quum ademta nobis ar-  
ma, incensæ naves, interdictum externis bellis: illo  
enim vulnere concidimus. Nec esse in vos, odio vestro,  
consultum ab Romanis credatis. Nulla magna civitas*

diu quiescere potest: si foris hostem non habet, domi U. C. 551.  
 invenit: ut prævalida corpora ab externis caassis tuta A. C. 201.  
 ridentur, sed suis ipsa viribus onerantur. Tantum,  
 nimirum, ex publicis malis sentimus, quantum ad pri-  
 vatas res pertinet: nec in eis quidquam acrius, quam  
 pecuniæ damnum, stimulat. Itaque, quum spolia victæ  
 Karthagini detrahebantur, quum inermem jam ac nu-  
 dam destitui inter tot armatas gentes Africæ cerneretis,  
 nemo ingemuit: nunc, quia tributum ex privato confe-  
 rendum est, tamquam in publico funere, comploratis.  
 Quam vereor, ne prope diem sentiatis, levissimo in  
 malo vos hodie lacrimasse! Hæc Hannibal apud Kar-  
 thaginienses. Scipio, concione advocata, Masinissa  
 sam, ad regnum paternum Cirta oppido et ceteris regno Sy-  
 phacis do-  
 urbibus agrisque, quæ ex regno Syphacis in populi natus.  
 Romani potestatem venissent, adjectis donavit. Cn.  
 Octavium classem in Siciliam ductam Cn. Cornelio  
 consuli tradere jussit: legatos Karthaginiensium  
 Romam proficiisci, ut, quæ ab se ex decem legato-  
 rum sententia acta essent, ea Patrum auctoritate  
 populique jussu confirmarentur.

XLV. Pace terra marique parta, exercitu in naves Scipio Ro-  
 inposito, in Siciliam Lilybæum trajecit: inde magna mam re-  
 parte militum in navibus missa, ipse per lætam pace triumphat.  
 non minus, quam victoria, Italiam, effusis non urbi-  
 bus modo ad habendos honores, sed agrestium etiam  
 turba obsidente vias, Romam pervenit, triumphoque  
 omnium clarissimo urbem est invectus. Argenti tu-  
 lit in ærarium pondo centum millia viginti tria: mi-  
 litibus ex præda quadragenos æris divisit. Morte  
 subtractus spectaculo magis hominum, quam trium-  
 phantis gloriæ, Syphax est, Tibure haud ita multo  
 ante mortuus, quo ab Alba traductus fuerat: con-

U.C. 551. specta mors tamen ejus fuit, quia publico funere est  
A. C. 201. elatus. Hunc regem in triumpho ductum Polybius,  
haudquaquam spernendus auctor, tradit. Secutus  
Seipionem triumphantem est pileo capiti inposito  
Q. Terentius Culleo: omnique deinde vita, ut dig-  
num erat, libertatis auctorem coluit. Africanum  
cognomen militaris prius favor, an popularis aura,  
celebraverit, an, sicuti Felicis Sullæ Magnique Pom-  
peii patrum memoria, cœptum ab adsentatione fa-  
miliari sit, parum compertum habeo. Primus certe  
hic imperator nomine victæ ab se gentis est nobili-  
tatus: exemplo deinde hujus, nequaquam victoria  
pares, insignes imaginum titulos claraque cogno-  
mina familiæ fecere.

---

## EPITOME LIBRI XXXI.

---

BELLI adversus Philippum Macedoniæ regem, quod intermissum erat, repetiti caussæ referuntur hæ. Tempore Initiorum duo juvenes Acarnanes, qui non initiati erant, Athenas venerunt, et in sacrarium Cereris cum aliis popularibus suis intraverunt: ob hoc, tamquam nefas summum commisissent, ab Atheniensibus cæsi sunt. Acarnanes, mortibus suorum commoti, ad vindicandos illos auxilium a Philippo petierunt. Paucis mensibus post pacem Karthaginiensibus datam, quingentesimo quinquagesimo anno ab urbe condita, quum Atheniensium, qui obsidebantur a Philippo, legati auxilium a senatu petissent, et senatus id censisset ferendum, plebe, quod tot bellorum continuus labor gravis erat, dissentiente, tenuit auctoritas Patrum, ut sociæ civitati ferri opem populus quoque juberet. Bellum id P. Sulpicio consuli mandatum est: qui, exercitu in Macedoniam ducto, equestribus præliis cum Philippo prospere pugnavit. Abydeni a Philippo obsessi, ad exemplum Saguntinorum, suos seque occiderunt. L. Furius prætor Gallos Insubres rebellantes et Hamilcarem Pænum, bellum in ea parte molientem, acie ricit. Hamilcar eo bello occisus est, et millia hominum triginta sex. Præterea expeditiones Philippi regis et Sulpicii consulis, expugnationesque urbium ab utroque factas, continet. Sulpicius consul, adjvantibus rege Attalo et Rhodiis, bellum gerebat. Triumphavit de Gallis L. Furius prætor.

---

## T. LIVII PATAVINI

### LIBER XXXI.

---

U.C. 551. A.C. 201. **M**E quoque juvat, velut ipse in parte laboris ac periculi fuerim, ad finem belli Punici pervenisse: nam etsi profiteri ausum, perscripturum res omnes Romanas, in partibus singulis tanti operis fatigari minime conveniat; tamen, quum in mentem venit, tres et sexaginta annos (tot enim sunt a primo Punico ad secundum bellum finitum) æque multa volumina occupasse milii, quam occuparint quadringenti octoginta octo anni a condita urbe ad Ap. Claudium consulem, qui primus bellum Karthaginiensibus intulit; jam provideo animo, velut qui proximis litori vadis inducti mare pedibus ingrediuntur, quidquid progredior, in vastiorem me altitudinem, ac velut profundum invehiri, et crescere pene opus, quod prima quæque perficiendo minui videbatur. Pacem Punicam bellum Macedonicum exceptit: periculo haudquaquam comparandum, aut virtute ducis, aut militum robore: claritate regum antiquorum, vetustaque fama gentis, et magnitudine imperii, quo multam quondam Europæ, maiorem partem Asiæ obtinuerant armis, prope nobilius. Ceterum cœptum bellum adversus Philippum decem ferme ante annis, triennio prius depositum erat, quum Ætoli et belli et pacis fuissent caussæ. Va-

Bellum  
Macedo-  
nicum.

cuos deinde pace Punica jam Romanos et infensos U.C. 551.  
Philippo, quum ob infidam adversus Ætolos alias A.C. 201.  
que regionis ejusdem socios pacem, tum ob auxilia  
cum pecunia nuper in Africam missa Hannibali Pœ-  
nisque, preces Atheniensium, quos agro pervastato  
in urbem compulerat, excitaverunt ad renovandum  
bellum.

II. Sub idem fere tempus et ab Attalo rege, et Rhodiis legati venerunt, nunciantes, Asiæ quoque civitates sollicitari. His legationibus responsum est, curæ Asianam rem senatui fore. Consultatio de Macedonico bello integra ad consules, qui tunc in prælio cum Boiis erant, rejecta est. Interim ad Legati in Ptolemæum Ægypti regem legati tres missi, C. Claudio Nero, M. Æmilius Lepidus, P. Sempronius Tuditanus: ut et adnunciarent victum Hannibalem Pœnosque, et gratias agerent regi, quod in rebus dubiis, quum finitimi etiam socii Romanos desererent, in fide mansisset; et peterent, ut, si coacti injuriis bellum adversus Philippum suscepissent, pristinum animum erga populum Romanum conservaret. Eodem fere tempore P. Ælius consul in Gallia, quum audisset a Boiis ante suum adventum incursiones in agros sociorum factas, duabus legionibus subitariis tumultus ejus caussa scriptis, additisque ad eas quatuor cohortibus de exercitu suo, C. Oppium præfectum sociūm hac tumultuaria manu per Umbriam (quam tribum Sappiniam vocant) agrum Boiorum invadere jussit: ipse eodem, aperto itinere, per medios montes duxit. Oppius, ingressus hostium fines, primo populationes satis prospere ac tuto fecit: delecto deinde ad castrum Mutilum satis idoneo loco, ad demetenda frumenta

U. C. 551. (jam enim maturæ erant segetes) profectus, neque  
 A. C. 201. explorato circa, nec stationibus satis firmis, quæ armatæ inermes atque operi intentos tutarentur, positis, improviso in petu Gallorum cum frumentatoribus est circumventus. Inde pavor fugaque etiam armatos cepit. Ad septem millia hominum palata per segetes sunt cæsa: inter quos ipse C. Oppius præfectus: ceteri in castra metu compulsi, inde sine certo duce consensu militari proxima nocte, relicta magna parte rerum suarum, ad consulem per saltus prope invios pervenere: qui, nisi quod populatus est Boiorum fines, et cum Ingaunis Liguribus fœdus icit, nihil, quod esset memorabile, aliud in provincia quum gessisset, Rōnam rediit.

III. Quum primum senatum habuit, universis postulantibus, ne quam prius rem, quam de Philippo sociorumque querelis, ageret; relatum exemplo est: decrevitque frequens senatus, ut P. Ælius consul, quem videretur ei, cum imperio mitteret, qui, classe accepta, quam ex Sicilia Cn. Octavius reduceret, in Macedoniam trajiceret. M. Valerius Lævinus prœtor missus, circa Vibonem duodecimquaginta navibus ab Cn. Octavio acceptis, in Macedoniam transmisit: ad quem quum M. Aurelius legatus venisset, edocuisseque eum, quantos exercitus, quantum navium numerum comparasset rex, et quemadmodum circa omnes non continentis modo urbes, sed etiam insulas, partim ipse adeundo, partim per legatos, conciret homines ad arma; majore conatu Romanis id capessendum bellum esse, ne, cunctantibus iis, auderet Philippus, quod Pyrrhus prius ausus ex aliquanto minore regno esset; hæc eadem scribere Aurelium consulibus et senatui placuit.

IV. Exitu hujus anni quum de agris veterum militum relatum esset, qui ductu atque auspicio P. Scipionis in Africa bellum perfecissent; decreverunt bus Patres, ut M. Junius prætor urbis, si ei videretur, decemviros agro Samniti Appuloque, quod ejus publicum populi Romani esset, metiendo dividendoque crearet. Creati P. Servilius, Q. Cæcilius Metellus, C. et M. Servilii, (Geminis ambobus cognomen erat) L. et A. Hostilii Catones, P. Villius Tappulus, M. Fulvius Flaccus, P. Ælius Pætus, Q. Flaminius. Per eos dies, P. Ælio consule comitia habente, creati consules P. Sulpicius Galba, C. Aurelius Cotta. Prætores exinde facti, Q. Minucius Rufus, L. Furius Purpureo, Q. Fulvius Gillo, Cn. Sergius Plancus. Ludi Romani scenici eo anno magnifice adparateque facti ab ædilibus curulibus, L. Valerio Flacco et L. Quinctio Flaminino: biduum instauratum est: frumentique vim ingentem, quod ex Africa P. Scipio miserat, quaternis æris populo cum summa fide et gratia divisorunt. Et plebeii ludi ter toti instaurati ab ædilibus plebis, L. Apustio Fullone et Q. Minucio Rufo, qui ex ædilitate prætor creatus erat: et Jovis epulum fuit ludorum caussa.

V. Anno quingentesimo quinquagesimo ab urbe condita, P. Sulpicio Galba, C. Aurelio consulibus, bellum cum rege Philippo initum est, paucis mensibus post pacem Karthaginiensibus datam. Omnium primum eam rem Idibus Martiis, quo die tum consulatus inibatur, P. Sulpicius consul retulit: senatusque decrevit, uti consules majoribus hostiis rem divinam facerent, quibus Diis ipsis videretur, cum precatione ea: *Quam rem senatus populusque Romanus de republica deque ineundo novo bello in animo ha-*

U. C. 551.  
A. C. 201.  
Agri militi-  
bus Scipio-  
nis divisi.

U. C. 552.  
A. C. 200.

De bello  
adversus  
Philippum  
ineundo  
consilia.

*U. C. 552. beret, ea res uti populo Romano, sociisque, ac nomini  
A. C. 200. Latino, bene ac feliciter eveniret: secundum rem di-*

*vinam precationemque, ut de republica deque pro-  
vinciis senatum consulerent. Per eos dies oppor-  
tune irritandis ad bellum animis, et literæ a M. Au-  
relio legato, et M. Valerio Lævino proprætore ad-  
latæ: et Atheniensium nova legatio venit, quæ re-  
gem adpropinquare finibus suis nunciaret: brevique,  
non agros modo, sed urbem etiam in ditione ejus  
futuram, nisi quid in Romanis auxilii foret. Qum  
pronuciassent consules, rem divinam rite perfectam  
esse, et precationem admisisse Deos aruspices re-  
spondere, lætaque exta fuisse, et prolationem finium,  
victoriamque, et triumphum portendi; tum literæ  
Valerii Aureliique lectæ, et legati Atheniensium an-  
diti. Senatus inde consultum factum est, ut sociis  
gratiae agerentur; quod diu sollicitati, ne obsidionis  
quidem metu fide decessissent: de auxilio mittendo  
tum respondere placere, quum consules provincias  
sortiti essent; atque is consul, cui Macedonia pro-  
vincia evenisset, ad populum tulisset, ut Philippo  
regi Macedonum indiceretur bellum.*

VI. P. Sulpicio provincia Macedonia sorte evenit,  
isque rogationem promulgavit, *Vellent, juberent Phi-  
lippo regi Macedonibusque, qui sub regno ejus essent,  
ob injurias armaque inlata sociis populi Romani, bellum  
indici.* Alteri consuli Aurelio Italia provincia obti-  
git. Prætores exinde sortiti sunt, Cn. Sergius Plau-  
cus urbanam, Q. Fulvius Gillo Siciliam, Q. Minu-  
cius Rufus Bruttios, L. Furius Purpureo Galliam.

Rogatio-  
nen de  
bello po-  
pulus an-  
tiquat.  
Rogatio de bello Macedonio primis comitiis ab  
omnibus ferme centuriis antiquata est: id quum fessi  
diuturnitate et gravitate belli sua sponte homines  
tædio laborum periculorumque fecerant, tum Q. Bæ-

bius tribunus plebis, viam antiquam criminandi Pa- U. C. 552.  
 tres ingressus, incusaverat bella ex bellis seri, ne A. C. 200.  
 pace umquam frui plebs posset. *Ægre* eam rem  
 passi Patres, laceratusque probris in senatu tribunus  
 plebis: et consulem pro se quisque hortari, ut de  
 integro comitia rogationi ferendæ ediceret, castiga-  
 retque segnitiem populi: atque doceret, quanto  
 damno dedecorique dilatio ea belli futura esset.

VII. Consul in campo Martio comitiis habitis, Castigat priusquam centurias in suffragium mitteret, concione <sup>populum</sup> <sub>consul.</sub> advocata, *Ignorare*, inquit, *videmini mihi, Quirites,*  
*non, utrum bellum an pacem habeatis, vos consuli:* (*ne-*  
*que enim liberum id vobis permittit Philippus, qui terra*  
*marique ingens bellum molitur) sed utrum in Macedo-*  
*niam legiones transportetis, an hostem in Italiam acci-*  
*piatis. Hoc quantum intersit, si umquam ante alias,*  
*Punico certe proximo bello experti estis. Quis enim*  
*dubitat, quin, si Saguntinis obsensis fidemque nostram*  
*implorantibus impigre tulissemus opem, sicut patres nos-*  
*tri Mamertinis tulerant, totum in Hispaniam aversuri*  
*bellum fuerimus, quod cunctando cum summa clade*  
*nostra in Italiam accepimus? Ne illud quidem dubium*  
*est, quin hunc ipsum Philippum, pactum jam per lega-*  
*tos literasque cum Hannibale in Italiam trajicere, misso*  
*cum classe Lævino, qui ultro ei bellum inferret, in*  
*Macedonia continuerimus: et quod tunc fecimus, quum*  
*hostem Hannibalem in Italia haberemus, id nunc, pulso*  
*Italia Hannibale, devictis Karthaginiensibus, cuncta-*  
*mur facere? Patiamur expugnandis Athenis, sicut*  
*Sagunto expugnando Hannibalem passi sumus, segni-*  
*tiem nostram experiri regem. Non quinto inde mense,*  
*quemadmodum ab Sagunto Hannibal, sed quinto inde*  
*die, quam ab Corintho solverit nares, in Italiam per-*

U.C. 552. reniet. Ne æquaveritis Hannibali Philippum, ne Kar-  
A.C. 200. thaginiensibus Macedonas; Pyrrho certe æquabitis:  
dico, quantum vel vir viro, vel gens genti præstat.  
Minima accessio semper Epirus regno Macedoniæ fuit,  
et hodie est. Peloponnesum totam in ditione Philip-  
pus habet, Argosque ipsos, non vetere fama magis,  
quam morte Pyrrhi nobilitatos. Nostra nunc compara:  
quanto magis florentem Italiam, quanto magis integras  
res, salvis ducibus, salvis tot exercitibus, quos Punicum  
postea bellum absumsit, adgressus Pyrrhus tamen con-  
cussit, et victor prope ad ipsam urbem Romam venit!  
Nec Tarentini modo oraque illa Italiae, quam majorem  
Græciam vocant, ut linguam, ut nomen secutos crede-  
res, sed Lucanus, et Bruttius, et Samnis, a nobis defe-  
cerunt. Hæc vos, si Philippus in Italiam transmiserit,  
quietura aut mansura in fide creditis? Manserunt  
enim Punico postea bello: numquam isti populi, nisi  
quum deerit, ad quem desciscant, a nobis non deficient.  
Si piguissest vos in Africam trajicere, hodie in Italia  
Hannibalem et Karthaginienses hostes haberetis. Ma-  
cedonia potius, quam Italia, bellum habeat: hostium  
urbes agrique ferro atque igni vastentur. Experti jam  
sumus foris nobis, quam domi, feliciora potentioraque  
arma esse. Ite in suffragium, bene juvantibus Diis, et,  
quæ Patres censuerunt, vos jubete. Hujus vobis sen-  
tentiae non consul modo auctor est, sed etiam Dii in-  
mortales; qui mihi sacrificanti precantique, ut hoc bel-  
lum mihi, senatui, vobisque, et sociis ac nomini Latino,  
classibus exercitibusque nostris bene ac feliciter eveni-  
ret, læta omnia prosperaque portendere.

*Populus bellum ju-  
bet.* VIII. Ab hac oratione in suffragium missi, uti  
rogarat, bellum jussérunt. Supplicatio inde a con-  
sulibus in triduum ex senatusconsulto indicta est,

obsecratique circa omnia pulvinaria Dii, ut, quod U.C. 552-  
bellum cum Philippo populus jussisset, id bene ac A.C. 200-  
feliciter eveniret: consultique feciales ab consule  
Sulpicio, bellum, quod indiceretur regi Philippo,  
utrum ipsi utique nunciari juberent; an satis esset,  
in finibus regni quod proximum præsidium esset, eo  
nunciari? feciales decreverunt, utrum eorum fecis-  
set, recte facturum. Consuli a Patribus permissum,  
ut, quem videretur, ex iis, qui extra senatum essent,  
legatum mitteret ad bellum regi indicendum. Tum  
de exercitibus consulum prætorumque actum: con-  
sules binas legiones scribere jussi; veteres dimittere  
exercitus. Sulpicio, cui novum ac magni nominis  
bellum decretum erat, permissum, ut de exercitu,  
quem P. Scipio ex Africa deportasset, voluntarios,  
quos posset, duceret: invitum ne quem militem  
veterem ducendi jus esset. Prætoribus L. Furio  
Purpureoni et Q. Minucio Rufo quina millia sociūm  
Latini nominis consul daret: quibus præsidiis alter  
Galliam, alter Bruttios provinciam obtineret. Q.  
Fulvius Gillo et ipse jussus ex eo exercitu, quem P.  
Ælius consul habuisset, ut quisque minime multa  
stipendia haberet, legere, donec et ipse quinque mil-  
lia sociūm ac nominis Latini effecisset: id præsidio  
Siciliæ provinciæ esset. M. Valerio Faltoni, qui  
prætor priore anno Campaniam provinciam habu-  
erat, prorogatum in annum imperium est; uti pro-  
prætor in Sardiniam trajiceret, atque de exercitu qui  
ibi esset, quinque millia sociūm nominis Latini, qui  
eorum minime multa stipendia haberet, legeret. Et  
consules duas urbanas legiones scribere jussi: quæ,  
si quo res posceret, multis in Italia contactis genti-  
bus Punici belli societate, iraque inde tumentibus,

**U. C. 552.** mitterentur. Sex legionibus Romanis eo anno usura  
**A. C. 200.** respublica erat.

**Legati Ptolemæi.** **IX.** In ipso adparatu belli legati ab rege Ptolemaeo venerunt, qui nunciarunt, *Athenienses adversus Philippum petisse ab rege auxilium: ceterum, etsi communes socii sint, tamen, nisi ex auctoritate populi Romani, neque classem, neque exercitum defendendi aut obpugnandi cuiusquam caussa regem in Græciam missurum esse. Vel quieturum eum in regno, si populo Romano socios defendere liceat; vel Romanos quiescere, si malint, passurum, atque ipsum auxilia, quæ facile adversus Philippum tueri Athenas possent, missurum. Gratiae regi ab senatu actæ, responsumque; Tutari socios populo Romano in animo esse: si qua re ad id bellum opus sit, indicaturos regi: regni que ejus opes scire subsidia firma ac fidelia suæ reipublicæ esse. Munera deinde legatis in singulos quinum millium æris ex senatusconsulto missa. Quum delectum consules haberent, pararentque quæ ad bellum opus essent; civitas religiosa, in principiis maxiime novorum bellorum, supplicationibus habitis jam, et obsecratione circa omnia pulvinaria facta, ne quid prætermitteretur, quod aliquando factum esset, ludos Jovi donumque vovere consulem, cui provincia Macedonia evenisset, jussit. Moram voto publico Licinius pontifex maximus adtulit, qui negavit, *ex incerta pecunia vovere debere, si ea pecunia non posset in bellum usui esse: reponi statim debere, nec cum alia pecunia misceri: quod nisi factum esset, votum rite solvi non posse.* Quamquam et res, et auctor movebat, tamen ad collegium pontificum referre consul jussus, si posset recte votum incertæ pecuniæ suscipi: posse, rectiusque etiam esse, pontifices decre-*

verunt. Vovit in eadem verba consul, præeunte U.C. 552.  
maximo pontifice, quibus antea quinquennalia vota  
suscipi solita erant: præterquam quod tanta pecu-  
nia, quantam tum, quum solveretur, senatus cen-  
suisset, ludos donaque facturum vovit. Toties  
ante ludi magni de certa pecunia voti erant: ii  
primi de incerta.

X. Omnia animis in bellum Macedonicum ver- Gallicus  
sis, repente nihil minus eo tempore timentibus, Gal- tumultus,  
lici tumultus fama exorta est. Insubres, Cenomani- auctore Ha-  
que, et Boii, excitis Salyis, Ilvatibusque, et ceteris  
Ligustinis populis, Hamilcare Pœno duce, qui in iis  
locis de Hasdrubalis exercitu substiterat, Placentiam  
invaserant: et, direpta urbe, ac per iram magna ex  
parte incensa, vix duobus millibus hominum inter  
incendia ruinasque relictis, trajecto Pado ad Cremo-  
nam diripiendam pergunt. Vicinæ urbis audita clades  
spatium colonis dedit ad claudendas portas,  
præsidiaque per muros disponenda; ut obsiderentur  
tamen prius, quam expugnarentur, nunciosque mit-  
terent ad prætorem Romanum. L. Furius Purpu-  
reus tum provinciæ præerat: cetero ex senatuscon-  
sulto exercitu dimisso, præter quinque millia sociūm  
ac Latini nominis, cum iis copiis in proxima regione  
provinciæ circa Ariminum substiterat. Is tum se-  
natui scripsit, quo in tumultu provincia esset. *Dua-*  
*rūm coloniarum, quæ ingentem illam tempestatem Pu-*  
*nici belli subterfugissent, alteram captam ac direptam*  
*ab hostibus, alteram obpugnari.* Nec in exercitu suo  
satis præsidii colonis laborantibus fore, nisi quinque  
millia sociūm quadraginta millibus hostium (tot enim  
in armis esse) trucidanda objicere velit, et tanta sua

U. C. 552. *clade jam inflatos excidio coloniae Romanæ augere hostium animos.*  
 A. C. 200.

Legati  
Karthagi-  
nem missi.

Iidem ad  
Masinis-  
sam.

XI. His literis recitatis decreverunt, ut C. Aurelius consul exercitum, cui in Etruriam ad convenienter diem edixerat, Arimini eadem die adesse juberet, et aut ipse, si per commodum reipublicæ posset, ad obprimendum Gallicum tumultum proficiseretur; aut L. Furio prætori scriberet, ut, quum ad eum legiones ex Etruria venissent, missis in vicem earum quinque millibus sociorum, qui interimi Etruriæ præsidio essent, proficiseretur ipse ad coloniam liberandam obsidione. Legatos item mittendos in Africam censuerunt, eosdem Karthaginem, eosdem in Numidiam ad Masinissam. Karthaginem, ut nunciarent, civem eorum Hamilcarem relictum in Gallia, haud satis scire ex Hasdrubalis prius, an ex Magonis postea exercitu, bellum contra fœdus facere. Exercitus Gallorum Ligurumque excivisse ad arma contra populum Romanum: eum, si pax placeret, revocandum illis, et dedendum populo Romano esse: simul nunciare jussi, perfugas sibi non omnes redditos esse; ac magnam partem eorum palam Karthagini obversari dici: quos comprehendendi conqueririque debere, ut sibi ex fœdere restituantur. Hæc ad Karthaginienses mandata. Masinissæ gratulari jussi, quod non patrium modo recuperasset regnum, sed, parte florentissima Syphacis finium adjecta, etiam auxisset: nunciare præterea jussi, bellum cum rege Philippo susceptum, quod Karthaginienses auxiliis juvisset; injuriasque inferendo sociis populi Romani, flagrante bello Italia, coegerisset classes exercitusque in Græciam mitti; et, distinendo copias, caussa in primis fuisse serius in Africam trajiciendi. Petere,

*ut ad id bellum mitteret auxilia Numidarum equitum.* U. C. 552.  
A. C. 200.

Dona ampla data, quæ ferrent regi, vasa aurea argenteaque, toga purpurea, et palmata tunica cum eburneo scipione, et toga prætexta cum curuli sella: jussique polliceri, si quid ei ad firmandum augendumque regnum opus esse judicasset, enise id populum Romanum merito ejus præstaturum. Verminæ quoque Verminæ, Syphacis filii legati per eos dies senatum adierunt, <sup>Syphacis</sup> filii, legati. excusantes errorem adolescentiamque, et culpam omne in fraudem Karthaginiensium avertentes. Et Masinissam Romanis ex hoste amicum factum: Verminam quoque adnisurum, ne officiis in populum Romanum aut a Masinissa, aut ab ullo alio vincatur. Petere, ut rex, sociusque, et amicus ab senatu adpellatur. Responsum legatis est: Et patrem ejus Syphacem sine caussa ex socio et amico hostem repente populi Romani factum: et eum ipsum rudimentum adolescentiæ bello lacessentem Romanos posuisse. Itaque pacem illi prius petendam a populo Romano esse, quam ut rex, sociusque, et amicus adpelletur. Nomiris ejus honorem pro magnis erga se regum meritis dare populum Romanum consuesse. Legatos Romanos in Africa fore, quibus mandaturum senatum, ut Verminæ pacis dent leges, liberum arbitrium eis populo Romano permittente. Si quid ad eas addi, demi, mutarive vellet, rursus ab senatu ei postulandum fore. Legati cum iis mandatis in Africam missi, C. Terentius Varro, Sp. Lucretius, Cn. Octavius: quinqueremes singulis datæ.

XII. Literæ deinde in senatu recitatæ sunt Q. Sublata Minucii prætoris, cui Bruttii provincia erat; Pecu- pecunia e fano Pro- niam Locris ex Proserpinæ thesauris nocte clam subla- serpinæ.

U.C. 552. tam : nec, ad quos pertineat facinus, vestigia ulla ex-  
 A.C. 200. stare. Indigne passus senatus, non cessari ab sacri-  
 legiis, et ne Pleminium quidem, tam clarum recens-  
 que noxæ simul ac pœnæ exemplum, homines deter-  
 rere. C. Aurelio consuli negotium datum, ut ad  
 prætorem in Bruttios scriberet: *senatui placere,*  
*quæstionem de expilatis thesauris eodem exemplo ha-*  
*beri, quo M. Pomponius prætor triennio ante habuisset.*  
*Quæ inventa pecunia esset, reponi; si quo minus in-*  
*ventum foret, expleri: ac piacularia, si videretur, sicut*  
*ante pontifices censuissent, fieri caussa expiandæ viola-*  
*tionis ejus templi.* Prodigia etiam sub idem tempus  
 pluribus locis nunciata acciderunt. In Lucanis cœ-  
 lum arsisse adferebant. Priverni sereno per diem  
 totum rubrum solem fuisse. Lanuvii templo Sospitæ  
 Junonis nocte strepitum ingentem exortum. Jam  
 animalium obscœni fœtus pluribus locis nunciaban-  
 tur: in Sabinis incertus infans natus, masculus an  
 femina esset: alter sexdecim jam annorum item am-  
 biguo sexu inventus. Frusinone agnus cum suillo  
 capite, Sinuessa porcus cum capite humano natus: in  
 Lucanis in agro publico equuleus cum quinque  
 pedibus. Fœda omnia et deformia, errantisque in  
 alienos fœtus naturæ visa. Ante omnia abominati  
 semimares, jussique, in mare extemplo deportari:  
 sicut proxime, C. Claudio, M. Livio consulibus,  
 deportatus similis prodigiæ fœtus erat. Nihilo minus  
 decemviro adire libros de portento eo jusserunt.  
 Decemviri ex libris res divinas easdem, quæ proxime  
 secundum id prodigium factæ essent, impararunt:  
 carmen præterea ab ter novenis virginibus cani per  
 urbem jusserunt, donumque Junoni Reginæ ferri.

Ea uti fierent, C. Aurelius consul ex decemvirorum U. C. 552.  
responso curavit. Carmen, sicut patrum memoria A. C. 200.  
Livius, ita tum condidit P. Licinius Tegula.

XIII. Expiatis omnibus religionibus, (nam etiam Reddita Locris sacrilegium pervestigatum a Q. Minucio erat, Proserpinæ pecuniaque ex bonis noxiorum in thesauros reposita) quum consules in provincias proficisci vellent: privati frequentes, quibus ex pecunia, quam M. Vale-  
rio, M. Claudio consulibus mutuam dederant, tertia pensio debebatur eo anno, adierunt senatum: quia consules, quum ad novum bellum, quod magna classe magnisque exercitibus gerendum esset, vix ærarium subficeret, negaverant esse, unde iis in præsentia solveretur. Senatus querentes eo non sustinuit, *Si in Punicum bellum pecunia data, in Macedonicum quoque bellum uti respublica vellet; aliis ex aliis orientibus bellis, quid aliud quam publicatam, pro beneficio, tamquam ob noxam, suam pecuniam fore?* Quum et privati æquum postularent, nec tamen solvendo ære alieno respublica esset, quod medium inter æquum et utile crat, decreverunt, *Ut, quoniam magna pars eorum agros vulgo venales esse diceret, et sibimet emitis opus esse; agri publici, qui intra quinquagesimum lapidem esset, copia iis fieret. Consules agrum aestimatores, et in jugera asses vectigales, testandi caussa publicum agrum esse, inposituros; ut, si quis, quum solvere posset populus, pecuniam habere, quam agrum, mallet, restitueret agrum populo.* Læti eam conditionem privati accepere. Trientius Tabiliusque is ager, quia pro tertia parte pecuniae datus erat, adpellatus.

XIV. Tum P. Sulpicius, secundum vota in Capitolio nuncupata, paludatus cum lictoribus profectus ab urbe, Brundisium venit, et, veteribus militibus Sulpicius it in Macedonia.

U. C. 552. voluntariis ex Africano exercitu in legiones descrip-  
 A. C. 200. tis, navibusque ex classe consulis Cornelii lectis, altera die, quam a Brundisio solvit, in Macedoniam  
 Athenæ a Macedon. trajecit. Ibi ei præsto fuere Atheniensium legati,  
 obsessæ. orantes, ut se obsidione eximeret. Missus extemplo Athenas est C. Claudius Centho, cum viginti longis  
 navibus, et militum copiis: neque enim ipse rex Athenas obsidebat: eo maxime tempore Abydum  
 obpugnabat, jam cum Rhodiis et Attalo navalibus certaminibus, neutro feliciter prælio, vires expertus.  
 Sed animos ei faciebat, præter ferociam insitam, fœdus ictum cum Antiocho Syriæ rege, divisæque jam  
 cum eo Ægypti opes; cui, morte audita Ptolemæi  
 Caussa regis, ambo inminebant. Contraxerant autem sibi  
 belli Athenienses in- cum Philippo bellum Athenienses haudquaquam  
 ter et Phi- digna caussa: dum ex vetere fortuna nihil præter  
 lippum. animos servant. Acarnanes duo juvenes per Initiorum dies, non initiati, templum Cereris, imprudentes  
 religionis, cum cetera turba ingressi sunt. Facile  
 eos sermo prodidit, absurde quædam percunctantes:  
 deductique ad antistites templi, quum palam esset,  
 per errorem ingressos, tamquam ob infandum sce-  
 lus, imperfecti sunt. Id tam fœde atque hos-  
 tiliter factum gens Acarnanum ad Philippum de-  
 tulit: inpetravitque ab eo, ut, datis Macedonum  
 auxiliis, bellum se inferre Atheniensibus pateretur.  
 Hic exercitus, primo terram Atticam ferro ignique  
 depopulatus, cum omnis generis præda in Acarna-  
 niam rediit: et irritatio animorum ea prima fuit:  
 postea justum bellum decretis civitatis ultro indi-  
 cendo factum. Attalus enim rex Rhodiisque, perse-  
 cuti cedentem in Macedoniam Philippum, quum  
 Æginam venissent; rex Piræum, renovandæ fir-

mandæque cum Atheniensibus societatis caussa, tra- U. C. 552.  
jecit. Civitas omnis obviam effusa cum conjugibus A. C. 200.  
ac liberis, sacerdotes cum insignibus suis intrantem  
urbem, ac Dii prope ipsi exciti sedibus suis, exce-  
perunt.

XV. In concionem extemplo populus vocatus, ut rex, quæ vellet, coram ageret: deinde ex dignitate magis visum, scribere eum, de quibus videretur, quam præsentem aut referendis suis in civitatem beneficiis erubescere, aut significationibus adclamationibusque multitudinis, adsentatione inmodica pudorem onerantis. In literis autem, quæ missæ in concionem recitatæque sunt, commemoratio erat beneficiorum primum in civitatem sociam; deinde rerum, quas adversus Philippum gessisset; ad postremum adhortatio; *Capessendum bellum, dum se, dum Rhodios, tum quidem, dum etiam Romanos habent.* Nequidquam postea, si tum cessassent, prætermissam occasionem quæsituros. Rhodii deinde legati auditи sunt: quorum recens erat beneficium, quod naves longas quatuor Atheniensem, captas nuper a Macedonibus recuperatasque, reniserant: itaque ingenti consensu bellum adversus Philippum decreatum. Honores regi primum Attalo inmodici, deinde et Rhodiis habitи: tum primum mentio inlata de tribu, quam Attalida adpellarent, ad decem veteres tribus addenda: et Rhodiorum populus corona aurea virtutis gratia donatus, civitasque Rhodiis data, quemadmodum Rhodii prius Atheniensibus dederant. Secundum hæc rex Attalus Æginam ad classem se recepit. Rhodii Ciam ab Ægina, inde per insulas Rhodum navigarunt: omnibus, præter Andrum, Parumque, et Cythnum, quæ præsidij

U. C. 552. Macedonum tenebantur, in societatem acceptis. At-

A. C. 200.

talum Æginæ, missi in Ætoliam nuncii, exspectati-  
que inde legati, aliquamdiu nihil agentem tenuere;  
et neque illos excire ad arma potuit, gaudentes ut-  
cumque composita cum Philippo pace: et ipse Rhodiique,  
si institissent tunc Philippo, egregium libe-  
ratæ per se Græciæ titulum habere potuissent; pa-  
tiendo rursus eum in Hellespontum trajicere, occu-  
pantemque Græciæ opportuna loca vires conligere,  
bellum aluere; gloriampque ejus gesti perfectique  
Romanis concesserunt.

XVI. Philippus magis regio animo est usus: qui,  
quum Attalum Rhodiosque hostes non sustinisset,  
ne Romano quidem, quod inminebat, bello territus,  
Philocle quodam ex præfectis suis cum duobus mil-  
libus peditum, equitibus ducentis ad populandos  
Atheniensium agros misso, classe tradita Heraclidi,  
ut Maroneam peteret, ipse terra eodem cum expedi-  
tis duobus millibus peditum, equitibus ducentis per-  
git. Et Maroneam quidem primo inpetu expugna-  
vit: Ænum inde cum magno labore, postremo pro-  
ditione Ganymedis præfecti Ptolemæi, cepit: dein-  
ceps alia castella, Cypsela, et Doriscon, et Ser-  
rheum, occupat: inde progressus ad Chersonesum,  
Elæunta et Alopeconnesum, tradentibus ipsis, rece-  
pit. Callipolis quoque et Madytos dedita, et castella  
quædam ignobilia. Abydeni, ne legatis quidem ad-  
missis, regi portas clauerunt: ea obpugnatio diu  
Philippum tenuit: eripique ex obsidione, ni cessa-  
tum ab Attalo et Rhodiis foret, potuerunt. Attalus  
trecentos tantum milites in præsidium, Rhodii qua-  
diremem unam ex classe, quum ad Tenedum staret,  
miserunt: eodem postea, quum jam vix sustinerent

Philippos  
Abydum  
obsidet.

obsidionem, et ipse Attalus quum trajecisset, spem U. C. 552.  
tantum auxilii ex propinquo ostendit, neque terra, A. C. 200.  
neque mari adjutis sociis.

XVII. Abydeni primo, tormentis per muros dispositis, non terra modo adeuntes aditu arcebant, sed navium quoque stationem infestam hosti faciebant: postea, quum et muri pars strata ruinis, et ad interiorem raptim obpositione murum cuniculis jam perventum esset, legatos ad regem de conditionibus tradendae urbis miserunt. Paciscebantur autem, ut Rhodiam quadriremem cum sociis navalibus, Attalique praesidium emitti liceret; atque ipsis urbe excedere cum singulis vestimentis. Quibus Abydeno-  
rum rabies.  
quum Philippus nihil pacati, nisi omnia permitten-  
tibus, respondisset; adeo renunciata hæc legatio ab indignatione simul ac desperatione iram accedit, ut, ad Saguntinam rabiem versi, matronas omnes in templo Dianæ, pueros ingenuos, virginesque, infantes etiam cum suis nutricibus, in gymnasium includi juberent: aurum et argentum in forum deferri, vestem pretiosam in naves Rhodiam Cyzicenamque, quæ in portu erant, congeri: sacerdotes victimasque adduci, et altaria in medio poni. Ibi delecti primum, qui, ubi cæsam aciem suorum, pro diruto muro pugnantem, vidissent, extemplo conjuges liberosque interficerent; aurum, argentum, vescemque, quæ in navibus esset, in mare dejicerent; tectis publicis privatisque, quamplurimis locis possent, ignes subjiccerent; et, se facinus perpetratores, praecuntibus execrabilis carmen sacerdotibus, jurejurando adacti: tum militaris ætas jurare, neminem vivum, nisi victori, acie excessurum. Hi, memores Deorum, adeo pertinaciter pugnaverunt, ut, quum nox proelium diremitura esset, rex prior,

U. C. 552. territus rabie eorum, pugna abstiterit. Principes,  
 A. C. 200. quibus atrocior pars facinoris delegata erat, quum  
 Urbs dedi- paucos et confectos vulneribus ac lassitudine super-  
 tur a prin- cipibus. esse prælio cernerent, luce prima sacerdotes cum  
 infulis ad urbem dedendam Philippo mittunt.

XVIII. Ante dditionem ex iis legatis Romanis, qui Alexandriam missi erant, M. Æmilius trium consensu minimus natu, audita obsidione Abydenorum, ad Philippum venit: qui, questus Attalo Rhodiisque arma inlata, et quod tum maxime Abydum obpugnaret, quum rex ab Attalo et Rhodiis ultro se bello lacessitum diceret; *Num Abydeni quoque, inquit, ultro tibi intulerunt arma?* Insueto vera audire ferocior oratio visa est, quam quæ habenda apud regem esset. *Ætas, inquit, et forma, et super omnia Romanum nomen te ferociorem facit.* Ego autem primum velim, vos fæderum memores servare mecum pacem. Si bello lacesseritis, mihi quoque in animo est facere, ut regnum Macedonum nomenque, haud minus quam Romanum, nobile bello sentiatis. Ita dimisso legato, Philippus, auro argentoque, quæ coacervata erant, accepto, hominum prædam omnem amisit: tanta enim rabies multitudinem invasit, ut repente proditos rati, qui pugnantes mortem obcubuisserent, perjuriumque aliis alii exprobrantes, et sacerdotibus maxime, qui, quos ad mortem devovissent, eorum dditionem vivorum hosti fecissent, repente omnes ad cædem conjugum liberorumque discurrerent, sequi ipsi per omnes vias lethi interficerent. Obstupefactus eo furore rex, subpressit inpetum militum: et, *triduum se ad moriendum Abydenis dare, dixit.* Quo spatio plura facinora in se victi ediderunt, quam infesti edidissent victores: nec, nisi quem vincula aut alia necessitas mori prohibuit, quisquam

Abydeni se ipsi trucidant.

vivus in potestatem venit. Philippus, inposito Abydi U. C. 552.  
præsidio, in regnum rediit. Qnum, velut Sagunti A. C. 200.  
excidium Hannibali, sic Philippo Abydenorum clades ad Romanum bellum animos fecisset, nuncii ob-  
currerunt, consulem jam in Epiro esse, et Apollonia-  
niam terrestres copias, navales Corcyram in hiberna  
deduxisse.

XIX. Inter hæc legatis, qui in Africam missi Legati Ro-  
erant de Hamilcare Gallici exercitus duce, respon- mani in  
sum a Karthaginiensibus est, nihil ultra se facere Africa.  
posse, quam ut exsilio eum multarent, bonaque ejus  
publicarent. Perfugas et fugitivos, quos inquirendo  
vestigare potuerint, reddidisse: et de ea re missuros  
legatos Romam, qui senatui satisfacerent. Ducenta  
millia modiū tritici Romam, ducenta ad exercitum  
in Macedoniam miserunt. Inde in Numidiam ad  
reges profecti legati: dona data Masinissæ, manda-  
taque edita. Equites mille Numidæ (quum duo  
millia daret) accepti: ipse in naves inponendos  
curavit: et cum ducentis millibus modiū tritici,  
ducentis hordei, in Macedoniam misit. Tertia le-  
gatio ad Verminam erat. Is, ad primos fines regni  
legatis obviam progressus, ut scriberent ipsi, quas  
vellent, pacis conditiones, permisit. Omnem pacem  
bonam justamque fore sibi cum populo Romano.  
Datae leges pacis, jussusque ad eam confirmandam  
mittere legatos Romam.

XX. Per idem tempus L. Cornelius Lentulus pro Lentulo ex  
consule ex Hispania rediit: qui quum in senatu res Hispania  
ab se per multos annos fortiter feliciterque gestas reduci con-  
exposuisset, postulassetque, ut triumphanti sibi in- cessa ova-  
vehi liceret in urbem; *res triumpho dignas esse cen-*  
*sebat senatus: sed exemplum a majoribus non acce-*  
tio.

U. C. 552. pisce, ut, qui neque dictator, neque consul, neque prætor res gessisset, triumpharet. Pro consule illum Hispaniam provinciam, non consulem, aut prætorem, obtinuisse. Decurrebatur tamen eo, ut ovans urbem iniret, intercedente Ti. Sempronio Longo tribuno plebis; qui nihilo magis id more majorum, aut ullo exemplo futurum diceret. Postremo victus consensu Patrum tribunus cessit: et ex senatusconsulto L. Lentulus ovans urbem est ingressus. Argenti tulit ex præda quadraginta quatuor millia pondo; auri duo millia quadringenta quinquaginta: militibus ex præda centum viginti asses divisit.

XXI. Jam exercitus consularis ab Arretio Ariminum traductus erat, et quinque millia socium Latini nominis ex Gallia in Etruriam transierant: itaque L. Furius, magnis itineribus ab Arimino adversus Gallos, Cremonam tum obsidentes, profectus, castra mille quingentorum passuum intervallo ab hoste posuit. Occasio egregie rei gerendæ fuit, si protinus de via ad castra obpugnanda duxisset. Palati passim vagabantur per agros, nullo satis firmo relichto præsidio; lassitudini militum timuit, quod raptim ductum agmen erat. Galli, clamore suorum ex agris revocati, omissa præda quæ in manibus erat, castra repetivere, et postero die in aciem progressi: nec Romanus moram pugnandi fecit; sed vix spatiū instruendi fuit: eo cursu hostes in prælium venerunt. Dextra ala (in alas divisum socialem exercitum habebat) in prima acie locata est: in monam. subsidiis duæ Romanæ legiones. M. Furius dextræ alæ, legionibus M. Cæcilius, equitibus L. Valerius Flaccus (legati omnes erant) præpositi. Prætor secum duos legatos, Cn. Lætorium et P. Titinium, ha-

bebat: cum quibus circumspicere et obire ad om- U. C. 552-  
nes hostium subitos conatus posset. Primo Galli, A. C. 200.  
omni multitudine in unum locum connisi, obruere  
atque obterere sese dextram alam, quæ prima erat,  
sperarunt posse: ubi id parum procedebat, circumire  
a cornibus; et amplecti hostium aciem (quod in  
multitudine adversus paucos facile videbatur) conati  
sunt. Id ubi vidit prætor, ut et ipse dilataret aciem,  
duas legiones ex subsidiis dextra lævaque alæ, quæ  
in prima acie pugnabat, circumdat, ædemque Deo  
Jovi vovit, si eo die hostes fudisset. L. Valerio im-  
perat, ut parte duarum legionum equites, altera so-  
ciorum equitatum in cornua hostium emittat, nec  
circumire eos aciem patiatur: simul et ipse, ut ex-  
tenuatam medium deductis cornibus aciem Gallo-  
rum vidit, signa inferre confertos milites, et perrum-  
pere ordines jubet. Et cornua ab equitibus, et me-  
dii a pedite pulsi: ac repente, quum omni parte  
cæde ingenti sternerentur, Galli terga vertunt, fuga-  
que effusa repetunt castra: fugientes persecutus  
eques, mox et legiones insecuræ in castra inpetum  
fecerunt. Minus sex millia hominum inde effuge-  
runt: cæsa aut capta supra quinque et triginta mil-  
lia cum signis militaribus septuaginta, carpentis  
Gallicis, multa præda oneratis, plus ducentis. Ha-  
milear dux Pœnus eo prælio cecidit, et tres impera-  
tores nobiles Gallorum. Placentini captivi ad duo  
millia liberorum capitum redditi colonis.

XXII. Magna victoria lætaque Romæ fuit: lite-  
ris adlatis, supplicatio in triduum decreta est. Ro-  
manorum sociorumque ad duo millia eo prælio ceci-  
derunt: plurimi dextræ alæ, in quam primo inpetu  
vis ingens hostium inflata est. Quamquam per præ-

U. C. 552. torem prope debellatum erat, consul quoque C. Au-  
 C. 200. relius, perfectis, quæ Romæ agenda fuerant, pro-  
 fectus in Galliam, victorem exercitum a prætore  
 accepit. Consul alter, quum autumno ferme exacto  
 in provinciam venisset, circa Apolloniam hiberna-  
 Res Græ-  
 siae.  
 Athenæ  
 defensæ.  
 bat: ab classe, quæ Corcyrae subducta erat, C. Clau-  
 dius triremesque Romanæ, (sicut ante dictum est)  
 Athenas missæ, quum Piræum pervenissent, de-  
 spondentibus jam animos sociis spem ingentem ad-  
 tulerant: nam et terrestres ab Corintho, quæ per  
 Megaram incursions in agros fieri solitæ erant, non  
 fiebant; et prædonum a Chalcide naves, quæ non  
 mare solum infestum, sed etiam omnes maritos  
 agros Atheniensibus fecerant, non modo Sunium  
 superare, sed nec extra fretum Euripi committere  
 aperto mari se audebant. Supervenerunt his tres  
 Rhodiæ quadriremes, et crant Atticæ tres apertæ  
 naves, ad tuendos maritos agros comparatæ. Hac  
 classe si urbs agrique Atheniensium defenserentur,  
 satis in præsentia existimanti Claudio esse, majoris  
 etiam rei fortuna oblata est.

Chalci-  
 dem occu-  
 pant Ro-  
 mani.  
 XXIII. Exsules ab Chalcide, regiorum injuriis  
 pulsi, adulterunt, occupari Chalcidem sine certamine  
 ullo posse: nam et Macedonas, quia nullus in pro-  
 pinquo sit hostium metus, vagari passim, et oppi-  
 danos, præsidio Macedonum fretos, custodiam urbis  
 negligere. His auctoribus profectus, quamquam  
 Sunium ita mature pervenerat, ut inde provelhi ad  
 primas angustias Eubœæ posset; ne superato pro-  
 montorio conspiceretur, classem in statione usque  
 ad noctem tenuit. Primis tenebris movit: et tran-  
 quillo pervectus Chalcidem, paullo ante lucem, qua  
 infrequentissima urbis sunt, paucis militibus turrim

proximam murumque circa scalis cepit, alibi sopitis U. C. 552.  
custodibus, alibi nullo custodiente; progressi inde A. C. 200.  
ad frequentia ædificiis loca, custodibus interfectis,  
refractaque porta, ceteram multitudinem armato-  
rum acceperunt. Inde in totam urbem discursum  
est: aucto etiam tumultu, quod circa forum ignis  
tectis injectus erat. Conflagrarunt et horrea regia,  
et armamentarium cum ingenti adparatu machina-  
rum tornientorumque: cædes inde passim fugientium  
pariter ac repugnantium fieri cœpta est: nec  
ullo jam, qui militaris ætatis esset, non aut cæso,  
aut fugato, Sopatro etiam Acarnane præfecto præ-  
sidii imperfecto, præda omnis primo in forum con-  
lata, deinde in naves inposita: carcer etiam ab Rho-  
diis refractus: emi sique captivi, quos Philippus  
tamquam in tutissimam custodiam condiderat. Sta-  
tuis inde regis dejectis truncatisque, signo receptui  
dato, concenderunt naves, et Piræum, unde pro-  
fecti erant, redierunt. Quod si tantum militum  
Romanorum fuisset, ut et Chalcis teneri, et non  
deseri præsidium Athenarum potuisset; magna res  
principio statim belli, Chalcis et Euripus ademta  
regi forent: nam ut terra Thermopilarum angustiæ  
Græciam, ita mari fretum Euripi claudit.

XXIV. Demetriade tum Philippus erat: quo Advolat  
quum esset nunciata clades sociæ urbis, quamquam Philippus,  
serum auxilium perditis erat, tamen, quæ proxima sed sero.  
auxilio est, ultiōnem petens, cum expeditis quinque  
millibus peditum, et trecentis equitibus extemplo  
profectus, cursu prope Chalcidem contendit, haud-  
quaquam dubius obprimi Romanos posse: a qua  
destitutus spe, nec quidquam aliud, quam ad de-  
forme spectaculum semirutæ ac fumantis sociæ ur-

U.C. 552. bis quum venisset, paucis vix, qui sepelirent bello  
A.C. 200. absuntos, relictis, æque raptim ac venerat, trans-  
Dicit gressus ponte Euripum, per Boëtiam Athenas du-  
Athenas. cit, pari incepto haud disparem eventum ratus re-  
sponsurum: et respondisset, ni speculator, (heme-  
rodronios vocant Græci, ingens die uno cursu eme-  
tientes spatium,) contemplatus regium agmen e  
specula quadam, prægressus nocte media Athenas  
pervenisset. Idem ibi somnus, eademque negligen-  
tia erat, quæ Chalcidem dies ante paucos prodide-  
rat. Excitati nuncio trepido et prætor Athenien-  
sium, et Dioxippus præfectus cohortis mercede mili-  
tantium auxiliorum, convocatis in forum militibus,  
tuba signum ex arce dari jubent, ut hostes adesse  
omnes scirent: ita undique ad portas, ad muros  
discurrunt. Paucas post horas Philippus, aliquanto  
tamen ante lucem, adpropinquans urbi, conspectis  
luminibus erebris, et fremitu hominum trepidantium  
(ut in tali tumultu) exaudito, sustinuit signa: et  
considere ac conquiescere agmen jussit, vi aperta  
propalam usurus, quando parum dolus profuerat.  
Ab Dipylo accessit: porta ea, velut in ore urbis  
posita, major aliquanto patentiorque, quam ceteræ,  
est: et intra eam extraque latæ sunt viæ, ut et op-  
pidani dirigere aciem a foro ad portam possent: et  
extra limes mille ferme passus, in Academiæ gym-  
nasium ferens, pediti equitique hostium liberum  
spatium præberet. Eo limite Athenienses cum At-  
tali præsidio et cohorte Dioxippi, acie intra portam  
instructa, signa extulerunt. Quod ubi Philippus vi-  
dit, habere se hostes in potestate ratus, et diu op-  
tata cæde (neque enim ulli Græcarum civitatum in-  
festior erat) expleturum, cohortatus milites, ut, se

*intuentes, pugnarent, scirentque ibi signa, ibi aciem U. C. 552.  
esse debere, ubi rex esset, concitat in hostes equum,  
non ira tantum, sed etiam gloria elatus; quod, in- A. C. 200.  
genti turba completis etiam ad spectaculum muris,  
conspici se pugnantem egregium ducebat. Aliquan- Prælrium  
tum ante aciem cum equitibus paucis evectus in me- memora-  
dios hostes, ingentem quum suis ardorem, tum pa- bile edit.  
vorem hostibus, injecit: plurimos manu sua comi-  
nus eminusque vulneratos compulsosque in portam,  
consecutus et ipse, quum majorem in angustiis tre-  
pidantium edidisset cædem, in temerario incepto tu-  
tum tamen receptum habuit: quia, qui in turribus  
portæ erant, sustinebant tela, ne in permixtos hosti-  
bus suos conjicerent. Intra muros deinde tenenti-  
bus milites Atheniensibus, Philippus, signo receptui  
dato, castra ad Cynosarges (templum Herculis,  
gymnasiumque, et lucus erat circumjectus) posuit:  
sed Cynosarges, et Lyceum, et quidquid sancti Diruit om-  
amœnive circa urbem erat, incensum est, dirutaque nia circa  
non tecta solum, sed etiam sepulcra: nec divini Athenas.  
humanive juris quidquam præ inpotenti ira est ser-  
vatum.*

XXV. Postero die, quum primo clausæ fuissent portæ, deinde subito apertæ, quia præsidium Attali ab Ægina, Romanique ab Piræo intraverant urbem, castra ab urbe retulit rex tria ferme millia passuum: inde Eleusinem profectus, spe improviso templi castellique, quod et inminet et circumdatum est templo, capiendi, quum haudquaquam neglectas custodias animadvertisset, et classem a Piræo sub-sidio venire, omissio incepto, Megaram, ac protinus Corinthum dicit: et quum Argis Achæorum concilium esse audisset, inopinantibus Achæis, concioni It Argos ad concilium Achæorum.

V. C. 552. ipsi supervenit. Consultabant de bello adversus  
A. C. 200. Nabin tyrannum Lacedæmoniorum: qui, translato  
imperio a Philopœmene ad Cycliadem, nequaquam  
parem illi ducem, dilapsa cernens Achæorum auxi-  
lia, redintegraverat bellum, agrosque finitimorum  
vastabat; et jam urbibus quoque erat terribilis.  
Adversus hunc hostem, quum, quantum ex quaue  
civitate militum scriberetur, consultarent; Philip-  
pus, demturm se eis curam, quod ad Nabin et La-  
cedæmonios adtineret, pollicitus; nec tantum agros  
sociorum populationibus prohibitum, sed terro-  
rem omnem belli in ipsam Laconicam, ducto eo  
extemplo exercitu, translaturum. Hæc oratio quum  
ingenti hominum adsensu acciperetur: *Ita tamen*  
*æquum est, inquit, me vestra meis armis tutari, ne*  
*mea interim nudentur præsidiis. Itaque, si vobis vide-*  
*tur, tantum parate militum, quantum ad Oreum, et*  
*Chalcidem, et Corinthum tuenda satis sit: ut, meis*  
*ab tergo tutis, securus bellum Nabidi inferam et Lace-*  
*dæmoniis. Non febellit Achæos, quo spectasset tam*  
*benigna pollicitatio, auxiliumque oblatum adversus*  
*Lacedæmonios: id quæri, ut obsidem Achæorum*  
*juventutem educeret ex Peloponneso, ad inligan-*  
*dam Romano bello gentem: et id quidem coarguere*  
Cycliadas prætor Achæorum nihil adtinere ratus, id  
modo quum dixisset, non licere legibus Achæorum  
de aliis rebus referre, quam propter quas convocati  
essent; decreto de exercitu parando adversus Nabin  
facto, concilium fortiter ac libere habitum dimisit;  
inter adsentatores regios ante eam diem habitus.  
Philippus, magna spe depulsus, voluntariis paucis  
militibus conscriptis, Corinthum atque in Atticam  
terram rediit.

XXVI. Per eos ipsos dies, quibus Philippus in U. C. 552.  
Achaia fuit, Philocles præfектus regius, ex Eubœa A. C. 200.  
profectus cum duobus millibus Thracum Macedo-  
numque ad depopulandos Atheniensium fines, e re-  
gione Eleusinis saltum Cithæronis transcendit: inde  
dimidia parte militum ad prædandum passim per  
agros dimissa, cum parte ipse occultus loco ad  
insidias opportuno consedit, ut, si ex castello ab  
Eleusine in prædantes suos inpetus fieret, repente  
hostes effusos ex improviso adoriretur. Non fefel-  
lere insidiæ: itaque revocatis, qui discurrerant ad  
prædandum, militibus, instructisque, ad obpugnan-  
dum castellum Eleusinem profectus, cum multis inde  
vulneribus recessit, Philippoque se venienti ex A-  
chaia conjunxit. Teutata et ab ipso rege obpugna-  
tio ejus castelli est: sed naves Romanæ, a Piræo  
venientes, intromissumque præsidium absistere in-  
cepto coegerunt. Diviso deinde exercitu, rex cum Philippus  
parte Philoclem Athenas mittit, cum parte ipse Athenas et  
Piræum pergit: ut, quum Philocles subeundo mu- Piræum  
frustra ten-  
ros, et comminanda obpugnatione contineret urbe tat.  
Athenienses, ipsi Piræum levi cum præsidio relic-  
tum expugnandi facultas esset. Ceterum nihilo ei  
Piræi, quam Eleusinis, facilior, iisdem fere defen-  
dentibus, obpugnatio fuit. A Piræo Athenas re-  
pente duxit: inde eruptione subita peditum equi-  
tumque inter angustias semiruti muri, qui brachiis  
duobus Piræum Athenis jungit, repulsus; omissa  
obpugnatione urbis, diviso cum Philocle rursus  
exercitu, ad vastandos agros profectus, quum prior-  
rem populationem sepuleris circa urbem diruendis  
exercuisset, ne quid inviolatum relinqueret, templo  
Deum, quæ pagatim sacrata habebant, dirui atque

U.C. 552. incendi jussit. Exornata eo genere operum eximie  
 A.C. 200. terra Attica, et copia domestici marmoris, et inge-  
 niis artificium, præbuit huic furori materiam: ne-  
 que enim diruere modo ipsa templa, ac simulacra  
 evertere satis habuit; sed lapides quoque, ne integri  
 cumularent ruinas, frangi jussit: et postquam non  
 tam ira satiata, quam iræ exercendæ materia hæc  
 deerat, agro hostium in Bœotiam excessit, nec aliud  
 quidquam dignum memoria in Græcia egit.

XXVII. Consul Sulpicius eo tempore inter Apol-  
 loniam ac Dyrrachium ad Apsum flumen habebat  
 castra: quo arcessitum L. Apustum legatum, cum  
 parte copiarum ad depopulandos hostium fines mit-  
 tit. Apustius, extrema Macedoniæ populatus, Cor-  
 rago, et Gerrunio, et Orgesso castellis primo inpetu  
 captis, ad Antipatriam in faucibus angustis sitam  
 urbem, venit: ac primo evocatos principes ad con-  
 loquium, ut fidei Romanorum se committerent, per-  
 licere est conatus: deinde, ubi, magnitudine ac  
 mœnibus situque urbis freti, dicta adsperrabantur,  
 vi atque armis adortus, expugnavit; puberibusque  
 imperfectis, præda omni militibus concessa, diruit  
 muros, atque urbem incendit. Hic metus Codri-  
 nem, satis validum et munitum oppidum, sine cer-  
 tamine ut dederetur Romanis, effecit. Præsidio ibi  
 relicto, Ilion (nomen propter alteram in Asia ur-  
 bem, quam oppidum, notius) vi capitur. Reverten-  
 tem legatum ad consulem cum satis magna præda,  
 Athenagoras quidam regius præfectus in transitu  
 fluminis a novissimo agmine adortus, postremos  
 turbavit: ad quorum clamorem et trepidationem  
 quum revectus equo propere legatus signa conver-  
 tisset, conjectisque in medium sarcinis aciem di-

Romani  
 populan-  
 tur Mace-  
 doniæ fi-  
 nes.

rexisset; non tulere inpetum Romanorum militum U. C. 552.  
regii: multi ex iis occisi, plures capti. Legatus, A. C. 200.  
incolumi exercitu reducto ad consulem, remittitur  
inde ex templo ad classem.

XXVIII. Hac satis felici expeditione bello com-  
misso, reguli ac principes adcolæ Macedonum in  
castra Romana veniunt, Pleuratus Scerdilædi filius,  
et Amynander Athamanum rex, et ex Dardanis  
Bato, Longari filius. Bellum suo nomine Longa-  
rus cum Demetrio Philippi patre gesserat. Polli-  
centibus auxilia respondit consul, Dardanorum et  
Pleurati opera, quum exercitum in Macedoniam in-  
duceret, se usurum. Amynandro Ætolos concitan-  
dos ad bellum adtribuit. Attali legatis (nam ii quo-  
que per id tempus venerant) mandat, ut Æginæ rex,  
ubi hibernabat, classem Romanam obperiretur:  
qua adjuncta, bello maritimo, sicut ante, Philippum  
urgeret. Ad Rhodios quoque missi legati, ut capes-  
serent partem belli. Nec Philippus segnius (jam Philippi  
enim in Macedoniam pervenerat) adparabat bellum. adparatus.  
Filium Persea, puerum admodum, datis ex amico-  
rum numero, qui ætatem ejus regerent, cum parte  
copiarum ad obsidendas angustias, quæ ad Pelago-  
niam sunt, mittit. Sciathum et Peparethum, haud  
ignobiles urbes, ne classi hostium prædæ ac præmio  
essent, diruit. Ad Ætolos mittit legatos, ne gens  
inquieta adventu Romanorum fidem mutaret.

XXIX. Concilium Ætolorum statuta die, quod  
Panætolium vocant, futurum erat. Huic ut obcur-  
rerent, et legati regis iter adcelerarunt, et ab con-  
sule missus L. Furius Purpureo legatus venit. Athe-  
niensium quoque legati ad id concilium obcurrerunt.  
Primi Macedones, cum quibus recentissimum fœdus

U. C. 552. erat, auditи sunt: qui, nulla nova re, nihil se novi  
 A. C. 200. habere, quod adferrent, dixerunt: quibus enim de  
 Oratio  
 Mace-  
 num lega-  
 torum in  
 concilio  
 Ætolo-  
 rum.

*caussis, experta inutili societate Romana, pacem cum  
 Philippo fecissent, compositam semel servare eos de-  
 bere. An imitari, inquit unus ex legatis, Romano-  
 rum licentiam, an levitatem dicam, mavultis? qui,  
 quum legatis vestris Romae responderi ita jussissent,  
 Quid ad nos venitis, Ætoli, sine quorum auctoritate  
 pacem cum Philippo fecistis? iidem nunc, ut bellum  
 secum adversus Philippum geratis, postulant: et antea  
 propter vos, et pro vobis arma sumta adversus eum  
 simulabant; nunc vos in pace esse cum Philippo pro-  
 hibent. Messanæ ut auxilio essent, primo in Siciliam  
 concenderunt: iterum, ut Syracusas obpressas ab Kar-  
 thaginiensibus in libertatem eximerent. Et Messanam,  
 et Syracusas, et totam Siciliam ipsi habent, rectiga-  
 lemque provinciam securibus et fascibus subjecerunt.  
 Scilicet, sicut vos Naupacti legibus vestris per magis-  
 tratus a vobis creatos concilium habetis, socium hostem-  
 que libere, quem velitis, lecturi, pacem ac bellum arbit-  
 riori habituri vestro; sic Siculorum civitatibus, Syra-  
 cusas, aut Messanam, aut Lilybæum indicitur conci-  
 lium. Prætor Romanus conventus agit: eo imperio  
 evocati conveniunt: excuso in subgestu superba jura  
 reddentem, stipatum lictoribus vident: virgæ tergo,  
 secures cervicibus imminent: et quotannis alium atque  
 alium dominum sortiuntur. Nec id mirari debent,  
 aut possunt, quum Italæ urbes Rhegium, Tarentum,  
 Capuam, ne finitimas nominem, quarum ruinis crevit  
 urbs Romana, ejusdem subjectas videant imperio. Ca-  
 pua quidem, sepulcrum ac monumentum Campani po-  
 puli, elato et extorri ejecto ipso populo, superest; urbs  
 truncata, sine senatu, sine plebe, sine magistratibus, pro-*

digium; relictā crudelius habitanda, quam si deleta U. C. 552.  
 foret. Furor est, si alienigenæ homines, plus lingua et A. C. 200.  
 moribus et legibus, quam maris terrarumque spatio,  
 discreti, hæc tenuerint, sperare, quidquam eodem statu  
 mansurum. Philippi regnum obficere aliquid videtur  
 libertati vestræ; qui, quum merito vestro vobis infestus  
 esset, et nihil a vobis ultra, quam pacem, petiit, fidem-  
 que hodie pacis pactæ desiderat? Adsuefacite his ter-  
 ris legiones externas, et jugum accipite: sero ac ne-  
 quidquam, quum dominum Romanum habebitis, socium  
 Philippum quæretis. Ætolos, Acarnanas, Macedonas,  
 ejusdem linguæ homines, leves ad tempus ortæ caussæ  
 disjungunt conjunguntque; cum alienigenis, cum barba-  
 ris æternum omnibus Græcis bellum est, eritque: natura  
 enim, quæ perpetua est, non mutabilibus in diem caus-  
 sis, hostes sunt. Sed, unde cœpit oratio mea, ibi desi-  
 net. Hoc eodem loco iidem homines de ejusdem Phi-  
 lippi pace triennio ante decrevistis, iisdem improbanti-  
 bus eam pacem Romanis, qui nunc pactam et compo-  
 sitam turbare volunt: in qua consultatione nihil for-  
 tuna mutavit, cur vos mutetis, non video.

XXX. Secundum Macedonas, ipsis Romanis ita  
 concedentibus jubentibusque, Athenienses, qui fœ-  
 da passi justius in crudelitatem sævitiamque regis  
 invehi poterant, introducti sunt. Deploraverunt  
 vastationem populationemque miserabilem agrorum.  
 Neque id se queri, quod hostilia ab hoste passi forent: Atheniens-  
 esse enim quædam belli jura; quæ ut facere, ita pati um oratio.  
 sit fas: sata exuri, dirui tecta, prædas hominum pe-  
 corumque agi, misera magis, quam indigna, patienti  
 esse. Verum enim vero id se queri, quod is, qui Ro-  
 manos alienigenas et barbaros vocet, adeo omnia simul  
 divina humanaque jura polluerit, ut priore populatione

**U. C. 552.** *cum infernis Diis, secunda cum superis bellum nefarium gesserit: omnia sepulcra monumentaque diruta esse in finibus suis, omnium nudatos manes, nullius ossa terra tegi: delubra sibi fuisse, quæ quondam pagatim habitantes in parvis illis castellis vicisque consecrata, ne in unam urbem quidem contributi majores sui deserta reliquerint; circa ea omnia templo Philippum infestos circumtulisse ignes: semiusta et truncata simulacra Deūm inter prostratos jacere postes templorum. Qualem terram Atticam fecerit, exornatam quondam opulentamque, talem eum, si liceat, Aetolian, Græciamque omnem facturum. Urbis quoque suæ similem deformitatem futuram fuisse, nisi Romani subvenissent: eodem enim scelere urbem colentes Deos, præsulemque arcis Minervam petitam: eodem Eleusine Cereris templum, eodem Piræei Jovem Minervamque; sed ab eorum non templis modo, sed etiam mænibus vi atque armis repulsum, in ea delubra, quæ sola religione tutæ fuerint, sævisse. Itaque se orare atque obsecrare Aetolos, ut, miserti Atheniensium, ducibus Diis immortalibus, deinde Romanis, qui secundum Deos plurimum possint, bellum susciperent.*

**Legati Romaniorum orationis XXXI.** Tum Romanus legatus: Totam orationis meæ formam Macedones primum, deinde Athenienses mutarunt. Nam et Macedones, quum ad conquerendas Philippi injurias in tot socias nobis urbes venisset, ultro accusando Romanos, defensionem ut accusatione potiorem haberem, effecerunt: et Athenienses in Deos superos inferosque nefanda atque inhumana scelera ejus referendo, quid mihi aut cuiquam reliquerunt, quod objicere ultra possim? Eadem Cianos, Abydenos, Æneos, Maronitas, Thasios, Parios, Samios, Larissenses, Messenios hinc ex Achaia, existimare queri;

graviora etiam acerbioraque eos, quibus nocendi majo- U. C. 552.  
rem facultatem habuit. Nam quod ad ea adtinet, quæ A. C. 200.  
nobis objecit; nisi gloria digna sunt, fateor ea defendi  
non posse. Rhegium, et Capuam, et Syracusas nobis  
objecit. Rhegium Pyrrhi bello legio a nobis, Reginis  
ipsis, ut mitteremus, orantibus, in præsidium missa,  
urbem, ad quam defendendam missa erat, per scelus  
possedit. Comprobavimus ergo id facinus? an bello  
persecuti sceleratam legionem, in potestatem nostram  
redactam tergo et cervicibus pœnas sociis pendere quum  
coëgisset, urbem, uigilas, suæ quo omnia cum libertate  
legibusque Reginis reddidimus? Syracusanis obpressis  
ab externis tyrannis, quo indignius esset, quum tulisse-  
mus opem, et fatigati prope per triennium terra mari-  
que urbe munitissima obpugnanda essemus, quum jam  
ipsi Syracusani servire tyrannis, quam capi a nobis  
mallent, captam iisdem armis et liberatam urbem red-  
didimus. Neque inficias imus, Siciliam provinciam  
nostram esse, et civitates, quæ in parte Karthaginien-  
sium fuerunt, et uno animo cum illis adversus nos bel-  
lum gesserunt, stipendiarias nobis ac vectigales esse:  
quin contra, hoc et vos et omnes gentes scire volumus,  
pro merito cuique erga nos fortunam esse. An Cam-  
panorum pœnae, de qua neque ipsi quidem queri pos-  
sunt, nos pœniteat? Hi homines, quum pro iis bellum  
adversus Samnites per annos prope septuaginta cum  
magnis nostris cladibus gessisset, ipsos fædere pri-  
mum, deinde connubio, atque inde cognitionibus, post-  
remo civitate nobis conjunxissemus, tempore nostro ad-  
verso primi omnium Italie popolorum, præsidio nostro  
fæde imperfecto, ad Hannibalem defecerunt: deinde,  
indignati se obsideri a nobis, Hannibalem ad obpug-  
nandam Romam miserunt. Horum si neque urbs ipsa,

U.C. 552. neque homo quisquam superesset, quis durius, quam  
A.C. 200. pro merito ipsorum, statutum indignari posset? Plures sibimet ipsi conscientia scelerum mortem consicerunt, quam a nobis suppicio affecti sunt. Ceteris ita oppidum, ita agros ademimus, ut agrum locumque ad habitandum daremus; urbem innoxiam stare incolument pateremur; ut, qui hodie videat eam, nullum obpugnatæ captæ vestigium inveniat. Sed quid ego Capuam dico? quum Karthagini victæ pacem ac libertatem dederimus. Magis illud est periculum, ne, nimis facile victis ignoscendo, plures ob id ipsum ad experiendam adversus nos fortunam belli incitemus. Hæc pro nobis dicta sint, hæc adversus Philippum: cuius domestica parricidia, et cognatorum amicorumque cædes, et libidinem inhumaniorem prope, quam crudelitatem, vos, quo propiores Macedonie estis, melius nostis. Quod ad vos adtinet, Ætoli, nos pro vobis bellum suscepimus adversus Philippum: vos sine nobis cum eo pacem fecistis. Et forsitan dicatis, bello Punico occupatis nobis, coactos metu vos leges pacis ab eo, qui tum plus poterat, accepisse: et nos, quum alia magjora urgerent, depositum a vobis bellum et ipsi omisiimus. Nunc et nos, Deum benignitate Punico perfecto bello, totis viribus nostris in Macedoniam incubuimus: et vobis restituendi vos in amicitiam societatemque nostram fortuna oblata est; nisi perire cum Philippo, quam vincere cum Romanis, mavultis.

**XXXII.** Hæc dicta ab Romano quuin essent, in Damocriti clinatis omnium animis ad Romanos, Damocritus prætoris Ætolorum prætor Ætolorum, pecunia, ut fama est, ab rege sententia accepta, nihil aut huic aut illi parti adsensus, Rem magni discriminis consiliis nullam esse tam inimicam, quam celeritatem, dixit. Celerem enim pœnitentiam,

*sed eamdem seram atque inutilem, sequi; quum præ-* U. C. 552.  
*cipitata raptim consilia neque revocari, neque in inte-* A. C. 200.  
*grum restitui possint. Deliberationis autem ejus, cuius*  
*ipse maturitatem exspectandam putaret, tempus ita jam*  
*nunc statui posse: quum legibus cautum esset, ne de*  
*pace bellore, nisi in Panætolico et Pylaico concilio,*  
*ageretur, decernerent extemplo, ut prætor sine fraude,*  
*quum de bello aut de pace agere velit, advocet concilium:* et, quod tum referatur decernaturque, ut perinde  
*jus ratumque sit, ac si in Panætolico aut Pylaico*  
*concilio actum esset. Dimissis ita suspensa re legatis,*  
*egregie consultum genti aiebat: nam, utrius*  
*partis melior fortuna belli esset, ad ejus societatem*  
*inclinaturos. Hæc in concilio Ætolorum acta.*

XXXIII. Philippus in pigre terra marique para- Philippus  
 bat bellum: navales copias Demetriadem in Thes- in pigre bel-  
 saliam contrahebat. Attalum Romanamque classem rat.  
 lum adpa-  
 principio veris ab Ægina ratus moturos, navibus  
 maritimæque oræ præfecit Heraclidem, quem et  
 ante præfecerat: ipse terrestres copias comparabat,  
 magna se duo auxilia detraxisse Romanis credens,  
 ex una parte Ætolos, ex altera Dardanos, faucibus  
 ad Pelagoniam a filio Perseo interclusis. Ab con-  
 sule non parabatur, sed gerebatur jam bellum: per  
 Dassaretiorum fines exercitum ducebat, frumentum, Consul per  
 quod ex hibernis extulerat, integrum vehens; quod Dassaretio-  
 in usum militi satis esset, præbentibus agris. Op- rum fines  
 pida vicique partim voluntate, partim metu se tra- ducit exer-  
 debant: quædam vi expugnata, quædam deserta, in citum.  
 montes propinquos refugientibus barbaris, invenie-  
 bantur. Ad Lyncum stativa posuit prope flumen  
 Bevum: inde frumentatum circa horrea Dassaretio-  
 rum mittebat. Philippus consternata quidem omnia

U. C. 552. circa, pavoremque ingentem hominum cernebat : sed  
A. C. 200.

parum gnarus, quam partem petisset consul, aliam equitum ad explorandum, quonam hostes iter intendissent, misit. Idem error apud consulem erat. Movisse ex hibernis regem sciebat, quam regionem petisset ignorans : is quoque speculatum miserat equites. Hæ duæ alæ ex diverso, quum diu incertis itineribus vagatae per Dassaretios essent, tandem in unum iter convenerunt. Neutros fefellit, ut fremitus procul hominum equorumque exauditus est, hostes adpropinquare. Itaque prius, quam in conspectum venirent, equos armaque expedierant : nec mora, ubi primum hostem videre, concurrendi facta est. Forte et numero et virtute, utpote lecti utrimque, haud inparés, æquis viribus per aliquot horas pugnarunt. Fatigatio ipsorum equorumque, incerta victoria, diremit prælium. Macedonum quadraginta equites, Romanorum quinque et triginta ceciderunt. Neque eo magis explorati quidquam, in qua regione castra hostium essent, aut illi ad regem, aut hi ad consulem retulerunt : per transfugas cognitum est, quos levitas ingeniorum, ad cognoscendas hostium res, in omnibus bellis præbet.

XXXIV. Philippus, aliquid et ad caritatem suorum, et ut promptius pro eo periculum adirent, ratus profecturum se, si equitum, qui ceciderant in expeditione, sepeliendorum curam habuisse, adferri eos in castra jussit, ut conspiceretur ab omnibus funeris honos. Nihil tam incertum nec tam inæstimabile est, quam animi multitudinis : quod promptiores ad subeundam omnem dimicationem videbatur facturum, id metum pigritiamque incussit : nam, qui hastis sagittisque et rara lanceis vulnera facta vidissent,

Macedo-  
nesterren-  
tur con-

cum Græcis Illyriisque pugnare adsueti, postquam U. C. 552.  
 gladio Hispanensi detruncata corpora brachiis ab- A. C. 200.  
 scisis, aut tota cervice desecta divisa a corpore ca- spectis vul-  
 pita, patentiaque viscera, et fœditatem aliam vulne- neribus  
 rum viderunt, adversus quæ tela quosque viros pug- suorum.  
 nandum esset, pavidi vulgo cernebant. Ipsum quo-  
 que regem terror cepit, nondum justo prælio cum  
 Romanis congressum: itaque, revocato filio præsi-  
 dioque, quod in Pelagoniæ faucibus erat, ut iis co-  
 piis suas augeret, Pleurato Dardanisque iter in Ma-  
 cedoniam patefecit. Ipse, cum viginti millibus pe-  
 ditum, quatuor equitum, ducibus transfugis, ad hos-  
 tem profectus, paullo plus ducentos passus a castris  
 Romanis tumulum propinquum Athaco fossa ac  
 vallo communivit: ac, subjecta cernens Romana Philippus  
 castra, admiratus esse dicitur et universam speciem miratur  
 castrorum, et descripta suis quæque partibus, tum Romana  
 castra. tendentium ordine, tum itinerum intervallis; et ne-  
 gasse, barbarorum ea castra ulli videri posse. Bi-  
 duum consul et rex, alter alterius conatus exspec-  
 tantes, continuere suos intra vallum: tertio die Ro-  
 manus omnes copias in aciem eduxit.

XXXV. Rex vero, tam celerem aleam universi certaminis timens, quadringentos Tralles (Illyrio- rum id, sicut alio diximus loco, est genus) et Cre- tenses trecentos, addito iis peditibus pari numero equitum, cum duce Athenagora, uno ex purpuratis, ad lacessendos hostium equites misit. Ab Romanis autem (aberat acies eorum paullo plus quingentos passus) velites et equitum duæ ferme alæ emissæ: ut numero quoque eques pedesque hostem æquarent. Credidere regii, genus pugnæ, quo adsuerant, fore, Equestris ut equites, in vicem insequentes refugientesque, pugna.

U. C. 552. nunc telis uterentur, nunc terga darent ; Illyriorum  
 A. C. 200. velocitas ad excursiones et inpetus subitos usui  
 esset, Cretenses in invenientem se effuse hostem sa-  
 gittas conjicerent. Turbavit hunc ordinem pug-  
 nandi non acrior, quam pertinacior, inpetus Roma-  
 norum : nam haud secus, quam si tota acie dimica-  
 rent, et velites, emissis hastis, minus gladiis rem  
 gerebant, et equites, ut semel in hostem enecti sunt,  
 stantibus equis, partim ex ipsis equis, partim desi-  
 lientes inimicentesque se peditibus, pugnabant : ita  
 nec eques regius equiti par erat, insuetus ad stabi-  
 lem pugnam ; nec pedes concursator et vagus, et  
 prope seminudus genere armorum, veliti Romano  
 parvani gladiumque habenti, pariterque et ad se  
 tuendum, et ad hostem petendum armato. Non  
 tulere itaque dimicationem ; nec alia re, quam velo-  
 citate, tutantes se, in castra refugerunt.

**XXXVI.** Uno deinde intermisso die, quum om-  
 nibus copiis equitum levisque armaturae pugnaturus  
 rex esset, nocte cætratos, quos peltastas vocant,  
 loco opportuno inter bina castra in insidiis abdide-  
 rat ; præceperatque Athenagoræ et equitibus, ut, si  
 aperto prælio procederet res, uterentur fortuna : si  
 minus, cedendo sensim ad insidiarum locum hostem  
 pertraherent. Et equitatus quidem cessit : duces  
 cætratae cohortis, non satis exspectato signo, ante  
 tempus excitatis suis, occasionem bene gerendæ rei  
 amisere. Romanus, et aperto prælio victor, et tu-  
 tus a fraude insidiarum, in castra sese recepit. Pos-  
 tero die omnibus copiis consul in aciem descendit,  
 ante prima signa locatis elephantis : quo auxilio  
 tum primum Romani, quia captos aliquot bello Pu-  
 nico habebant, usi sunt. Ubi latentem intra vallum

Insidiaæ  
Philippi  
irritæ.

sensit, exprobrans metum successit. Postquam ne U.C. 552.  
 tum quidem potestas pugnandi dabatur, quia ex tam A.C. 200.  
 propinquis stativis parum tuta frumentatio erat, dis-  
 persos milites per agros equitibus extemplo invasu-  
 ris; octo ferme inde millia, intervallo tutiorem fru-  
 mentationem habiturus, castra ad Octolophum (id  
 est loco nomen) movit. Quum in propinquo agro  
 frumentarentur Romani, primo rex intra vallum  
 suos tenuit, ut cresceret simul et negligentia cum  
 audacia hosti. Ubi effusos vidit, cum omni equitatu  
 et Cretensium auxiliaribus, quantum equitem velo-  
 cissimi pedites cursu æquare poterant, citato pro-  
 fectus agmine, inter castra Romana et frumentato-  
 res constituit signa. Inde, copiis divisis, partem ad Prælium.  
 consecrandos vagos frumentatores emisit, dato signo,  
 ne quem vivuni relinquerent; cum parte ipse sub-  
 stitit, itineraque, quibus ad castra recursuri vide-  
 bantur hostes, obsedit. Jam passim cædes ac fuga  
 erat, needum quisquam in castra Romana nuncius  
 cladi pervenerat; quia refugientes in regiam statio-  
 nem incidebant; et plures ab obsidentibus vias,  
 quam ab emissis ad cædem, interficiebantur: tan-  
 dem inter medias hostium stationes elapsi quidam  
 trepidi, tumultum magis, quam certum nuncium,  
 intulerunt castris.

XXXVII. Consul, equitibus jussis, qua quisque  
 posset, opem ferre laborantibus, ipse legiones e  
 castris educit, et agmine quadrato ad hostem ducit.  
 Dispersi equites per agros quidam aberrarunt, de-  
 cepti clamoribus aliis ex alio exsistentibus loco.  
 Pars obvios habuerunt hostes: pluribus locis simul  
 pugna cœpit. Regia statio atrocissimum prælium  
 edebat: nam et ipsa multitudine equitum peditum-

Tum pri-  
 mum uoi  
 elephanti-  
 Romani.

U. C. 552. que prope justa acies erat: et Romanorum, quia  
A. C. 200. medium obsederat iter, plurimi in eam inferebantur.

Eo quoque superiores Macedones erant, quod et rex ipse hortator aderat, et Cretensium auxiliares multos ex improviso vulnerabant, conferti præparatique in dispersos et effusos pugnantes. Quod si modum in inseguendo habuissent, non in præsentis modo certaminis gloriam, sed in summam etiam belli profectum foret: nunc, aviditate cædis intemperantius insecuri, in prægressas cum tribunis militum cohortes Romanas incidere; et fugiens eques, ut primo signa suorum vidit, convertit in effusum hostem equos: versaque momento temporis fortuna pugnæ est, terga dantibus, qui modo secuti erant. Multi cominus congressi, multi fugientes interfici: nec ferro tantum peridere, sed in paludes quidam conjecti, profundo limo cum ipsis equis hausti sunt. Rex quoque in periculo fuit: nam, ruente saucio equo, præceps ad terram datus, haud multum abfuit, quin jacens obprimeretur. Saluti fuit eques, qui raptim ipse desiluit, pavidumque regem in equum subiecit. Ipse, quum pedes æquare cursu fugientes non posset equites, ab hostibus ad casum regis concitatis confossus periit. Rex, circumvectus paludes pervias inviasque trepida fuga, in castra tandem, jam desperantibus plenisque incolunem evasurum, pervenit. Ducenti Macedonum equites eo prælio peridere, centum ferme capti; octoginta admodum ornati equi, spoliis simul armorum relatis, abducti.

Judicium XXXVIII. Fuerunt, qui hoc die regem temeritate eo prætatis, consulem segnitiae accusarent: nam et Philippo

quiescendum fuisse, quum paucis diebus hostes, exhausto circa omni agro, ad ultimum inopias

venturos sciret: et consulem, quum equitatum hos- U.C. 552.  
 tium levemque armaturam fudisset, ac prope regem A.C. 200.  
 ipsum cepisset, protinus ad castra hostium ducere  
 debuisse: nec enim mansuros ita percussoes hostes  
 fuisse, debellarique momento temporis potuisse. Id  
 dictu, quam re, ut pleraque, facilius: nam, si omni-  
 bus peditum quoque copiis rex congressus fuisset,  
 forsitan inter tumultum, quum omnes victi metuque  
 perculti ex proelio intra vallum, protinus inde super-  
 vadentem munimenta victorem hostem fugerent, exui  
 castris potuerit rex: quum vero integræ copiæ pe-  
 ditum in castris mansissent, statioes ante portas,  
 præsidiaque disposita essent, quid, nisi ut temerita-  
 tem regis, effuse paullo ante secuti percussoes equi-  
 tes, imitaretur, profecisset? neque enim ne regis  
 quidem primum consilium, quo inpetum in frumen-  
 tatores palatos per agros fecit, reprehendendum fo-  
 ret, si modum prosperæ pugnæ inposuisset. Eo  
 quoque minus est mirum, tentasse eum fortunam,  
 quod fama erat, Pleuratum Dardanosque, ingenti-  
 bus copiis profectos domo, jam in Macedoniam  
 transcendisse. Quibus si undique circumventus co-  
 piis foret, sedentem Romanuni debellaturum, credi  
 poterat. Itaque, secundum duas adversas equestres  
 pugnas, multo minus tutam moram in iisdem stati-  
 vis fore Philippus ratus, quum abire inde et fallere Philippe  
 abiens hostem vellet, caduceatore sub occasum solis recedit.  
 ad consulem misso, qui inducias ad sepeliendos  
 equites peteret, frustratus hostem, secunda vigilia,  
 multis ignibus per tota castra relictis, silenti agmine  
 abiit.

XXXIX. Corpus jam curabat consul, quum, ve-  
 nisse caduceatorem, et quid venisset, nunciatum

U.C. 552. est: responso tantum dato, mane postero die forse

A.C. 200. copiant conveniendi, id quod quæsumit erat, nox dieique insequentis pars ad præcipiendum iter Philippo data est: montes, quam viam non ingressum gravi agmine Romanum sciebat, petit. Consul, prima luce caduceatore datis induciis dimisso, haud ita multo post abisse hostem quum sensisset, ignarus qua sequeretur, iisdem stativis frumentando dies aliquot consumsit. Stuberam deinde petit, atque ex Pelagonia frumentum, quod in agris erat, convexit: inde ad Pluvinam est progressus, nondum comperto, quam regionem hostes petissent. Philippus, quum primo ad Bryanium stativa habuisset, profectus inde transversis limitibus, terrorem præbuit subitum hosti. Movere itaque ex Pluvina Romani, et ad Oosphagum flumen posuerunt castra. Rex haud procul inde et ipse, vallo super ripam amnis ducto, (Erigonum incolæ vocant) consedit.

**Occupat angustias qua iter in Eordæam arat.** Inde satis comperto, Eordæam petituros Romanos, ad occupandas angustias, ne superare hostes artis faucibus inclusum aditum possent, præcessit: ibi alia vallo, alia fossa, alia lapidum congerie, ut pro muro essent, alia arboribus objectis, ita ut locus postulabat, aut materia subpeditabat, permuniit; atque (ut ipse rebatur) viam suapte natura difficultem, objectis per omnes transitus operibus inexpugnabilem fecit. Erant pleraque silvestria circa, incommoda phalangi maxime Macedonum: quæ, nisi ubi prælongis hastis velut vallum ante clipeos objectit, (quod ut fiat, libero campo opus est) nullius admodum usus est. Thracas quoque romphææ, ingentis et ipsæ longitudinis, inter objectos undique ramos inpediebant. Cretensium una cohors non

inutilis erat: sed ea quoque ipsa ut, si quis inpetum U. C. 552.  
 faceret, in patentem vulneri equum equitemque sa- A. C. 200.  
 gittas conjicere poterat, ita adversus scuta Romana  
 nec ad trajiciendum satis magnam vim habebat, nec  
 aperti quidquam erat, quod peteret. Itaque id ut  
 vanum teli genus senserunt esse, saxis passim tota  
 valle jacentibus incesebant hostem: ea, majore  
 cum sonitu, quam vulnere ullo, pulsatio scutorum  
 parumper succedentes Romanos tenuit. Deinde, Perrum-  
 ii quoque spretis partim, testudine facta, per ad- punt Ro-  
 versos vadunt hostes: partim, brevi circuitu quum mani an-  
 gustias. in jugum collis evasisse, trepidos ex præsidiis sta-  
 tionibusque Macedonas deturbant: et, ut in locis  
 impeditis difficulti fuga, plerosque etiam obtruncant.

XL. Ita angustiæ minore certamine, quam quod  
 animis proposuerant, superatae, et in Eordæam per-  
 ventum; ubi pervastatis passim agris, in Elimeam  
 se recepit: inde inpetum in Orestidem fecit; et  
 oppidum Celetrum est adgressus, in peninsula si-  
 tum. Lacus mœnia cingit: angustis faucibus unum  
 ex continenti iter est. Primo situ ipso freti, clausis  
 portis, imperium abnuere: deinde, postquam signa  
 ferri, ac testudine succedi ad portam, obsessasque  
 fauces agmine hostium viderunt, priusquam exper-  
 rentur certamen, metu in ditionem venerunt. Ab  
 Celetro in Dassaretios processit, urbemque Pelium  
 vi cepit: servitia inde cum cetera præda abduxit, et  
 libera capita sine pretio dimisit; oppidumque iis  
 reddidit, præsidio valido inposito: nam et sita op-  
 portune urbs erat ad inpetus in Macedoniam facien-  
 dos. Ita peragratiss hostium agris, consul in loca  
 jam pacata ad Apolloniam, unde orsus bellum erat,  
 copias reduxit. Philippum averterant Ætolii, et

U. C. 552. Athamanes, et Dardani, et tot bella repente alia ex  
 A. C. 200. aliis locis exorta. Adversus Dardanos, jam recipientes ex Macedonia sese, Athenagoram cum expeditis peditibus ac majore parte equitatus misit, jussum instare ab tergo abeuntibus, et, carpendo postremum agmen, segniores eos ad movendos domo exercitus efficere. Ætolos Damocritus prætor, qui moræ ad decernendum bellum ad Naupactum auctor fuerat, idem proximo concilio ad arma conciverat: post famam equestris ad Octolophum pugnæ, Dardanorumque et Pleurati cum Illyriis transitum in Macedoniam, ad hæc classis Romanæ adventum in Oreum, et, super circumfusas tot Macedoniæ gentes, maritimam quoque instantem obsidionem.

Ætoli et  
Athama-  
nes bel-  
lum infe-  
runt Phi-  
lippo.

**XLI.** Hæ caussæ Damocritum Ætolosque restituerant Romanis: et, Amynandro rege Athamanum adjuncto, profecti Cercinium obsedere. Clauserant portas, incertum vi, an voluntate: quia regium habebant præsidium. Ceterum intra paucos dies captum est Cercinium, atque incensum: qui superfuerant e magna clade, liberi servique, inter ceteram prædam abducti. Is timor omnes, qui circumcoiunt Bœben paludem, relictis urbibus, montes coëgit petere. Ætoli, inopia prædæ inde aversi, in Perrhæbiam ire pergunt. Cyretias ibi vi capiunt, fœdeque diripiunt: qui Mallœam incolunt, voluntate in ditionem societatemque accepti. Ex Perrhæbia Gomphos petendi Amynander auctor erat: et inminet Athamania huic urbi, videbaturque expugnari sine magno certamine posse. Ætoli campos Thessaliæ opimos ad prædam petiere: sequente, quamquam non probante, Amynandro, nec effusas

Thessa-  
liam po-  
pulantur.

populationes Ætolorum, nec castra, quo fors tulis- U. C. 552.  
 set loco, sine ullo discrimine ac cura muniendi, po- A. C. 200.  
 sita: itaque, ne temeritas eorum negligentiaque sibi  
 ac suis etiam cladis alicujus caussa esset, quum cam-  
 pestribus locis subjicientes eos castra Phœcado urbi  
 videret, ipse paullo plus quingentorum passuum  
 inde tumulum suis, quamvis levi munimento tutum,  
 cepit. Quum Ætoli, nisi quod populabantur, vix  
 meminisse viderentur, se in hostium agro esse; alii  
 palati semiermes vagarentur, alii in castris sine sta-  
 tionibus per somnum vinumque dies noctibus æqua-  
 rent, Philippus inopinantibus advenit: quem quum Obprimun-  
 adesse refugientes ex agris quidam pavidi nuncias- tur a Philip-  
 sent, trepidare Damocritus ceterique duces: et erat po.  
 forte meridianum tempus, quo plerique graves cibo  
 sopiti jacebant. Excitare igitur alii alias, jubere  
 arma capere, alias dimittere ad revocandos, qui pa-  
 lati per agros prædabantur: tantaque trepidatio  
 fuit, ut sine gladiis quidam equitum exirent, loricas  
 plerique non induerent. Ita raptim educti, quum  
 universi sexcentorum ægre simul equites peditesque  
 numerum explessent, incidunt in regium equitatum,  
 numero, animis, armisque præstantem. Itaque pri-  
 mo in petu fusi, vix tentato certamine, turpi fuga  
 repetunt castra: cæsi captique quidam, quos equi-  
 tes ab agmine fugientium interclusere.

**XLII.** Philippus, suis jam vallo adpropinquanti-  
 bus, receptui cani jussit: fatigatos enim equos vi-  
 rosque non tam prælio, quam itineris simul longi-  
 tudine, simul præpropera celeritate, habebat. Ita-  
 que turmatim equites, in vicemque manipulos levis  
 armaturæ, aquatum ire et prandere jubet: alios in  
 statione armatos retinet, obperiens agmen peditum

U. C. 552. tardius ductum propter gravitatem armorum. Quod  
 A. C. 200. ubi advenit, et ipsis imperatum, ut, statutis signis  
 armisque ante se positis, raptim cibum caperent,  
 binis ternisve summum ex manipulis aquandi caussa  
 missis: interim eques cum levi armatura paratus in-  
 structusque stetit, si quid hostis moveret. *Ætolii*,  
 (jam enim et, quæ per agros multitudo sparsa  
 fuerat, receperat se in castra) ut defensuri muni-  
 menta, circa portas vallumque armatos disponunt,  
 dum quietos hostes ipsi feroce ex tuto spectabant:  
 postquam mota signa Macedonum sunt, et suc-  
 dere ad vallum parati atque instructi cœpere, omnes  
 repente, relictis stationibus, per aversam partem  
 castrorum ad tumulum, ad castra Athamanum per-  
 fugiunt: multi in hac quoque tam trepida fuga  
 capti cæsique sunt *Ætolorum*. *Philippus*, si satis  
 diei superesset, non dubius, quin Athamanes quo-  
 que exui castris potuissent, die per prælium, deinde  
 per direptionem castrorum absumto, sub tumulo in  
 proxima planicie consedit, prima luce insequentis  
 diei hostem adgressurus. Sed *Ætolii* eodem pavore,  
 quo sua castra reliquerant, nocte proxima dispersi  
 fugerunt. Maximo usni fuit Amynander, quo duce  
*Athamanes*, itinerum periti, summis montibus per  
 calles ignotos sequentibus eos hostibus in *Ætoliam*  
 perduxerunt: non ita multos in dispersa fuga error  
 intulit in Macedonum equites, quos luce prima Phi-  
 lippus, ut desertum tumulum vidit, ad carpendum  
 hostium agmen misit.

**XLIII.** Per eos dies et Athenagoras regius præ-  
 fectus, Dardanos recipientes se in fines adeptus,  
 postremum agmen primo turbavit: dein, postquam  
 Dardani male mul- Dardani conversis signis direxere aciem, æqua pugna-  
 tati.

justo prælio erat: ubi rursus procedere Dardani U.C. 552.  
 cœpissent, equite et levi armatura regii, nullum talis A.C. 200.  
 auxilii genus habentes Dardanos, oneratos inmobili-  
 bus armis, vexabant: et loca ipsa adjuvabant.  
 Occisi perpauci sunt, plures vulnerati, captus nemo,  
 quia non excedunt temere ordinibus suis, sed con-  
 fertim et pugnant, et cedunt. Ita damna Romano  
 accepta bello, duabus per oportunas expeditiones  
 coërcitis gentibus, restituerat Philippus, incepto  
 forti, non prospero solum eventu. Minuit deinde  
 ei forte oblata res hostium Ætolorum numerum.  
 Scopas princeps gentis, ab Alexandria magno cum  
 pondere auri ab rege Ptolemæo missus, sex millia  
 peditum et equites mercede conductos Ægyptum Ætolorum  
 avexit: nec ex juventute Ætolorum quemquam re- juventus in  
 liquisset, ni Damocritus, nunc belli, quod instaret, avecta.  
 nunc futuræ solitudinis admonens, (incertum cura  
 gentis, au ut adversaretur Scopæ, parum donis cul-  
 tus) partem juniorum castigando domi continuiss-  
 set. Hæc ea æstate ab Romanis Philippoque gesta  
 erant.

XLIV. Classis a Coreyra ejusdem principio æsta- Res mari-  
 tis cum L. Apustio legato profecta, Malea superata, gestæ.  
 circa Scyllæum agri Hermionici Attalo regi con-  
 juncta est. Tum vero Atheniensium civitas, cui  
 odio in Philippum per metum jam diu moderata  
 erat, id omne in auxilii præsentis spem effudit: nec  
 unquam ibi desunt linguæ promtæ ad plebem con-  
 citandam: quod genus, quum in omnibus liberis  
 civitatibus, tum præcipue Athenis, ubi oratio pluri-  
 mum pollet, favore multitudinis alitur. Rogatio-  
 nem extemplo tulerunt, plebesque scivit, ut Philippi Decreta A-  
 theniensis statuæ, imagines omnes, nominaque earum, item majo- theniensis  
 rum in Phi- lippum.

**U. C. 552.** *rum ejus virilis ac muliebris sexus omnium tollerentur,*  
**A. C. 200.** *delerenturque: dies festi, sacra, sacerdotes, quæ ipsius majorumve ejus honoris caussa instituta essent, omnia profanarentur. Loca quoque, in quibus positum aliquid inscriptumve honoris ejus caussa fuisse, detestabilia esse, neque in iis quidquam postea poni dedicarique placere eorum, quæ in loco puro poni dedicarique fas esset. Sacerdotes publicos, quotiescumque pro populo Atheniensi, sociisque, et exercitibus, et classibus eorum precarentur, toties detestari atque execrari Philippum, liberos ejus, regnumque, terrestres navalesque copias, Macedonum genus omne nomenque. Additum decreto, Si quis quid postea, quod ad notam ignominiamque Philippi pertineret, ferret, id omne populum Atheniensem jussurum: si quis contra ignominiam, prope honore ejus dixisset, fecissetve, qui occidisset eum, jure cæsurum. Postremo inclusum, Ut omnia, quæ adversus Pisistratidas decreta quondam erant, eadem in Philippo servarentur. Athenienses quidem literis verbisque, quibus solis valent, bellum adversus Philippum gerebant.*

**XLV.** Attalus Romanique, quum Piræum primo ab Hermione petissent, paucos ibi morati dies, oneratique æque inmodicis ad honores sociorum, atque in ira adversus hostem fuerant, Atheniensium decretis, navigant a Piræo Andrum: et quum in portu, quem Gaureleon vocant, constitissent, missis, qui tentarent oppidanorum animos, si voluntate tradere urbem, quam vim experiri, mallent; postquam præsidio regio arcem teneri, nec se potestatis suæ esse respondebant; expositis copiis, omnique adiparatu urbium obpugnandarum, diversis partibus rex et legatus Romanus ad urbem subeunt. Plus ali-

quanto Græcos Romana signa armaque non ante U. C. 552.  
 visa animique militum, tam promte succedentium A. C. 200.  
 muros, terruere. Itaque fuga extemps in arcem Andros  
 facta est: urbe hostes potiti: et in arce quum bi- capta a Ro-  
 dum loci se magis, quam armorum, fiducia tenuis- manis.  
 sent, tertio die pacti ipsi præsidiumque, ut cum sin-  
 gulis vestimentis Delium Bœot'æ transvehementur.  
 Ea ab Romanis regi Attalo concessa: prædam or-  
 namentaque urbis ipsi avexerunt. Attalus, ne de-  
 sertam haberet insulam, et Macedonum fere omnibus,  
 et quibusdam Andriorum, ut manerent, persua-  
 sit: postea et ab Delio, qui ex pacto transvecti eo  
 fuerant, promissis regis, quum desiderium quoque  
 patriæ facilius ad credendum inclinaret animos, re-  
 vocati. Ab Andro Cythnum trajecerunt: ibi dies  
 aliquot obpugnanda urbe nequidquam absumti: et,  
 quia vix operæ pretium erat, abscessere. Ad Pra-  
 sias (continentis Atticæ is locus est) Issæorum vi-  
 ginti lembi classi Romanorum adjuncti sunt: ii  
 missi ad populandos Carystiorum agros: cetera  
 classis Geræstum, nobilem Eubœæ portum, dum a  
 Carysto Issæi redirent, tenuit. Inde omnes, velis in  
 altum datis, maris medio præter Scyrum insulam  
 Icum pervenere: ibi paucos dies, sæviente Boreæ,  
 retenti; ubi prima tranquillitas data est, Sciathum  
 trajecere, vastatam urbem direptamque nuper a Phi-  
 lippo. Per agros palati milites frumentum, et si  
 qua alia usui esse ad vescendum poterant, ad naves  
 retulere: prædæ nec erat quidquam, nec meruerant  
 Græci, cur diriperentur. Inde Cassandream peten-  
 tes, primo ad Mendin, maritimum civitatis ejus vi-  
 cum, tenuere: inde quum, superato promontorio,  
 ad ipsa mœnia urbis circumagere classem vellent,

U. C. 552. *sæva coorta tempestate, prope obruti fluctibus, dis-*  
 A. C. 200. *persi, magna ex parte amissis armamentis, in ter-*  
*ram effugerunt. Omen quoque ea maritima tem-*  
*pestas ad rem terra gerendam fuit: nam, conlectis*  
*in unum navibus, expositisque copiis, adgressi ur-*  
*bem, cum multis vulneribus repulsi, (et erat vali-*  
*dum ibi regium præsidium) irrito incepto regressi*  
*Canastræum Pallenæ trajecere: inde, superato To-*  
*ronæ promontorio, navigantes Acanthum petiere.*  
*Ibi primo ager vastatus, deinde ipsa urbs vi capta*  
*ac direpta: nec ultra progressi (jam enim et graves*  
*præda naves habebant) retro, unde venerant, Scia-*  
*thum, et ab Sciatho Eubœam repetunt.*

Conloqui-  
um Æto-  
lorum  
cum At-  
talo et Ro-  
manis.

XLVI. Ibi relicita classe, decem navibus expedi-  
 tis sinum Maliacum intravere, ad conloquendum  
 cum Ætolis de ratione gerendi belli. Sipyrricas  
 Ætolus princeps legationis ejus fuit, quæ ad com-  
 municanda consilia Heracleam cum rege et cum  
 Romano legato venit. Petitum ex foedere ab Attalo  
 est, ut mille milites præstaret: tantum enim nume-  
 rum bellum gerentibus adversus Philippum debebat.  
 Id negatum Ætolis: quod illi quoque gravati prius  
 essent ad populaudam Macedoniam exire, quo tem-  
 pore, Philippo circa Pergamum urente sacra pro-  
 fanaque, abstrahere eum inde respectu rerum sua-  
 rum potuissent. Ita Ætolii cum spe magis, Roma-  
 nis omnia pollicentibus, quam cum auxilio dimissi.  
 Apustius cum Attalo ad classem rediit. Inde con-  
 sultari de Oreo obpugnando cœptum. Valida ea  
 civitas et mœnibus, et, quia ante fuerat tentata,  
 firmo erat præsidio. Conjunxerant se iis post ex-  
 pugnationem Andri cum præfecto Agesimbroto vi-  
 ginti Rhodiæ naves, tectæ omnes: eam classem in

stationem ad Zelasium miserunt, (Isthmiæ id super U. C. 552. Demetriadem promontorium est peropportune ob- A. C. 200. jectum) ut, si quid inde moverent Macedonum na- ves, in præsidio essent. Heraclides præfetus re- gius classem ibi tenebat, magis per occasionem, si quam negligentia hostium dedisset, quam aperta vi quidquam ausurus. Oreum diversi Romani et rex Oreum ob- Attalus obpugnabant: Romani a maritima arce, regii adversus vallem inter duas jacentem arces, qua et muro intersepta urbs est. Et ut loca diversa, sic dispari modo etiam obpugnabant: Romani testu- dinibus, et vineis, et ariete admovendo muris: regii ballistis, catapultisque, et alio omni genere tormentorum tela ingerentes: et pondere ingenti saxa jaciebant, et cuniculos, et quidquid aliud priore ob- pugnatione expertum profuerat. Ceterum non plu- res tantum Macedones, quam ante, tuebantur urbem arcesque, sed etiam præsentioribus animis, et, castigationibus regis in adiuissa culpa, simul mina- rum, simul promissionum in futurum memores, ita ut parum in expugnatione celeri spei esset. Interim et aliud agi posse ratus legatus, relictis, quot satis videbantur ad opera perficienda, militibus, trajicit in proxima continentis: Larissamque (non illam ir Thessalia nobilem urbem, sed alteram, quam Cre- masten vocant) subito adventu, præter arcem, cepit. Attalus quoque Ægeleon, nihil minus quam tale quidquam in alterius obpugnatione urbis timenti- bus, obpressit. Et jam quum opera in effectu erant circa Oreum, tum præsidium, quod intus erat, la- Capitur. bore adsiduo, vigiliis diurnis pariter nocturnisque, et vulneribus confectum. Muri quoque pars, ariete incusso subruta, multis jam locis prociderat: per-

U. C. 552. que apertum ruina iter nocte Romani, quodque su-  
 A. C. 200. per portum est, in arcem perruperunt. Attalus luce  
 prima, signo ex arce dato ab Romanis, et ipse ur-  
 bem invasit, stratis magna ex parte muris: præsi-  
 dium oppidanique in alteram arcem perfugere, unde  
 biduo post deditio facta: urbs regi, captiva corpora  
 Romanis cessere.

XLVII. Jam autumnale æquinoctium instabat:  
 et est sinus Euboicus, quem Cœla vocant, suspectus  
 nautis: itaque, ante hiemales motus evadere inde  
 cupientes, Piræum, unde profecti ad bellum erant,  
 repetunt. Apustius, triginta navibus ibi relictis,  
 super Maleam navigat Coreyram. Regem spatiū  
 Iuitiorum Cereris, ut sacrī interesset, tenuit: se-  
 cundum Initia et ipse in Asiam se recepit, Agesim-  
 bro et Rhodiis domum remissis. Hæc ea æstate  
 terra marique adversus Philippum sociosque ejus a  
 consule et legato Romanis, adjuvantibus rege Attalo  
 et Rhodiis, gesta. Consul alter C. Aurelius ad con-  
 fectum bellum quum in provinciam venisset, haud  
 clam tulit iram adversus prætorem, quod absente se  
 rem gessisset: missō igitur eo in Etruriam, ipse in  
 agrum hostium legiones induxit: populandoque,  
 cum præda majore, quam gloria, bellum gessit.  
 Aurelius tri-  
 cos. in  
 Gallia.  
 Furios tri-  
 umphum  
 petit.  
 L. Furios, simul quod in Etruria nihil erat rei,  
 quod gereret, simul Gallico triumpho inminens,  
 quem, absente consule irato atque invidente, faci-  
 lius impetrari posse ratus, Romam inopinato quum  
 vcnisset, senatum in æde Bellonæ habuit: exposi-  
 tisque rebus gestis, ut triumphanti sibi in urbem in-  
 velhi liceret, petit.

XLVIII. Apud magnam partem senatus et mag-  
 nitudine rerum gestarum valebat, et gratia. Majo-

res natu negabant triumphum, et quod alieno exer- U. C. 552.  
 citu rem gessisset, et quod provinciam reliquisset avidi- A. C. 200.  
 tate rapiendi per occasionem triumphi; id vero eum Variae sen-  
 nullo exemplo fecisse. Consulares præcipue, exspec- tentiæ in  
 tandem fuisse consulem, dicebant: potuisse enim cas-  
 tris, prope urbem positis, tutanda colonia, ita ut acie  
 non decerneret, in adventum ejus rem extrahere: et,  
 quod prætor non fecisset, senatui faciendum esse. Con-  
 sulem exspectarent: ubi coram disceptantes consulem et  
 prætorem audissent, verius de caussa existimaturos esse.  
 Magna pars senatus nihil præter res gestas, et an  
 in magistratu suisque auspiciis gessisset, censebant  
 spectare senatum debere. Ex duabus coloniis, quæ  
 velut claustra ad cohibendos Gallicos tumultus obpositæ  
 fuissent, quum una direpta et incensa esset, trajectu-  
 rumque id incendium, velut ex continentibus tectis, in  
 alteram tam propinquam coloniam esset, quid tandem  
 prætori faciendum fuisse? Nam, si sine consule geri  
 nihil oportuerit, aut senatum peccasse, qui exercitum  
 prætori dederit, (potuisse enim, si non cum prætoris,  
 sed consulis, exercitu rem geri voluerit, ita finire sena-  
 tusconsultum, ne per prætorem, sed per consulem, ge-  
 reretur,) aut consulem, qui non, quum exercitum ex  
 Etruria transire in Galliam jussisset, ipse Arimini ob-  
 currerit, ut bello interesset, quod sine eo geri fas non  
 esset. Non exspectare belli tempora moras et dilatio-  
 nes imperatorum: et pugnandum esse interdum, non  
 quia velis, sed quia hostis cogat. Pugnam ipsam  
 eventumque pugnæ spectari oportere: fusos cæsosque  
 hostes: castra capta ac direpta: coloniam liberatam  
 obsidione: alterius coloniæ captivos recuperatos resti-  
 tutosque suis: debellatum uno prælio esse. Non ho-  
 mines tantum ea victoria latacos, sed Diis quoque in-

*U. C. 552. mortalibus per triduum supplicationes habitas, quod  
A. C. 200. bene ac feliciter, non quod male ac temere, respublica  
a L. Furio prætore gesta esset. Data fato etiam quo-  
dam Furiæ genti Gallica bella.*

**XLIX.** Hujus generis orationibus ipsius amico-  
rumque victa est, præsentis gratia prætoris, absentis  
*Purius tri-* consulis majestas; triumphumque frequentes L. Fu-  
umphat. rio decreverunt. Triumphavit de Gallis in magis-  
tratu L. Furius prætor. In ærarium tulit trecenta  
viginti millia æris, argenti centum septuaginta mil-  
lia pondo: neque captivi ulli ante currum ducti,  
neque spolia prælata, neque milites secuti: omnia,  
præter victoriam, penes consulem esse adparebat.

Ludi deinde a P. Cornelio Scipione, quos consul in  
Decretum Africa voverat, magno adparatu facti. Et de agris  
de agris militum ejus decretum, ut, quot quisque eorum an-  
Scipionis. nos in Hispania aut in Africa militasset, in singulos

annos bina jugera acciperet: eum agrum decemviri  
adsignarent. Triumviri inde creati ad supplendum  
Venusinis colonorum numerum, quod bello Hanni-  
balis adtenuatæ vires ejus coloniæ erant, C. Teren-  
tius Varro, T. Quinctius Flamininus, P. Cornelius  
Cn. F. Scipio: hi colonos Venusiam adscripserunt.  
Eodem anno C. Cornelius Cethagus, qui proconsul  
Hispaniam obtinebat, magnum hostium exercitum  
in agro Sedetano fudit: quindecim millia Hispano-  
rum eo prælio dicuntur cæsa, signa militaria capta  
octo et septuaginta. C. Aurelius consul, quum ex  
provincia Romam comitiorum caussa venisset, non  
id, quod animis præceperant, questus est, *Non ex-  
spectatum se ab senatu, neque disceptandi cum prætore  
consuli potestatem factam: sed ita triumphum decresse  
senatum, ut nullius, nisi ejus, qui triumphaturus esset,*

*haud eorum, qui bello interfuerint, verba audiret.* U. C. 552.  
*Majores ideo instituisse, ut legati, tribuni militum,* A. C. 200.  
*centuriones, milites denique triumpho adessent; ut ve-*  
*ritas rerum gestarum ejus, cui tantus honos haberetur,*  
*publice videretur. Ecquem ex eo exercitu, qui cum*  
*Gallis pugnaverit, si non militem, lixum saltem fuisse,*  
*quem percunctari posset senatus, quid veri prætor va-*  
*nive referret?* Comitiis deinde diem edixit: quibus  
creati sunt consules **L. Cornelius Lentulus**, **P. Villius Tappulus**. **Prætores** inde facti **L. Quintius Flamininus**, **L. Valerius Flaccus**, **L. Villius Tappulus**, **Cn. Bæbius Tamphilus**.

**L. Annona** quoque eo anno pernihil fuit: frumenti vim magnam ex Africa advectam ædiles curules **M. Claudius Marcellus** et **Sex. Ælius Pætus** binis æris in modios populo divisorunt: et ludos Romanos magno adparatu fecerunt; diem unum instaurarunt: signa ænea quinque ex multaticio argento in ærario posuerunt. Plebeii ludi ab ædilibus **L. Terentio Massiliota** et **Cn. Bæbio Tamphilo**, quem prætorem designaverant, ter toti instaurati. Et ludi funebres eo anno per quatriduum in foro, mortis **M. Valerii Lævini** caussa, a **P.** et **M.** filiis ejus facti: et munus gladiatorium datum ab iis: paria quinque et viginti pugnarunt. **M. Aurelius Cotta**, decemvir sacerorum, mortuus: in ejus locum **M'. Acilius Glabrio** subiectus. Comitiis ædiles curules creati sunt forte ambo, qui statim occipere magistratum non possent: nam **C. Cornelius Cethegus** absens creatus erat, quum Hispaniam obtineret provinciam; **C. Valerius Flaccus**, quem præsentem creaverant, quia flamen Dialis erat, jurare in leges non poterat: magistratum autem plus quin-

**U. C. 552.** que dies, nisi qui jurasset in leges, non licebat ge-  
**A. C. 200.** rere. Petente Flacco, ut legibus solveretur, sena-  
tus decrevit, ut, si ædilis, qui pro se juraret, arbit-  
ratu consulum daret, consules, si eis videretur,  
cum tribunis plebis agerent, uti ad plebem ferrent.  
Datus, qui juraret pro fratre, **L. Valerius Flaccus**,  
prætor designatus: tribuni ad plebem tulerunt, ple-  
besque scivit, ut perinde esset, ac si ipse ædilis ju-  
rasset. Et de altero ædile scitum plebis est factum,  
rogantibus tribunis, quos duos in Hispaniam cum  
imperio ad exercitus ire juberent, ut **C. Cornelius**  
ædilis curulis ad magistratum gerendum veniret, et  
**L. Manlius Acidinus** decederet de provincia multos  
post annos: plebes **Cn. Cornelio Lentulo** et **L. Ster-  
tinio** pro consulibus imperium esse in Hispania jus-  
sit.

---

## EPITOME LIBRI XXXII.

---

**C**Omplura prodigia ex diversis regionibus nunciata referuntur: inter quæ, in Macedonia in puppi longæ navis lauream esse natam. T. Quinctius Flamininus consul adversus Philippum feliciter pugnavit in fauibus Epiri, fugatumque coëgit in regnum reverti. Ipse Thessaliam, quæ est vicina Macedoniae, sociis Ætolis et Athamanibus, vexavit. L. Quinctius Flamininus consulis frater, Attalo rege et Rhodiis adjuvantibus, in Eubœam et maritimam oram trajectus, Eretriam expugnavit. Achæi in amicitiam recepti sunt. Conjuratio servorum, facta de solvendis Karthaginensium obsidibus, obpressa est; duo millia necati sunt. Prætorum numerus ampliatus est, ut seni crearentur. Cornelius Cethegus consul Gallos Insubres prælio fudit. Cum Lacedæmoniis et tyranno eorum Nabide amicitia juncta est. Præterea expugnationes urbium in Macedonia referuntur.

---

## T. LIVII PATAVINI

### LIBER XXXII.

---

U. C. 555. A. C. 199. **C**ONSULES prætoresque, quum Idibus Martiis  
magistratum inissent, provincias sortiti sunt.  
L. Cornelio Lentulo Italia, P. Villio Macedonia;  
prætoribus, L. Quinctio urbana, Cn. Bæbio Arimi-  
num, L. Valerio Sicilia, L. Villio Sardinia evenit.  
Lentulus consul novas legiones scribere jussus; Vil-  
lius a P. Sulpicio exercitum accipere: in supple-  
mentum ejus, quantum militum videretur, ut scri-  
beret, ipsi permissum. Prætori Bæbio legiones,  
quas C. Aurelius consul habuisset, ita decretæ, ut  
retineret eas, donec consul novo cum exercitu suc-  
cederet; in Galliam ubi is venisset, omnes milites  
exauctorati domum dimitterentur, præter quinque  
millia sociûm: his obtineri circa Ariminum provin-  
ciam satis esse. Prorogato imperio prætoribus prioris  
anni, (Cn. Sergio, ut militibus, qui in Hispania, Si-  
cilia, Sardinia stipendia per multos annos fecissent,  
agrum adsignandum curaret; Q. Minucio, ut in  
Bruttiis idem de conjurationibus quæstiones, quas  
prætor cum fide curaque exercuisset, perficeret; et  
eos, quos sacrilegii compertos in vinculis Romam  
misisset, Locros nitteret ad supplicium; quæque  
sublata ex delubro Proserpinæ essent, reponenda

cum piaculis curaret) feriae Latinæ pontificum de U. C. 558.  
creto instauratae sunt; quod legati ab Ardea questi A. C. 199.  
in senatu erant, sibi in monte Albano Latinis car-  
nem, ut adsolet, datam non esse. Ab Suessa nunciatum est, duas portas, quodque inter eas muri erat,  
de cœlo tactum; et Formiani legati ædem Jovis,  
item Ostienses ædem Jovis, et Veliterni Apollinis et  
Sanci ædes, et in Herculis æde capillum enatum: et  
ex Bruttiis ab Q. Minucio proprætore scriptum,  
equuleum cum quinque pedibus, pullos gallinaceos  
tres cum ternis pedibus, natos esse. Inde a P. Sul-  
picio preconsule ex Macedonia literæ adlatæ, in  
quibus inter cetera scriptum erat, lauream in puppi  
navis longæ enatam. Priorum prodigiorum caussa  
senatus censuerat, ut consules majoribus hostiis, qui-  
bus Diis videretur, sacrificarent: ob hoc unum pro-  
digium aruspices in senatum vocati, atque ex re-  
sponso eorum supplicatio populo in diem unum edic-  
ta, et ad omnia pulvinaria res divinæ factæ.

II. Karthaginienses eo anno argentum in stipen- Karthagi-  
dium inpositum primum Romam advixerunt: id nienses pri-  
quia probum non esse quæstores renunciaverant, buti pen-  
experientibusque pars quarta decocta erat, pecunia sionem  
Romæ mutua sumta, intertrimentum argenti supple-  
verunt. Petentibus deinde, ut, si jam videretur se-  
natui, obsides sibi redderentur, centum redditii obsi- Obsidum  
des: de ceteris, si in fide permanerent, spes facta. pars iis  
Petentibus iisdem, qui non reddebantur obsides, ut reddita.  
ab Norba, ubi parum commode essent, alio traduce-  
rentur, concessum, ut Signiam et Ferentinum trans-  
irent. Gaditanis item potentibus remissum, ne præ-  
fectus Gades mitteretur, adversus quod iis, in fidem  
populi Romani venientibus, cum L. Marcio Septimo

U. C. 553. convenisset. Et Narniensium legatis, querentibus  
 A. C. 199. ad numerum sibi colonos non esse, et inmixtos quos-  
 dam non sui generis pro colonis se gerere, earum  
 rerum caussa tres viros creare L. Cornelius consul  
 jussus : creati P. et Sex. Ælii (Pætis fuit ambobus  
 cognomen) et C. Cornelius Lentulus : quod Narni-  
 ensibus datum erat, ut colonorum numerus cogere-  
 tur, id Cosani petentes non inpetraverunt.

**Seditio militum in Macedonia.**

III. Rebus, quæ Romæ agendæ erant, perfectis, consules in provincias profecti. P. Villium in Macedonia quum venisset, atrox seditio militum, jam ante irritata, nec satis in principio compressa, exceptit : duo millia ea militum fuere, qui ex Africa post devictum Hannibalem in Siciliam, inde anno fere post in Macedoniam pro voluntariis transportati erant : id voluntate factum negabant : *Ab tribunis recusantes in naves inpositos : sed utcumque, seu injuncta, seu suscepta foret militia, et eam exhaustam, et finem aliquem militandi fieri æquum esse.* *Multis annis sese Italiam non vidisse : consenuisse sub armis in Sicilia, Africa, Macedonia.* Confectos jam se labore, opere, exsangues tot acceptis vulneribus esse. Consul, caussam postulandæ missionis probabilem, si modeste peteretur, videri, dixit : *seditionis nec eam, nec ullam aliam satis justam caussam esse.* *Itaque si manere ad signa, et dicto parere velint, se de missione eorum ad senatum scripturum.* Modestia facilius, quam pertinacia, quod velint, inpetraturos.

Thauma-  
 cos frustra  
 tentatos  
 deserit  
 Philippus.

IV. Thaumacos eo tempore Philippus summa vi obpugnabat aggeribus vineisque ; et jam arietem muris admoturnus erat : ceterum incepto absistere eum coegerit subitus Ætolorum adventus, qui, Archidamo duce inter custodias Macedonum mœnia ingressi,

nec die, nec nocte finem ullum erumpendi, nunc in U. C. 553.  
 stationes, nunc in opera Macedonum, faciebant : et A. C. 199.  
 adiuvabat eos natura ipsa loci : namque Thaumaci  
 a Pylis sinuque Maliaco per Lamiam eunti loco alto  
 siti sunt, ipsis faucibus inminentes, quas Cœla vocant :  
 Thessaliæque transeunti confragosa loca implicatas-  
 que flexibus vallium vias, ubi ventum ad hanc urbem  
 est, repente, velut maris vasti, sic inmensa panditur  
 planities, ut subjectos campos terminare oculis haud  
 facile queas. Ab eo miraculo Thaumaci adpellati :  
 nec altitudine solum tuta urbs, sed quod, saxo undi-  
 que absciso, rupibus inposita est. Hæ difficultates,  
 et quod haud satis dignum tanti laboris periculique  
 pretium erat, ut absisteret incepto Philippus, effece-  
 runt : hiems quoque jam instabat, quum inde abs-  
 cessit, et in Macedoniam in hiberna copias reduxit.

V. Ibi ceteri quidem, data quantacumque quiete Philippi  
 temporis, simul animos corporaque remiserant. Phi- curæ et  
 lippum quantum ab adsiduis laboribus itinerum pug- anxietas.  
 narumque laxaverat annus, tanto magis intentum in  
 universum eventum belli curæ angunt, non hostes  
 modo timentem, qui terra marique urgebant ; sed  
 nunc sociorum, nunc etiam popularium animos, ne  
 et illi ad spem amicitiae Romanorum deficerent, et  
 Macedonas ipsos cupido novandi res caperet : itaque  
 et in Achaiam legatos misit, simul qui jusjurandum  
 (ita enim pepigerant, quotannis juratueros in verba  
 Philippi) exigerent ; simul qui redderent Achæis  
 Orchomenon, et Heræam, et Triphyliam ; Eleis  
 Alipheram, contendentibus, numquam eam urbem  
 fuisse ex Triphylia, sed sibi debere restitui, quia una  
 esset ex iis, quæ ad condendam Megalopolim et con-  
 cilio Arcadum contributæ forent. Et cum Achæis

U. C. 553. quidem per hæc societatem firmabat. Macedonum  
 A. C. 199. animos sibi conciliavit cum Heraclide: nam quum eum maximæ invidiæ sibi esse cerneret, multis crimibus oneratum in vincula conjecit, ingenti popularium gaudio. Bellum, si quando umquam ante alias, tum magna cura adparavit, exercuitque in armis et Macedonas, et mercenarios milites: principioque veris cum Athenagora omnia externa auxilia, quodque levis armaturæ erat, in Chaoniam per Epirum ad occupandas, quæ ad Antigoneam fauces sunt, (Stena vocant Græci) misit. Ipse post paucis diebus graviore secutus agmine, quum situm omnem regionis adspexisset, maxime idoneum ad munien-

*Castra ad Aoum ponit.* dum locum credidit esse præter amnem Aoum: is inter montes, quorum alterum Æropuni, alterum Asnaum incolæ vocant, angusta valle fluit, iter exiguum super ripam præbens. Asnaum Athenagoram cum levi armatura tenere ac communire jubet: ipse in Æropo posuit castra. Qua abscisæ rupes erant, statio paucorum armatorum tenebat; quæ minus tuta erant, alia fossis, alia vallis, alia turribus munita erant. Magna tormentorum etiam vis, ut missilibus procul arcerent hostem, idoneis locis disposita est: tabernaculuni regium pro vallo, in conspecto maxime tumulo, ut terrorem hostibus, suisque spem ex fiducia faceret, positum.

*Consul mox adest.*

VI. Consul, per Charopum Epirotæ certior factus, quos saltus cum exercitu insedisset rex, et ipse, quum Coreyræ hibernasset, vere primo in continentem trajectus, ad hostem ducere pergit: quinque millia ferme ab regiis castris quum abesset, loco munito relictis legionibus, ipse cum expeditis progressus ad speculanda loca, postero die consilium

habuit, utrum per insessum ab hoste saltum, quam- U. C. 553.  
 quam labor ingens periculumque proponeretur, trans- A. C. 199.  
 itum tentaret; an eodem itinere, quo priore anno  
 Sulpicius Macedoniam intraverat, circumducet co-  
 pias. Hoc consilium per multos dies agitanti nun-  
 cius venit, T. Quinctium consulem factum, sortitam-  
 que provinciam Macedoniam, maturato itinere jam  
 Corcyram trajecisse. Valerius Antias intrasse, sal-  
 tum Villium tradit, quia recto itinere nequierit, om-  
 nibus a rege insessis, secutum vallem, per quam me-  
 dia in fertur Aous ananis; ponte raptim facto, in ri-  
 pam, in qua erant castra regia, transgressum acie  
 conflixisse: fusum fugatumque regem, castris exu-  
 tum: duodecim millia hostium eo p̄oelio c̄esa, capta  
 duo millia et ducentos, et signa militaria centum  
 triginta duo, equos ducentos triginta: ædem etiam  
 Jovi in eo p̄oelio votam, si res prospere gesta esset.  
 Ceteri Græci Latinique auctores, quorum quidem  
 ego legi annales, nihil memorabile a Villio actum,  
 integrumque bellum insequentem consulem T. Quinc-  
 tium accepisse tradunt.

VII. Dum hæc in Macedonia geruntur, consul  
 alter L. Lentulus, qui Romæ substiterat, comitia  
 censoribus creandis habuit. Multis claris potentibus  
 viris, creati censores P. Cornelius Scipio Africanus  
 et P. Ælius Paetus: hi, magna inter se concordia,  
 et senatum sine ullius nota legerunt, et portoria ve-  
 naliū Capuæ Puteolisque, item Castrorum porto-  
 rium, quo in loco nunc oppidum est, fruendum loca-  
 runt: colonosque eo trecentos (is enim numerus fi-  
 nitus ab senatu erat) adscripserunt, et sub Tifatis  
 Capuæ agrum vendiderunt. Sub idem tempus L.  
 Manlius Acidinus, ex Hispania decedens, prohibitus

U. C. 553. a P. Porcio Læca tribuno plebis, ne ovans rediret,  
A. C. 199.

quum ab senatu inpetrasset, privatus urbem ingrediens mille ducenta pondo argenti, triginta pondo ferme auri in ærarium tolit. Eodem anno Cn. Bæbius Tamphilus, qui ab C. Aurelio consule anni prioris provinciam Galliam acceperat, temere ingressus Gallorum Insubrium fines, prope cum toto

Cn. Bæbius exercitu est circumventus: supra sex millia et sexcircumven-tus a Gallis. centos milites amisit: tanta ex eo bello quod jam

timeri desierat, clades accepta est. Ea res L. Lentulum consulem ab urbe excivit: qui, ut in provinciam venit plenam tumultus, trepido exercitu accepto, prætorem multis probris increpitum provincia dededere, atque abire Romam jussit. Neque ipse consul memorabile quidquam gessit, comitiorum caussa Romam revocatus; quæ ipsa per M. Fulvium et

M'. Curium tribunos plebis impediebantur, quod T. Quinctius Flamininus consulatum ex quæstura petere non patiebantur. Jam ædilitatem præturamque fastidiri: nec per honorum gradus, documentum suidantes, nobiles homines tendere ad consulatum, sed transcendendo media, summa imis continuare. Res ex campestri certainine in senatum venit. Patres censuerunt, Qui honorem, quem sibi capere per leges liceret, peteret, in eo populo creandi, quem velit, potestatem fieri æquum esse. In auctoritate Patrum fuisse tribuni. Creati consules Sex. Ælius Pætus et T. Quinctius Flamininus. Inde prætorum comitia habita: creati L. Cornelius Merula, M. Claudius Marcellus, M. Porcius Cato, C. Helvius, qui ædiles plebis fuerant: ab iis ludi plebeii instaurati: et epulum Jovis fuit ludorum caussa. Et ab ædilibus curulibus C. Valerio Flacco flamme Diali et C. Cor-

T. Quinc-tius ex  
quæstura  
consul.

nelio Cethego ludi Romani magno adparatu facti. U. C. 553.  
 Ser. et C. Sulpicii Galbae pontifices eo anno mortui A. C. 199.  
 sunt: in eorum locum M. Æmilius Lepidus et Cn.  
 Cornelius Scipio pontifices subfecti sunt.

VIII. Sex. Ælius Pætus, T. Quinctius Flamininus U. C. 554.  
 consules, magistratu inito, senatum in Capitolio A. C. 198.  
 quum habuissent, decreverunt Patres, *ut provincias*  
*Macedoniam atque Italiam consules comparent inter*  
*se, sortirenturve. Utri eorum Macedonia evenisset, in*  
*supplementum legionum tria millia militum Romanorum*  
*scriberet, et trecentos equites: item sociorum La-*  
*tini nominis quinque millia peditum, quingentos equites.*  
 Alteri consuli novus omnis exercitus decretus. L.  
 Lentulo prioris anni consuli prorogatum imperium  
 est; vetitusque aut ipse provincia decedere prius,  
 aut veterem exercitum deducere, quam cum legioni-  
 bus novis consul venisset. Sortiti consules provin-  
 cias: Ælio Italia, Quinctio Macedonia evenit. Præ-  
 tores, L. Cornelius Merula urbanam, M. Claudius  
 Siciliam, M. Porcius Sardiniam, C. Helvius Galliam  
 est sortitus. Delectus inde haberi est cœptus: nam,  
 præter consulares exercitus, prætores quoque jussi  
 scribere milites erant. Marcello in Siciliam quatuor  
 millia peditum socium Latini nominis, et trecentos  
 equites; Catoni in Sardiniam ex eodem genere mili-  
 tum tria millia peditum, ducentos equites: ita ut hi  
 prætores ambo, quum in provincias venissent, veteres  
 dimitterent pedites equitesque. Attali deinde regis Attali lega-  
 tos in senatum consules introduxerunt. Hi, <sup>ti</sup> senatum  
 regem classe sua copiisque omnibus terra marique  
 Romanam rei juvare, quæque imperarent Romani  
 consules, impigre atque obedienter ad eam diem fe-  
 cissee, quum exposuissent, Vereri, dixerunt, ne id  
 adeunt.

U. C. 554. *præstare ei per Antiochum regem ultra non liceret:*  
 A. C. 198. *vacuum namque præsidiis navalibus terrestribusque regnum Attali Antiochum invasisse. Itaque Attalum orare Patres conscriptos, si sua classe, suaque opera uti ad Macedonicum bellum vellent, mitterent ipsi præsidium ad regnum ejus tutandum: si id nollent, ipsum ad sua defendenda cum classe ac reliquis copiis redire patet.*  
*Responsum rentur. Senatus legatis ita responderi jussit, Quod senatus.* *rex Attalus classe copiisque aliis duces Romanos juvisset, id gratum senatui esse. Auxilia nec ipsos missuros Attalo adversus Antiochum, socium et amicum populi Romani: nec Attali auxilia retenturos, ultra quam regi commodum esset. Semper populum Romanum alienis rebus, arbitrio alieno, usum: et principium et finem in potestate ipsorum, qui ope sua velint adjutos Romanos, esse. Legatos ad Antiochum missuros, qui nuncient, Attali naviumque ejus et militum opera adversus Philippum communem hostem uti populum Romanum. Gratum eum facturum et senatui, si regno Attali abstineat, belloque absistat. Æquum esse, socios et amicos populi Romani reges inter se quoque ipsos pacem servare.*

IX. Consulem T. Quintium, ita habito delectu, ut eos fere legeret, qui in Hispania aut Africa meruissent spectatae virtutis milites, properantem in provinciam prodigia nunciata atque eorum procuratio Romæ tenuerunt. De cœlo tacta erant via publica Veiis, forum et ædes Jovis Lanuvii, Herculis ædes Ardeæ, Capuæ murus et turres et ædes, quæ Alba dicitur: cœlum ardere visum erat Arretii: terra Velitræ trium jugerum spatio caverna ingenti desiderat. Suessæ Auruncæ nunciabant agnum cum duobus capitibus natum, et Sinuessæ porcum humano capite.

Eorum prodigiorum caussa supplieatio unum diem U.C. 554.  
habita: et consules rebus divinis operam dederunt. A.C. 198.  
placatisque Diis, profecti in provincias sunt. Ælius Ælius cof.  
cum C. Helvio prætore in Galliam: exerceitumque ab it in Ga-  
liam.

L. Lentulo acceptum, quem dimittere debebat, præ-  
tori tradidit; ipse novis legionibus, quas secum ad-  
duxerat, bellum gesturus: neque memorabilis rei  
quidquam gessit. Et T. Quinctius alter consul ma- Quintcius  
turius, quam priores soliti erant consules, a Brun- in Mace-  
disio quum transmisisset, Coreyram tenuit cum octo doniam.  
millibus peditum, equitibus octingentis. Ab Cor-  
cyra in proxima Epiri quinqueremi trajecit: et in  
castra Romana magnis itineribus contendit; iude  
Villio dimisso, paucos moratus dies, dum se copiæ  
ab Coreyra adsequerentur, consilium habuit, utrum  
recto itinere per castra hostium vim facere conare-  
tur: an, ne tentata quidem re tanti laboris ac peri-  
culi, per Dassaretios potius Lycumque tuto circuitu  
Macedoniam intraret. Vieissetque ea sententia, ni  
timuisset, ne, quum a mari longius recessisset, misso  
e manibus hoste, si (quod antea fecerat) solitudini-  
bus silvisque se tutari rex voluisse, sine ullo effectu  
ætas extraheretur. Uteunique esset igitur, illo ipso  
tam iniquo loco adgredi hostem placuit: sed magis  
fieri id placebat, quam, quomodo fieret, satis expe-  
diebat.

X. Dies quadraginta sine ullo conatu sedentes in Consulis et  
conspictu hostium absumserant. Inde spes data Philippi  
Philippo est, per Epirotarum gentem tentandæ pa- conlo-  
cis: habitoque consilio delecti ad eam rem agendam,  
Pausanias prætor, et Alexander magister equitum,  
consulem et regem, ubi in artissimas ripas Aous co-  
gitur amnis, in conloquium adduxerunt. Summa

U. C. 554. postulatorum consulis erat, præsidia ex civitatibus  
 A. C. 198. rex deduceret: iis, quorum agros urbesque popula-  
 tus esset, redderet res, quæ comparerent: ceterorum  
 æquo arbitrio æstimatio fieret. Philippus aliam ali-  
 arum civitatum conditionem esse respondit. Quas  
 ipse cepisset, eas liberaturum. Quæ sibi traditæ a ma-  
 joribus essent, earum hæreditaria ac justa possessione  
 non excessurum: si quas quererentur belli clades eæ ci-  
 vitates, cum quibus bellatum foret; arbitrio, quo vel-  
 lent, populorum, cum quibus pax utrisque fuisse, se  
 usurum. Consul, Nihil ad id quidem arbitro aut ju-  
 dice opus esse, dicere. Cui enim non adparere, ab eo,  
 qui prior arma intulisset, injuriam ortam? nec Philip-  
 pum ab ullis bello lacessitum, ipsum priorem vim omni-  
 bus fecisse. Inde quum ageretur, quæ civitates libe-  
 randæ essent, Thessalos primos omnium nominavit  
 consul: ad id vero adeo accensus indignatione est  
 Irrito eventu.  
 rex, ut exclamaret, *quid victo gravius imperares, T. Quinti?* atqne ita se ex conloquio proripuit: et  
 temperatum ægre est, quin missilibus, quia diremi  
 medio amni fuerant, pugnam inter se consererent.  
 Postero die per excursiones ab stationibus primo in  
 planicie, satis ad id patentí, multa levia commissa  
 prælia sunt: deinde recipientibus se regiis in arta  
 et confragosa loca, aviditate accensi certaminis eo  
 quoque Romani penetravere. Pro his ordo, et mi-  
 litaris disciplina, et genus armorum erat, aptum ur-  
 gendis regiis: pro hoste loca, et catapultæ ballistæ-  
 que, in omnibus prope rupibus, quasi in muris, dis-  
 positæ. Multis hinc atque illinc vulneribus acceptis,  
 quum etiam, ut in prælio justo, aliquot cecidissent,  
 nox pugnæ finem fecit.

XI. Quum in hoc statu res esset, pastor quidam,

a Charopo principe Epirotarum missus, deducitur ad U. C. 554.  
 consulem. Is se in eo saltu, qui regiis tunc oneratus A. C. 198.  
*castris erat, armentum pascere ait: omnes montium* A pastore  
*eorum amfractus callesque nosse. Si secum aliquos* via ostendit  
*mittere velit, non iniquo nec perdifficili aditu supra* Quintcio.  
*caput hostium deducturum. Hæc, Charopus renun-*  
*cari jubet, ita crederet, ut suæ potius omnia, quam*  
*illius, potestatis essent. Quum magis vellet credere,*  
*quam auderet, consul, mixtumque gaudio ac metu*  
*animum gereret, auctoritate motus Charopi, experiri*  
*spem oblatam statuit: et, ut averteret rem a suspi-*  
*cione, biduo insequenti laccessere hostem, dispositis*  
*ab omni parte copiis, succendentibusque integris in*  
*locum defessorum, non destitit. Quatuor millia*  
*inde lecta peditum et trecentos equites tribuno mili-*  
*tum tradit. Equites, quoad loca patientur, ducere*  
*jubet: ubi ad invia equiti ventum sit, in planicie*  
*aliqua locari equitatum; pedites, qua dux monstra-*  
*ret viam, ire: ubi, ut polliceretur, super caput hos-*  
*tium perventum sit, fumo dare signum: nec ante*  
*clamorem tollere, quam ab se signo accepto pugnam*  
*cœptam arbitrari posset. Nocte itinera fieri jubet,*  
*(et pernox forte luna erat) interdiu cibi quietisque*  
*sumeret tempus: ducem promissis ingentibus onera-*  
*tum, si fides exstet, vincum tamen tribuno tradit.*  
*His copiis ita dimisis, eo intentius Romanus undi-*  
*que instat capi stationes.*

XII. Interim die tertio quum verticem, quem pe- Quintcius  
 tierant, Romani cepisse ac tenere se fumo significa- gte atur  
 rent; tum vero, trifariam divisis copiis, consul valle Philippum.  
 media cum militum robore succedit: cornua dextra  
 levaque admovet castris: nec segnus hostes obviam  
 eunt: et, dum, aviditate certaminis proiecti, extra

U.C. 554. munitiones pugnant, hand paullo superior est Ro-

A.C. 198. manus miles, et virtute, et scientia, et armorum ge-  
nere. Postquam, multis vulneratis interfectisque,

A tergo Romani regios invadunt et fugant. recepero se regii in loca, aut munimento, aut natura  
tuta, verterat periculum in Romanos, temere in loca  
iniqua, nec faciles ad receptum angustias progres-  
sos: neque in puncta temeritate inde receperissent sese,

ni clamor primum ab tergo auditus, dein pugna-  
etiam cœpta, amentes repente terrore regios fe-  
cisset. Pars in fugam effusi sunt: pars magis, quia  
locus fugæ deerat, quam quod animi satis esset ad  
pugnam, quum substitissent, ab hoste, et a fronte et  
ab tergo urgente, circumventi sunt. Deleri totus  
exercitus potuit, si fugientes persecuti victores es-  
sent: sed equitem angustiæ locorumque asperitas,  
peditem armorum gravitas impediit. Rex primo  
effuse ac sine respectu fugit: dein, quinque millium  
spatium progressus, quum ex iniuitate locorum, id  
quod erat, suspicatus esset, sequi non posse hostem,  
substitit in tumulo quodam, dimisitque suos per  
omnia juga vallesque, qui palatos in unum conlige-  
rent. Non plus duobus millibus hominum amissis,  
cetera omnis multitudo, velut signum aliquod secuta,

Rex in Thessali- am fugit. in unum quum convenisset, frequenti agmine petunt  
Thessaliam. Romani, quoad tutum fuit inseuti,  
cædentes spoliantesque cæsos, castra regia, etiam  
sine defensoribus difficile aditu, diripiunt: atque ea  
nocte in suis castris manserunt.

Sequitur consul. XIII. Postero die consul per ipsas angustias, qua-  
se inter valles flumen insinuat, hostem sequitur. Rex  
primo die ad Castra Pyrrhi pervenit: locus, quem  
ita vocant, est in Triphylia terræ Melotidis: inde  
postero die (ingens iter agminis, sed metus urget)

in montem Lingon perrexit: ipsi montes Epiri sunt, U. C. 554.  
 interjeti Macedoniae Thessaliæque. Latus, quod A. C. 198.  
 vergit in Thessaliam, oriens spectat: septentrio a  
 Macedonia objicitur. Vestiti frequentibus silvis  
 sunt: juga summa campos patentes aquasque per-  
 ennes habent. Ibi, stativis, rex, per aliquot dies  
 habitis, fluctuatus animo est, utrum protinus in reg-  
 num se reciperet, an reverti in Thessaliam posset:  
 inclinavit sententia, suum in Thessalam agmen de-  
 mittere, Triccamque proximis limitibus petit: inde  
 obvias urbes raptim peragravit. Homines, qui sequi  
 possent, sedibus excibat: oppida incendebat: rerum  
 suarum, quas possent, ferendarum secum dominis  
 jus fiebat: cetera militis præda erat: nec, quod ab  
 hoste crudelius pati possent, reliqui quidquam fuit,  
 quam quæ ab sociis patiebantur. Hæc etiam fa-  
 cienti Philippo acerba erant, sed e terra, mox futura  
 hostium, corpora saltem eripere sociorum volebat:  
 ita evastata sunt oppida, Phacium, Iresiae, Euhydri-  
 um, Eretria, Palæpharus. Pheras quum peteret, ex-  
 clusus, quia res egebat mora, si expugnare vellet,  
 nec tempus erat, omissso incepto, in Macedoniam  
 transcendit. Nam etiam Ætolos adpropinquare fama  
 erat: qui, audito prælio, quod circa annum Aouim  
 factum erat, proximis prius evastatis circa Sperchias  
 et Macran (quam vocant) Comen, transgressi inde in  
 Thessaliam, Cymines et Angeas primo inpetu potiti  
 sunt: a Metropoli, dum vastant agros, concursu  
 oppidanorum ad tuenda mœnia facto, repulsi sunt.  
 Callithera inde adgressi, similem inpetum oppidanorum  
 pertinacius sustinuerunt: compulsisque intra  
 mœnia, qui eruperant, contenti ea victoria, quia  
 spes nulla admodum expugnandi erat, abscesserunt.

U.C. 554. Theuma inde et Calathana vicos expugnant diripi-

A.C. 198. untque. Acharras per deditonem receperunt. Xyniæ simili metu a cultoribus desertæ sunt. Hoc sedibus suis extorre agmen in præsidium incidit, quod Athamanum, quo tutior frumentatio esset, ducebatur: incondita inermisque multitudo, mixta inbelli turba, ab armatis cæsa est. Xyniæ desertæ diripiuntur. Cyphara inde Ætoli capiunt, opportune Dolopiæ innuinens castellum. Hæc raptim intra paucos dies ab Ætolis gesta. Nec Amynander atque Athamanes, post fānam prosperæ pugnæ Romano-rum, quieverunt.

Amynandri res gestæ. XIV. Ceterum Amynander, quia suo militi arum

fidebat, petito ab consule modico præsidio, quum Gomphos peteret, oppidum protinus nomine Phecam, situm inter Gomphos faucesque angustas, quæ ab Athamania Thessaliam dirimunt, vi cepit: inde Gomphos adortus, et per aliquot dies summa vi urbem tuentes, quum scalas ad mœnia erexisset, eodenī metu perpulit ad deditonem. Hæc traditio Gomphorum ingentem terrorem Thessalis intulit: dederū deinceps sese, qui Argenta, quique Pherinum, et Thimarum, et Lisinas, et Stimonem, et Lampsum habent, aliaque castella juxta ignobilia. Dum Athamanes Ætolique, submoto Macedonum metu, in aliena victoria suam prædam faciunt, Thessaliaque a tribus simul exercitibus, incerta quem hostem, quemque socium crederet, vastatur; consul faucibus, quas fuga hostium aperuerat, in regionem Epiri transgressus, etsi probe scit, cui parti, Charopo principe excepto, Epirotæ favissent; tamen, quia ab satisfaciendi quoque cura imperata enise facere videt, ex præsenti eos potius, quam ex præterito, æstimat ha-

Epirotis  
ignoscit  
consul.

bitu, et ea ipsa facilitate veniae animos eorum in U.C. 554,  
A.C. 198.  
posterum conciliat. Missis deinde nunciis Cory-  
ram, ut onerariæ naves in sinum venirent Ambraci-  
um; ipse, progressus modicis itineribus, quarto die  
in monte Cercetio posuit castra, eodem Amynandro  
cum suis auxiliis adeito; non tam virium ejus egens,  
quam ut duces in Thessaliam haberet: ab eodem  
consilio et plerique Epirotarum voluntarii inter auxi-  
lia accepti.

XV. Primam urbium Thessaliæ Phaloriam est Phaloriam  
adgressus: duo millia Macedonum in præsidio ha-  
bebat, qui primo summa vi restiterunt, quantum  
arma, quantum mœnia tueri poterant: sed obpug-  
natio continua, non die, non nocte remissa, (quum  
consul in eo verti crederet ceterorum Thessalorum  
animos, si primi vim Romanam non sustinuissent)  
vicit pertinaciam Macedonum. Capta Phaloria, le-  
gati a Metropoli et a Piera dedentes urbes venerunt:  
venia eisdem petentibus datur. Phaloria incensa ac  
direpta est. Inde Æginum petit: quem locum  
quum vel modico præsidio tutum ac prope inexpug-  
nabilem vidisset, paucis in stationem proximam telis  
conjectis, ad Gomphorum regionem agmen vertit:  
degressusque in campos Thessaliæ, quum jam omnia  
exercitui deessent, quia Epirotarum pepercerait agris,  
explorato ante, utrum Leucadem, an sinum Ambra-  
cium onerariæ tenuissent, frumentatum Ambraciam  
in vicem cohortes misit: et est iter a Gomphis Am-  
braciam, sicut impeditum ac difficile, ita spatio per-  
brevi. Intra paucos itaque dies, transvectis a mari  
commeatisbus, repleta omni rerum copia sunt castra.  
Inde Atracem est profectus: decem ferme millia ab Atrax  
Larissa abest: ex Perrhæbia oriundi sunt: sita est <sup>obsessa.</sup>

V. C. 554. urbs super Peneum amnem. Nihil trepidavere Thes-  
A. C. 198. sali ad primum adventum Romanorum. Et Phi-  
lippus, sicut in Thessaliam ipse progredi non aude-  
bat, ita, intra Tempe stativis positis, ut quisque lo-  
cus ab hoste tentabatur, præsidia per occasiones  
submittebat.

*L. Quinctii  
scē gestee.* XVI. Sub idem fere tempus, quo consul adversus  
Philippum primum in Epiri faucibus castra posuit,  
et L. Quinctius, frater consulis, cui classis cura ma-  
ritimæque oræ imperium mandatum ab senatu erat,  
cum duabus quinqueremibus Coreyram transvectus,  
postquam profectam inde classem audivit, nihil mor-  
randum ratus, quam ad Zamam insulam adsecutus  
esset, dimisso L. Apustio, cui successerat, tarde inde  
ad Maleam, trahendis plerumque remulco navibus,  
quæ cum conimeatu sequebantur, pervenit. A Ma-  
sea, jussis ceteris, quantum maxime possent matu-  
rate, sequi, ipse tribus quinqueremibus expeditis Pi-  
ræuni præcepit, accepitque naves ibi relietas ab L.  
Apustio legato ad præsidium Athenarum. Eeden-

*Classis At-  
tali et Rhod-  
eium.* tempore duæ ex Asia classes profectæ, una cum  
Attalo rege; (eæ quatuor et viginti quinqueremes  
erant) Rhodia altera, viginti navium teatarum;  
Agesimbrotus præerat. Hæ circa Andrum insulam  
classes conjunctæ Eubœam, inde exiguo distantem-  
fretu, trajecerunt. Carystiorum primum agros vas-  
tarunt: deinde, ubi Carystus, præsidio a Chalcide  
raptrum misso; firma visa est, ad Eretriam acces-  
serunt. Eodem et L. Quinctius cum iis navibus, quæ  
Piræi fuerant, Attali regis adventu auditio, venit,  
jassitque, ut, quæ ex sua classe venissent naves,  
*Eretria ob-  
pugnata.* Eubœam peterent. Eretria summa vi obpugnaba-  
tur: nam et trium junctarum classium naves omnis-

generis tormenta machinasque ad urbium excidia se- U. C. 554.  
 cum portabant, et agri adfatum materiæ præbebant A. C. 198.  
 ad nova molienda opera. Oppidanî primo hand in-  
 pigre tuebantur mœnia: deinde fessi vulneratique  
 aliquot, quum et muri partem eversam operibus  
 hostium cernerent, ad deditioñem inclinarunt: sed  
 præsidium erat Macedonum, quos non minus, quam  
 Romanos, metuebant: et Philocles regius præfectus  
 a Chalcide nuncios mittebat, se in tempore adfutu-  
 rum, si sustinerent obsidionem. Hæc mixta metu  
 spes ultra, quam vellent, aut quam possent, trahere  
 eos tempus cogebat: deinde, postquam Philoclem re-  
 pulsum trepidantemque refugisse Chalcidem accepe-  
 runt, oratores extemplo ad Attalum, veniam fidem-  
 que ejus petentes, miserunt. Dum in spem pacis  
 intenti segnissimum munera belli obeunt, et ea modo  
 parte, qua murus dirutus erat, ceteris neglectis, sta-  
 tiones armatas obponunt: Qinctius, noctu ab ea Capitur.  
 parte, quæ minime suspecta erat, inpetu facto, scalis  
 urbem cepit. Oppidanorum omnis multitudo cum  
 conjugibus ac liberis in arcem confugit: deinde in  
 deditioñem venit. Pecuniæ aurique et argenti haud  
 sane multum fuit: signa, tabulæ priscæ artis, orna-  
 mentaque ejus generis plura, quam pro urbis magni-  
 tudine aut opibus ceteris, inventa.

XVII. Carystus inde repetita; unde, priusquam Carystus  
 e navibus copiæ exponerentur, omnis multitudo, <sup>capta.</sup>  
 urbe deserta, in arcem confugit. Inde ad fidem ab  
 Romano petendani oratores mittunt: oppidanis ex-  
 templo vita ac libertas concessa est: Macedonibus  
 treceni nummi in capita statutum est pretium, et ut  
 armis traditis abirent. Hac summa redempti, in Bœ-  
 otiam inermies trajecti. Navales copiæ, duabus cla-

U. C. 554. ris urbibus Eubœæ intra dies paucos captis, cir-  
A. C. 198. cumvectæ Sunium Atticæ terræ promontorium, Cen-  
Atrax per- chreas Corinthiorum emporium petierunt. Consul  
tinaciter interim omnium spe longiorem atrociore inque ob-  
defenditur. pugnationem habuit: et ea, qua minimum credidis-  
set, resistebant hostes: nam omnem laborem in  
muro diruendo crediderat fore; si aditum armatis  
in urbem patefecisset, fugam inde cædemque hos-  
tium fore, qualis captis urbibus fieri solet: ceterum  
postquam, parte muri arietibus decussa, per ipsas  
ruinas transcendenterunt in urbem armati, illud princi-  
pium velut novi atque integri laboris fuit. Nam  
Macedones, qui in præsidio erant et multi et delecti,  
gloriam etiam egregiam rati, si armis potius et vir-  
tute, quam mœnibus, urbem tuerentur, conferti,  
pluribus introrsus ordinibus acie firmata, quum  
transcendere ruinas sensissent Romanos, per impe-  
ditum ac difficilem ad receptum locum expulerunt.  
Id consul ægre passus, nec eam ignominiam ad unius  
modo expugnandæ moram urbis, sed ad summam  
universi belli, pertinere ratus, quod ex momentis  
parvarum plerumque rerum penderet, purgato loco,  
qui strage semiruti muri cumulatus erat, turrem in-  
gentis altitudinis, magnam vim armatorum multi-  
plici tabulato portantem, promovit: et cohortes in  
vicem sub signis, quæ cuneum Macedonum, (pha-  
langem ipsi vocant) si possent, vi perrumperent,  
emittebat. Sed ad loca angusta, haud late patente  
intervallo diruti muri, genus armorum pugnæque  
hosti aptius erat: ubi conferti hastas ingentis lon-  
gitudinis præ se Macedones objecissent, velut in  
constructam densitate clipeorum testudinem Ro-  
mani, pilis nequidquam emissis, quum strinxissent

gladios; neque congregari propius, neque præcidere U. C. 554.  
hastas poterant: et, si quas incidissent, aut præfre- A. C. 198.  
gissent, hastilia fragmento ipso acuto, inter spicula  
integrarum hastarum, velut vallum explebant. Ad  
hoc et muri pars adhuc integra utraque tuta præ-  
stabat latera: nec ex longo spatio aut cedendum,  
aut impetus faciendus erat; quæ res turbare ordines  
solet. Accessit etiam fortuita res ad animos eorum  
firmandos: nam quum turris per aggerem parum  
densati soli ageretur, rota una in altiore orbitam  
depressa ita turrim inclinavit, ut speciem ruentis  
hostibus, trepidationemque insanam superstantibus  
armatis præbuerit.

XVIII. Quum parum quidquam succederet, con-  
sul minime æquo animo comparationem militum ge-  
neris armorumque fieri patiebatur: simul nec matu- Re infecta  
ram expugnandi spem, nec rationem procul a mari  
et in evastatis belli cladibus locis hibernandi ullam  
cernebat: itaque relicta obsidione, quia nullus in  
tota Acarnaniæ atque Ætoliae ora portus erat, qui  
simul et omnes onerarias, quæ commeatum exercitui  
portabant, caperet, et tecta ad hibernandum legio-  
nibus præberet, Anticyra in Phocide, in Corinthium  
versa sinum, ad id opportunissime sita visa: quia  
nec procul Thessalia hostiumque locis abibant; et Phocidis  
ex adverso Peloponnesum exiguo maris spatio divi- urbes ab  
sam, ab tergo Ætoliam Acarnaniamque, ab lateribus eo captæ.  
Locridem ac Bœotiam habebant. Phocidis primo  
inpetu Phanoteam sine certamine cepit. Anticyra  
haud multum in obpugnando præbuit moræ. Ambrysus inde Hyampolisque receptæ. Daulis, quia  
in tumulo excuso si a est, nec scalis, nec operibus  
capi poterat: lassendo missilibus eos, qui in præ-

U. C. 554. sidio erant, quum ad excursiones eliciissent, refugiendo in vicem insequendoque, et levibus sine effectu certaminibus, eo negligentiae et contemptus adduxerunt, ut cum refugientibus in portam permixti impetum Romani facerent. Sex alia ignobilia castella Phocidis terrore magis, quam armis, in potestatem venerunt. Elatia clausit portas: nec, nisi vi cogerentur, recepturi mœnibus videbantur aut ducem, aut exercitum Romanum.

XIX. Elatiam obsidenti consuli rei majoris spes adfulsit, Achæorum gentem ab societate regia ad Romanam amicitiam avertendi. Cyliadum, principem factionis ad Philippum trahentium res, expulerant. Aristænus, qui Romanis gentem jungi volebat, prætor erat. Classis Romana cum Attalo et Rhodiis Cenchreis stabat, parabantque communi omnes consilio Corinthum obpugnare. Optimum igitur ratus est, priusquam eam rem adgredierentur, legatos ad gentem Achæorum mitti, pollicentes, si ab rege ad Romanos defecisset, Corinthum iis contributuros in antiquum gentis concilium. Auctore consule, legati a fratre ejus L. Quinetio, et Attalo, et Rhodiis, et Atheniensibus, ad Achæos missi. Si cyone datum iis est concilium. Erat autem non admodum simplex habitus animorum inter Achæos:

Legati a  
Romanis  
et eorum  
sociis ad  
Achæos.

Achæorum  
fluctuans  
et incerta  
mens.

terrebat eos Lacedæmonius, gravis et adsiduus hostis: horrebant Romana arma: Macedonum beneficiis et veteribus et recentibus obligati erant: regem ipsum suspectum habebant pro ejus crudelitate perfidiaque; neque ex iis, quæ tum ad tempus faceret, aestimantes, graviorem post bellum dominum futurum cernebant: neque solum, quid in senatu quisque civitatis suæ, aut in communibus conciliis gentis

pro sententia dicerent, ignorabant ; sed ne ipsis U.C. 554.  
quidem secum cogitantibus, quid vellent, aut quid A.C. 198.  
optarent, satis constabat. Ad homines ita incertos  
introductis legatis potestas dicendi facta est. Ro-  
manus primum legatus L. Calpurnius, deinde Attali Audiunt  
regis legati, post eos Rhodii disseruerunt. Philippi legatos.  
deinde legatis dicendi potestas facta est : postremi  
Athenienses, ut refellerent Macedonum dicta, auditи  
sunt. Ii fere atrocissime in regem, quia nulli nec  
plura, nec tam acerba passi erant, invecti sunt. Et  
illa quidem concio sub occasum solis, tot legatorum  
perpetuis orationibus die absumto, dimissa est.

XX. Postero die advocatur concilium ; ubi quum per praeconem, sicut Græcis mos est, suadendi, si quis vellet, potestas a magistratibus facta esset, nec quisquam prodiret : diu silentium aliorum alias in- Silentium  
tuentium fuit : neque mirum, si, quibus sua sponte, inter A-  
volutantibus res inter se pugnantes, obtorpuerant chæos.  
quodammodo animi, eos orationes quoque insuper turbaverant, utrumque quæ difficilia essent, promendo admonendoque, per totum diem habitæ. Tandem Aristænus prætor Achæorum, ne tacitum concilium dimitteret, *Ubi, inquit, illa certamina animorum,* Aristænus Achæi, sunt, quibus in conviviis et circulis, quum de prætor eos- Philippo et Romanis mentio incidit, vix manibus tem- hortatur ut perabatis? Nunc in concilio, ad eam rem unum indicto, expromant quum legatorum utrumque verba audieritis, quum refe- quid sen- rant magistratus, quum præco ad suadendum vocet, ob- mutuistis. Si non cura communis salutis, ne studia quidem, quæ in hanc aut illam partem animos vestros inclinarunt, vocem cuiquam possunt exprimere? quum præsertim nemo tam hebes sit, qui ignorare possit, di- cendi ac suadendi, quod quisque aut velit, aut optimum

U. C. 554. *putet, nunc occasionem esse, priusquam quidquam de-*  
 A. C. 198. *cernamus. Ubi semel decretum erit, omnibus id, etiam*  
*quibus ante displicuerit, pro bono atque utili fædere*  
*defendendum. Hæc adhortatio prætoris non modo*  
*quemquam unum elicit ad suadendum; sed ne fre-*  
*mitum quidem aut murmur concionis tantæ, ex tot*  
*populis congregatæ, movit.*

Pergit  
Aristænus.

XXI. Tum Aristænus prætor rursus: *Non magis*  
*consilium vobis, principes Achæorum, deest, quam lin-*  
*gua: sed suo quisque periculo in commune consultum*  
*non vult. Forsitan ego quoque tacerem, si privatus*  
*essem: nunc prætor video, aut non dandum concilium*  
*legatis fuisse, aut inde sine responso eos dimittendos non*  
*esse. Respondere autem, nisi ex vestro decreto, qui*  
*possum? Et quando nemo vestrum, qui in hoc concilium*  
*adversari estis, pro sententia quidquam dicere vult, aut*  
*audet; orationes legatorum hesterno die dictas, pro*  
*sententiis percenscamus; perinde ac non postulaverint,*  
*quæ e re sua essent, sed suaserint, quæ nobis censerent*  
*utilia esse. Romani Rhodiique et Atticulus societatem*  
*amicitiamque nostram petunt: et in bello, quod adver-*  
*sus Philippum gerunt, se a nobis adjuvari æquum cen-*  
*sent. Philippus societatis secum admonet et jurisju-*  
*randi: et modo postulat, ut secum stemus; modo, ne*  
*intersimus armis, contentum oit se esse. Nulline venit*  
*in mentem, cur, qui nondum socii sunt, plus petant,*  
*quam socius? Non fit hoc neque modestia Philippi,*  
*neque impudentia Romanorum. Achæi portus et dant*  
*fiduciam postulantibus, et demunt. Philippi præter*  
*legatum videmus nihil. Romana classis ad Cenchreas*  
*stat, urlium Eubææ spolia præ se ferens: consulem*  
*legionesque ejus, exiguo maris spatio disjunctas, Pho-*  
*cidem ac Locridem pervagantes videmus. Miramini,*

cur diffidenter Cleomedon legatus Philippi, ut pro rege U. C. 554.  
arma caperemus adversus Romanos, modo egerit : qui,  
si ex eodem fædere ac jurejurando, cuius nobis religio-  
nem injiciebat, rogemus eum, ut nos Philippus et ab  
Nabide ac Lacedæmoniis et ab Romanis defendat, non  
modo præsidium, quo nos tueatur, sed ne quid respon-  
deat quidem nobis, sit inventurus : non, Hercle, magis,  
quam ipse Philippus priore anno, qui, pollicendo se ad-  
versus Nabidem bellum gesturum, quum tentasset nos-  
tram juventutem hinc in Eubœam extrahere ; postquam  
nos neque decernere id sibi præsidium, neque velle in-  
ligari Romano bello vidit, oblitus societatis ejus, quam  
nunc jactat, vastandos depopulandosque Nabidi ac La-  
cedæmoniis reliquit. Ac mihi quidem minime conve-  
niens inter se oratio Cleomedontis visa est. Elevabat  
Romanum bellum, eventumque ejus eumdem fore, qui  
prioris belli, quod cum Philippo gesserint, dicebat. Cur  
igitur nostrum ille auxilium absens petit potius, quam  
præsens nos veteres socios simul ab Nabide ac Romanis  
tueatur ? Nos, dico ? quid ita passus est Eretriam Ca-  
ryustumque capi ? quid ita tot Thessalîæ urbes ? quid  
ita Locridem Phocidemque ? quid ita nunc Elatiam  
obpugnari patitur ? cur excessit faucibus Epîri claus-  
trisque illis inexpugnabilibus super Aoum amnem, aut  
vi, aut metu, aut voluntate, relictoque, quem insidebat,  
saltu, penitus in regnum abiit ? Si sua voluntate tot  
socios reliquit hostibus diripiendos, quid recusare po-  
test, quin et socii sibi consulant ? si metu, nobis quoque  
ignoscat timentibus : si virtus armis cessit, Achæi arma  
Romana sustinebimus, Cleomedon, quæ vos Macedones  
non sustinuitis ? An tibi potius credamus, Romanos  
non majoribus copiis nec viribus nunc bellum gerere,  
quam antea gesserint, potius quam res ipsas intueamur ?

U. C. 554. *Ætolos tum classe adjuverunt: nec duce consulari, nec  
A. C. 196. exercitu bellum gesserunt: sociorum Philippi maritimæ  
urbes in terrore ac tumultu erant: mediterranea adeo  
tuta ab Romanis armis fuerunt, ut Philippus Ætolos,  
nequidquam opem Romanorum implorantes, depopula-  
retur. Nunc autem defuncti bello Punico Romani,  
quod per sexdecim annos velut intra viscera Italæ tole-  
raverunt, non præsidium Ætolis bellantibus miserunt,  
sed ipsi duces belli arma terra marique simul Macedo-  
niæ intulerunt. Tertius jam consul summa vi gerit  
bellum. Sulpicius, in ipsa Macedonia congressus, fudit  
fugavitque regem; partem opulentissimam regni ejus  
depopulatus: nunc Quintius tenentem claustra Epiri,  
natura loci, munimentis, exercituque fretum, castris  
exuit: fugientem in Thessalam persecutus, præsidia  
regia sociasque ejus urbes prope in conspectu regis ip-  
sius expugnavit. Ne sint vera, quæ Athenienses modo  
legati de crudelitate, avaritia, libidine regis dixerunt:  
nihil ad nos pertineant, quæ in terra Attica scelerata in  
superos inferosque Deos sunt admissa: multo minus,  
quæ Ciani Abydenique, qui procul a nobis absunt, passi  
sunt: nostrorum ipsi vulnerum, si vultis, obliviscamur;  
cædes direptionesque bonorum Messenæ in media Pelo-  
ponneso factas; et hospitem Cyparissiæ Garitenem  
contra jus omne ac fas inter epulas prope ipsas occisum:  
et Aratum patrem filiumque Sicyonios, quum senem  
infelicem parentem etiam adpellare solitus esset, inter-  
fectos; filii etiam uxorem libidinis caussa in Macedo-  
niam asportatam: cetera stupra virginum matrona-  
rumque oblivioni dentur: ne sint cum Philippo res,  
cujus crudelitatis metu obmutuistis omnes: (nam quæ  
alia tacendi advocatis in concilium caussa est?) cum  
Antigono, mitissimo ac justissimo rege, et de nobis om-*

nibus optime merito, existimemus disceptationem esse : U. C. 554.  
num id postularet facere nos, quod tum fieri non posset ? A. C. 198.  
Peninsula est Peloponnesus, angustis Isthmi faucibus  
continenti adhærens, nulli apertior neque opportunior,  
quam navalī, bello : si centum tectae naves, et quinqua-  
ginta leviores apertae, et triginta Issaici lembi mariti-  
mam oram vastare, et expositas prope in ipsis litoribus  
urbes cæperint obpugnare, in mediterraneas scilicet nos  
urbes recipiemus ? tamquam non intestino et hærente in  
ipsis visceribus uramur bello ? Quum terra Nabis et  
Lacedæmonii, mari Romana classis urgebunt ; unde  
regiam societatem et præsidia Macedonum in plorem ?  
an ipsi nostris armis ab hoste Romano tutabimur urbes,  
quæ obpugnabuntur ? egregie enim Dymas priore bello  
sumus tutati. Satis exemplorum nobis alienæ clades  
præbent : ne quæramus, quemadmodum ceteris exemplo  
simus. Nolite, quia ultro Romani petunt amicitiam,  
id, quod optandum vobis ac summa ope petendum erat,  
fastidire : metu enim videlicet compulsi in aliena terra,  
quia sub umbra auxiliū vestri latere volunt, in societa-  
tem vestram configuiunt, ut portubus vestris recipiantur,  
ut commeatibus utantur. Mare in potestate habent ;  
terras, quascumque adeunt, extemplo ditionis suæ fa-  
ciunt. Quod rogant, cogere possunt : quia pepercisse  
volunt, committere vos, cur percatis, non patiuntur.  
Nam quod Cleomedon modo, tamquam medium et tu-  
tissimam vobis viam consilii, ut quiesceretis abstineretis-  
que armis, ostendebat ; ea non media, sed nulla via est.  
Etenim, præterquam quod aut accipienda, aut adspen-  
nanda vobis Romana societas est, quid aliud quam nus-  
quam gratia stabili, velut qui eventum exspectaverimus,  
ut fortunæ adplicaremus nostra consilia, præda victoris  
erimus ? Nolite, si, quod omnibus votis petendum erat,

U. C. 554. *ultra obfertur, fastidire.* Non, quemadmodum hodie  
 A. C. 198. *utrumque vobis licet, sic semper licitum est : nec saepe,*  
*nec diu eadem occasio erit. Liberare vos a Philippo*  
*jamdiu magis vultis, quam oudetis. Sine vestro labore*  
*et periculo qui vos in libertatem vindicarent, cum magnis*  
*classibus exercitibusque mare trajecerunt. Hos si*  
*socios adspernamini, vix sanæ mentis estis : sed, aut*  
*socios, aut hostes habeatis, oportet.*

Dissensio inter Achæos. XXII. Secundum orationem prætoris murmur oratum aliorum cum adsensu, aliorum inclementer assentientes increpantium ; et jam non singuli tantum, sed populi universi, inter se altercabantur : tum inter magistratus gentis (damiurgos vocant : decem numero creantur) certamen nihilo segnus, quam inter multitudinem, esse : quinque relatuos se de societate Romana aiebant, suffragiumque datus : quinque lege cunctum testabantur, ne quid, quod adversus Philippi societatem esset, aut referre magistratibus, aut decernere concilio jus esset. Hic quoque dies iurgiis est consumtus. Supererat unus justi concilii dies : (tertio enim lex jubebat decretum fieri) in quem adeo exarsere studia, ut vix parentes ab liberis temperaverint. Rhisiasus (Pellenensis erat) filium damiurgum, nomine Memnonem, habebat, partis ejus, quæ decretum recitari, perrogarique sententias prohibebat. Is, diu obtestatus filium, ut consulere Achæos communi saluti pateretur, neu pertinacia sua gentem universam perditum iret, postquam parum proficiebant preces, juratus se eum sua manu interemturum, nec pro filio, sed pro hoste, habiturum, minis pervicit, ut postero die coniungeret iis se, qui referebant : qui quum plures facti referrent, omnibus fere populis haud dubie adproban-

tibus relationem, ac præ se ferentibus, quid deere- U. C. 554.  
turi essent; Dymæi ac Megalopolitani, et quidam A. C. 193.  
Argivorum, priusquam decretum fieret, consurrexerunt, ac reliquerunt concilium, neque mirante ullo, neque inprobante. Nam Megalopolitanos, avorum memoria pulsos ab Lacedæmoniis, restituerat in patriam Antigonus: et Dymæis, captis nuper direptisque ab exercitu Romano, quum redimi eos, ubique servirent, Philippus jussisset, non libertatem modo, sed etiam patriam, reddiderat. Jam Argivi, præterquam quod Macedonum reges ab se oriundos credunt, privatis etiam hospitiis familiarique amicitia plerique inligati Philippo erant. Ob haec concilio, quod inclinaverat ad Romanam societatem jubendam, excesserunt: veniaque iis hujus secessio- nis fuit, et magnis et recentibus obligatis beneficiis.

XXIII. Ceteri populi Achæorum, quuin senten-  
tias perrogarentur, societatem cum Attalo ac Rho-  
diis præsenti decreto confirmarunt: cum Romanis, societas.  
quia injussu populi non poterat rata esse, in id tem-  
pus, quo Romam mitti legati possent, dilata est: in  
præsentia tres legatos ad L. Quinctium mitti pla-  
cuit, et exercitum omnem Achæorum ad Corinthum  
admovevi; captis Cencreis, jam urbem ipsam  
Quinetio obpugnante. Et hi quidem e regione  
portæ, quæ fert Sicyonem, posuerunt castra. Ro-  
mani ad Cencreas versam partem urbis, Attalus,  
tradueto per Isthmum exercitu, ab Lechæo, alterius  
maris portu, obpugnabant; primo segnius, speran-  
tes seditionem intus fore inter oppidanos ac regium  
præsidium: postquam uno animo omnes, et Mace-  
dones tamquam communem patriam tuebantur, et  
Corinthii ducem præsidii Audrosthensem, haud secus

Pacta inter  
Achæos et  
Romanos

Corinthus  
obpugna-  
tur.

U.C. 554. quam civem et suffragio creatum suo, imperio justo  
 A.C. 198. patiebantur; omnis inde spes pugnantibus in vi, et  
 armis, et operibus erat: undique aggeres haud facilis  
 aditu ad moenia admovebantur. Aries ex ea parte,  
 quam Romani obpugnabant, aliquantum muri diru-  
 erat: in quem locum, quia nudatus munimento erat,  
 protegendum armis quum Macedones concurrisserent,  
 atrox proelium inter eos ac Romanos ortum est. Ac  
 primo multitudine facile expellebantur Romani: ad-  
 sumtis deinde Achaeorum Attalique auxiliis, æqua-  
 bant certamen: nec dubium erat, quin Macedonas  
 Graecosque facile loco pulsuri fuerint. Transfuga-  
 rum Italicorum magna multitudo erat; pars ex  
 Hannibal exercitu metu poenae a Romanis Philip-  
 pum secuti, pars navales socii, relictis nuper classi-  
 bus, ad spem honoratioris militiae transgressi: hos  
 desperata salus, si Romani vicissent, ad rabiem ma-  
 gis, quam audaciam, accendebat. Promontorium est  
 adversus Sicyonem, Junonis quam vocant Acræam,  
 in altum excurrens; trajectus inde Corinthum, sep-  
 tem millia ferme passuum: eo Philocles, regius et  
 Relicta Corinthi obpugna- ipse praefectus, mille et quingentos milites per Boe-  
 tiam duxit: praesto fuere ab Corintho lembi, qui  
 præsidium id acceptum Lechæum trajicerent. Au-  
 tor erat Attalus, incensis operibus, omittendæ ex-  
 templo obpugnationis. Pertinacius Quintius in  
 incepto perstebat: is quoque ut pro omnibus portis  
 disposita vidi præsidia regia, nec facile erumpen-  
 tium impetus sustineri posse, in Attali sententiam  
 concessit: ita irrito incepto, dimissis Achæis, redi-  
 tum ad naves est. Attalus Piræum, Romani Cor-  
 cyram petierunt.

XXIV. Dum hæc ab navalii exercitu geruntur,

consul, in Phocide ad Elatiam castris positis, primo U. C. 554. conloquiis rem per principes Elatiensium tentavit: A. C. 198. postquam, nihil esse in manu sua, et plures validio- Elatiam ca- resque esse regios, quam oppidanos, respondebatur. pit consul. tum simul ab omni parte operibus armisque urbem est adgressus. Ariete admoto, quantum inter turrem muri erat prorutum, quum ingenti fragore ac stre- pitu nudasset urbem, simul et cohors Romana per apertum recenti strage iter invasit; et ex omnibus oppidi partibus, relictis suis quisque stationibus, in eum, qui premebatur in petu hostium, locum con- currenunt. Eodem tempore Romani et ruinas muri supervadebant, et scalas ad stantia moenia infere- bant: et, dum in unam partem oculos animosque hostium certamen averterat, pluribus locis scalis capitur murus, armatique in urbem transcederunt: quo tumultu auditu, territi hostes, relicto, quem conferti tuebantur, loco, in arcem omnes metu, in- ermi quoque insequente turba, confugerunt. Ita urbe potitur consul: qua direpta, missis in arcem, qui vitam regiis, si abire vellent inermes, libertatem Elatiensibus pollicerentur, fideque in hæc data, post paucos dies arcem recepit.

XXV. Ceterum adventu in Achaiam Philoclis regii præfecti non Corinthus tantum liberata obsi- dione, sed Argivorum quoque civitas per quosdam principes Philocli prodita est, tentatis prius animis plebis. Mos erat, comitorum die primo velut omni- Philocli nis caussa prætores pronunciare Jovem, Apollinem, Argos que, et Herculem: additum legi erat, ut iis Philip- pus rex adjiceretur: cuius nomen post pactam cum Romanis societatem quia præco non adjecit, fremi- tus primo multitudinis ortus: deinde clamor subji-

U.C. 551. cientium Philippi nomen, jubentiumque legitimum  
 A.C. 198. honorem usurpare; donec cum ingenti adsensu no-  
 men recitatum est. Hujus fiducia favoris Philocles  
 arcessitus nocte occupat collem inminentem urbi,  
 (Larissam eam arcem vocant) positoque ibi præsi-  
 dio, quum lucis principio signis infestis ad subjec-  
 tum arcii forum vaderet, instructa acies ex adverso  
 obcurrit. Præsidium erat Achæorum nuper inposi-  
 tum, quingenti fere juvenes delecti omnium civita-  
 tium. Ænesidemus Dymæus præerat. Adhortator  
 a præfecto regio missus, qui excedere urbe juberet,  
 (neque enim pares eos oppidanis solis, qui idem  
 quod Macedones sentirent, nedum adjunctis Mace-  
 donibus, esse, quos ne Romani quidem ad Corin-  
 thum sustinuissent) primo nihil, nec ducem, nec  
 ipsos movit: post paullo, ut Argivos quoque arma-  
 tos ex parte altera venientes magno agmine vide-  
 runt, certam perniciem cernentes, omnem tamen  
 easum, si pertinacior dux fuisset, videbantur subi-  
 turi. Ænesidemus, ne flos Achæorum juventutis  
 simul cum urbe amitteretur, pactus cum Philocle,  
 ut abire illis liceret, ipse, quo loco steterat armatus,  
 cum paucis clientibus non excessit. Missus a Phi-  
 locle, qui quereret, quid sibi vellet? nihil fatus,  
 tantummodo, quum projecto præ se clipeo staret,  
 in præsidio creditæ urbis moriturum se armatum, re-  
 spondit: tum jussu præfecti a Thracibus conjecta  
 tela, interfectique omnes. Et post pactam inter  
 Achæos et Romanos societatem due nobilissimæ  
 civitates, Argi et Corinthus, in potestate regis erant.  
 Hæc ab Romanis ea æstate in Græcia terra marique  
 gesta.

Aelio consule gestum: quum duos exercitus in pro- U. C. 554.  
 vincia habuisse, unum retentum, quem dimitti oportebat, cui L. Cornelius proconsul præfuerat, (ipse ei C. Helvium prætorem præfecit) alterum, quem in provinciam adduxit; totum prope annum Cremo-  
 nensis Placentinisque cogendis redire in colonias,  
 unde belli casibus dissipati erant, consumsit. Quem-  
 admodum Gallia præter spem quieta eo anno fuit,  
 ita circa urbem servilis prope tumultus excitatus est. Servilis  
 Obsides Karthaginiensium Setiæ custodiebantur: tumultus.  
 cum iis, ut principum liberis, magna vis servorum  
 erat: augebant eorum numerum, ut ab recenti  
 Africo bello, et ab ipsis Setinis captiva aliquot na-  
 tionis ejus ex præda emta mancipia. Quum conju-  
 rationem fecissent, missis ex eo numero, qui in Se-  
 tino agro, deinde circa Norbam et Circeios, servitia  
 sollicitarent; satis jam omnibus præparatis, Iudis,  
 qui Setiæ prope diem futuri erant, spectaculo inten-  
 tum populum adgredi statuerant: Setia per cædem  
 et repentinum tumultum capta, Norbam et Circeios  
 occupare. Hujus rei tam foedæ indicium Romanum  
 ad L. Cornelium Merulam prætorem urbis delatum  
 est. Servi duo ante lucem ad eum venerunt, atque  
 ordine omnia, quæ acta futuraque erant, exposue-  
 runt. Quibus domi custodiri jussis, prætor, senatu  
 vocato edoctoque, quæ indices adferrent, proficisci ad  
 eam coniurationem querendam atque obprimendam  
 jussus, cum quinque legatis profectus, obvios in  
 agris sacramento rogatos arma capere et sequi co-  
 gebat. Hoc tumultuario delectu duobus millibus  
 ferme hominum armatis, Setiam, omnibus, quo per- Obpressu-  
 geret, ignaris, venit: ibi raptim principibus conjura-  
 tionis comprehensis, fuga servorum ex oppido facta

**U. C. 554.** est: dimissi deinde per agros, qui vestigarent. **Egredia** A. C. 198. **duorum opera servorum indicum et unius liberi fuit.** Ei centum millia gravis æris dari Patres **jusserunt:** servis **vicena quina millia æris, et libertatem:** pretium eorum ex ærario solutum est dominis. Haud ita multo post, ex ejusdem conjurationis reliquiis, nunciatum est, servitia **Præneste occupatura.** **Eo L. Cornelius prætor profectus,** de quingentis fere hominibus, qui in ea noxa erant, supplicium sumsis: in timore civitas fuit, obsides captivosque Pœnorum ea moliri. Itaque et Romæ vigiliæ per vicos servatæ; jussique circumire eas minores magistratus: et triumviri carceris lautumiarum intentionem custodiam habere jussi: et circa nomen **Latinum** a prætore literæ missæ, ut et obsides in privato servarentur, neque in publicum prodeundi facultas daretur; et captivi ne minus decem pondo compedibus vincti in nulla alia, quam in carceris publici, custodia essent.

**XXVII.** Eodem anno legati ab rege Attalo coronam auream ducentūm quadraginta sex pondo in Capitolio posuerunt, gratiasque senatui egerunt, quod Antiochus, legatorum Romanorum auctoritate motus, finibus Attali exercitum deduxisset. Eadem æstate equites ducenti, et elephanti decem, et tritici modiūm ducenta millia, ab rege Masinissa ad exercitum, qui in Græcia erat, pervenerunt. Item ex Sicilia Sardiniaque magni commeatus et vestimenta exercitui missa. Siciliam M. Marcellus, Sardiniam M. Porcius Cato obtinebat; sanctus et innocens, asperior tamen in fœnore coërcendo habitus. Fugatique ex insula fœneratores, et sumtus, quos in cultum prætorum socii facere soliti erant, circum-

visi, aut sublati. Sex. Ælius consul ex Gallia comi- U. C. 554.  
tiorum caussa Romam quum redisset, creavit con- A. C. 198.  
sules C. Cornelium Cethegum et Q. Minucium Ru-  
fum. Biduo post prætorum comitia habita. Sex præ- Sex præ-  
tores illo anno primum creati, crescentibus jam pro- tores.  
vinciis, et latius patescente imperio: creati autem hi,  
L. Manlius Vulso, C. Sempronius Tuditanus, M. Ser-  
gius Silus, M. Helvius, M. Minucius Rufus, L. Atilius.  
Sempronius et Helvius ex iis ædiles plebis erant: cu-  
rules ædiles Q. Minucius Thermus et Ti. Sempronius  
Longus. Ludi Romani eo anno quater instaurati.

XXVIII. C. Cornelio et Q. Minucio consulibus, U. C. 555.  
omnium primum de provinciis consulum prætorum- A. C. 197.  
que aetum. Prius de prætoribus transacta res, quæ  
transigi sorte poterat: urbana Sergio, peregrina ju-  
risdictio Minucio obtigit. Sardiniam Atilius, Sici-  
liam Manlius, Hispaniam Sempronius ceteriorem,  
Helvius ulteriorem est sortitus. Consulibus Italianam  
Macedoniamque sortiri parantibus, L. Oppius et  
Q. Fulvius tribuni plebis inpedimento erant, quod  
*longinqua provincia Macedonia esset: neque ulla alia*  
*res majus bello impedimentum ad eam diem fuisse,*  
*quam quod, vixdum inchoatis rebus, in ipso conatu ge-*  
*rendi belli prior consul revocaretur. Quartum jam*  
*annum esse ab decreto Macedonicō bello. Quærendo*  
*regem et exercitum ejus Sulpiciū majorem partem anni*  
*absumsisse. Villium, congregientem cum hoste, re infec-*  
*ta revocatum. Quintū, rebus divinis Romæ majorem*  
*partem anni retentum, ita gessisse tamen res, ut, si aut*  
*maturius in provinciam venisset, aut hiems magis sera*  
*fuisse, potuerit debellare. Nunc prope in hiberna pro-*  
*fectum, ita comparare dici bellum, ut, nisi successor*  
*inpediat, perfecturus æstate proxima rideatur. His*

U. C. 555. orationibus pervicerunt, ut consules in senatus auc-  
A. C. 197. toritate fore dicerent se, si idem tribuni facerent.

Permittentibus utrisque liberam consultationem, Patres consulibus ambobus Italiam provinciam decreverunt. T. Quinctio prorogarunt imperium, donec successor ei venisset. Consulibus binæ legiones decretæ, et ut bellum cum Gallis Cisalpinis, qui defecissent a populo Romano, gererent. Quinctio in Macedoniam supplementum decretum, peditum quinque millia et trecenti equites, et sociorum navalium tria millia. Præesse idem, qui præerat, classi L. Quinctius Flamininus jussus. Prætoribus in Hispanias octona millia peditum sociū ac Latini nominis data, et quadringenti equites, ut dimitterent veterem ex Hispaniis militem: et terminare jussi, qua ulterior citeriorve provincia servaretur. Macedoniæ legatos P. Sulpicium et P. Villium, qui consules in ea provincia fuerant, adjecerunt.

XXIX. Priusquam consules prætoresque in provincias proficiserentur, prodigia procurari placuit: quod ædes Vulcani Summanique Romæ, et quod Fregellis murus et porta de cœlo tacta erant: et Frusinone inter noctem lux orta: et Asculo agnus biceps cum quinque pedibus natus: et Formiis duo lupi, oppidum ingressi, obvios aliquot laniaverant: Romæ non in urbem solum, sed in Capitolium penetraverat lupus. C. Acilius tribunus plebis talit, ut quinque coloniæ in oram maritimam deducerentur: duæ ad ostia fluminum Vulturni Liternique: una Puteolos: una ad castrum Salerni. His Buxentum adjectum: trecenæ familiæ in singulas colonias jubebant nitti: triumviri deducendis iis, qui per triennium magistratum haberent, creati, M. Servi-

Quinctio  
proroga-  
tum im-  
perium.

lius Geminus, Q. Minucius Thermus, Ti. Semipro- U.C. 555.  
nius Longus. Delectū rebusque aliis divinis huma- A.C. 197.  
nisque, quæ per ipsos agenda erant, perfectis, con-  
sules ambo in Galliam profecti. Cornelius recta ad Consulum  
Insubres via, qui tūm in armis erant, Cenomanis res gestæ  
adsumtis, Q. Minucius in læva Italiae ad inferum  
mare flexit iter, Genuamque exercitu abducto, ab  
Liguribus orsus est bellum. Oppida Clastidium et  
Litubium, utraque Ligurum, et duæ gentis ejusdem  
civitates, Celelates Cerdiciasque, sese dediderunt.  
Et jam omnia cis Padum, præter Gallorum Boios,  
Ilvates Ligurum, sub ditione erant: quindecim op-  
pida, hominum viginti millia esse dicebantur, quæ se  
dediderant. Inde in agrum Boiorum legiones duxit.

XXX. Boiorum exercitus haud ita multo ante  
trajecerat Padum, junxeratque se Insubribus et  
Cenomanis: quod ita acceperant, conjunctis legionib-  
us consules rem gesturos, ut et ipsi conlatas in  
unum vires firmarent. Postquam fama accidit, al-  
terum consulem Boiorum urere agros, seditio ex-  
templo orta est. Postulare Boii, ut laborantibus  
opem universi ferrent. Insubres negare, se sua de-  
serturos. Ita divisæ copiæ, Boiisque in agrum  
suum tutandum profectis, Insubres cum Cenomanis  
super annis Mincii ripam consederunt. Infra eum  
locum quinque millia passuum, et consul Cornelius  
eidem flumini castra applicuit: inde mittendo in  
vicos Cenonianorum Brixiamque, quod caput gentis  
erat, ut satis comperit, non ex auctoritate seniorum  
juventutem in armis esse, nec publico consilio Insu-  
brium defectioni Cenomanos se adjunxisse; excitis  
ad se principibus, id agere ac moliri cœpit, ut de-  
sciscerent ab Insubribus Cenomani, et, signis subla-

U. C. 555. tis, aut domos redirent, aut ad Romanos transirent.  
 A. C. 197. Et id quidem inpetrari nequiiit: in id data fides consuli est, ut in acie aut quiescerent, aut, si qua etiam occasio fuisset, adjuvarent Romanos. Hæc ita convenisse Insubres ignorabant: suberat tamen quædam suspicio animis, labare fidem sociorum. Itaque, quum in aciem eduxissent, neutrum iis cornu committere ausi, ne, si dolo cessissent, rem totam inclinarent, post signa in subsidiis eos locaverunt. Consul principio pugnæ vovit ædem Sospitæ Junoni, si eo die hostes fusi fugatiique essent. A militibus clamor sublatus, compotem voti consulem se facturos, et inpetus in hostes est factus. Non tulerunt Insubres primum concursum: quidam et a Cenomanis, terga repente in ipso certamine adgressis, tumultum ancipitem injectum auctores sunt, cæsaque in medio quinque et triginta millia hostium, quinque millia et septingentos vivos captos; in iis Hamilcarem Pœnorum imperatorem, qui belli caussa fuisset: signa militaria centum triginta, et carpenta supra ducenta. Oppida, quæ defectionem secuta erant, dediderunt se Romanis.

**XXXI.** Minucius consul primo effusis populacionibus peragraverat fines Boiorum: deinde, ut, relicitis Insubribus, ad sua tuenda receperant sese, castris se tenuit, acie dimicandum cum hoste ratus. Nec Boii detractassent pugnam, ni fama victos Insubres adlata animos fregisset. Itaque, relicto duce castrisque, dissipati per vicos, sua ut quisque defenderent, rationem gerendi belli hosti mutarunt: omissa enim spe per unam dimicationem rei decernendæ, rursus populari agros, et urere tecta, vicosque expugnare cœpit. Per cosdem dies Clastidium in-

censum: inde in Ligustinos Ilvates, qui soli non U. C. 555.  
parebant, legiones ductæ. Ea quoque gens, ut In- A. C. 197.  
subres acie victos, Boios, ita ut tentare spei certa-  
minis metuerent, territos audivit, in ditionem venit.  
Literæ consulum a Gallia de gestis prospere sub  
idem tempus Romam adlatæ. M. Sergius prætor  
urbis in senatu eas, deinde ex auctoritate Patrum  
ad populum recitavit: supplicatio in quatriuum  
decreta. Hiems jam eo tempore erat.

XXXII. Quum T. Quinctius, capta Elatia, in Phocide ac Locride hiberna disposita haberet, Opunte seditio orta est. Factio una Ætolos, qui propiores erant; altera Romanos arcessebat. Ætoli priores venerunt: sed opulentior factio, exclusis Ætolis, missoque ad imperatorem Romanum nuncio, usque in adventum ejus tenuit urbem. Arcem regium tenebat præsidium: neque, ut descenderent inde, aut Opuntiorum minis, aut auctoritate imperantis consulis Romani, perpelli potuerunt. Mora, cur non extemplo obpugnarentur, ea fuit, quod cadiutor ab rege venerat, locum ac tempus petens conloquio. Id gravate concessum regi est: non quin cuperet Quinctius per se partim armis, partim conditionibus confectum videri bellum: necdum enim sciebat, utrum successor sibi alter ex novis consulibus mitteretur; an, quod, summa vi ut tenerent, amicis et propinquis mandaverat, imperium prorogaretur: aptum autem fore conloquium credebat, ut sibi liberum esset, vel ad bellum manenti, vel ad pacem decadenti rem inclinare. In sinu Ma- Quinctii liaco prope Nicæam litus elegere: eo rex ab Deme- conloqui- triade cum quinque lembis et una nave rostrata ve- um cum Philippo. nit. Erant cum eo principes Macedonum, et Achæo-

U.C. 555. rum exsul vir insignis Cyliadas. Cum imperatore  
A.C. 197<sup>o</sup> Romano rex Amynander erat, et Dionysodorus At-

tali legatus, et Agesimbrotus præfector Rhodiæ classis, et Phæneas princeps Ætolorum, et Achæi duo, Aristænus et Xenophon. Inter hos Romanus, ad extremum litus progressus, quum rex in proram navis in anchoris stantis processisset, *Commodius*, inquit, *si in terram egrediuris, et ex propinquo dicamus in vicem, audiamusque.* Quum rex facturum se id negaret; *Quem tandem, inquit Quintius, times?* Ad hoc ille superbo et regio animo: *Neminem equidem timeo, præter Deos inmortales: non omnium autem credo fidei, quos circa te video, atque omnium minime Ætolis.* *Istud quidem, ait Romanus, par omnibus periculum est, qui cum hoste ad conloquium congregantur, ut nulla fides sit.* Non tamen, inquit rex, *T. Quinti, par perfidiæ præmium est, si fraude agatur, Philippus et Phæneas: neque enim æque difficulter Ætoli prætorem alium, ac Macedones regem in meum locum substituant.* Secundum hæc silentium fuit.

XXXIII. Quum Romanus eum æquum censeret priorem dicere, qui petisset conloquium; rex, ejus esse priorem orationem, qui daret pacis leges, non qui acciperet; tum Romanus, *Simplicem suam ora-*

*Lges pacis Philippos sit pacis conditio. Deducenda ex omnibus Græciæ civitatibus regi præsidia esse: captivos et transfugas sociis populi Romani reddendos: restituenda Romanis ea Illyrici loca, quæ post pacem in Epiro factam occupasset. Ptolemaeo regi Ægypti reddendas urbes, quas post Philopatoris Ptolemæi mortem occupasset. Suas populi Romani conditiones has esse: ceterum et so-*

ciorum audiri postulata verum esse. Attali regis legatus, Naves captivosque, quæ ad Chium navalí prælio capta essent, et Nicephorium, Venerisque templum, quæ spoliasset evastassetque, pro inconruptis restitui. Rhodii Peræam (regio est continentis adversus insulam, vetustæ eorum ditionis) repetebant, postulabantque præsidia deduci ab Iasso, et Bargyliis, et Euronensium urbe, et in Hellesponto Sesto atque Abydo, et Panopolim Byzantiis in antiqui formulam juris restitui, et liberari omnia Asie emporia portusque. Achæi Corinthum et Argos repetebant. Prætor Ætolorum Phæneas quum eadem fere, quæ Romani, ut Græcia decederetur, postulasset, redderenturque Ætolis urbes, quæ quondam juris ac ditionis eorum fuissent; excepit orationem ejus princeps Ætolorum Alexander, vir, ut inter Ætolos, faenndus. Jamdudum se <sup>Ætoli oratio in Phi-</sup> reticere, ait, non quo quidquam agi putet eo conloquio, lippum. sed ne quem sociorum dicentem interpellat. Neque de pace cum fide Philippum agere, neque bella vera virtute umquam gessisse. In conloquiis insidiari et captare: in bello non congregandi æquo campo, neque conflatis signis dimicare, sed refugientem incendere ac diripere urbes, et vincentium præmia victum conrumpere. At non sic anticos Macedonum reges, sed acie bellare solitos, urbibus parcere, quantum possent, quo opulentius imperium haberent. Nam de quorum possessione dimicerunt tollentem, nihil sibi præter bellum relinquere, quod consilium esse? Plures priore anno sociorum urbes in Thessalia evastasse Philippum, quam omnes, qui umquam hostes Thessaliam fuerint: ipsis quoque Ætolis eum plura socium, quam hostem, adenisse. Lysimachiam, pulso prætore et præsidio Ætolorum, occupasse eum. Chium item suæ ditionis urbem funditus ever-

U.C. 355. tisse ac delesse. Eadem fraude habere eum Thebas  
 A.C. 197. Phthias, Echinum, Larissam, et Pharsalum.

Respon-  
sum Phi-  
lippi.      XXXIV. Motus oratione Alexandri Philippus  
 navem, ut exaudiretur, propius terram applicuit.  
 Orsum eum dicere, in Ætolos maxime, violenter,  
 Phæneas interfatus, *Non in verbis rem verti*, ait:  
*aut bello vincendum, aut melioribus parendum esse.*  
*Adparet id quidem*, inquit Philippus, *etiam cæco*;  
 jocatus in valetudinem oculorum Phæneæ: et erat  
 dicacior natura, quam regem decet, et ne inter seria  
 quidem risu satis temperans. Indignari inde cœpit,  
 Ætolos, tamquam Romanos, decedi Græcia jubere:  
*qui, quibus finibus Græcia sit*, dicere non possint. Ip-  
 sius enim Ætoliae Agræos, Apodotosque, et Amphilochos,  
*quæ permagna eorum pars sit*, Græciam non esse.  
*An, quod a sociis eorum non abstinuerim, justam que-*  
*relam habent, quum ipsi pro lege hunc antiquitus mo-*  
*rem servent, ut adversus socios ipsi suos, publica tan-*  
*tum auctoritate denta, juventutem suam militare si-*  
*nant, et contrariæ persæpe acies in utraque parte Æto-*  
*licu auxilia habeant?* Neque ego Chium expugnari, sed  
 Prusiam socium et amicum obpugnantem adjuvi: et  
 Lysimachiam ab Thracibus vindicavi: sed, quia me  
 necessitas ad hoc bellum a custodia ejus avertit, Thra-  
 ces habent. Et Ætolis hæc. Attalo autem Rhodiisque  
 nihil jure debo: non enim a me, sed ab illis, prin-  
 cipium belli ortum est. Romanorum autem honoris  
 caussa, Peræam Rhodiis, et naves Attalo cum captivis,  
 qui comparebunt, restituam. Nam quod ad Nicepho-  
 rium Venerisque templi restitutionem adtinet; quid ea  
 restitui postulantibus respondeam? nisi, quo uno modo  
*luci silvæque cæsæ restitui possunt, curam impensamque*  
*sationis me præstaturum: qæoniam hæc inter se reges*

*postulare et respondere placet.* Extrema ejus oratio U. C. 555.  
 adversus Achæos fuit: in qua, orsus ab Antigoni A. C. 197.  
 primum, suis deinde erga eam gentem meritis, reci-  
 tari decreta eorum jussit, omnes divinos humanos-  
 que honores complexa: atque ad ea adjecit recens  
 de exercitu, quo ab se descivissent: invictusque  
 graviter in perfidiam eorum, *Argos tamen se redditu-*  
*rum eis, dixit.* *De Corintho cum imperatore Romano*  
*deliberaturum esse; quæsiturumque simul ab eo, utrum*  
*iis tantum urbibus decidere se æquum censeat, quas a*  
*se ipso captas jure belli habeat, an iis etiam, quas a*  
*majoribus suis accepisset.*

XXXV. Parantibus Achæis Ætolisque ad ea re-  
 spondere, quum prope occasum sol esset, dilato in  
 posterum diem conloquio, Philippus in stationem,  
 ex qua profectus erat, Romani sociique in castra  
 redierunt. Quintius postero die ad Nicæam (is Alter con-  
 enim locus placuerat) ad constitutum tempus venit.  
loquii dies.  
 Philippi nullus usquam nec nuncius ab eo per ali-  
 quot horas veniebat: et jam desperantibus ventu-  
 rum repente adparuerunt naves. At ipse quidem,  
*quum tam gravia et indigna imperarentur, inopem consilii diem se consumsisse deliberando, aiebat.* Vulgo  
 credebatur, de industria rem in serum tractam, ne  
 tempus dari posset Achæis Ætolisque ad responden-  
 dum: et eam opinionem ipse adfirmavit, petendo,  
 ut, submotis aliis, ne tempus altercando tereretur,  
 et aliquis finis rei inponi posset, cum ipso impera-  
 tore Romano licet sibi conloqui. Id primo non  
 acceptum, ne excludi conloquio viderentur socii:  
 deinde, quum haud absisteret petere, ex omnium  
 consilio Romanus imperator cum Ap. Claudio tri-  
 buno militum, ceteris submotis, ad extremum litus

U.C. 555. processit. Rex cum duobus, quos pridie adhibuerat, in terram est egressus. Ibi quum aliquamdiu secreto locuti essent, quæ acta ad suos Philippus retulerit, minus compertum est. Quinctius hæc retulit ad socios. Romanis eum cedere tota Illyrici ora; perfugas remittere, ac si qui essent captivi. Attalo nares, et cum iis captos narales socios; Rhodiis regionem, quam Peræam vocant, reddere: Iasso et Bargylis non cessurum. Ætolis Pharsalum Larissamque reddere, Thebas non reddere. Achæis, non Argis modo, sed etiam Corintho cessurum. Nulli omnium placere, partium, quibus cessurus, aut non cessurus esset, destinatio: plus enim amitti in iis, quam adquiri: nec umquam, nisi tota dedurisset Græcia præsidia, caussas certaminum deponere.

XXXVI. Quum hæc toto ex concilio certatim omnes vociferarentur, ad Philippum quoque procul stantem vox est perlata: itaque a Quinctio petit, ut rem totam in posterum diem differret: profecto aut persuasurum se, aut persuaderi sibi passurum. Litus ad Thronium conloquio destinatur: eo mature conventum est. Ibi Philippus primo et Quinctium et omnes, qui aderant, rogare, ne spem pacis turbare vellent. Postremo petere tempus, quo legatos Romanam ad senatum mittere posset. *Aut his conditionibus se pacem impetraturum, aut, quascumque senatus dedisset, leges pacis accepturum.* Id ceteris haudquam placebat: nec enim aliud, quam moram et dilationem ad conligendas vires, quæri. Quinctius, verum id futurum fuisse, dicere, si æstus et tempus rerum gerendarum esset: nunc, hieme instante, nihil amitti, dato spatio ad legatos mittendos. Nam neque sine auctoritate senatus quidquam eorum ratum fore,

*quæ cum rege ipsi pepigissent: et explorari (dum bello U. C. 555.  
necessariam quietem ipsa hiems daret) senatus auctori- A. C. 197.  
tatem posse.* In hanc sententiam et ceteri sociorum  
principes concesserunt: induciisque datis in duos Induciae in  
menses, et ipsos mittere singulos legatos ad edoce- duos men-  
dum senatum, ne fraude regis caperetur, placuit. ses.  
Additum induciarum pacto, ut regia præsidia Pho-  
cide ac Locride exteniplo deducerentur. Et ipse  
Quinctius cum sociorum legatis Amynandrum Atha-  
manum regem, ut speciem legationi adjiceret; Q.  
Fabium, (uxoris Quinctii sororis filius erat) et Q.  
Fulvium, et Ap. Claudium misit.

XXXVII. Ut ventum Romam est, prius socio-  
rum legati, quam regis, auditи sunt: cetera eorum  
oratio conviciis regis consumta est. Moverunt eo  
maxime senatum, demonstrando maris terrarumque  
regionis ejus situm: ut omnibus adparceret, si Deme-  
triadem in Thessalia, Chalcidem in Eubœa, Corin-  
thum in Achaia rex teneret, non posse liberam Græ-  
ciam esse: et ipsum Philippum, non contumeliosius,  
quam verius, compedes eas Græciæ adpellare. Le- Legati regii  
gati deinde regis intromissi: quibus, longiorem ex- a senatu re-  
orsis orationem, brevis interrogatio, cessurusne iis missi.  
tribus urbibus esset, sermonem incidit, quum man-  
dati sibi de his nominatim negarent quidquam: sic  
infecta pace, regii dimissi. Quinctio liberum arbitrium pacis ac belli permissum. Quod ut satis ad-  
paruit, non tædere belli senatum, et ipse, victoriæ,  
quam pacis, avidior, neque conloquium postea Phi-  
lippo dedit, neque legationem aliam, quam quæ om-  
ni Græcia decedi nunciaret, admissurum dixit.

XXXVIII. Philippus, quum acie decernendum Philippiæ-  
wideret, et undique ad se contrahendas vires, maxime dus cum Nabide.

U. C. 555. de Achaiæ urbibus, regionis ab se diversæ, et magis  
A. C. 197. tamen de Argis, quam de Corintho, sollicitus, optimum ratus Nabidi eam Lacedæmoniorum tyranno

velut fiduciariam dare, ut victori sibi restitueret; si quid adversi accidisset, ipse haberet; Philocli, qui Corintho Argisque præerat, scribit, ut tyrannum ipse conveniret. Philocles, præterquam quod jam veniebat cum munere, adjicit ad pignus futuræ regi cum tyranno amicitiæ, filias suas regem Nabidis filiis matrimonio conjungere velle. Tyrannus primo negare, aliter urbem eam se accepturum, nisi Argivorum ipsorum decreto arcessitus ad auxilium urbis esset: deinde, ut frequenti concione non adspersnatos modo, sed abominatos etiam nomen tyranni audivit, caussam se spoliandi eos naectum ratus, tradere,

Argi Nabidi tra-duntur.

ubi vellet, urbem, Philoclem jussit. Nocte, ignaris omnibus, acceptus in urbem est tyrannus: prima luce occupat superiora omnia loca: portæque clausæ. Paucis principum tumultum inter primum elapsis, eorum absentium direptæ fortunæ: præsentibus aurum atque argentum ablatum: pecuniæ imperatæ ingentes: qui non cunctanter contulere, sine contumelia et laceratione corporum sunt dimissi: quos occulere aut retrahere aliquid suspicio fuit, in servilem modum lacerati atque extorti. Concione inde advocata, rogationem promulgavit; unam de tabulis novis, alteram de agro viritim dividendo; duas faces novantibus res ad plebem in optimates accendendam.

XXXIX. Postquam in potestate Argivorum civitas erat, nihil ejus memor tyrannus, a quo eam civitatem, et quam in conditionem accepisset, legatos Elatiam ad Quinctium, et Attalum Æginæ hiber-

Nabidis  
avaritia et  
crudelitas.

xantem mittit, qui nunciarent, *Argos in potestate sua U. C. 555.*  
 esse: eo si veniret Quinctius ad conloquium, non diffi- A. C. 197.  
 dere, sibi omnia cum eo conventura. Quinctius, ut eo  
 quoque præsidio Philippum nudaret, quum adnusset  
 se venturum, mittit ad Attalum, ut ab Ægina Sicyo-  
 nem sibi obcurreret, ipse ab Anticyra decem quin-  
 queremibus, quas iis forte ipsis diebus L. Quinctius  
 frater ejus adduxerat ex hibernis Corcyrae, Sicyonem  
 transmisit. Jam ibi Attalus erat; qui, quum tyran-  
 no ad Romanum imperatorem, non Romano ad ty-  
 rannum, eundum diceret, in sententiam suam Quinc-  
 tium traduxit, ne in urbem ipsam Argos iret. Haud Nabidis  
 precul urbe Mycenica vocatur: in eo loco ut con-<sup>cum</sup>  
 grederentur, convenit. Quinctius cum fratre et tri-<sup>Quinctio</sup>  
 bunis militum paucis, Attalus cum regio comitatu,<sup>um.</sup>  
 Nicostratus Achæorum prætor cum auxiliaribus pau-  
 cis venit: tyrannum ibi cum omnibus copiis obpe-  
 rientem invenerunt: progressus armatus cum satel-  
 litibus armatis est in medium fere interjacentis  
 campi: inermis Quinctius cum fratre et duobus tri-  
 bunis militum; inermi item regi prætor Achæorum  
 et unus ex purpuratis latus cingebant. Initium  
 sermonis ab excusatione tyranni ortum, *quod armatus*  
*ipse armatisque septus, quum inermes Romanum*  
*imperatorem regemque cerneret, in conloquium venis-*  
*set: neque enim se illos timere, dixit, sed exsules Argi-*  
*vorum.* Inde, ubi de conditionibus amicitiae cœp-  
 tum agi est, Romanus duas postulare res: unam, ut  
 bellum cum Achæis finiret: alteram, ut adversus  
 Philippum mitteret secum auxilia. Ea se missurum  
 dixit: pro pace cum Achæis, induciæ inpetratæ, do-  
 nec bellum cum Philippo finiretur.

U. C. 555. XL. De Argis quoque disceptatio ab Attalo rege  
A. C. 197. est nata: quum fraude Philoclis proditam urbem vi  
ab eo teneri argueret; ille, ab ipsis Argivis, ut se  
defenderet, adcitum. Concionem Argivorum rex  
postulabat, ut id sciri posset. Nec tyrannus ab-  
nuere: sed, deductis ex urbe præsidiis, liberam  
concionem, non inmixtis Lacedæmoniis, declaratu-  
ram, quid Argivi vellent, præberi debere dicebat  
rex. Tyrannus negavit dedueturum. Hæc discep-  
tatio sine exitu fuit. De conloquio discessum, sex-  
centis Cretensibus ab tyranno datis Romano, indu-  
ciisque inter Nicostratum prætorem Achæorum et  
Lacedæmoniorum tyrannum in quatuor menses fac-  
tis. Inde Quinctius Corinthum est profectus: et ad  
portam cum Cretensium cohorte accessit, ut Philo-  
cli præfecto urbis adpareret, tyrannum a Philippo  
descisse. Philocles et ipse ad imperatorem Roma-  
num in conloquium venit: hortantique, ut extem-  
plo transiret, urbemque traderet, ita respondit, ut  
distulisse rem magis, quam negasse, videretur. A  
Corintho Quinctius Anticyram trajecit: inde fra-  
trem ad tentandam Acarnanum gentem misit. At-  
talus ab Argis Sicyonem est profectus. Ibi et civi-  
tas novis honoribus veteres regis honores auxit: et  
rex ad id, quod sacrum Apollinis agrum grandi  
quondam pecunia redemerat cis; tum quoque, ne  
sine aliqua munificentia præteriret civitatem sociam  
atque amicam, decem talenta argenti dono dedit,  
et decem millia medimnūm frumenti: atque ita  
Cenchreas ad naves rediit. Et Nabis, firmato præ-  
sidio Argis, Lacedæmonem regressus, quum ipse  
viros spoliasset, ad feminas spoliandas uxorem Ar-

gos remisit. Ea nunc singulas inlustres, nunc si- U. C. 555.  
mul plures genere inter se junctas domum arcessen- A. C. 197.  
do, blandiendoque ac minando, non aurum modo <sup>Uxor Na-</sup>  
iis, sed postremo vestem quoque mundumque om- bidis Argi-  
nem muliebrem ademit.

---

## EPITOME LIBRI XXXIII.

---

**T.** *QUINCTIUS FLAMININUS* proconsul cum *Philippo* ad *Cynoscephalas* in *Thessalia* acie victo debellavit. *L. Quinctius Flamininus*, frater proconsulis, *Acarnanes*, *Leucade* urbe, quod caput est *Acaranum*, expugnata, in ditionem accepit. *C. Sempronius Tuditianus* prætor a *Celtiberis* cum exercitu cæsus est. *Attalus*, a *Thebis* ob subitam valetudinem *Pergamum* translatus, decessit. *Pax* petenti *Philippo*, *Græciae* libertas data est. *L. Furius Purpureo* et *Claudio Marcellus* consules *Boios* et *Insubres* Gallos subegerunt. *Marcellus* triumphavit. *Hannibal*, frustra in *Africa* bellum molitus, et ob hoc Romanis per epistolas adversæ factionis principum delatus, propter metum Romanorum, qui legatos ad *Karthaginiensium* senatum de eo miserant, profugus ad *Antiochum* regem *Syriæ* se contulit, bellum contra Romanos parantem.

---

# T. LIVII PATAVINI

## LIBER XXXIII.

---

**H**ÆC per hiemem gesta. Initio autem veris U. C. 555.  
Quinctius, Attalo Elatiā excito, Bœotorum A. C. 197.  
gentem, incertis ad eam diem animis fluctuantem,  
Quinctius  
ditionis suæ facere cupiens, profectus per Phocidem, it.  
in Bœotiam  
quinq̄ millia ab Thebis, quod caput est Bœotiæ,  
posuit castra. Inde postero die cum unius signi  
militibus, et Attalo, legationibusque, quæ frequen-  
tes undique convenerant, pergit ire ad urbem, jussis  
legionis hastatis (ea duo millia militum erant) sequi  
se, mille passuum intervallo distantes. Ad medium  
ferme viæ Bœotorum prætor Antiphilus obvius fuit:  
cetera multitudo e muris adventum imperatoris Ro-  
mani regisque prospeculabatur: rara arma paucique  
milites circa eos adparebant: hastatos, sequentes  
procul, amfractus viarum vallesque interjectæ occu-  
lebant. Quum jam adpropinquaret urbi, velut ob-  
viam egredientem turbani salutaret, tardius incede-  
bat. Caussa erat moræ, ut hastati consequerentur.  
Oppidani, ante lictorem turba acta, insecurum con-  
festim agmen armatorum non ante, quam ad hospi-  
tium imperatoris ventum est, conspexere. Tum,

U. C. 555. velut prodita dolo Antiphili prætoris urbe captaque,  
A. C. 197. obstupuerunt omnes. Et adparebat, nihil liberæ  
consultationis concilio, quod in diem posterum in-  
dictum erat Bœotis, relictum. Texerunt dolorem,  
quem et nequidquam, et non sine periculo ostendis-  
sent.

In concil-  
lio Bœoto-  
rum Atta-  
lus verba  
faciens  
concidit.

Societas  
cum Ro-  
manis de-  
creta.

II. In concilio Attalus primus verba fecit. Orsus  
a majorum suorum suisque, et communibus in omni-  
nem Græciam, et propriis in Bœotorum gentem,  
meritis, segnior jam et infirmior, quam ut conten-  
tionem dicendi sustineret, obmutnit et concidit. Et,  
dum regem auferunt perferuntque parte membrorum  
captum, paullisper concio intermissa est. Aristæ-  
nus inde, Achæorum prætor, eo cum majore aucto-  
ritate auditus, quod non alia, quam quæ Achæis  
suaserat, Bœotis suadebat. Pauca ab ipso Quinc-  
tio adjecta, fidem magis Romanam, quam arma aut  
opes, extollente verbis. Rogatio inde, a Platæensi  
Dicæarcho lata recitataque, de societate cum Ro-  
manis jungenda, nullo contra dicere audente, om-  
nium Bœotiæ civitatum suffragiis accipitur jubetur-  
que. Concilio dimisso, Quintius tantum Thebis  
moratus, quantum Attali repens casus coëgit, post-  
quam non vitæ præsens periculum vis morbi adtu-  
lissee, sed membrorum debilitatem visa est, relicto  
eo ad curationem necessaria in corporis, Elatiām,  
unde profectus erat, redit; Bœotis quoque, sicut  
prius Achæis, ad societatem adseitis, et quando tuta  
ea pacataque ab tergo relinquebantur, omnibus jam  
cogitationibus in Philippum, et quod reliquum belli  
erat, conversis.

Philippi  
adparatus.

III. Philippus quoque primo vere, postquam le-

gati ab Roma nihil pacati retulerant, delectum per U. C. 555.  
 omnia oppida regni habere instituit, in magna inopia A. C. 197.  
 juniorum: absumserant enim per multas jam ætates  
 continua bella Macedonas: ipso quoque regnante,  
 et navalibus bellis adversus Rhodios Attalumque, et  
 terrestribus adversus Romanos ceciderat magnus  
 numerus: ita et tirones ab sedecim annis milites  
 scribebat, et emeritis quidam stipendiis, quibus mo-  
 do quidquam reliqui roboris erat, ad signa revoca-  
 bantur. Ita suppleto exercitu, secundum vernum  
 æquinoctium omnes copias Dium contraxit; ibique  
 stativis positis, exercendo quotidie milite, hostem  
 obperiebatur. Et Quinctius per eosdem ferme dies,  
 ab Elatia profectus, præter Thronium et Scarphæam  
 ad Thermopylas pervenit. Ibi concilium Ætolor-  
 rum, Heracleam indictum, tenuit, consultantium  
 quantis auxiliis Romanum ad bellum sequerentur.  
 Cognitis sociorum decretis, tertio die ab Heraclea  
 Xynias progressus, in confinio Ænianum Thessalo-  
 rumque positis castris, Ætolica auxilia obperieba-  
 tur. Nihil morati Ætolii sunt. Phæna duce, duo  
 millia peditum cum equitibus quadringentis vene-  
 runt. Ne dubium esset, quid exspectasset, confes-  
 tim Quinctius movit castra. Transgresso in Phthio-  
 ticum agrum quingenti Gortynii Cretensium, duce Quinctius  
 Cydante, et trecenti Apolloniatae, hand dispari ar- ad Philip-  
 matu, se conjinxere: nec ita multo post Amynan- pum con-  
 der cum Athamanum peditum ducentis et mille,  
 Philippus, cognita profectione ab Elatia Romano-  
 rum, ut cui de summa rerum adesset certamen, ad-  
 hortandos militas rates, multa jam sæpe memorata  
 de majorum virtutibus, simul de militari laude Mace-  
 donum, quum disseruisset, ad ea, quæ tum maxime

U. C. 555. animos terrebant, quibusque erigi ad aliquam spem  
A. C. 197. poterant, venit.

IV. Acceptæ ad Aoum flumen in angustiis cladi, territa Macedonum phalange, ad Atracem vi pulso Romanos obponebat: *et illic tamen, ubi insessas fauces Epiri non tenuissent, primam culpam fuisse eorum, qui negligenter custodias servassent: secundam, in ipso certamine levis armaturæ mercenariorumque militum. Macedonum vero phalangem et tunc stetisse, et loco Copiarum æquo justaque pugna semper mansuram invictam. De utrumque numerus. cem et sex millia militum hæc fuere, robur omnino virium et regni.* Ad hoc duo millia cætratorum, quos peltastas adpellant, Thracumque et Illyriorum (Trallis nomen est genti) par numerus bina millia erant, et mixti ex pluribus gentibus mercede conducti auxiliares mille ferme, et duo millia equitum. Cum iis copiis rex hostem obperiebatur. Romanis ferme par numerus erat; equitum copiis tantum, quod Ætoli accesserant, superabant.

V. Quinetius ad Thebas Phthioticas castra quum movisset, spem nactus per Timonem principem civitatis prodi urbem, cum paucis equitum levisque armaturæ ad muros successit. Ibi adeo frustrata spes est, ut non certamen modo cum erumpentibus, sed periculum quoque atrox subiret: ni castris exciti repente pedites equitesque in tempore subvenissent. Et postquam nihil conceptæ temere spei succedebat, urbis quidem amplius tentandæ in præsentia conatu absistit: ceteruni satis gnarus, jam in Thessalia regem esse, nondum comperto, quam in regionem venisset, milites per agros dimissos vallum cædere et parare jubet. Vallo et Macedones et Græci usi sunt; sed usum nec ad cœmoditatem ferendi, nec ad ip-

sius munitionis firmamentum aptaverunt. Nam et U. C. 555.  
 majores et magis ramosas arbores cædebant, quam A. C. 197.  
 quas ferre cum armis miles posset; et quum castra  
 his ante objectis sepsissent, facilis molitio eorum  
 valli erat: nam et quia rari stipites magnarum ar-  
 borum eminebant, multique et validi rami præbe-  
 bant, quod recte manu caperetur, duo, aut summum  
 tres juvenes connisi arborem unam evellebant: qua  
 evulsa, portæ instar extemplo patebat, nec in prointu  
 erat, quod obmolirentur. Romanus leves et bifur- Vallum Re-  
 cos plerosque, et trium, aut, quum plurimum, qua- manorum.  
 tuor ramorum vallos cædit, ut et suspensis ab tergo  
 armis ferat plures simul apte miles; et ita densos  
 obfigunt implicantque ramos, ut neque, quæ cujus-  
 que stipitis palma sit, pervideri possit; et adeo  
 acuti, aliisque per alium inmissi radii locum ad in-  
 serendam manum non relinquunt, ut neque prehendi,  
 quod trahatur, neque trahi, quum inter se innexi  
 rami vinculum in vicem præbeant, possit; et si  
 evulsus forte est unus, nec loci multum aperit, et  
 alium reponere perfacile est.

VI. Quintius postero die, vallum secum ferente  
 milite, ut paratus omni loco castris ponendis esset,  
 progressus modicum iter, sex ferme millia a Pheris  
 quum consedisset, speculatum, in qua parte Thessa-  
 liae hostis esset, quidve pararet, misit. Circa Laris-  
 sam erat rex, qui certior jam factus, Romanum ab  
 Thebis Pheras movisse, defungi quamprimum et Pheras uter-  
 ipse certamine cupiens, ducere ad hostem pergit, et que exerci-  
 quatuor millia fere a Pheris posuit castra. Inde  
 postero die quum expediti utrimque ad occupandos  
 super urbem tumulos processissent, pari ferme in-  
 tervalle ab jugo, quod capiendum erat, quum inter

**U.C. 555.** se conspecti essent, constiterunt; nuncios in castra  
**A.C. 197.** remissos, qui, quid sibi, quum præter spem hostis  
 obcurrisset, faciendum esset, consulerent, quieti ob-  
 perientes. Et illo quidem die, nullo inito certa-  
 mine, in castra revocati sunt. Postero die circa  
 eosdem tumulos equestre prælium fuit: in quo non  
 minimum Ætolorum opera regii fugati, atque in  
 castra compulsi sunt. Magnum utrisque impedi-  
 mentum ad rem gerendam fuit ager consitus crebris  
 arboribus, hortique, ut in suburbanis locis, et coar-  
 tata itinera maceriis, et quibusdam locis interclusa.  
 Itaque pariter ducibus consilium fuit excedendi ea  
 regione, et, velut ex prædicto, ambo Scotussam pe-  
 tierunt; Philippus, spe frumentandi inde; Roma-  
 nus, ut prægressus conrumperet hosti frumenta. Per  
 diem totum, quia colles perpetuo jugo intererant,  
 nullo conspecta inter se loco agmina ierunt. Ro-  
 mani ad Eretriam Phthiotici agri, Philippus super  
 amnem Onchestum posuit castra. Ne postero qui-  
 dem die, quum Philippus ad Melambium, quod vo-  
 cant Scotussæi agri, Quinetius circa Thetidium  
 Pharsaliæ terræ posuisset castra, aut hi, aut illi, ubi  
 hostis esset, satis compertuni habuerunt. Tertio  
 die primo nimbus effusus, dein caligo noctis similli-  
 ma Romanos metu insidiarum tenuit.

VII. Philippus maturandi itineris caussa, post  
 imbre nubibus in terram demissis nihil deterritus,  
 signa ferri jussit: sed tam densa caligo obcæcaverat  
 diem, ut neque signiferi viam, nec signa milites cer-  
 nerent; agmen ad incertos clamores vagum velut  
 Prælium errore nocturno turbaretur. Supergressi tumulos,  
 ad Cynos- qui Cynoscephalæ vocantur, relictæ ibi statione fir-  
 cephalas. ma peditum equitumque, posuerunt castra. Roma-

nus eisdem ad Thetidium castris quum se tenuisset, U.C. 555.  
exploratum tamen, ubi hostis esset, decem turmas A.C. 197.  
equitum et mille pedites misit; monitos, ut ab in-  
sidiis, quas dies obscurus apertis quoque locis tectu-  
rus esset, præcaverent. Ubi ventuni ad insessos tu-  
mulos est, pavore mutuo injecto velut torpentes  
quierunt: dein, nunciis retro in castra ad duces  
missis, ubi primus terror ab necopinato visu conse-  
dit, non diutius certamine abstinuere. Principio  
a paucis procurentibus lacessita pugna est, deinde  
subsidiis tuentium pulsos aucta: in qua quum haud-  
quaquam pares Romani alios super alios nuncios  
ad ducem mitterent, premi sese; quingenti equites  
et duo millia peditum, maxime Ætolorum, cum duo-  
bus tribunis militum propere missa, rem inclinatam  
restituerunt: versaque fortuna, Macedones laboran-  
tes opem regis per nuncios implorabant. Sed, ut  
qui nihil minus illo die propter obfuscam caliginem,  
quam prælium, exspectasset, magna parte hominum  
omnis generis pabulatum missa, aliquamdiu inops  
consilii trepidavit: deinde, postquam nuncii insta-  
bant, et jam juga montium detexerat nebula, et in  
conspectu erant Macedones, in tumulum maxime  
editum inter alios compulsi, loco se magis, quam  
armis, tutantes; committendam rerum summam in  
discrimen utcumque ratus, ne partis indefensæ jac-  
tura fieret, Athenagoram ducem mercede militan-  
tium cum omnibus, præter Thracas, auxiliis, et  
equitatu Macedonum ac Thessalorum mittit: eo-  
rum adventu depulsi ab jugo Romani non ante  
restiterunt, quam in planiorem vallem perventum  
est. Ne effusa detruderentur fuga, plurimum in  
Ætolis equitibus præsidii fuit: is longe tum opti-

U. C. 555. nus eques in Græcia erat : pedite inter finitimos  
 A. C. 197. vincebantur.

VIII. Lætior res, quam pro successu pugnæ, nunciata, quum alii super alios recurrentes ex prælio clamarent, fugere pavidos Romanos, invitum et cunctabundum, et dicentem temere fieri, non locum sibi placere, non tempus, perpulit, ut educeret omnes copias in aciem. Idem et Romanus, magis necessitate, quam occasione pugnæ inductus, fecit : dextrum cornu, elephantis ante signa instructis, in subsidiis reliquit : lævo cum omni levi armatura in hostem vadit ; simul admisionens, *cum iisdem Macedonibus pugnaturos, quos ad Epiri fauces, montibus fluminibusque septos, victa naturali difficultate locorum, expulissent, acieque expugnassent : cum iis, quos P. Sulpicii prius ductu, obsidentes Eordææ aditum vicissent. Fama stetisse, non viribus, Macedoniæ regnum. Eam quoque famam tandem evanuisse.* Jam perventum ad suos in ima valle stantes erat, qui adventu exercitus imperatorisque pugnam renovant, inpetuque facto rursus avertunt hostem. Philippus cum cætratis et cornu dextro peditum, robore Macedonici exercitus, quam phalangem vocabant, proprio cursu ad hostem vadit. Nicanori, ex purpuratis uni, ut cum reliquis copiis confestim sequatur, imperat. Primo, ut in jugum evasit, et, jacentibus ibi paucis armis corporibusque hostium, prælium eo loco fuisse, pulsosque inde Romanos, et pugnari prope castra hostium vidit, ingenti gaudio est elatus : mox, refugientibus suis, et terrore verso, paullisper, incertus an in castra reciperet copias, trepidavit : deinde, ut adpropinquabat hostis, et, præterquam quod cædebantur aversi, nec, nisi defenserentur, servari

poterant, ne ipsi quidem in tuto jam receptus erat ; U. C. 555.  
 coactus, nondum adsecuta parte suorum, periculum A. C. 197.  
 summæ rerum facere, equites levemque armaturam,  
 qui in pœlio fuerant, dextro in cornu locat. Cæ-  
 tratos et Macedonum phalangem, hastis positis,  
 quarum longitudo impedimento erat, gladiis rem ge-  
 rere jubet : simul, ne facile perrumperetur acies,  
 dimidium de fronte demtum introrsus porrectis ordi-  
 nibus duplicat, ut longa potius, quam lata, acies  
 esset : simul et densari ordines jussit, ut vir viro,  
 arma armis jungerentur.

IX. Quintius, his, qui in pœlio fuerant, inter  
 signa et ordines acceptis, tuba dat signum. Raro  
 alias tantus clamor dicitur in principio pugnæ exor-  
 tus . nam forte utraque acies simul conclamavere :  
 nec solum qui pugnabant, sed subsidia etiam, qui que  
 tum maxime in pœlium veniebant. Dextro cornu  
 rex, loci plurimum auxilio, ex jugis altioribus pug-  
 nans, vincebat : sinistro, tum cum maxime adpro-  
 pinquante phalangis parte, quæ novissimi agminis  
 fuerat, sine ullo ordine trepidabatur Media acies,  
 quæ propior dextrum cornu erat, stabat spectaculo  
 velut nihil ad se pertinentis pugnæ intenta : pha-  
 lanx, quæ venerat, agmen magis, quam acies, apti-  
 orque itineri, quam pugnæ, vixdum in jugum eva-  
 serat. In hos incompositos Quintius, quamquam  
 pedem referentes in dextro cornu suos cernebat, ele-  
 phantis prius in hostem actis, inpetum facit ; ratus  
 partem profligatam cetera tracturam. Non dubia res Vincunt  
 fuit: exemplo terga vertere Macedones, terrore primo Romani.  
 bestiarum aversi: et ceteri quidem hos pulsos seque-  
 bantur: unus e tribunis militum, exemplo capto  
 consilio, cum viginti signorum militibus, relicta ea

U. C. 555. parte suorum, quæ haud dubie vincebat, brevi cir-  
A. C. 197. cuitu dextrum cornu hostium aversum invadit. Nul-  
lam aciem ab tergo adortus non turbasset; ceterum  
ad communem omnium in tali re trepidationem ac-  
cessit, quod phalanx Macedonum, gravis atque in-  
mobilis, nec circumagere se poterat, nec hoc, qui a  
fronte, paullo ante pedem referentes, tunc ultro ter-  
ritis instabant, patiebantur. Ad hoc, loco etiam  
premebantur, quia jugum, ex quo pugnaverant, dum  
per proclive pulsos inseguuntur, tradiderant hosti  
ad terga sua circumducto. Paullisper in medio  
cæsi, deinde, omissis plerique armis, capessunt fu-  
gam.

X. Philippus cum paucis peditum equitumque  
primo tumulum altiorem inter ceteros cepit, ut spe-  
cularetur, quæ in læva parte suorum fortuna esset:  
deinde, postquam fugam effusam animadvertisit, et  
omnia circa juga signis atque armis fulgere, tum et  
ipse acie excessit. Quinetius, quum institisset ce-  
dentibus, repente quia erigentes hastas Macedonas  
conspexerat, quidnam pararent incertus, paullisper  
novitate rei constituit signa: deinde, ut accepit  
hunc morem esse Macedonum tradentium sese, par-  
cere vietiis in animum habebat. Ceterum ab ignaris  
militibus omissam ab hoste pugnare, et quid impe-  
rator vellet, inpetus in eosdem factus, et primis cæ-  
sis, ceteri in fugam dissipati sunt. Rex effuso cursu  
Tempe petit. Ibi ad Gonnos diem unum substitut  
ad excipiendos, si qui prælio superessent. Romani  
victores in castra hostium spe prædæ inruunt: ve-  
rum ea magna jam ex partæ direpta ab Ætolis inve-  
niunt. Cæsa eo die octo hostium millia, quin-  
que capta. Ex victoribus septingenti ferme cecide-

runt. Si Valerio quis credat, omnium rerum immo- U. C. 555.  
dice numerum augenti, quadraginta millia hostium A. C. 197.  
eo die sunt cæsa ; capta, ubi modestius mendacium  
est, quinque millia septingenti, signa militaria du-  
centa unum et quadraginta. Claudius quoque duo  
et triginta millia hostium cæsa scribit, capta quatuor  
millia et trecentos. Nos non minimo potissimum  
numero credidimus, sed Polybium seuti sumus, non  
incertum auctorem quum omnium Romanarum re-  
rum, tum præcipue in Græcia gestarum.

XI. Philippus, conlectis ex fuga, qui, variis casi-  
bus pugnæ dissipati, vestigia ejus seuti fuerant,  
missisque Larissam ad commentarios regios combu-  
rendos, ne in hostium venirent potestatem, in Ma-  
cedoniam concessit. Quinctius, captivis prædaque  
venumdati, partim militi concessis, Larissam est  
profectus, haudum satis gnarus, quam regionem  
petisset rex, quidve pararet. Caduceator eo regius Caduceator  
venit, specie ut induciæ essent, donec tollerentur ad missus ab  
sepulturam, qui in acie cecidissent ; re vera ad pe-  
tendam veniam legatis mittendis. Utrumque ab  
Romano inpetratum. Adjecta et illa vox, *bono ani-  
mo esse regem ut juberet* : quæ maxime Ætolos ob-  
fendit, jam tuentes querentesque, *mutatum victoria Ætolorum  
imperatorem*. *Ante pugnam omnia magna parvaque* querelæ et  
*communicare cum sociis solitum* : nunc omnium exper-  
tes consiliorum esse : *suo ipsum arbitrio cuncta agere* :  
cum Philippo jam gratiæ privatæ locum querere ; ut  
dura atque aspera belli Ætoli exhauserint, pacis gra-  
tiam et fructum Romanus in se vertat. Et haud dubie  
decesserat iis aliquantum honoris : sed, cur neglig-  
rentur, ignorabant. Donis regiis inminere crede-  
bant invicti ab ea cupiditate animi virum : sed et

**U. C. 555.** succensebat non inmerito Ætolis, ob insatiabilem  
**A. C. 197.** aviditatem prædæ, et adrogantiam eorum, victoriæ gloriæ in se rapientium, quæ vanitate sua omnium aures offendebat: et Philippo sublato, fractis opibus Macedonici regni, Ætolos habendos Græciæ dominos cernebat. Ob eas caussas multa sedulo, ut viliores levioresque apud omnes essent et vide-rentur, faciebat.

XII. Induciæ quindecim dierum datæ hosti erant, et cum ipso rege constitutum conloquium: cuius priusquam tempus veniret, in consilium advocavit socios. Retulit, quas leges pacis placeret dici. Amynander Athamanum rex paucis sententiam absol-

*Consultatio vit; ita componendam pacem esse, ut Græcia, etiam de pace.*

*absentibus Romanis, satis potens tuendæ simul pacis libertatisque esset. Ætolorum asperior oratio fuit, qui pauca præfati, recte atque ordine imperatorem Romanum facere, quod, quos belli socios habuisset, cum iis communicaret pacis consilia: falli autem eum tota res, si aut Romanis pacem, aut Græciæ libertatem satis firmam se credat relicturum, nisi Philippo aut occiso, aut regno pulso: quæ utraque proclivia esse, si fortuna uti vellet. Ad hæc Quinctius negare, Ætolos aut moris Romanorum memores, aut sibi ipsis convenientem sententiam dixisse; et illos prioribus omnibus conciliis conloquiisque de conditionibus pacis semper, non ut ad internacionem bellaretur, disseruisse, et Romanos, præter vetustissimum morem victis parcendi, præcipuum clementiæ documentum dedisse, pace Hannibali et Karthaginiensibus dati. Omittere se Karthaginienses. Cum Philippo ipso quoties ventum in conloquium? nec umquam, ut cederet regno, actum esse? An, quia victus prælio foret, inexpiable bellum factum? Cum armato*

*hoste infestis animis concurri debere: adversus victos, U. C. 555.  
mitissimum quemque, animum maximum habere.* Li- A. C. 197.  
*bertati Græciæ videri graves Macedonum reges: si reg-  
num gensque tollatur, Thracas, Illyrios, Gallos deinde,  
gentes feras et indomitas, in Macedoniam se et in Græ-  
cium effusuras. Ne, proxima quæque amoliendo, ma-  
joribus gravioribusque aditum ad se facerent. Inter-  
fanti deinde Phæneæ prætori Ætolorum, testifican-  
tique, si elapsus eo tempore Philippus foret, mox  
gravius eum rebellaturum, Desistite tumultuari, in-  
quit, ubi consultandum est. Non iis conditionibus in-  
ligabitur pax, ut morere bellum possit.*

XIII. Hoc dimisso concilio, postero die rex ad fauces, quæ ferunt in Tempe, (is datus erat locus conloquio) venit: tertio die datur ei Romanorum ac sociorum frequens concilium. Ibi Philippus per- Conloqui-  
quam prudenter, iis, sine quibus pax inpetrari non um ad  
poterat, sua potius voluntate omissis, quam ut alter- Tempe  
cando extorquerentur, quæ priore conloquio aut impe- cum Phi-  
lippo.  
*rata a Romanis, aut postulata ab sociis essent, omnia  
se concedere, de ceteris senatui permissurum, dixit.  
Quamquam vel inimicissimis omnibus præclusisse  
vocem videbatur, Phæneas tamen Ætolus, cunctis  
tacentibus, Quid? nobis, inquit, Philippe, reddisne  
tandem Pharsalum, et Larissam Cremasten, et Echi-  
num, et Thebas Phthias? Quum Philippus nihil mo- Disceptatio  
rari diceret, quo minus reciperen; disceptatio inter  
imperatorem Romanum et Ætolos orta est de The- inter Ro-  
manos et  
Ætolos.  
bis: nam, eas populi Romani jure belli factas esse,  
Quinctius dicebat, quod, integris rebus, exercitu ab  
se admoto, vocati in amicitiam, quum potestas libera  
descendi ab rege esset, regiam societatem Roma-  
næ præposuissent. Phæneas, et pro societate belli,*

U. C. 555. quæ ante bellum habuissent, restitui Ætolis æquum  
 A. C. 197. censebat, et ita in födere primo cautum esse, ut  
 belli præda, rerumque, quæ ferri agique possent, Ro-  
 manos ; ager urbesque captæ Ætolos sequerentur.  
*Vos, inquit, ipsi, Quintius, societatis istius leges rupis-  
 tis, quo tempore, relictis nobis, cum Philippo pacem fe-  
 cistis : quæ si maneret, captarum tamen urbium illa lex  
 foret. Thessaliæ civitates sua voluntate in ditionem nos-  
 tram venerunt.* Hæc, cum omnium sociorum adsensu  
 dicta, Ætolis non in præsentia modo gravia auditu,  
 sed mox belli etiam caussæ, magnarumque ex eo  
 cladium, iis fuerunt. Cum Philippo ita convenit,  
 ut Demetrium filium et quosdam ex amicorum nu-  
 mero obsides, et ducenta talenta daret : de eeteris  
 Romam mitteret legatos : ad eam rem quatuor  
 mensium induciæ essent. Si pax non inpetrata ab  
 senatu foret, obsides pecuniamque reddi Philippo  
 receptum est. Caussa Romano imperatori non alia  
 major fuisse dicitur pacis maturandæ, quam quod  
 Antiochum bellum transitumque in Europam moliri  
 constabat.

Pax con-  
venit.

Androsthe-  
nis cum  
Achæis  
pugna.

XIV. Eodem tempore, atque, ut quidam tradi-  
 dere, eodem die ad Corinthum Achæi ducem regium  
 Androsthenem justo prælio fuderunt. Eam urbem  
 pro arce habiturus Philippus adversus Græciæ civi-  
 tates, et principes inde evocatos per speciem conlo-  
 quendi, quantum equitum dare Corinthii ad bellum  
 possent, retinuerat pro obsidibus, et, præter quin-  
 gentos Macedonas mixtosque ex omni genere auxili-  
 orum octingentos, quod jam ante ibi fuerat, mille  
 Macedonum eo miserat, et mille ac ducentos Illy-  
 rios, Thracasque, et Cretenses, qui in utraque parte  
 militabant, octingentos. His additi Bœoti, Thessa-

lique, et Acarnanes mille, scutati omnes, et ex ipso- U. C. 555.  
 rum Corinthiorum juventute, inpleta ut essent sex A. C. 197.  
 millia armatorum, fiduciam Androstheni fecerunt  
 acie decernendi. Nicostratus prætor Achæorum Si-  
 cyone erat cum duobus millibus peditum, centum  
 equitibus: sed, inparem se et numero et genere mi-  
 litum cernens, mœnibus non excedebat. Regiae co-  
 piæ peditum equitumque vagæ Pellenensem, et Phli-  
 asium, et Cleonæum agrum, depopulabantur. Post-  
 remo, exprobrantes metum hosti, in fines Sicyonio-  
 rum transcendebant: navibus etiam circumvecti  
 omnem oram Achaiæ vastabant. Quum id effusius  
 hostes, et, nt fit ab nimia fiducia, negligentius etiam  
 facerent, Nicostratus, spem nactus necopinantes eos  
 adgrediendi, circa finitimas civitates nuncium occul-  
 tum mittit, quo die, et quot, ex quaqne civitate ar-  
 mati ad Apelaurum (Stymphaliæ terræ is locus est)  
 convenient. Omnibus ad diem edictam paratis,  
 profectus inde extemplo, per Phliasiorum fines nocte  
 Cleonas, insciis omnibus, quid pararet, pervenit.  
 Erant autem cum eo quinque millia peditum, ex  
 quibus armaturæ levis, et trecenti equites, cum iis  
 copiis dimissi, qui specularentur: quam in partem  
 hostes effunderent sese, obperiebantur.

XV. Androstenes, omnium ignarus, Corintho  
 profectus, ad Nemæam (annis est Corinthium et Si-  
 cyonium interfluens agrum) castra locat. Ibi parte  
 dimidia exercitus dimissa, dimidiā trifariam divisit,  
 et omnes equites discurrere ad depopulandos simul  
 Pellenensium Sicyoniumque agros, et Phliasium, ju-  
 bet. Hæc tria diversa agmina discessere: quod ubi  
 Cleonas ad Nicostratum perlatum est, extemplo va-  
 lidam mercenariorum manum præmissam ad occu-

**U. C. 555.** pandum saltum, per quem transitus in Corinthium  
**A. C. 197.** est agrum, ante signa equitibus ut prægrederentur locatis, ipse confestim agmine dupli sequitur. Parte una mercenarii milites ibant cum levi armatura, altera clipeati, dein aliarum gentium exercitus robur erat. Jam haud procul castris aberant pedites equitesque, et Thracum quidam in vagos palatosque per agros hostes inpetum fecerunt, quum repens terror castris infertur. Trepidare dux, ut qui hostes nusquam, nisi raro in collibus ante Sicyonem, non audentes agmen demittere in campos, vidisset; ad Cleonas quidem accessuros numquam credidisset: revocari tuba jubet vagos a castris dilapsos. Ipse, raptim capere arma jussis militibus, infrequenti agmine porta egressus, super flumen instruit aciem. Ceteræ copiæ, vix conligi atque instrui quum potuissent, primum hostium inpetum non tulerunt. Macedones et maxime omnium frequentes ad signa fuerant, et diu ancipitem victoriae spem fecerunt: postremo fuga ceterorum nudati, quum duæ jam aries hostium ex diverso, levis armatura ab latere, clipeati cætratique a fronte urgerent; et ipsi, re inclinata, primo retulere pedem: deinde impulsi terga vertunt, et plerique, abjectis armis, nulla spe castorum tenendorum relicta, Corinthum petierunt. Nicostratus, mercenariis militibus ad hos persequendos, equitibus Thracumque auxiliis in populatores agri Sicyonii missis, magnam ubique cædem edidit; maiorem prope, quam in prælio ipso. Ex iis quoque, qui Pellenen Phliuntaque depopulati erant, incompositi partim omniumque ignari, ad castra revertentes, in hostium stationes, tamquam in suas, inlati sunt; partim ex discursu id, quod erat, suspicati,

ita se in fugam passim sparserant, ut ab ipsis agres- U. C. 555.  
tibus errantes circumvenirentur. Ceciderunt eo die A. C. 197.  
mille et quingenti, capti trecenti. Achaia oninis  
magno liberata metu.

XVI. Priusquam dimicaretur ad Cynoscephalas, Acarna-  
L. Quinctius, Coreyram excitis Acarnanum princi- num gens  
pibus, quæ sola Græciæ gentium in societate Mace- societatem  
donum manserat, initium quoddam ibi motus fecit. Romanam  
Duæ autem maxime caussæ eos tenuerant in amicitia  
regis; una fides insita genti, altera metus odiumque  
Ætolorum. Concilium Leucadem indictum est. Eo  
neque cuncti convenere Acarnanum populi; nec ip- resputit.  
sis, qui convenerant, idem placuit: sed et principes  
et magistratus pervicerunt, ut privatum decretum  
Romanæ societatis fieret. Id omnes, qui abfuerant,  
ægre passi; et in hoc frenitu gentis a Philippo  
missi duo principes Acarnanum, Androcles et Eche-  
demus, non ad tollendum modo decretum Romanæ  
societatis valuerunt, sed etiam ut Archelaus et Bia-  
nor, principes gentis ambo, quod antores ejus sen-  
tentiae fuissent, proditionis in concilio damnarentur,  
et Zeuxidæ prætori, quod de ea re retulisset, impe-  
rium abrogaretur. Rem temerariam, sed eventu  
prosperant, damnati fecerunt. Suadentibus namque  
amicis, cederent tempori, et Coreyram ad Romanos  
abirent, statuerunt obferre se multitudini, et aut eo  
ipso lenire iras, aut pati, quod easus tulisset. Quum  
se frequenti concilio intulissent, primo murmur ac  
fremitus admirantium, silentium mox a verecundia  
simul pristinæ dignitatis, ac misericordia præsentis  
fortunæ, ortum est. Potestate quoque dicendi facta,  
principio suppliciter, procedente autem oratione, ubi  
ad crimina diluenda ventum est, cum tanta fiducia,

U.C. 555. quantam innocentia dabat, disseruerunt: postremo,  
 A.C. 197. ultro aliquid etiam queri, et castigare iniquitatem  
 simul in se crudelitatemque ausi, ita adfecerunt animos, ut omnia, quæ in eos decreta erant, frequentes  
 tollerent: neque eo minus redeundum in societatem  
 Philippi, abnuendamque Romanorum amicitiam,  
 censerent.

L. Quinc-  
 tius Leu-  
 cadem ob-  
 pugnat.

Leucadis  
 situs.

XVII. Leucade hæc sunt decreta: id caput Acarnaniae erat, eoque in concilium omnes populi conve-  
 niebant. Itaque, quum hæc repentina mutatio Cor-  
 eyram ad legatum Flamininum perlata esset, ex-  
 templo cum classe profectus, Leucade ad Heræum,  
 quod vocant, naves applicuit. Inde cum omni ge-  
 nere tormentorum machinarumque, quibus expug-  
 nantur urbes, ad muros accessit, ad primum terro-  
 rem ratus inclinari animos posse. Postquam pacati  
 nihil ostendebatur, tum vineas turresque erigere, et  
 arietem admoveare muris cœpit. Acarnania universa,  
 inter Ætoliam atque Epirum posita, solem occiden-  
 tem et mare Siculum spectat. Leucadia nunc in-  
 sula, et vadoso freto, quod perfosum manu est, ab  
 Acarnania divisa, tum peninsula erat, occidentis re-  
 gione artis fancibus cohærens Acarnaniæ. Quingentos  
 ferme passus longæ fauces erant; latæ haud amplius  
 centum et viginti: in his angustiis Leucas posita  
 est, colli applicata verso in orientem et Acarnaniam.  
 Intra urbis plana sunt, jacentia ad mare, quo Leuca-  
 dia ab Acarnania dividitur. Inde terra marique ex-  
 pugnabilis est: nam et vada sunt stagno similiora,  
 quam mari: et campus terrenus omnis operique fa-  
 cilis. Itaque multis simul locis aut subruti, aut  
 ariete decussi ruebant muri. Sed quam urbs ipsa  
 opportuna obpugnantibus erat, tam inexpugnabiles

hostium animi: die ac nocte intenti reficere quassata U. C. 555.  
 muri; obstruere, quæ patefacta ruinis erant; proelia A. C. 197.  
 in pigre inire, et armis magis muros, quam se ipsos  
 mœnibus, tutari: diutiusque spe Romanorum obsidi-  
 onem eam extraxissent, ni exsules quidam Italici ge-  
 neris, Leucade habitantes, ab arce milites accepis-  
 sent: eos tamen, ex superiore loco magno cum tu-  
 multu decurrentes, acie in foro instructa, justo prœ-  
 lio aliquamdiu Leucadii sustinuerunt. Interim et  
 scalis capta multis locis mœnia, et per stragem lapi-  
 dum ac ruinas transensem in urbem: jamque ipse  
 legatus magno agmine circumvenerat pugnantes:  
 pars in medio cœsi; pars, armis abjectis, dediderunt  
 sese victori. Et post dies paucos, audito prœlio,  
 quod ad Cynoscephalas pugnatum erat, omnes po- Acarnania  
 puli Acarnaniæ in ditionem legati venerunt. pacata.

XVIII. Iisdein diebus, omnia simul inclinante Rhodii  
 fortuna, Rhodii quoque ad vindicandam a Philippo Peræam  
 continentem regionem, (Peræam vocant) possessam recuperant.  
 a majoribus suis, Pausistratum prætorem cum octiū-  
 gentis Achæis peditibus, mille et nongentis fere ar-  
 matis, ex vario genere auxiliorum conlectis, miserunt:  
 Galli, et Pisuetæ, et Nisuetæ, et Tamiani, et Arci, ex  
 Africa, et Laodiceni ex Asia erant: cum his copiis  
 Pausistratus Tendeba in Stratonicensi agro locum  
 peropportuni, ignaris regiis, qui tenuerant, occu-  
 pavit. In tempore et ad id ipsum excitum auxilium,  
 mille Achæi pedites cum centum equitibus superven-  
 erunt. Theoxenus iis præterat. Dinocrates, regius  
 præfectus, recuperandi castelli caussa, primo castra  
 ad ipsa Tendeba movit, inde ad alterum castellum,  
 item Stratonicensis agri: Astragon vocant: omni-  
 busque ex præsidiis, quæ multifariam disjecta erant,

U. C. 555. devocatis, et ab ipsa Stratonicea Thessalorum auxiliariibus, Alabanda, ubi hostes erant, ducere pergit.

A. C. 197 Nec Rhedii pugnam detractaverunt: atque, castris in propinquum conlatis, extemplo in aciem descensum est. Dinocrates quingentos Macedonas dextro cornu, laeo Agrianas locat: in medium accipit contractos ex castellorum (Cares maxime erant) praesidiis: equites cornibus circumdat, et Cretensium auxiliares Thracumque. Rhodii Achaeos dextro cornu, sinistro mercenarios milites, lectam peditum manum, habuere; medios mixta ex pluribus gentibus auxilia: equites levisque armaturae quod erat, cornibus circumjectum. Eo die steterunt tantum acies utræque super ripam, qui tenui aqua interfluebat, torrentis: paucisque telis emissis, in castra receperunt sese. Postero die eodem ordine instructi majus aliquanto prælium, quam pro numero, edidere, pugnantium: nec enim plus terna millia peditum fuere, et centeni ferme equites: ceterum non numero tantum, nec armorum genere, sed animis quoque paribus, et æqua spe pugnarunt. Achæi primi, torrente superato, in Agrianas inpetum fecere; deinde tota prope cursu transgressa amnem acies est. Diu anceps pugna stetit: numero Achæi mille et ipsi quadrungentos loco expulere. Inclinat dein dextrum omne cornu. Macedones, usque dum ordine et velut stipata phalanx consistebat, moveri nequierunt: postquam, laeo latere nudato, circumjacere hastas in venientem ex transverso hostem conati sunt, turbati extemplo tumultum primo inter se fecerunt: terga deinde vertunt: postremo, abjectis armis, in præcipitem fugam effusi, Bargylias petentes fugebunt. Eodem et Dinocrates perfugit. Rhodii, quan-

tum diei superfuit secuti, receperunt se ad castra. U.C. 555.  
 Satis constat, si confestim victores Stratoniceam pe- A. C. 197.  
 tissent, recipi eam urbem sine certamine potuisse. Prætermissa ejus rei occasio est, dum in castellis vi-  
 cisque Perææ recipiendis tempus teritur. Interim  
 animi eorum, qui Stratoniceam præsidio obtinebant,  
 confirmati sunt: mox et Dinocrates cum iis, quæ  
 prælio supererant, copiis intravit muros. Nequid-  
 quam inde obsessa obpugnataque urbs est: recipi,  
 nisi aliquanto post, per Antiochum non potuit. Hæc  
 in Thessalia, hæc in Achaia, hæc in Asia per eosdem  
 dies ferme gesta.

XIX. Philippus quum audisset, Dardanos, trans- Philippus  
 gressos fines ab contemtu concussi tum regni, supe- Dardanos  
 riora Macedoniæ evastare, qnamvis toto prope orbe  
 terrarum, undique se snosque profligante fortuna,  
 urgebatur, tamen morte tristius ratus, Macedoniæ  
 etiam possessione pelli, delectu raptim per urbes  
 Macedonum habitu, cum sex millibus peditum et  
 quingentis equitibus circa Stobos Pæoniæ improviso  
 hostes obpressit. Magna multitudo hominum in  
 prælio, major prædandi cupidine palata per agros  
 cæsa est: quibus fuga expeditior fuit, ne tentato  
 quidem casu pugnæ, in fines suos redierunt. Ea  
 una expeditione non pro reliquo statu fortunæ facta,  
 refectis suorum animis, Thessalonicanam sese recepit.  
 Non tam in tempore Punicum bellum terminatum  
 erat, ne simul et cum Philippo foret bellandum;  
 quam opportune, jam Antiocho in Syria moliente Antiochi  
 bellum, Philippus est superatus: nam, præterquam Syriæ regis  
 quod facilius cum singulis, quam si in unum ambo  
 simul contulissent vires, bellatum est; Hispania  
 quoque sub idem tempus magno tumultu ad bellum

U. C. 555. consurrexit. Antiochus quum, priore æstate omnibus, quæ in Cœle-Syria sunt, civitatibus Ptolemæi in suam potestatem redactis, in hiberna Antiochiam concessisset; nihilo quietiores postea res habuit: omnibus enim regni viribus connisus, quum ingentes copias terrestres maritimasque comparasset, principio veris præmissis terra cum exercitu filiis duabus, Ardye ac Mithridate, jussisque Sardibus se obperiri; ipse cum classe centum tectarum navium, ad hoc levioribus navigiis cercurisque ac lembis ducantis, proficiscitur: simul per omnem oram Ciliciæque et Cariæ tentaturus urbes, quæ in ditione Ptolemæi essent; simul Philippum (necdum enim debellatum erat) exercitu navibusque adjuturus.

Legatio  
Rhodiorum ad  
Antiochum.

XX. Multa egregia Rhodii pro fide erga populum Romanum, proque universo nomine Græcorum, terra marique ausi sunt: nihil magnificentius, quam quod ea tempestate, non territi tanta mole inminen-  
tis belli, legatos ad regem miserunt Nephelida, (promontorium Ciliciæ est, inclitum födere antiquo Atheniensium) si eo non contineret copias suas, se obviam ituros; non ab odio ullo, sed ne conjugi eum Philippo paterentur, et impedimento esse Romanis liberantibus Græciam. Coracesium eo tempore Antiochus operibus obpugnabat. Zephyrio, et Solis, et Aphrodisiade, et Coryco, et, superato Aenamurio, (promontorium id quoque Ciliciæ est) Selinunte recepto, omnibus his aliisque ejus oræ eas-  
tellis, aut metu, aut voluntate, sine certamine, in ditionem acceptis, Coracesium præter spem clausis portis tenebat eum. Ibi legati Rhodiorum auditи: et quamquam ea legatio erat, quæ accendere regium animum posset, temperavit iræ: et, *legatos se Rho-*

*dum missurum, respondit, iisque mandaturum, ut re-* U. C. 555.  
*novarent vetusta jura, cum ea civitate, sua majorumque* A. C. 197.  
*suorum: et retarent eos adventum pertimescere regis,*  
*nihil his aut sociis eorum noxæ futurum fraudive:*  
*nam, Romanorum amicitiam se non violaturum, argu-*  
*mento et suam recentem ad eos legationem esse, et se-*  
*natus honorifica in se decreta responsaque.* Tum forte  
 legati redierant ab Roma, comiter auditи dimissique,  
 ut tempus postulabat, incerto adhuc adversus Phi-  
 lippum eventu belli. Quum hæc legati regis in con-  
 cione Rhodiorum agerent, nuncius venit, debellatum  
 ad Cynosephalas esse. Hoc nuncio accepto, Rho-  
 diis, demto metu a Philippo omni, erat consilium  
 obviam eundi classe Antiocho. Illam alteram curam  
 non omiserant, tuendæ libertatis civitatum socia-  
 rum Ptolemæi, quibus bellum ab Antiocho inmine-  
 bat: nam alias auxiliis juverunt, alias providendo  
 ac præmonendo conatus hostis: caussaque libertatis  
 fuerunt Cauniis, Myndiis, Halicarnassensibus, Sa-  
 miisque. Non operæ est persecui, ut quæque acta  
 in his locis sint, quum ad ea, quæ proprie Romani  
 belli sunt, vix sufficiam.

XXI. Eodem tempore et Attalus rex, æger The- Attali mors  
 bis Pergamum advectus, moritur altero et septuage- et laudes.  
 simo anno; quum quatuor et quadraginta annos  
 regnasset. Huic viro, præter divitias, nihil ad spem  
 regni fortuna dederat: his simul prudenter, simul  
 magnifice utendo, effecit, primum ut sibi, deinde ut  
 aliis non indignus videretur regno. Victis deinde  
 prælio uno Gallis, quæ tum gens recenti adventu  
 terribilior Asiæ erat, regium adscivit nomen, cuius  
 magnitudini semper animum æquavit. Summa jus-  
 titia suos rexit: unicam fidem sociis præstítit: uxo-

**U. C. 555.** rem ac liberos quatuor superstites habuit: mitis ac  
**A. C. 197.** munificus amicis fuit: regnum adeo stabile ac firmum reliquit, ut ad tertiam stirpem possessio ejus descenderit. Quam is status rerum in Asia, Græciaque, et Macedonia esset, vixdum terminato cum **Motus in Hispania.** Philippo bello, pace certe nondum perpetrata, ingens in Hispania ulteriore coortum est bellum. M. Helvius eam provinciam obtinebat. Is literis senatum certiores fecit, *Colcam et Luscinum regulos in armis esse.* Cum Colca decem et septem oppida, cum Luscino validas urbes, Cardonem et Bardonem: et maritimam oram omnem, quæ nondum animos nudaverat, ad finitimarum motus consurrecturam. His literis a M. Sergio prætore, cuius jurisdictio inter cives erat, recitatis, decreverunt Patres, ut, comitiis prætorum perfectis, cui prætori provincia Hispania obvenisset, is primo quoque tempore de bello Hispaniæ ad senatum referret.

**Consulum alteri triumphus conceditur, alteri negatur.** XXII. Sub idem tempus consules Romam venerunt: quibus in æde Bellonæ senatum habentibus, postulantibusque triumphum ob res prospere bello gestas, C. Atinius Labeo et C. Ursanius tribuni plebis, ut separatim de triumpho agerent consules, postularunt: *communem se relationem de ea re fieri non passuros, ne par honos in dispari merito esset.* Quumque Minucius utrique provinciam Italiam obtigisse diceret, communi animo consilioque se et collegam res gessisse; Cornelius adjiceret, Boios adversus se transgredientes Padum, ut Insubribus Cenomanisque auxilio essent, depopulante vicos eorum atque agros collega, ad sua tueuda aversos esse; tribuni *res tantas bello gessisse Cornelium fateri, ut non magis de triumpho ejus, quam de honore Diis immortalibus*

*habendo dubitari possit. Non tamen nec illum, nec U. C. 555. quemquam alium civem tantum gratia atque opibus A. C. 197. valuisse, ut, quum sibimet triumphum impetrasset, collegæ eundem honorem impudenter petenti daret. Q. Minucium in Liguribus levia prælia, vix digna dictu, fecisse: in Gallia magnum numerum militum amisisse. Nominabant etiam tribunos militum T. Juventium, et C. Labeonem ejus fratrem, qui adversa pugna cum multis aliis viris fortibus, civibus ac sociis, cecidissent. Oppidorum paucorum ac vicorum falsas, et in tempus simul tas, sine ullo pignore deditiones factas esse. Hæ inter consules tribunosque altercationes biduum tenuerunt, victique perseverantia tribunorum consules separatim retulerunt.*

XXIII. C. Cornelio omnium consensu decretus triumphus: et Placentini Cremonensesque addiderunt favorem consuli, gratias agentes commemo-  
rantesque, obsidione se esse ab eo liberatos: pleros-  
que etiam, quum apud hostes essent, servitute ex-  
ceptos. Q. Minucius, tentata tantum relatione,  
quum adversum omnem senatum videret, in monte  
Albano se triumphaturum, et jure imperii consul-  
aris, et multorum clarorum virorum exemplo, dixit.  
C. Cornelius de Insubribus Cenomanisque in magis- Cornelius  
tratu triumphavit: multa signa militaria tulit, multa in urbe,  
Gallica spolia captivis carpentis transvexit: multi  
nobiles Galli ante currum traducti; inter quos, qui-  
dam, Hamilcarem ducem Pœnorum fuisse, auctores  
sunt. Ceterum magis in se convertit oculos Cremo-  
nensem Placentinorumque colonorum turba pilea-  
torum, currum sequentium. Tulit in triumpho du-  
centa triginta septem millia, quingentos æris, ar-  
genti bigati septuaginta novem millia: septuagenos

U. C. 555. æris militibus divisit; duplex equiti, triplex centuriæ. A. C. 197. Minucius in monte Albano triumphat. Q. Minucius consul de Liguribus Boiisque Gallis in monte Albano triumphavit: is triumphus, ut loco, et fama rerum gestarum, et quod sumtum non erogatum ex ærario omnes sciebant, inhonorable fuit: ita signis, carpentisque, et spoliis ferme æquabat. Pecuniae etiam prope par summa fuit: æris translata ducenta et quinquaginta quatuor milia, argenti bigati quinquaginta tria millia et ducenti: militibus centurionibusque et equitibus item in singulos datum, quod dederat collega.

XXIV. Secundum triumphum consularia comitia habita: creati consules L. Furius Purpureo et M. Claudius Marcellus. Prætores postero die facti, Q. Fabius Buteo, Ti. Sempronius Longus, Q. Minucius Thermus, M'. Acilius Glabrio, L. Apustius Fullo, C. Lælius. Exitu ejus anni literæ a T. Quinctio venerunt, se signis conlatis cuin rege Philippo in Thessalia pugnasse: hostium exercitum fusum fugatumque. Hæ literæ prius in senatu a Sergio prætore, deinde ex auctoritate Patrum in concione sunt recitatæ. Ob res prospere gestas in dies quinque supplicationes decretæ. Brevi post legati et a

Macedones legati Romæ. T. Quinctio et ab rege venerunt. Macedones deducti extra urbem in villam publicam; ibique iis locus et lautia præbita: et ad ædem Bellonæ senatus est habitus. Haud multa verba facta, quuin Macedones, quæcumque senatus censuisset, id regem facturum esse, dicerent. Decem legati more majorum, quorum ex consilio T. Quinctius imperator leges pacis Philippo daret, decreti; adjectumque, ut in eo numero legatorum P. Sulpicius et P. Villius essent, qui consules provinciam Macedoniam

obtinuissent. Cosanis eo die postulantibus, ut sibi U.C. 555. colonorum numerus augeretur, mille adscribi jussi : A.C. 197. dum ne quis in eorum numero esset, qui post P. Cornelium et Ti. Sempronium consules hostis fuisset.

XXV. Ludi Romani eo anno in circo scenaque ab ædilibus curulibus, P. Cornelio Scipione et Cn. Manlio Vulsone, et magnificentius, quam alias, facti, et lætius propter res bello bene gestas spectati, totique ter instaurati: plebeii septies instaurati. Aci- lius Glabrio, C. Lælius eos ludos fecerunt. Ex ar- gente multaticio tria signa ænea, Cereri, Liberoque, et Liberæ, posuerunt. L. Furius et M. Claudius U.C. 556. Marcellus, consulatu inito, quoniam de provinciis age- A.C. 196. retur, et Italiam utrique provinciam senatus decer- neret, ut Macedoniam cum Italia sortirentur, pe- tebant. Marcellus, provinciæ cupidior, pacem si- mulatam ac fallacem dicendo, et rebellaturum, si exercitus inde deportatus esset, regem, dubios sententiæ Patres fecerat. Et forsitan obtinuissent con- sules, ni Q. Marcius Rex et C. Atinius Labeo, tri- buni plebis, se intercessuros dixissent; ni prius ipsi ad plebem tulissent, vellent juberentne cum rege Phi- Pax cum lippo pacem esse. Ea rogatio in Capitolio ad ple- Macedoni- bem lata est: omnes quinque et triginta tribus, uti bus. rogatae, jusserunt. Et quo magis pacem ratam esse in Macedonia vulgo lætarentur, tristis ex Hispania Tristis nun- nuncius adlatus effecit, vulgatæque literæ, C. Sem- cius ex His- pronium Tuditianum proconsulem in citeriore Hispania pælio victum: exercitum ejus fusum fugatumque, et inlustres viros in acie cecidisse. Tuditianum, cum gravi vulnere latum ex pælio, haud ita multo post exspirasse. Consulibus ambobus Italia provincia cum his legio- nibus, quas superiores consules habuissent, decreta,

U. C. 556. et ut quatuor legiones novas scriberent: duas, quæ,  
A. C. 196. quo senatus censuisset, mitterentur: et T. Quinctius  
Flamininus cum duabus legionibus provinciam eo-  
dem exercitu obtinere jussus: imperium ei proroga-  
tum satis jani ante videri esse.

XXVI. Prætores deinde provincias sortiti, L. Apustius Fullo urbanam jurisdictionem, M'. Acilius Glabrio inter cives et peregrinos, Q. Fabius Buteo Hispaniam ulteriorem, Q. Minucius Therinus citeriorem, C. Lælius Siciliam, Ti. Sempronius Longus Sardiniam. Q. Fabio Buteoni et Q. Minucio, qui bus Hispaniæ provinciæ evenerant, consules legio- nes singulas ex quatuor ab se scriptis, quas videre- tur, uti darent, decretum est; sociū ac nominis Latini quaterna millia peditum, trecentos equites: hique primo quoque tempore in provincias ire jussi. Bellum in Hispania quinto post anno exortum est, quam simul cum Punico bello fuerat finitum. Prius- quam hi prætores ad bellum prope novum, quia tuum primum suo nomine, nullo Punico exercitu aut duce, ad arma ierant, proficiscerentur, aut ipsi consules ab urbe moverent; procurare, ut adsolet, prodigia, quæ nunciabantur, jussi. L. Julius Sequestris, in Sabinos proficiscens, fulmine ipse equusque exani- mati fuerant: ædes Feroniæ in Capenate de cœlo tacta erat: ad Monetæ duarum hastarum spicula arserant: lupus, Esquilina porta ingressus, frequen- tissima parte urbis, quum in forum decurisset, Tus- co vico atque Intemelio, per portam Capenam prope intactus evaserat. Hæc prodigia majoribus hostiis sunt procurata.

Lentulus  
urbem o-  
vans in-  
greditur.

XXVII. Iisdem diebus Cn. Cornelius Lentulus, qui ante Sempronium Tuditanum citeriorem Hispa-

niam obtinuerat, ovans ex senatusconsulto urbem est U. C. 556.  
 ingressus : tulit præ se auri mille et quingenta quindecim pondo, argenti viginti millia, signati deuarios triginta quatuor millia, et quingentos quinquaginta. A. C. 196.  
**L.** Stertinus ex ulteriore Hispania, ne tentata quidem triumphi spe, quinquaginta millia pondo argenti in ærarium tulit : et de manubiis duos fornices in foro Boario ante Fortunæ ædem et matris Matutæ, unum in maximo circulo fecit : et his fornicibus signa aurata inposuit. Hæc per biemem ferme aeta. Hibernabat eo tempore Athenis Quinctius, a quo quum multa socii peterent, Bœoti petierunt inpetraveruntque, ut hi, qui suæ gentis militassent apud Philippum, sibi restituerentur : id a Quinctio facile inpe-tratum ; non quia satis dignos eos credebat, sed quia, Antiocho rege jam suspecto, favor concilian-dus nomini Romano apud civitates erat. Restitutis, confestim adparuit, quam nulla inita apud Bœotos gratia esset : nam et ad Philippum gratias agentes pro redditis hominibus, perinde atque ipsi id a Quinctio et Romanis datum esset, miserunt : et comitiis proximis Bœotarchen nullam aliam ob caus-sam Brachyllam quemdam, quam quod præfectus Brachyllas Bœotorum apud regem militantum fuisse, fece-Bœotarcha-runt ; præteritis Zeuxippo, et Pisistrato, aliisque, qui Romanæ societatis auctores fuerant. Id ægre et in præsentia hi passi, et in futurum etiam metum ceperunt, quum ad portas prope sedente exercitu Romano ea fierent, quidnam se futurum esset, pro-fectis in Italiam Romanis ; Philippo ex propinquo socios adjuvante, et infesto his, qui partis adversæ fuissent.

XXVIII. Dum Romana arma propinqua habe-VOL. III. T

U. C. 556. bant, tollere Brachyllam, principem fautorum regis,  
A. C. 196. statuerunt: et tempore ad eam rem capto, quum in  
publico epulatus reverteretur domum tenuentus,  
prosequentibus mollibus viris, qui joci caussa con-  
vivio celebri interfuerant; ab sex armatis, quorum  
Occiditur. tres Italici, tres Ætolici erant, circumventus occidi-  
tur. Fuga comitum et quiritatio facta, et tumultus  
tota urbe discurrentium cum luminibus: percusso-  
res proxima porta evaserunt. Luce prima concio  
frequens, velut exstante indicio, ad vocem præconis  
convocata in theatro erat. Palam ab suo comitatu  
et obsecenis illis viris fremebant interfectum: ani-  
mis autem Zeuxippum auctorem destinabant cædis.  
In præsentia placuit comprehendendi eos, qui simul  
fuissent, quæstionemque ex his haberi: qui dum  
quæruntur, Zeuxippus, consimili animo avertendi  
ab se criminis caussa in concessionem progressus, errare  
ait homines, qui tam atrocem cædem pertinere ad  
illos semiviros crederent; multaque in eam partem  
probabiliter argumentatus, quibus fidem apud quos-  
dam fecit, numquam, si conscius esset, oblaturum se  
multitudini, mentionemve cædis, nullo lacescente,  
facturum fuisse. Alii non dubitare, obviam eundo  
inpudenter criminis suspicionem averti. Torti post  
paullo insolentes, quum scirent ipsi opinionem om-  
nium, ea pro indicio usi, Zeuxippum et Pisistratum  
nominaverunt: nullo adjecto, cur scire quidquam  
viderentur, argumento. Zeuxippus tamen cum Stra-  
tonida quodam nocte perfugit Tanagram, suam ma-  
gis conscientiam, quam indicium hominum nullius  
rei considorum, metuens. Pisistratus, spretis indi-  
cibus, Thebis mansit. Scrus erat Zeuxippo, totius  
internuncius et minister rei; quem indicem Pisistra-

tus timens, eo ipso timore ad indicium protraxit. U. C. 556.  
 Literas ad Zeuxippum mittit, *servum conscientum tolleret*. A. C. 196.  
*Non tam idoneum ad celandam rem eum videri sibi, quam ad agendam fuerit.* Has qui tulit literas, jussit Zeuxippo dare quamprimum: is, quia non sibi conveniendi ejus copia fuit, ipsi illi servo, quem ex omnibus domino fidissimum credebat, tradidit: et adjecit, a Pisistrato de re magnopere pertinente ad Zeuxippum esse. Conscientia ictus, quum extemplo traditurum eas adfirmasset, aperit. Perlectis literis, pavidus Thebas refugit: et Zeuxippus quidem, fuga servi motus, Athenas, tutiorem exsilio locum ratus, concessit. De Pisistrato aliquæ quæstiones tormentis habitæ, et sumtum supplicium est.

XXIX. Efferavit ea cædes Thebanos Bœotosque Bœoti in omnes ad exsecrabile odium Romanorum; Zeuxip- Romanos efferati. pum principem gentis id facinus consisse: ad rebellandum neque vires, neque ducem habebant. Proxiimum bello quod erat, in latrocinium versi, alios hospites, alios vagos per hiberna milites, ad varios commeantes usus, excipiebant: quidam in ipsis itineribus, ad notas latebras insidiantium pars in deserta per fraudem deversoria devecti deductique obprimebantur: postremo non tantum odio, sed etiam aviditate prædæ, ea facinora faciebant; quia, negotiandi ferme caussa argentum in zonis habentes, in commeatibus erant. Quum primo pauci, deinde in dies plures desiderarentur, infamis esse Bœotia omnis cœpit: et timidius, quam in hostico, egredi castris miles. Tum Quintcius legatos ad querendum de latrociniis per civitates mittit. Plurimi pedites circa Copaidem paludem inventi: ibi ex lino oruta extractaque ex stagno cadavera, saxis aut am-

U.C. 556. phoris, ut pondere traherentur in profundum, ad-  
▲. C. 196. nixa: multa facinora Acræphiæ et Coroneæ facta  
inveniebantur. Quintius primo noxios tradi sibi  
jussit, et pro quingentis militibus (tot enim inter-  
cepti erant) quingenta talenta Bœotos conferre.  
Quorum neutrum quum fieret, verbis tantum civita-  
tes excusarent, nihil publico consilio factum esse;  
missis Athenas et in Achiam legatis, qui testaren-  
tur sociis, justo pioque bello se persecuturum Bœo-  
tos, et cum parte copiarum P. Claudio Acræphiam  
ire jusso, cum parte Coroneam circumcedid: evasta-  
tis prius agris, quam ab Elatia duo diversa agmina  
iere. Hac perculti clade Bœoti, quum omnia ter-  
rore ac fuga complessent, legatos mittunt: qui  
quum in castra non admitterentur, Achæi Athenien-  
sesque supervenerunt. Plus auctoritatis Achæi ha-  
buerunt, deprecantes: ac, ni impetrassent pacem  
Bœotis, bellum simul gerere decreverunt. Per  
Achæos et Bœotis copia adeundi adloquendique  
Romanum facta est, jussisque tradere noxios, et  
multæ nomine triginta talenta conferre, pax data,  
et ab obpugnatione recessum.

**XXX.** Post paucos dies decem legati ab Roma  
Leges pa-  
cis cum  
Philippo. venerunt, quorum ex consilio pax data Philippo in  
has leges est. *Omnes Græcorum civitates, quæ in  
Europa, quæque in Asia essent, libertatem ac suas  
leges haberent: quæ earum sub ditione Philippi fuis-  
sent, præsidia ex his Philippus deduceret: his, quæ in  
Asia essent, Euromo, Pedasisque, et Bargylis, et Iasso,  
et Myrina, et Abydo, et Thaso, et Perintho: eas quo-  
que enim placere liberas esse. De Cianorum libertate,  
Quinctius Prusiæ Bithynorum regi scriberet, quid sena-  
tui et decem legatis placuisset. Captivos transfugas-*

*que reddere Philippum Romanis, et naves omnes tectas U. C. 556.  
tradere, quin et regiam unam inhabilis prope magnitudinis, quam sexdecim versus remorum agebant. Ne plus quingentis armatorum haberet, neve elephantum ullum. Bellum extra Macedoniæ fines ne injussu senatus gereret. Mille talentum daret populo Romano: dimidium præsens, dimidium pensionibus decem annorum. Valerius Antias, quaternum millium pondo argenti vectigal in decem annos, triginta quaterna millia pondo, et ducenta, præsens viginti millia pondo: idem nominatim adjectum scribit, ne cum Eumene, Attali filio, (novus is tum rex erat) bellum gereret. In hæc obsides accepti, inter quos Demetrius Philippi filius. Adjicit Valerius Antias, Attalo absenti Æginam insulam elephantosque dono datos, et Rhodiis Stratoniceam Cariæ atque alias urbes, quas Philippus tenuisset: Atheniensibus insulas datas, Paron, Imbrum, Delum, Scyrum.*

XXXI. Omnibus Græciæ civitatibus hanc pacem adprobantibus, soli Ætoli id decretum decem legatorum clam mussantes carpebant: *literas ianæ vana Ætolorum specie libertatis adumbratas esse. Cur enim alias Romanis tradi urbes, nec nominari eas, alias nominari, et sine traditione juberi liberas esse? nisi ut, quæ in Asia sint, liberentur, longinquitate ipsa tutiores: quæ in Græcia sint, ne nominatæ intercipiantur, Corinthus, et Chalcis, et Oreum, cum Eretria et Demetriade.* Nec tota ex vano criminatio erat: dubitabatur enim de Corintho, et de Chalcide, et Demetriade, quia in senatusconsulto, quo missi decem legati ab urbe erant, ceteræ Græciæ atque Asiæ haud dubie libabantur: de his tribus urbibus legati, quod tempora reipublicæ postulassent, id e republica fideque sua

M.C. 556. facere, statuere jussi erant. Antiochus rex erat,  
 A. C. 196. quem transgressorum in Europam, quum primum ei  
 res suæ placuissent, non dubitabant: ei tam oppor-  
 tunas ad occupandum patere urbes nolebant. Ab  
 Consulta-  
 tio de li-  
 beranda  
 Græcia. Elatia Anticyram cum decem legatis, inde Corin-  
 thum trajecit: ibi consilia decem legatorum tracta-  
 bantur. Idemtidem Quinctius, liberandam omnem  
*Græcianam*, si *Ætolorum* linguas retundere, si veram  
 caritatem, majestatem, apud omnes nominis Romani  
 vellent esse: si fidem facere, ad liberandam *Græciam*,  
 non ad transferendum a Philippo ad se imperium, se  
 mare trajecisse. Nihil contra ea de libertate urbium  
 alii dicebant: ceterum *ipsis tutius esse, manere paul-*  
*lis per sub tutela præsidii Romani, quam pro Philippo*  
*Antiochum dominum accipi.* Postremo ita decretum  
 est: Corinthus redderetur *Achaïs*, ut in *Acrocorintho*  
 tamen præsidium esset: Chalcidem ac Demetriadem  
 retineri, donec cura de Antiocho decessisset.

Isthmii  
 ludi.

XXXII. Isthmiorum statum ludicrum aderat; semper quidem et alias frequens, quum propter spectaculi studium insitum genti, quo certamina omnis generis artium, viriumque, ac pernicitatis visuntur; tum quia propter opportunitatem loci, per duo diversa maria, omnium Græcorum undique conventus erat. Sed exspectatione erecti, qui deinde status futurus Græciæ, quæ sua fortuna esset: alii non taciti solum opinabantur, sed sermonibus etiam serebant. Romani ad spectaculum considererunt; et præco cum tubicine, ut mos est, in medium arenam, unde solleimi carmine ludicrum indici solet, processit, et, tuba silentio facto, ita pronunciat: SENATUS ROMANUS ET T. QUINCTIUS IMPERATOR, PHI-  
 LIFFO REGE MACEDONIBUSQUE DEVICTIS, LIBEROS,

Libertas  
 Græciæ  
 promul-  
 gata.

INMUNES, SUIS LEGIBUS ESSE JUBET CORINTHIOS, U. C. 556.  
 PHOCENSES, LOCRENSESQUE OMNES, ET INSULAM A. C. 196.  
 EUBŒAM, ET MAGNETAS, THESSALOS, PERRHÆBOS,  
 ACHÆOS PHTHIOTAS. Percensuerat omnes gentes,  
 quæ sub ditione Philippi regis fuerant. Audita  
 voce præconis, majus gaudium fuit, quam quod uni-  
 versum homines caperent. Vix satis credere se quis-  
 que audisse: alii alios intueri, mirabundi velut som-  
 nii vanam speciem: quod ad quemque pertineret,  
 suarum aurium fidei minimum credentes, proximos  
 interrogabant. Revocatus præco, quum unusquisque  
 non audire, sed videre libertatis suæ nuncium ave-  
 ret, iterum pronunciaret eadem. Tum ab certo jam  
 gaudio tantus cum clamore plausus est ortus, toties-  
 que repetitus, ut facile adpareret, nihil omnium bo-  
 norum multitudini gratius, quam libertatem esse.  
 Ludicrum deinde ita raptim peractum est, ut nullius  
 nec animi, nec oculi spectaculo intenti essent: adeo  
 unum gaudium præoccupaverat omnium aliarum  
 sensum voluptatum.

XXXIII. Ludis vero dimissis, cursu prope omnes  
 tendere ad imperatorem Romanum: ut, ruente tur-  
 ba in unum, adire, contingere dextram cupientium,  
 coronas lemniscosque jacientium, haud procul peri-  
 culo fuerit. Sed erat trium ferme et triginta anno-  
 rum; et quum robur juventæ, tum gaudium ex tam  
 insigni gloriæ fructu, vires subpeditatabant: nec præ-  
 sens omnium modo effusa lætitia est; sed per multos  
 dies gratis et cogitationibus, et sermonibus revo-  
 cata: *Esse aliquam in terris gentem, quæ sua impensa,*  
*suo labore ac periculo bella gerat pro libertate alio-*  
*rum: nec hoc finitimus, aut propinquæ vicinitatis ho-*  
*minibus, aut terris continentis junctis præstet: maria*

U.C. 556. *trajiciat, ne quod toto orbe terrarum injustum impere*  
 A.C. 196. *rium sit, et ubique jus, fas, lex potentissima sint. Una*  
*voce præconis liberatas omnes Græciae atque Asiae ur-*  
*bes. Hoc spe concipere, audacis animi fuisse: ad*  
*effectum adducere, virtutis et fortunæ ingentis.*

Legatio-  
nes.

XXXIV. Secundum ista jam Quinctius et decem legati legationes regum, gentium, civitatumque audiwere. Primi omnium regis Antiochi vocati legati sunt: his eadem, quæ fere Romæ erant, verba sine fide rerum jactata. Nihil jam perplexe, ut ante, quum dubiæ res incolumi Philippo erant, sed aperte pronunciatum, ut excederet Asiae urbibus, quæ aut Philippi, aut Ptolemæi regum fuissent: abstineret liberas, omnesque Græcas. Ante omnia denuntiatum, ne in Europam aut ipse transiret, aut copias trajiceret. Dimisis regis legatis, conventus gentium civitatumque est haberi coepitus: eoque matruis peragebatur, quod decreta decem legatorum civitates nominatim pronunciabant. Orestis, (Macedonum ea gens est) quod primi ab rege defecissent, suæ leges redditæ. Magnetes, et Perrhæbi, et Dolopes, liberi quoque pronunciati. Thessalorum genti, præter libertatem concessam, Achæi Phthiotæ dati, Thebis Phthioticis et Pharsalo excepto. Ætolos de Pharsalo et Leucade postulantes, ut ex fœdere sibi restituerentur, ad senatum rejecerunt. Phocenses, Locrenses, et quæ sicut ante fuerant adjecta, decreti auctoritate his contribuerunt. Corinthus, et Triphylia, et Heræa (Peloponnesi et ipsa urbs est) redditæ Achæis. Oreum et Eretriam decem legati Eumeni regi, Attali filio, dabant: dissentiente Quinctio, venit res in arbitrium senatus: senatus libertatem his civitatibus dedit, Carysto adjecto.

Pleurato Lycus et Partbini dati : Illyriorum utra- U. C. 556.  
que gens sub ditione Philippi fuerat. Amynandrum A. C. 196.  
tenere jussérunt castella, quæ per belli tempus Phi-  
lippo capta ademisset.

XXXV. Dimisso conventu, decem legati, partiti  
munia inter se, ad liberandas suæ quisque regionis  
civitates discesserunt: P. Lentulus Bargylias, L.  
Stertinius Hephaestiam et Thasum et Thraciæ ur-  
bes, P. Villius et L. Terentius ad regem Antiochum,  
Cn. Cornelius ad Philippum. Qui, de minoribus Cn. Corne-  
rebus editis mandatis, percunctatus, si consilium lius Philip-  
non utile solum, sed etiam salutare, admittere auri- pum con-  
venit. bus posset, quum rex gratias quoque se acturum di-  
ceret, si quid, quod in rem suam esset, expromeret,  
magnopere ei suasit, quoniam pacem inpetrasset, ad  
societatem amicitiamque petendam mitteret Romam  
legatos; ne, si quid Antiochus moveret, exspectasse,  
et temporum opportunitates captasse ad bellandum,  
videri posset. Ad Tempe Thessalica Philippus est  
conventus: qui quum se missurum extemplo legatos  
respondisset; Cornelius Thermopylas, ubi frequens Mox adit  
Græciæ statis diebus esse solet conventus, (Pylai- concilium  
cum adpellant) venit: Ætolos præcipue monuit, ut  
constanter et fideliter in amicitia populi Romani  
permanerent. Ætolorum principes alii interquesti  
sunt, quod non idem erga suam gentem Romanorum  
animus esset post victoriam, qui in bello fuis-  
set: alii ferocius incusarunt, exprobraruntque, non  
modo vinci sine Ætolis Philippum, sed ne transire  
quidem in Græciam Romanos potuisse. Adversus ea  
respondere (ne in altercationem excederet res) quum  
supersedisset Romanus; omnia eos æqua inpetratu-  
ros, si Romam misissent, dixit: itaque ex auctoritate

U. C. 556. ejus decreti legati sunt. Hunc finem bellum cum  
A. C. 196. Philippo habuit.

Servorum **XXXVI.** Quum hæc in Græcia Macedoniaque et  
conjuratio in Etruria. Asia gererentur, Etruriam infestam prope conjura-  
tio servorum fecit: ad quærendam obprimendamque  
eam M'. Acilius prætor, cui inter cives peregrinos-  
que jurisdictione obtigerat, cum una ex duabus legione  
urbana missus, alios jam congregatos pugnando vi-  
cit; ex his multi occisi, multi capti: alios verbera-  
tos crucibus adfixit, qui principes conjurationis fue-  
rant: alios dominis restituit. Consules in provin-  
cias profecti sunt. Marcellum Boiorum ingressum  
fines, fatigato per diem totum milite via facienda,  
castra in tumulo quodam ponentem, Corolamus,  
**Boii Ro-**  
**manos cæ-**  
**dunt.** regulus Boiorum, cum magna manu adortus, ad  
tria millia hominum occidit: et inlustres viri ali-  
quot in illo tumultuario prælio ecederunt, inter  
quos præfecti sociūm, T. Sempronius Gracchus, M.  
Junius Silanus; et tribuni militum de legione se-  
cunda, A. Ogulnius et P. Claudius: castra tamen  
ab Romanis impigre permunita retentaque, quum  
hostes a prospera pugna nequidquam obpugnassent.  
Stativis deinde eisdem per dies aliquot sese tenuit,  
dum et saucios curaret, et a tanto terrore animos  
militum reficeret. Boii, ut est gens miuime ad mo-  
ræ tædium patiens, in castella sua vicosque dilapsi  
**Victoria**  
**Marcelli**  
**de Insu-**  
**bribus.** sunt. Marcellus, Pado confestim trajecto, in agrum  
Comensem, ubi Insubres, Comensibus ad arma ex-  
citatis, castra habebant, ducit legiones: in ipso itinere  
prælium committunt: et primo adeo acriter invase-  
runt, ut antesignanos impulerint. Quod ubi animi  
advertisit, veritus ne moti semel pellerentur, cohorti  
Marsorum obposuit: et equitum Latinorum

omnes turmas in hostem emisit. Quorum quum pri- U. C. 556.  
mus secundusque impetus retudisset inferentem se fe- A. C. 196.  
rociter hostem, confirmata et reliqua acies Romana  
restitit primo, deinde signa acriter intulit: nec ul-  
tra sustinuerunt certamen Galli, quin terga verte-  
rent, atque effuse fugerent. In eo prælio supra qua-  
draginta millia hominum cæsa, Valerius Antias scri-  
bit: et quingenta septem signa militaria capta, et  
carpenta quadringenta triginta duo, et aureos tor-  
ques multos, ex quibus unum magni ponderis Clau-  
dius in Capitolio Jovi donum in æde positum scribit.  
Castra eo die Gallorum expugnata direptaque: et  
Comum oppidum intra dies paucos captum. Ca-  
stella inde duodetriginta ad consulem defecerunt. Id  
quoque inter scriptores ambigitur, utrum in Boios  
prius, an Insubres, consul exercitum induxerit, adver-  
samque prospera pugna oblitteraverit: an victoria, ad  
Comum parta, deformata clade in Boiis accepta sit.

XXXVII. Sub hæc tam varia fortuna gesta, L.  
Furius Purpurco alter consul per tribum Sappiniam  
in Boios venit. Jam castro Mutilo adpropinquabat,  
quum, veritus ne intercluderetur simul a Boiis  
Liguribusque, eadem via, qua adduxerat, reduxit,  
et magno circuitu per aperta, eaque tuta loca, ad  
collegam pervenit: dein junctis exercitibus primum  
Boiorum agrum usque ad Felsinam oppidum popu- Uterque  
lantes peragraverunt. Ea urbs, ceteraque castella, <sup>cos. Boio-</sup>  
et Boii fere omnes, præter juventutem, quæ præ- <sup>rum agros</sup> populatur.  
dandi caussa in armis erat, (tunc in devias silvas re-  
cesserat) in ditionem venerunt. In Ligures de-  
inde traductus exercitus. Boii negligentius coactum  
agmen Romanorum, quia ipsi procul abesse vide-

**U.** C. 556. rentur, improviso adgressuros se rati, per occultos

**A.** C. 196. saltus secuti sunt: quos non adepti, Pado repente

navibus trajecto, Lævos Libuosque quum pervas-  
tassent, redeentes inde Ligurum extremo fine, cum  
agresti præda, in agmen incident Romanum. Ce-  
lerius prælium acriusque commissum, quam si tem-

Vincun-  
tur acie  
Boii.

tempore locoque ad certamen destinatis, præparatis ani-  
mis concurrisserent. Ibi, quantam vim ad stimulan-  
dos animos ira haberet, adparuit: nam ita cædis  
magis, quam victoriæ, avidi pugnarunt Romani, ut  
vix nuncium cladi hosti relinquerent. Ob eas res

Marcellus  
triump-  
hat.

gestas, consulum literis Rōnam adlatis, supplicatio  
in triduum decreta est. Brevi post Marcellus Rō-  
nam venit, triumphusque ei magno consensu Pa-  
trum est decretus. Triumphavit in magistratu de  
Insubribus Comensibusque. Boiorum triumphi  
spem collegæ reliquit: quia ipsi proprie adversa  
pugna in ea gente evenerat, collegæ secunda. Multa  
spolia hostium captivis carpentis traducta, multa  
militaria signa lata, æris trecenta viginti millia, ar-  
genti bigati duecenta triginta quatuor millia: in pe-  
dites singulos dati octingenti æris: triplex equiti  
centurionique.

Antiochus  
Asiam oc-  
cupare ni-  
titur.

XXXVIII. Eodem anno Antiochus rex, quum  
hibernasset Ephesi, omnes Asiae civitates in anti-  
quam imperii formulam redigere est conatus: reli-  
quias quidem, aut quia locis planis positæ erant, aut  
quia parum mœnibus armisque ac juventuti fide-  
bant, haud difficulter jugum accepturas. Smyrna  
et Lampsacus libertatem usurpabant: periculumque  
erat, ne, si concessum his foret, quos in Theba  
Smyrnam in Æolide Ioniane, Lampsacum in Hel-

lesponto, aliæ urbes seqnerentur. Igitur et ipse ab U. C. 556.  
 Epheso ad Smyrnam obsidem A. C. 196.  
 Abydi copiæ erant, præsidio tantum modico relicto,  
 duci ad Lampsacum obpugnandum jussit. Nec vi  
 tantum terrebat: sed, per legatos leniter adloquen-  
 do castigandoque temeritatem et pertinaciam, spem  
 conabatur facere, brevi, quæ peterent, habituros;  
 sed quum satis et ipsis, et omnibus aliis adpareret,  
 ab rege impetratam eos libertatem, non per occa-  
 sionem raptam, habere. Adversus quæ responde-  
 bant, *Nihil neque mirari, neque succensere Antiochum*  
*debere, si spem libertatis differri non satis æquo animo*  
*paterentur.* Ipse initio veris, navibus ab Epheso  
 profectus, Hellespontum petit; terrestres copias Chersones-  
 Madytum trajicit, Chersonesi urbem; terrestri na-  
 valem exercitum junxit: et, quia clauserant portas,  
 circumdedic mœnia armatis, et jam opera admo-  
 venti, deditio est facta: idem metus tum incolentes  
 alias Chersonesi urbes in ditionem dedit. Lysima-  
 chiam inde omnibus simul navalibus terrestribusque  
 copiis venit: quam quum desertam ac stratam  
 prope ruinis invenisset, (ceperant autem, direptam-  
 que incenderant Thracis paucis ante annis) cupidio  
 eum restituendi nobilem urbem, et loco sitam op-  
 portuno, cepit. Itaque omni cura simul est ad-  
 gressus et tecta murosque restituere, et partim re-  
 dimere servientes Lysimachienses, partim fuga spar-  
 sos per Hellespoutum Chersonesumque conquerire  
 contrahereque: partim novos colonos, spe conimo-  
 dorum proposita, adscribere, et omni modo fre-  
 quentare. Simul ut Thracum submoveretur metus,  
 ipse parte dimidia terrestrium copiarum ad depopu-

sum occu-  
pat.

Lysima-  
chiam re-  
stituit.

**U. C. 556.** landum proxima Thraciae est profectus : partem  
**A. C. 196.** navalesque socios omnes reliquit in operibus refi-  
 ciendæ urbis.

Legato-  
 rum Rom.  
 cum An-  
 tiocho  
 conlo-  
 quium.

**XXXIX.** Sub hoc tempus et **L. Cornelius** mis-  
 sus ab senatu ad dirimenda inter Antiochum Ptole-  
 mæumque reges certamina, Selymbriæ substitit : et  
 decem legatorum **P. Lentulus** a Bargyliis, **P. Vil-  
 lius** et **L. Terentius** a Thasso, Lysimachiam peti-  
 erunt : eodem et a Selymbria **L. Cornelius**, et ex  
 Thracia post paucos dies Antiochus convenerunt.  
 Primus congressus cuin legatis, et deinceps invita-  
 tio benigna et hospitalis fuit : ut de mandatis sta-  
 tuque præsenti Asiæ agi cœptum est, animi exaspe-  
 rati sunt. Romani, omnia acta ejus, ex quo tem-  
 pore e Syria classe solvisset, displicere senatui, non  
 dissimulabant, restituique Ptolemæo civitates om-  
 nes, quæ ditionis ejus fuissent, æquum censebant.  
*Nam quod ad eas civitates adtineret, quas a Philippo  
 possessas Antiochus per occasionem, averso Philippo in  
 Romanum bellum, intercepisset, id vero ferendum non  
 esse, Romanos per tot annos terra marique tanta peri-  
 culæ ac labores exhausisse, Antiochum belli præmia  
 habere.* Sed ut in Asiam adventus ejus dissimulari ab  
 Romanis, tamquam nihil ad eos pertinens, potuerit ;  
 quod jam etiam in Europam omnibus navalibus ter-  
 restribusque copiis transierit, quantum a bello aperto  
 Romanis abesse ? Illum quidem, etiamsi in Italiam  
 trajiciat, negaturum.

**XL.** Ad ea rex, *Satis jam ante videre se, Romanos  
 inquirere, quid regi Antiocho faciendum ; at, quo usque  
 terra marique progrediendum fuerit ipsis, non cogi-  
 tare.* Asiam nihil ad populum Romanum pertinere :

*nec magis illis inquirendum esse, quid Antiochus in U.C. 556.  
Asia, quam Antiochō, quid in Italia populus Romanus A.C. 196.  
faciat. Quod ad Ptolemaeum adtineat, cui ademtas  
civitates querantur; sibi cum Ptolemæo et amicitiam  
esse, et id agere se, ut brevi etiam adfinitas jungatur.  
Nec ex Philippi quidem adversa fortuna spolia ulla se  
petisse: aut adversus Romanos in Europam trajecisse,  
\*\*\*\*\* fuerit, (quo victo onnia, quæ illius fuissent,  
jure belli Seleuci facta sint) existimare suæ ditionis  
esse. Occupatis majoribus suis rerum aliarum alia  
cura, primo quædam ex his Ptolemaeum, deinde et  
Philippum, usurpando aliena possedisse: sicut quæ-  
dam ex proxima Thracia, quæ indubitate Lysimachi  
fuerint. Ad ea facienda in antiquum venisse: et Lysi-  
machiam, deletam Thracum inpetu, de integro condere,  
ut Seleucus filius eam sedem regni habeat.*

XLI. His disceptationibus per dies aliquot habi- Re infecta  
tis, rumor sine ullo satis certo auctore adlatus de disceditur.  
morte Ptolemæi regis, ut nullus exitus inponere-  
tur sermonibus. Nam dissimulabat pars utraque se  
audisse; et L. Cornelius, cui legatio ad duos reges,  
Antiochum Ptolemaeumque, mandata erat, spatium  
modici temporis ad convenientum Ptolemaeum pe-  
tebat: ut, priusquam moveretur aliquid in nova  
possessione regni, perveniret in Ægyptum; et An-  
tiochus suam fore Ægyptum, si tum occasio esset,  
censebat. Itaque, dimissis Romanis, relichtoque Se-  
leuco filio cum terrestribus copiis ad restituendam,  
ut instituerat, Lysimachiam, ipse onni classe navi-  
gans Ephesum, legatis ad Quinetium missis, qui ad fi-  
dem de societate agerent, oram Asiæ legens, pervenit  
in Lyciam: Patarisque cognito, vivere Ptolemaeum,  
navigandi quidem in Ægyptum omissum consilium

**U. C. 556.** est. Cyprum nihilominus tendens, quum Chelidonium promontorium superasset, paullisper seditione remigum est retentus in Pamphylia circa Eurymedontem amnem. Inde profectum eum ad capita (quæ vocant) Sari fluminis fœda tempestas oborta prope cum omni classe demersit: multæ naves ejectæ: multæ ita haustræ mari, ut nemo in terram enaverit. Magna vis hominum ibi interiit, non remigum tantum militumque ignotorum, sed etiam insignium amicorum. Conlectis reliquiis naufragii, quum res non in eo esset, ut Cyprum tentaret, minus opulento agmine, quam profectus erat, Seleuciam reddit: ibi subduci navibus jussis (jam enim et hiems instabat) ipse in hiberna Antiochiam processit. In hoc statu regum erant res.

**Triumviri epulones.** XLII. Romæ eo primum anno triumviri epulones facti, C. Licinius Lucullus tribunus, qui legem de creandis his tulerat, P. Manlius, et P. Porcius Læca: his triumviris, item ut pontificibus, lege datum togæ prætextæ habendæ jus. Sed magnum certamen cum omnibus sacerdotibus eo anno fuit quæstoribus urbanis, Q. Fabio Labeoni et L. Aurelio. Pecunia opus erat, quod ultimam pensionem pecuniæ in bellum conlatæ persolvere placuerat privatis. Quæstores ab auguribus pontificibusque, quod stipendum per bellum non contulissent, petebant: ab **Tributum a sacerdotibus so-** sacerdotibus tribuni nequidquam adpellati, omniumque annorum, per quos non dederant, exactum est. Eodem anno duo mortui pontifices, novique in eorum locum subfecti, M. Marcellus consul in locum C. Sempronii Tuditani, qui prætor in Hispania decesserat: et L. Valerius in locum M. Cornelii Cethigi. Et Q. Fabius Maximus augur mortuus est

admodum adolescens, priusquam ullum magistratum U. C. 556.  
caperet : nec eo anno augur in ejus locum est sub- A. C. 196.  
fectus. Comitia iude consularia habita a M. Mar-  
cello consule : creati consules L. Valerius Flaccus,  
M. Porcius Cato. Prætores inde facti C. Fabricius  
Luscinus, C. Atinius Labeo, Cn. Manlius Vulso,  
Ap. Claudius Nero, P. Manlius, P. Porcius Læca.  
Ædiles curules, M. Fulvius Nobilior et C. Flaminius,  
tritici decies centum millia binis æris populo  
diviserunt : id C. Flaminii honoris caussa ipsius,  
patrisque, advexerant Siculi Romam. Flaminius  
gratiam ejus communicaverat cum collega. Ludi  
Romani et adparati magnifice sunt, et ter toti in-  
staurati. Ædiles plebis, Cn. Domitius Ahenobarbus  
et C. Scribonius Curio, multos pecuarios ad populi  
judicium adduxerunt : tres ex his condemnati sunt ;  
ex eorum multaticia pecunia ædem in insula Fauni  
fecerunt. Ludi plebeii per biduum instaurati, et  
epulum fuit ludorum caussa.

**XLIII.** L. Valerius Flaccus et M. Porcius, quo U. C. 557.  
die magistratum inierunt, de provinciis quum ad A. C. 195.  
senatum retulissent, Patres censuerunt, *Quum in*  
*Hispania tantum gliseret bellum, ut jam consulari et*  
*duce et exercitu opus esset, placere, consules Hispaniam*  
*citeriorem et Italiam provincias aut comparare*  
*inter se, aut sortiri. Utri Hispania provincia evenisset,*  
*eum duas legiones et quinque millia socium Latini*  
*nominis, et quingentos equites secum portare, et naves*  
*longas viginti ducere. Alter consul duas legiones*  
*scriberet. His Galliam provinciam obtineri satis esse,*  
*fractis proximo anno Insubrium et Boiorum animis.*  
Cato Hispaniam, Valerius Italiam est sortitus.  
Prætores deinde provincias sortiti, C. Fabricius Lus-

U. C. 557. cinus urbanam, C. Atinius Labeo peregrinam, Cn.  
A. C. 195. Manlius Vulso Siciliam, Ap. Claudius Nero Hispaniam ulteriorem, P. Porcius Læca Pisæ, ut ab tergo Liguribus esset: P. Manlius in Hispaniam citeriorum adjutor consuli datur. T. Quinctio, suspectis non solum Antiocho et Ætolis, sed etiam Nabide Lacedæmoniorum tyranno, prorogatum in annum imperium est, duas legiones ut haberet: in eas si quid supplementi opus esset, consules scribere, et mitttere in Macedoniam jussi. Ap. Claudio præter legionem, quam Q. Fabius habuerat, duo millia peditum et ducentos equites novos conscribere permisum. Par numerus peditum equitumque novorum P. Manlio in citeriore Hispaniam decretus: et legio eadem, quæ fuerat sub Minucio prætore, data. Et P. Porcio Læcæ ad Etruriam circa Pisæ duo millia peditum et quingenti equites ex Gallico exercitu decreti. In Sardinia prorogatum imperium Sempronio Longo.

**XLIV.** Provinciis ita distributis, consules, priusquam ab urbe proficiserentur, ver sacrum ex pontificum jussu fecere, quod A. Cornelius Mammula prætor voverat de senatus sententia populique jussu, Cn. Servilio, C. Flaminio consulibus: annis post uno et viginti factum est, quam votum. Per eosdem dies C. Claudius, Ap. filius, Pulcher augur in Q. Fabii Maximi locum, qui priore anno mortuus erat, lectus inauguratusque est. Mirantibus jam vulgo hominibus, quod Hispania movisset, bellum negligi, literæ a Q. Minucio adlatæ sunt, *Se ad Turbam oppidum cum Budare et Besaside, imperatoribus Hispanis, signis conlatis prospere pugnasse: duodecim milia hostium cæsa: Budarem imperatorem captum:*

Victi a  
Minucio  
Hispani.

*ceteros fusos fugatosque.* His literis lectis, minus U.C. 557.  
terroris ab Hispanis erat, unde ingens bellum ex- A. C. 195.  
spectatum fuerat. Omnes curæ, post adventum  
utique decem legatorum, in Antiochum regem con-  
versæ. Hi, expositis prius, quæ cum Philippo acta  
essent, et quibus legibus data pax, non minorem  
belli molem restare ab Antiocho docuerunt. *In-*  
*genti classe, egregio terrestri exercitu, in Europam*  
*eum trajecisse: nisi avertisset vana spes, ex vaniore*  
*rumore orta, Ægypti invadendæ, mox bello Græciam*  
*arsuram fuisse: neque enim ne Ætolos quidem quietu-*  
*ros, quum ingenio inquietam, tum iratam Romanis*  
*gentem. Hærere et aliud in visceribus Græciæ ingens*  
*malum, Nabin, nunc Lacedæmoniorum, mox, si liceat,*  
*universæ Græciæ futurum tyrannum: avaritia et cru-*  
*delitate omnes fama celebratos tyrannos æquantem. Cui*  
*si Argos, velut arcem Peloponneso inpositam, tenere*  
*liceat, deportatis in Italiam Romanis exercitibus, ne-*  
*quidquam liberatam a Philippo Græciam fore, pro*  
*rege, si nihil aliud, longinquo vicinum tyrannum do-*  
*minum habituram.*

XLV. Hæc quum jam ab gravibus auctoribus,  
tum qui omnia per se ipsos explorata referrent, au-  
dirent majores; quod ad Antiochum adtineret, ma-  
turanda his, quum rex quacunque de caussa in  
Syriam concessisset, de tyranno consultatio visa est.  
Quum diu disceptatum esset, utrum jam caussæ  
satis videretur, cur decerneretur, an permitterent T.  
Quinctio: quod ad Nabin Lacedæmonium adtine-  
ret, faceret, quæ e republica censeret esse, permise-  
runt; eam rem esse rati, quæ maturata dilatave-  
non tam magni momenti ad summam rem populi  
Romani esset. Magis id animadvertisendum esse,

U. C. 557. quid Hannibal et Karthaginienses, si cum Antiochœ  
 A. C. 195. Hannibal ortum foret bellum, acturi essent. Adversæ Han-  
 et Kartha. nibali factionis homines principibus Romanis, ami-  
 ginienses eis quisque suis, idem tidem scribebant, Nuncios lite-  
 suspecti.

*rasque ab Hannibale ad Antiochum missas, et ab rege  
 ad eum clam legatos venisse. Ut feras quasdam num-  
 quam mitescere; sic inmitem, in placabilem ejus viri  
 animum esse: marcescere otio situque civitatem, queri  
 eum, et inertia operis; nec sine armorum sonitu exci-  
 tari posse. Hæc probabilia memoria prioris belli,  
 per unum illum non magis gesti, quam moti, facie-  
 bat. Irritaverat etiam recenti facto multorum po-  
 tentium animos.*

Judices  
 Kartha-  
 gine ex  
 perpetuis  
 anni  
 facti.

XLVI. Judicum ordo Karthagine ea tempestate  
 dominabatur; eo maxime, quod iidem perpetui ju-  
 dices erant. Res, fama, vitaque omnium in illo-  
 rum potestate erat: qui unum ejus ordinis, idem  
 omnes adversos habebat; nec accusator apud judi-  
 ces infensos deerat. Horum in tam inpotenti regno  
 (neque enim civiliter nimiis opibus utebantur) præ-  
 tor factus Hannibal vocare ad se quæstorem. Idem  
 pro nihilo habuit: nam et adversæ factionis erat:  
 et, quia ex quæstura in judices, potentissimum or-  
 dinem, referebantur, jam pro futuris mox opibus  
 animos gerebat. Enimvero indignum id ratus Han-  
 nibal, viatorem ad prehendendum quæstorem mi-  
 sit: subductumque in concionem, non ipsum ma-  
 gis, quam ordinem judicum, præ quorum superbia  
 atque opibus nec leges quidquam essent, nec ma-  
 gristratus, accusavit: et, ut secundis auribus accipi  
 orationem animadvertisit, et infimorum quoque liber-  
 tati gravem esse superbiam eorum, legem exemplo  
 promulgavit, pertulitque, *Ut in singulos annos judi-*

*ees legerentur, ne quis biennium continuum judex esset. U. C. 557.*  
*Ceterum quantam eo facto ad plebem inierat gra-*  
*tiam, tantum magnæ partis principum obfendebat*  
*animos. Adjecit aliud, quod, bono publico, sibi*  
*proprias simultates irritavit. Vectigalia publica par-* *Ærarii ino-*  
*tim negligentia dilabebantur ; partim prædæ ac di-* *piæ mede-*  
*visui principum quibusdam et magistratibus erant : bal-* *tur Hanni-*  
*quin et pecunia, quæ in stipendum Romanis suo*  
*quoque anno penderetur, deerat, tributumque grave*  
*privatis inminere videbatur.*

XLVII. Hannibal postquam, vectigalia quanta terrestria maritimaque essent, et in quas res erogarentur, animadvertisit, et quid eorum ordinarii reipublicæ usus consumerent, quantum peculatus averteret ; omnibus residuis pecuniis exactis, tributo privatis remisso, satis locupletem rempublicam fore ad vectigal præstandum Romanis, pronunciavit in concione, et præstitit promissum. Tum vero isti, quos paverat per aliquot annos publicus peculatus, velut bonis ereptis, non furto eorum manibus extorto, infensi et irati Romanos in Hannibalem, et ipsos caussam odii quærentes, instigabant. Itaque, *Romani,* *legatis mis-*  
*diu repugnante Scipione Africano, quia parum ex* *sis, Hagni-*  
*populi Romani dignitate esse ducebat, subscribere balem ac-*  
*odiis accusationibusque Hannibalism, et factionibus* *cusant.*  
*Karthaginiensium inserere publicam auctoritatem,*  
*nec satis habere bello viciisse Hannibalem, nisi vel-*  
*ut accusatores calumniam in eum jurarent, ac no-*  
*men deferrent, tandem pervicerunt, ut legati Kar-*  
*thaginem mitterentur, qui apud senatum eorum ar-*  
*guerent, Hannibalem cum Antiocho rege consilia*  
*belli faciendi inire. Legati tres missi, C. Servilius,*  
*M. Claudius Marcellus, Q. Terentius Culleo : qui*

U. C. 557. quum venissent, ex consilio inimicorum Hannibalis,  
 A. C. 195. quæreutibus caussam adventus dici jusserunt; venisse ad controversias, quæ cum Masinissa rege Numidarum Karthaginiensibus essent, dirimendas: id creditum vulgo. Hannibalem unum se peti ab Romanis non fallebat; et ita pacem Karthaginiensibus datam esse, ut inexpiabile bellum adversus se unum maneret. Itaque cedere tempori et fortunæ statuit; et, præparatis jam omnibus ante ad fugam, obversatus eo die in foro avertendæ suspicionis caussa, primis tenebris vestitu forensi ad portam cum duobus comitibus ignaris consilii est egressus.

*Aufugit Hannibal.* XLVIII. Quum equi, quo in loco jussi erant, præsto fuissent, nocte via cita regionem quamdam agri Vocani transgressus, postero die mane inter Achollam et Thapsum ad suam turrim pervenit. Ibi eum parata instructaque remigio exceptit navis: ita Africa Hannibal excessit, sæpius patriæ, quam suorum eventus miseratus. Eo die in Cercinam insulam trajecit: ubi quum in portu naves aliquot onerarias cum mercibus invenisset, et ad egressum eum e nave concursus salutantium esset factus; perconstantibus legatum se Tyrum dici jussit. Veritus tamen, ne qua earum navis nocte profecta Thapsum aut Achollam nunciaret, se Cercinæ visum, sacrificio adparari jusso, magistros navium mercatoresque invitari jussit: et vela cum antennis ex navibus conrogari, ut umbra (etenim media æstas forte erat) cœnantibus in litore fieret. Quantum res et tempus patiebantur, adparatæ celebratæque ejus diei epulæ sunt: multoque vino in serum noctis convivium productum. Hannibal, quam primum fallendi eos, qui in portu erant, tempus habuit, navem solvit:

et ceteri sopiti quum postero die tandem ex somno U. C. 557.  
pleni crapulæ surrexisserunt, id quod serum erat, ali- A. C. 195.  
quot horas remis in naves conlocandis et aptandis  
armamentis absumserunt. Karthagine et multitu-  
dinis, adsuetæ domum Hannibalis frequentare, con-  
cursus ad vestibulum ædium est factus : et, ut non  
comparere eum vulgatum est, in forum turba con-  
venit principem civitatis quærerentium, et alii fugam  
conscisse, (id quod erat,) alii fraude Romanorum  
interfectum, idque imagis, ferebant : variosque vul-  
tus cerneret, ut in civitate aliorum alias partes fo-  
ventium factionibus. Visum deinde Cercinæ eum,  
tandem adlatum est.

**XLIX.** Romani legati quum in senatu exposuis-  
sent, *Compertum Patribus Romanis esse, et Philip-*  
*puni regem ante ab Hannibale maxime accensum, bel-*  
*lum populo Romano fecisse, et nunc literas nunciosque*  
*ab eo ad Antiochum regem profectos : haud quieturum*  
*ante, quam bellum toto orbe terrarum concisset. Ne*  
*his debere inpune esse, si satisfucere Karthaginienses*  
*populo Romano vellent, nihil eorum sua voluntate, nec*  
*publico consilio factum esse. Karthaginienses re-*  
*sponderunt, quicquid æquum censuissent Romani,*  
*facturos esse. Hannibal prospero cursu Tyrum*  
*pervenit : exceptusque a conditoribus Karthaginis,*  
*ut alia patria, vir tam clarus omni genere honorum,*  
*paucos moratus dies, Antiochiam navigat : ibi pro-*  
*fectum jam regem quum audisset, filium ejus sol-*  
*lemne ludorum ad Daphnen celebrantem convenis-*  
*set : comiter ab eo exceptus, nullam moram navi-*  
*gandi fecit. Ephesi regem est consecutus, fluc-*  
*tuantem adhuc animo, incertumque de Romano*<sup>Pervenit</sup>  
*bello ; sed haud parvum monientum animo ejus*<sup>ad Antio-</sup>  
*chum.*

U.C. 557. ad moliendum adventus Hannibalis fecit. Ætolo-  
A.C. 195. rum quoque eodem tempore alienati ab societate  
Romana animi sunt: quorum legatos Pharsalum et  
Leucadem, et quasdam alias civitates ex primo fœ-  
dere petentes, senatus ad Quintum rejecit,

---

## EPITOME LIBRI XXXIV.

---

**L**EX Oppia, quam C. Oppius tribunus plebis bello Punico de finiendis matronarum cultibus tulerat, cum magna contentione abrogata est; quum Porcius Cato auctor fuisset, ne ea lex aboleretur. Is, in Hispaniam profectus, bello, quod Emporiis orsus est, citeriorem Hispaniam pacavit. T. Quinctius Flamininus bellum adversus Lacedæmonios et tyrannum eorum Nabidem prospere gestum, data iis pace, qualem ipse voluit, liberatisque Argis, qui sub ditione tyranni erant, finivit. Senatus tunc primum secretus a populo ludos spectavit: ut id fieret, Sex. Ælius Paetus et C. Cornelius Cethegus censores intervenerunt, cum indignatione plebis. Coloniæ pleræque deductæ sunt. M. Porcius Cato de Hispania triumphavit. Res præterea in Hispania, et adversus Boios et Insubres Gallos feliciter gestæ referuntur. T. Quinctius Flamininus, qui Philippum Macedonum regem et Nabidem Lacedæmoniorum tyrannum vicerat, Græciamque omnem liberaverat, ob hanc rerum gestarum multitudinem tri-duo triumphavit. Legati Karthaginiensium nunciaverunt, Hannibalem, qui ad Antiochum configuerat, bellum cum eo moliri. Tentaverat autem Hannibal per Aristonem Tyrium, sine literis Karthaginem missum, ad rebellandum Pœnos concitare.

---

## T. LIVII PATAVINI

### LIBER XXXIV.

---

U. C. 557. A. C. 195. **I**NTER bellorum magnorum, aut vixdum finitorum, aut imminentium, curas intercessit res parva dictu, sed quae studiis in magnum certamen excesserit. M. Fundanius et L. Valerius tribuni plebei ad plebem tulerunt de Oppia lege abroganda. Tulerat eam C. Oppius tribunus plebis, Q. Fabio, Ti. Sempronio consulibus, in medio ardore Punici belli, *Ne qua mulier plus semunciam auri haberet: neu vestimento versicolori uteretur: neu juncto vehiculo in urbe oppidove, aut propius inde mille passus, nisi sacrorum publicorum caussa, reheretur.* M. et P. Junii Brutii tribuni plebis legem Oppiam tuebantur, nec eam se abrogari passuros aiebant. Ad suadendum dissuadendumque multi nobiles prodibant. Capitolium turba hominum faventium adversantiumque legi complebatur. Matronæ nulla nec auctoritate, nec verecundia, nec imperio virorum contineri limine poterant: omnes vias urbis aditusque in forum obsidebant; viros descendentes ad forum orantes, ut, florente republica, crescente in dies privata omnium fortuna, matronis quoque pristinum ornatum reddi paterentur. Augebatur hæc frequentia mulierum in dies: nam etiam ex oppidis conciliabulisque converiebant. Jam et consules prætoresque et alios ma-

gistratus adire et rogare audebant : ceterum minime U. C. 557.  
exorabilem alterum utique consulem M. Porcium A. C. 195.  
Catonem habebant, qui pro lege, quæ abrogabatur,  
ita disseruit.

II. *Si in sua quisque nostrum matre familiæ, Qui- Oratio Ca-*  
*ritez, jus et majestatem viri retinere instituisset, minus tonis pro*  
*cum universis feminis negotii haberemus : nunc domi*  
*victa libertas nostra inpotentia muliebri, hic quoque in*  
*foro obteritur et calcatur ; et, quia singulas sustinere*  
*non potuimus, universas horremus. Evidem fabulam*  
*et fictam rem ducebam esse, virorum omne genus in ali-*  
*qua insula conjuratione muliebri ab stirpe sublatum*  
*esse. Ab nullo genere non sumnum periculum est, si*  
*cætus, et concilia, et secretas consultationes esse sinus.*  
*Atque ego vix statuere apud animum meum possum,*  
*utrum pejor ipsa res, an pejore exemplio agatur. Quo-*  
*rum alterum ad nos consules reliquosque magistratus,*  
*alterum ad vos, Quirites, magis pertineret : nam utrum*  
*e republica sit, necne, id, quod ad vos fertur, vestra*  
*existimatio est, qui in suffragium ituri estis. Hæc con-*  
*sternatio muliebris, sive sua sponte, sive auctoribus vo-*  
*bis, M. Fundani et L. Valeri, facta est, haud dubie ad*  
*culpam magistratum pertinens, nescio vobis, tribuni,*  
*an consulibus, magis sit deformis : vobis, si feminas ad*  
*concitandas tribunicias seditiones jam adduxistis : no-*  
*bis, si, ut plebis quondam, sic nunc mulierum secessione*  
*leges accipiendæ sunt. Evidem non sine rubore quo-*  
*dam paullo ante per medium agmen mulierum in forum*  
*perveni. Quod nisi me verecundia singularum magis*  
*majestatis et pudoris, quam universarum, tenuisset, ne*  
*compellatae a consule viderentur, dixisset : Qui hic*  
*mos est in publicum procurrendi, et obsidendi vias, et*  
*viros alienos adpellandi? Istud ipsum suos quæque*

**U. C. 557.** *domi rogare non potuistis? An blandiores in publico,*

**A. C. 195.**

*quam in privato, et alienis, quam vestris, estis? quam-  
quam ne domi quidem vos, si sui juris finibus matronas  
contineret pudor, quæ leges hic rogarentur, abrogaren-  
turve, curare decuit. Majores nostri, nullam, ne pri-  
vatam quidem, rem agere feminas sine auctore, volue-  
runt; in manu esse parentum, fratrum, virorum: nos  
(si Diis placet) jam etiam rempublicam capessere eas  
patimur, et foro prope, et concionibus, et comitiis in-  
miseri. Quid enim nunc aliud per vias et compita  
faciunt, quam rogationes tribunorum plebis suadent,  
aliæ legem abrogandam censem? Date frenos inpotenti  
naturæ et indomito animali, et sperate, ipsas modum  
licentia facturas, nisi vos feceritis. Minimum hoc eo-  
rum est, quæ iniquo animo feminæ sibi aut moribus aut  
legibus injuncta patiuntur: omnium rerum libertatem,  
immo licentiam, (si vera dicere volumus) desiderant.  
Quid enim, si hoc expugnaverint, non tentabunt?*

**III.** *Recensete omnia muliebria jura, quibus licen-  
tiam earum adligaverint majores nostri, per quæque  
subjecerint viris: quibus omnibus constrictas vix tamen  
continere potestis. Quid? si carpere singula, et extor-  
quere, et exæquari ad extremum viris patiemini, tolera-  
biles vobis eas fore creditis? extemplo, simul pares esse  
cœperint, superiores erunt. At, Hercule, ne quid no-  
vum in cas rogetur, recusant: non jus, sed injuriam  
deprecantur. Immo ut, quam accepistis, jussistis suf-  
fragiis vestris legem, quam usu tot annorum et expe-  
riendo comprobastis, hanc ut abrogetis: id est, ut unam  
tollendo legem ceteras infirmetis. Nulla lex satis com-  
moda omnibus est: id modo queritur, si majori parti  
et in summam prodest. Si, quod cuiquam privatim  
ubficiet jus, id destruet ac demolietur, quid adtinebit*

*universos rogare leges, quas mox abrogare, in quos latæ U. C. 557.  
sunt, possint? Volo tamen audire, quid sit, propter A. C. 195.  
quod matronæ consternatæ procurrerunt in publicum,  
ac vix foro se et concione abstinent. Ut captivi ab  
Hannibale redimantur parentes, viri, liberi, fratres ea-  
rum? Procul abest: absitque semper talis fortuna rei-  
publicæ: sed tamen, quum fuit, negastis hoc piis preci-  
bus earum. At non pietas nec sollicitudo pro suis, sed  
religio, congregavit eas. Matrem Idæam, a Pessinunte  
ex Phrygia venientem, accepturæ sunt. Quid honestum  
dictu saltem seditioni prætenditur muliebri? Ut  
auro et purpura fulgeamus, inquit; ut carpentis, festis  
profestisque diebus, velut triumphantes de lege victa et  
abrogata, et captis et ereptis suffragiis vestris, per ur-  
bem vectemur: ne ullus modus sumtibus, ne luxuriæ  
sit.*

IV. *Sæpe me querentem de feminarum, sæpe de vi-  
rorum, nec de privatorum modo, sed etiam magistra-  
tuum, sumtibus audistis: diversisque duobus vitiis, ava-  
ritia et luxuria, civitatem laborare: quæ pestes omnia  
magna imperia everterunt. Hæc ego, quo melior læ-  
tiorque in dies fortuna reipublicæ est, imperiumque  
crescit, et jam in Græciam Asiamque transcendimus,  
omnibus libidinum inlecebris repletas, et regias etiam  
adtractanus gazas, eo plus horreo, ne illæ magis res  
nos ceperint, quam nos illas. Infesta, mihi credite,  
signa ab Syracusis inlata sunt huic urbi: jam nimis  
multos audio Corinthi et Athenarum ornamenta lau-  
dantes mirantesque, et antefixa fictilia Deorum Roma-  
norum ridentes. Ego hos malo propitios Deos; et ita  
spero futuros, si in suis manere sedibus patiemur. Pa-  
trum nostrorum memoria per legatum Cineam Pyrrhus,  
non virorum modo, sed etiam mulierum animos donis*

V. C. 557. tentavit: nondum lex Oppia ad coërcendam luxuriam  
A. C. 195. muliebrem lata erat: tamen nulla accepit. Quam  
caussam fuisse censem? Eadem fuit, quæ majoribus  
nostris nihil de hac re lege sanciendi: nulla erat luxu-  
ria, quæ coërceretur. Sicut ante morbos necesse est  
cognitos esse, quam remedia eorum; sic cupiditates  
prius natæ sunt, quam leges, quæ iis modum facerent.  
Quid legem Liciniam excitavit de quingentis jugeribus,  
nisi ingens cupidus agros continuandi? Quid legem Cin-  
ciam de donis et muneribus, nisi quia rectigalis jam et  
stipendiaria plebes esse senatui cœperat? Itaque minime  
mirum est, nec Oppiam, nec aliam ullam tum legem  
desideratam esse, quæ modum sumtibus mulierum face-  
ret, quum aurum et purpuram data et oblata ultiro non  
accipiebant. Si nunc cum illis donis Cineas urbem cir-  
cumiret; stantes in publico invenisset, quæ acciperent.  
Atque ego nonnullarum cupiditatum ne caussam qui-  
dem aut rationem inire possum: nam ut, quod alii li-  
ceat, tibi non licere, aliquid fortasse naturalis aut pu-  
doris aut indignationis habeat; sic, æquato omnium  
cultu, quid unaquæque vestrum veretur, ne in se con-  
spiciatur? Pessimus quidem pudor est vel parsimoniae,  
vel paupertatis: sed utrumque lex vobis demit, quum  
id, quod habere non licet, non habetis. Hanc, inquit,  
ipsam exæquationem non fero, illa locuples: cur non  
insignis auro et purpura conspicior? cur paupertas  
aliarum sub hac legis specie latet, ut, quod habere non  
possunt, habituræ, si liceret, fuisse videantur? Vultis  
hoc certamen uxoribus vestris injicere, Quirites, ut di-  
vites id habere velint, quod nulla alia possit; pau-  
peres, ne ob hoc ipsum contemnantur, supra vires se  
extendant? Næ, simul pudere, quod non oportet, cœ-  
perit; quod oportet, non pudebit: quæ de suo poten-

*rit, parabit: quæ non poterit, virum rogabit.* Mise- U. C. 557.  
*rum illum virum, et qui exoratus, et qui non exoratus A. C. 195.*  
*erit! quum, quod ipse non dederit, datum ab alio vide-*  
*bit. Nunc vulgo alienos viros rogant, et, quod majus*  
*est, legem et suffragia rogant, et a quibusdam impe-*  
*trant, adversus te, et rem tuam, et liberos tuos inexora-*  
*biles. Simul lex modum sumtibus uxoris tuæ facere*  
*desierit, tu numquam facies. Nolite eodem loco exis-*  
*timare, Quirites, futuram rem, quo fuit, antequam lex*  
*de hoc ferretur. Et, hominem inprobum non accusari,*  
*tutius est, quam absolviri: et luxuria non mota tolera-*  
*bilior esset, quam erit nunc, ipsis vinculis, sicut fera*  
*bestia, irritata, deinde emissâ. Ego nullo modo abro-*  
*gandam legem Oppiam censeo: vos quod faxitis, Deos*  
*omnes fortunare velim.*

V. Post hæc tribuni quoque plebei, qui se intercessuros professi erant, quum pauca in eamdem sententiam adjecissent; tum L. Valerius pro rogatione ab se promulgata ita disseruit. *Si privati tantummodo ad suadendum dissuadendumque id, quod a nobis rogatur, processissent, ego quoque, quum satis dic-tum pro utraque parte existimarem, tacitus suffragia vestra exspectassem.* Nunc, quum vir gravissimus consul M. Porcius, non auctoritate solum, quæ tacita satis momenti habuisset, sed oratione etiam longa et adcurata insectatus sit rogationem nostram, necessum est paucis respondere: qui tamen plura verba in castigandis matronis, quam in rogatione nostra dissuadenda, consumsit; et quidem, ut in dubio poneret, utrum id, quod reprehenderet, matronæ sua sponte, an nobis auctoribus, fecissent. Rem defendam, non nos; in quos jecit magis hoc consul verbo tenus, quam ut re insimu-

U. C. 557. laret. *Cætum, et seditiones, et interdum secessionem*  
 A. C. 195. *muliebrem adpellavit, quod matronæ in publico vos*  
*rogassent, ut legem, in se latam per bellum temporibus*  
*duris, in pace et florente ac beata republica abrogaretis.*  
*Verba magna, quæ rei augendæ caussa conquirantur, et*  
*hæc, et alia esse scio: et M. Catonem oratorem non*  
*solum gravem, sed interdum etiam trucem, esse scimus*  
*omnes, quum ingenio sit mitis. Nam quid tandem novi*  
*matronæ fecerunt, quod frequentes in caussa ad se per-*  
*tinente in publicum processerunt? Numquam ante hoc*  
*tempus in publico adparuerunt? Tuas adversus te Ori-*  
*gines revolvam. Accipe, quoties id fecerint, et quidem*  
*semper bono publico. Jam a principio, regnante Ro-*  
*mulo, quum Capitolio ab Sabinis capto, medio in foro*  
*signis conlatis dimicaretur, nonne intercursu matrona-*  
*rum inter acies duas prælium sedatum est? Quid? re-*  
*gibus exactis, quum Coriolano Marcio duce, legiones*  
*Volscorum castra ad quintum lapidem posuissent, nonne*  
*id agmen, quo obruta hæc urbs esset, matronæ averte-*  
*runt? Jam, urbe capta a Gallis, quo redemta urbs*  
*est? nempe aurum matronæ consensu omnium in publi-*  
*cum contulerunt. Proximo bello (ne antiqua repetam)*  
*nonne et, quum pecunia opus fuit, viduarum pecuniæ*  
*adjuverunt ærarium, et, quum Dii quoque novi ad*  
*opem ferendam dubiis rebus arcesserentur, matronæ*  
*universæ ad mare profectæ sunt ad matrem Idæam*  
*acciendiad? Dissimiles, inquis, caussæ sunt. Nec*  
*mihi caussas æquare propositum est: nihil novi fac-*  
*tum, purgare satis est. Ceterum, quod in rebus ad*  
*omnes pariter viros feminasque pertinentibus fecisse*  
*eas nemo miratus est, in caussa proprie ad ipsas*  
*pertinente miramur fecisse? Quid autem fecerunt?*

*superbas, me-Dius-fidius, aures habemus, si, quum do-* U. C. 557.  
*mini servorum non fastidiant preces, nos rogari ab ho-* A. C. 195.  
*nestis feminis indignamur.*

VI. *Venio nunc ad id, de quo agitur: in quo duplex consulis oratio fuit: nam et legem ullam omnino abrogari est indignatus; et eam præcipue legem, quæ luxuriæ muliebris coercendæ caussa lata esset. Et illa communis pro legibus, visa consularis oratio est: et hæc adversus luxuriam severissimis moribus conveniebat. Itaque periculum est, nisi, quid in utraque re vani sit, docuerimus, ne quis error vobis olsfundatur. Ego enim, quemadmodum ex his legibus, quæ non in tempus aliquod, sed perpetuæ utilitatis caussa in æternum lutæ sunt, nullam abrogari debere fateor, nisi quam aut usus coarguit, aut status aliquis reipublicæ inutilem fecit; sic, quas tempora aliqua desiderarunt leges, mortales (ut ita dicam) et temporibus ipsis mutabiles esse video. Quæ in pace latæ sunt, plerumque bellum abrogat; quæ in bello, pax: ut in navis administratione alia in secundam, alia in adversam tempestatem usui sunt. Hæc quum ita natura distincta sint, ex utro tandem gencre ea lex esse videtur, quam abrogamus? An vetus regia lex, simul cum ipsa urbe nata? An (quod secundum est) ab decemviris ad condenda jura creatis in duodecim tabulis scripta? Sine qua quum majores nostri non existimarint decus matronale servari posse, nobis quoque verendum sit, ne cum ea pudorem sanctitatemque feminarum abrogemus? Quis igitur nescit, novam istam legem esse, Q. Fabio et Ti. Sempronio consulibus viginti annis ante latam? sine qua quum per tot annos matroneæ optimis moribus viverint, quod tandem, ne abrogata ea effundantur ad luxuriam, periculum est? Nam si ista lex ideo lata esset,*

U. C. 557. ut finiret libidinem muliebrem, verendum foret, ne ab-  
 A. C. 195. rogata incitaret: cur sit autem lata, ipsum indicavit  
     tempus. Hannibal in Italia erat victor ad Cannas:  
     jam Tarentum, jam Arpos, jam Capuam habebat: ad  
     urbem Romam admoturus exercitum videbatur: defe-  
     cerant socii: non milites in supplementum, non socios  
     navales ad classem tuendam, non pecuniam in ærario  
     habebamus: serri, quibus arma darentur, ita ut pretium  
     pro iis bello perfecto dominis solveretur, emebantur: in  
     eandem diem pecuniæ, frumentum et cetera, quæ belli  
     usus postulabant, præbenda publicuni se conducturos  
     professi erant: serros ad remum, numero ex censu con-  
     stituto, cum stipendio nostro dabamus: aurum et ar-  
     gentum omne, ab senatoribus ejus rei initio orto, in  
     publicum conferebamus: viduæ et pupilli pecunias suas  
     in ærarium deferebant: cautum erat, quo ne plus auri  
     et argenti facti, quo ne plus signati argenti et æris  
     domi haberemus. Tali tempore in luxuria et ornatu  
     matronæ occupatæ erant, ut ad eam coërcendam lex  
     Oppia desiderata sit? quum, quia Cereris sacrificium,  
     lugentibus omnibus matronis, intermissum erat, senatus  
     finiri luctum triginta diebus jussit. Cui non adparet,  
     inopiam et miseriam civitatis, et quia omnium privato-  
     rum pecuniæ in usum publicum vertendæ erant, istam  
     legem scripsisse, tamdiu mansuram, quamdiu caussa  
     scribendæ legis mansisset? Nam si, quæ tunc temporis  
     caussa aut decrevit senatus, aut populus jussit, in per-  
     petuum servari oportet, cur pecunias reddimus privatis?  
     cur pñblica præsentí pecunia locamus? cur servi, qui  
     militent, non emuntur? cur privati non damus remiges,  
     sicut tunc dedimus?

VII. Omnes alii ordines, omnes homines mutationem  
     in meliorem statum reipublicæ sentient: ad conjuges

tantum nostras pacis et tranquillitatis publicæ fructus U. C. 557.  
 non perveniet? Purpura viri utemur, prætextati in A. C. 195.  
 magistratibus, in sacerdotiis; liberi nostri prætextis  
 purpura togis utentur; magistratibus in coloniis muni-  
 cipisque, hic Romæ infimo generi magistris vicorum  
 togæ prætextæ habendæ jus permittemus; nec id ut vivi  
 solum habeant tantum insigne, sed etiam ut cum eo cre-  
 mentur mortui: feminis duntaxat purpurae usum inter-  
 dicemus? et, quum tibi viro liceat purpura in veste  
 stragula uti, matrem familiæ tuam purpureum amicu-  
 lum habere non sines? et equus tuus speciosius instra-  
 tus erit, quam uxor vestita? Sed in purpura, quæ teri-  
 tur, absumitur, injustam quidem, sed aliquam tamen,  
 caussam tenacitatis video: in auro vero, in quo præter  
 manus pretium nihil intertrimenti fit, quæ malignitas  
 est? præsidium potius in eo est et ad privatos, et ad  
 publicos usus, sicut experti estis. Nullam œmulationem  
 inter se singularum, quando nulla haberet, esse aiebat.  
 At, Hercule, universis dolor et indignatio est, quum  
 sociorum Latini nominis uxoribus vident ea concessa  
 ornamenta, quæ sibi ademta sint; quum insignes eas  
 esse auro et purpura; quum illas vehi per urbem,  
 se pedibus sequi: tamquam in illarum civitatibus, non  
 in sua, imperium sit. Virorum hoc animos vulnerare  
 posset: quid mulierularum censem, quas etiam parva  
 movent? Non magistratus, nec sacerdotia, nec trium-  
 phi, nec insignia, nec dona, aut spolia bellica his con-  
 tingere possunt. Munditiæ, et ornatus, et cultus, hæc  
 feminarum insignia sunt: his gaudent et gloriantur;  
 hunc mundum muliebrem adpellarunt majores nostri.  
 Quid aliud in luctu, quam purpuram atque aurum de-  
 ponunt? quid, quum eluxerunt, sumunt? quid in gra-  
 tulationibus supplicationibusque, nisi excellentiores or-

V. C. 557. *natus, adjiciunt?* Scilicet, si legem Oppiam abrogaveris, non vestri arbitrii erit, si quid ejus vetare volueritis, quod nunc lex retat: minus filiae, uxores, sorores etiam quibusdam in manu erunt. Numquam, salvis suis, exiuit servitus muliebris: et ipsae libertatem, quam viduitas et orbitas facit, detestantur. In vestro arbitrio suum ornatum, quam in legis, malunt esse. Et vos in manu et tutela, non in servitio, debetis habere eas; et malle patres vos aut viros, quam dominos, dici. Invidiosis nominibus utebatur modo consul, seditionem muliebrem et secessionem adpellando. Id enim periculum est, ne Sacrum montem, sicut quondam irata plebs, aut Aventinum capiant. Patiendum huic infirmitati est, quocumque vos censueritis: quo plus potestis, eo moderatius imperio uti debetis.

**Oppia lex abrogata.** VIII. Hæc quum contra legem proque lege dicta essent, aliquanto major frequentia mulierum postero die sese in publicum effudit, unoque agmine omnes tribunorum januas obsederunt, qui collegarum rogationi intercedebant: nec ante abstiterunt, quam remissa intercessio ab tribunis esset. Nulla deinde dubitatio fuit, quin omnes tribus legem abrogarent: anno vigesimo post abrogata est, quam lata. M. Porcius consul, postquam abrogata est Oppia lex, extemplo viginti quinque navibus longis (quinque sociorum erant) ad Lunæ portum profectus, eodem exercitu convenire jusso, et, edicto per oram maritimam misso, navibus omnis generis contractis, ab Luna proficisciens edixit, ut ad portum Pyrenæi sequerentur: inde se frequenti classe ad hostes iturum. Prætervecti Ligustinos montes sinuque Gallicum, ad diem, quam edixerat, convenerunt: inde Rhodam ventum, et præsidium Hispanorum, quod

**Cato it in Hispaniam.**

in castello erat, vi dejectum. Ab Rhoda secundo U. C. 557.  
vento Emporias per ventum: ibi copiae omnes, prae- A. C. 195.  
ter socios navales, in terram expositae.

IX. Jam tunc Emporiae duo oppida erant muro Emporia-  
divisa. Unum Græci habebant, a Phocæa, unde et rum de-  
Massilienses, oriundi: alterum Hispani: sed Græ-  
cum oppidum in mare expositum, totum orbem muri  
minus quadringentos passus patentem habebat: His-  
panis retractior a mari trium millium passuum in  
circitu murus erat. Tertium genus, Romani coloni  
ab Divo Cæsare, post devictos Pompeii liberos, ad-  
jecti: nunc in corpus unum confusi omnes; Hispa-  
nis prius, postremo et Græcis in civitatem Romanam adscitis. Miraretur, qui tum cerneret, aperto  
mari ab altera parte, ab altera Hispanis, tam feræ  
et bellicosæ genti, objectos quæ res eos tutaretur:  
disciplina erat custos infirmitatis, quam inter vali-  
diores optime timor continet. Partem muri versam  
in agros egregie munitam habebant, una tantum in  
eam regionem porta inposita; cuius adsiduus custos  
semper aliquis ex magistratibus erat: nocte pars  
tertia civium in muris excubabant; neque moris  
tantum aut legis caussa, sed, quanta si hostis ad  
portas esset, et servabant vigilias, et circumibant,  
cura. Hispani neminem in urbem recipiebant:  
ne ipsi quidem temere urbe excedeant. ad mare  
patebat omnibus exitus: porta ad Hispanorum op-  
pidum versa numquam nisi frequentes, pars tertia  
fere, cuius proxima nocte vigiliæ in muris fuerant,  
egrediebantur. Caussa exequendi hæc erat: commer-  
cio eorum Hispani, imprudentes maris, gaudebant;  
mercarique et ipsi ea, quæ externa navibus invehe-  
rentur, et agrorum exigere fructus, volebant: hujus

U. C. 557. mutui usus desiderium, ut Hispana urbs Græcis pa-  
A. C. 195. teret, faciebat. Erant etiam eo tutiores, quod sub  
umbra Romanæ amicitiæ latebant: quam sicut mi-  
noribus viribus, quam Massilienses, pari colebant  
fide: tunc quoque consulem exercitumque comiter  
ac benigne acceperunt. Paucos ibi moratus dies  
Cato, dum exploraret, ubi et quantæ hostium copiæ  
essent; ut ne mora quidem segnis esset, omne id  
tempus exerceendis militibus consumsit. Id erat forte  
tempus anni, ut frumentum in areis haberent: ita-  
qne, redemptoribus vetitis frumentum parare, ac Ro-  
mam dimissis, *Bellum*, inquit, *se ipsum alet*. Pro-  
fectus ab Emporiis agros hostinm urit vastatque:  
omnia fuga et terrore complet.

Celtiberos  
Helvius  
vincit.

Ovans ur-  
bem in-  
greditur.

X. Eodem tempore M. Helvio, decedenti ex ulte-  
riore Hispania cum præsidio sex millium, dato ab  
Ap. Claudio prætore, Celtiberi agmine ingenti ad  
oppidum Illiturgi obcurrerunt. Viginti millia ar-  
matorum fuisse, Valerius scribit; duodecim millia  
ex iis cæsa, oppidum Illiturgi receptum, et puberes  
omnes interfectos. Inde ad castra Catonis Helvius  
pervenit: et, quia tuta jam ab hostibus regio erat,  
præsidio in ulteriore Hispaniam remisso, Romam  
est profectus, et ob rem feliciter gestam ovans ur-  
bem est ingressus. Argenti infecti tulit in ærarium  
quatrordecim millia pondo septingenta triginta duo:  
et signati bigatorum septemdecim millia viginti tria:  
et Oscensis argenti centum viginti millia quadrin-  
gentos triginta octo. Caussa triumphi negandi se-  
natui fuit, quod alieno auspicio et in aliena provin-  
cia pugnasset. Ceterum biennio post redierat, quum,  
provincia successori Q. Minucio tradita, annum in-  
sequentem retentus ibi longo et gravi morbo fuisset.

Itaque duobus modo mensibus ante Helvius ovans U. C. 557.  
 urbem est ingressus, quam successor ejus Q. Minu- A. C. 195.  
 cius triumpharet. Hic quoque tulit argenti pondo Minucii tri-  
 triginta quatuor millia octingenta, bigatorum sep- umphus.  
 tuaginta octo millia, et Oscensis argenti ducenta  
 septuaginta octo millia.

XI. In Hispania interim consul haud procul Em- *Ilergetes auxilium &*  
 poriis castra habebat. Eo legati tres ab Ilergetum *Romanis*  
 regulo Bili stage, in quibus unus filius erat, venerunt, petunt.  
 querentes, *castella sua obpugnari*, nec spem ullam esse  
*resistendi*, nisi *præsidio Romanus miles esset*. Tria  
*millia militum satis esse*: nec hostes, si *tanta manus*  
*venisset*, mansuros. Ad ea consul, *Moveri quidem se*  
*vel periculo eorum, vel metu*, dicere: *sed sibi nequa-*  
*quam tantum copiarum esse*, ut, *quum magna vis hos-*  
*tium haud procul absit*, cum *qua mox signis conlatis*  
*dimicandum sibi in dies exspectet*, *dividendo exercitum*  
*minuere tuto vires posset*. Legati, ubi hæc audierunt,  
 flentes ad genua consulis provolvuntur. Orant, ne  
*se in rebus tam trepidis deserat*. *Quo enim se, repul-*  
*sos ab Romanis, ituros?* Nullos se socios, nihil usquam  
 in terris aliud spei habere. Potuisse se extra id pe-  
 riculum esse, si *decedere fide*, si *conjurare cum ceteris*  
*voluissent*: nullis minis, nullis terriculis se motos, spe-  
 rantes satis opis et auxilii sibi in *Romanis esse*. Id si  
*nullum sit*, si sibi a consule negetur, Deos hominesque  
*se testes facere*, *invitos et coactos se*, ne eadem, quæ  
*Saguntini passi sint*, patientur, defecturos: et cum ce-  
 teris potius *Hispanis*, quam solos, perituros esse.

XII. Et illo quidem die sic sine responso dimissi.  
 Consulem nocte, quæ insecuta est, anceps cura agi-  
 tare: nolle deserere socios, nolle minuere exerci-  
 tum; quod aut moram sibi ad dimicandum, aut in

U. C. 557 dimicando periculum adferre posset. Stat sententia,  
 A. C. 195. non minuere copias, ne quid interim hostes inferant  
 ignominiæ: sociis spem pro re ostendendam censem.  
 Sæpe vana pro veris, maxime in bello, valuisse: et  
 credentem se aliquid auxilii habere, perinde atque  
 haberet, ipsa fiducia, et sperando atque audendo  
 servatum Postero die legatis respondit, *Quamquam  
 vereatur, ne suas vires, aliis eis commodando, minuat;  
 tamen illorum se temporis ac periculi magis, quam sui,  
 rationem habere.* Denunciari militum parti tertiae ex  
 omnibus cohortibus jubet, ut cibum, quem in naves  
 inponant, mature coquant: navesque in diem ter-  
 tium expediri jussit. Duos ex legatis Bilistagi at-  
 que Ilergetibus nunciare ea jubet; filium reguli co-  
 miter habendo, et muneribus apud se retinet. Le-  
 gati non ante profecti, quam inpositos in naves mi-  
 lites viderunt: id pro haud dubio jam nunciantes,  
 non suos modo, sed etiam hostes, fama Romani  
 auxilii adventantis impleverunt.

XIII. Consul, ubi satis, quod in speciem fuit,  
 ostentatum est, revocari ex navibus milites jubet:  
 ipse, quum jam id tempus anni adpeteret, quo geri-  
 res possent, castra hiberna tria millia passuum ab  
 Emporiis posuit: inde per occasiones, nunc hac  
 parte, nunc illa, modico præsidio castris relicto,  
 prædatum milites in hostium agros educebat. Nocte  
 ferme proficiscebantur, ut et quam longissime a cas-  
 tris procederent, et inopinatos obprimerent. Et  
 exercebat ea res novos milites, et hostium magna  
 vis excipiebatur: nec jam egredi extra munimenta  
 castellarum audebant. Ubi satis admodum et suo-  
 rum et hostium animos est expertus, convocari tri-  
 bunos, præfectosque, et equites omnes, et centurio-

nes jussit. *Tempus, inquit, quod s<sup>a</sup>pe optasti, venit,* U. C. 557.  
*quo vobis potestas fieret virtutem restram ostendendi.* A. C. 195.  
*Adhuc prædonum magis, quam bellantium, militatis*<sup>Catonis</sup> oratio ad  
*more; nunc justa pugna hostes cum hostibus conseratis*<sup>milites.</sup>  
*manum: non agros inde populari, sed urbium opes ex-*  
*havrire licebit. Patres nostri, quum Hispania Kar-*  
*thaginiensium, et imperatores ibi et exercitus essent,*  
*ipsi nullum imperatorem, nulos in ea milites haberent;*  
*tamen addere hoc in fædere voluerunt, Ut imperii sui*  
*Iberus fluvius esset finis. Nunc, quum duo prætores,*  
*quum consul, quum tres exercitus Romani Hispaniam*  
*obtineant, Karthaginiensium jam prope decem annis*  
*nemo in his provinciis sit, imperium nobis citra Iberum*  
*amissum est. Hoc armis et virtute recuperetis oportet:*  
*et nationem, rebellantem magis temere, quam constan-*  
*ter bellantem, jugum, quo se exuit, accipere rursus co-*  
*gatis. In hunc modum maxime adhortatus pronun-*  
*ciat, se nocte ad castra hostium ducturum: ita ad*  
*corpora curanda dimissi.*

XIV. Nocte media, quum auspicio operam dedis-  
set, profectus, ut locum, quem vellet, priusquam  
hostes sentirent, caperet, præter castra hostium cir-  
cumducit, et prima luce, acie instructa, sub ipsum  
vallum tres cohortes mittit. Mirantes barbari ab  
tergo adparuisse Romanum, discurrere ipsi ad arma.  
Interim consul apud suos, *Nusquam, nisi in virtute,*  
*spes est, milites, inquit, et ego sedulo, ne esset, feci:*  
*inter castra nostra et nos medii hostes: ab tergo hos-*  
*tium ager est: quod pulcherrimum, idem tutissimum*  
*est, in virtute spem positam habere.* Sub hæc cohori-  
tes recipi jubet, ut barbaros simulatione fugæ eli-  
ceret. Id, quod crediderat, evenit: pertinuisse et <sup>Hostes ad</sup>  
cedere rati Romanos, porta erumpunt: et, quan- <sup>pugnam</sup> <sup>eicit.</sup>

U. C. 557. tum inter castra sua et hostium aciem relictum erat  
 A. C. 195. loci, armatis compleant. Dum trepidant acie instruenda, consul, jam paratis ordinatisque omnibus, incompositos adgreditur: equites primos ab utroque cornu in pugnam educit, sed in dextro extemplo pulsi, cedentesque trepidi etiam pediti terrorem intulere. Quod ubi vidit consul, duas cohortes delectas ab dextro latere hostium circumduci jubet, et ab tergo se ostendere, priusquam concurrerent peditum acies: is terror objectus hosti rem, metu Romanorum equitum inclinatam, æquavit. Tamen adeo turbati erant dexteræ alæ equites peditesque, ut quosdam consul manu ipse reprehenderit, et adversos in hostem verterit: ita, et quamdiu missilibus pugnatum est, anceps pugna erat: et jam ab dextra parte, unde terror et fuga cœperat, ægre Romanus restabat. Ab sinistro cornu et ab fronte urgebantur barbari, et cohortes ab tergo instantes pavidi respiciebant. Ut, emissis soliferreis falaricisque, gladios strinxerunt, tum velut redintegrata est pugna: non cæcis ictibus procul ex improviso vulnerabantur: sed, pede conlato, tota in virtute ac viribus spes erat.

**Et fugat.** XV. Fessos jam suos consul, ex secunda acie subsidiariis cohortibus in pugnam inductis, accendit: nova acies facta: integri recentibus telis fatigatos adorti hostes primum acri inpetu, velut cuneo, perculerunt: deinde dissipatos in fugam averterunt: effusoque per agros cursu, castra repetebantur. Ubi omnia fuga completa vidit Cato, ipse ad secundam legionem, quæ in subsidio posita erat, equo revehitur: et signa præ se ferri, plenoque gradu ad castra hostium obpugnanda succedere jubet: si quis extra ordinem avidius procurrit, et ipse interequitanſ

sparo percutit, et tribunos centurionesque castigare U. C. 557.  
 jubet. Jam castra hostium obpugnabantur : saxis- A. C. 195.  
 que, et sudibus, et omni genere telorum submove-  
 bantur a vallo Romani : ubi recens admota legio  
 est, tum et obpugnantibus animus crevit, et infen-  
 sius hostes pro vallo pugnabant. Consul omnia  
 oculis perlustrat, ut, qua minima vi restatur, ea  
 parte inrumpat : ad sinistram portam infrequentes  
 videt : eo secundæ legionis principes hastatosque  
 inducit. Non sustinuit inpetum eorum statio, quæ  
 portæ adposita erat, et ceteri, postquam intra val-  
 lum hostes vident, ipsis castris exuti, signa arma-  
 que abjiciunt : cæduntur in portis, suomet ipsi ag-  
 mine in arto hærentes : secundani terga hostium  
 cædunt, ceteri castra diripiunt. Valerius Antias  
 supra quadraginta millia hostium cæsa eo die scri-  
 bit. Cato ipse, haud sane detractator laudum sua-  
 rum, multos cæsos ait ; numerum non adscribit.

XVI. Tria eo die laudabilia fecisse putatur :  
 unum, quod, circumducto exercitu, procul navibus  
 suis castrisque, ubi spem nisi in virtute haberent,  
 inter medios hostes prælrium commisit : alterum,  
 quod cohortes ab tergo hostibus objecit : tertium,  
 quod secundam legionem, ceteris omnibus effusis ad  
 sequendos hostes, pleno gradu sub signis composi-  
 tam instructamque subire ad portam castrorum jus-  
 sit. Nihil deinde a victoria cessatum : quum, re-  
 ceptui signo dato, suos spoliis onustos in castra re-  
 duxisset, paucis horis noctis ad quietem datis, ad  
 prædandum in agros duxit. Effusius, ut sparsis hos-  
 tibus fuga, prædati sunt : quæ res non minus, quam  
 pugna pridie adversa, Emporitanos Hispanos adco- Hispani se  
 lasque eorum in ditionem compulit : multi et ei dedunt.

**U. C. 557.** aliarum civitatum, qui Emporias perfugerant, de-  
**A. C. 195.** diderunt se: quos omnes, adpellatos benigne, vino-  
 que et cibo curatos, domos dimisit. Confestim inde  
 castra movit: et, quacumque incedebat agmen, le-  
 gati dedentium civitates suas obcurrebant: et quum  
 Tarragonem venit, jam omnis cis Iberum Hispania  
 perdomita erat, captivique et Romani, et sociū ac  
 Latini nominis, variis casibus in Hispania obpressi,  
 donum consuli a barbaris reducebantur. Fama de-  
 inde vulgatur, consulem in Turdetaniam exercitum  
 ducturum, et ad devios montanos profecturum et-  
 iam falso perlatum est. Ad hunc vanum et sine  
 auctore ullo rumorem, Bergistanorum civitatis sep-  
 tem castella defecerunt: eos, deducto exercitu, con-  
 sul sine memorando prælio in potestatem redegit.  
 Hand ita multo post iidem, regresso Tarragonem  
 consule, priusquam inde quoquam procederet, de-  
 fecerunt. Iterum subacti: sed non eadem venia  
 victis fuit: sub corona veniere omnes, ne sæpius pa-  
 cem solicitarent.

**P. Man-  
lius Tur-  
detanus  
vincit.**

XVII. Interim P. Manlius prætor, exercitu ve-  
 tere a Q. Minucio, cui successerat, accepto, adjuncto  
 et Ap. Claudii Neronis ex ulteriore Hispania veterè  
 item exercitu, in Turdetaniam proficiscitur. Om-  
 nium Hispanorum maxime inbellis habentur Turde-  
 tani: freti tamen multitudine sua obviam ierunt  
 agniini Romano. Eques inmissus turbavit extemplo  
 aciem eorum: pedestre prælium nullius ferme cer-  
 taminis fuit: milites veteres, periti hostium belli-  
 que, hand dubiam pugnam fecerunt. Nec tamen ea  
 pugna d bellatum est: decem millia Celtiberum  
 mercede Turduli conducunt, alienisque armis para-  
 bant bellum. Consul interim, rebellione Bergista-

norum ictus, ceteras quoque civitates ratus per oc- U.C. 557.  
 casionem idem facturas, arma omnibus cis Iberum A. C. 195.  
 Hispanis ademit: quam rem adeo ægre passi, ut multi  
 morteni sibimet ipsi consiscerent: ferox genus,  
 nullam vitam rati sine armis esse. Quod ubi con- Cato exar-  
 suli renunciatum est, senatores omnium civitatum mat omnes  
 ad se vocari jussit, atque iis, *Non nostra*, inquit,  
*magis, quam vestra, refert, vos non rebellare: si quidem id majore Hispanorum malo, quam exercitus Ro-*  
*mani labore, semper adhuc factum est. Id ut ne fiat,*  
*uno modo arbitror caveri posse, si effectum erit, ne possitis rebellare. Volo id quam mollissima via consequi:*  
*vos quoque in ea re consilio me adjuvate: nullum libentius sequar, quam quod vosmet ipsi adulteritis.*  
 Tacentibus spatium se ad deliberandum dierum paucorum dare dixit: quum revocati secundo quoque concilio tacuissent, uno die muris omnium dirutis, Diruit eoa-  
 ad eos, qui nondum parebant, prefectus, ut in ruini muros.  
 quamque regionem venerat, onines, qui circa incolebant, populos in ditionem accepit. Segesticam tantum, gravem atque opulentam civitatem, vineis et pluteis cepit.

XVIII. Eo majorem habebat difficultatem in subigendis hostibus, quam qui primi venerunt in Hispaniam; quod ad illos tædio imperii Karthaginiensium Hispani deficiebant; huic ex usurpata libertate in servitutem velut adserendi erant: et ita mota omnia accepit, ut alii in armis essent, alii obsidione ad defectionem cogerentur: nec, nisi in tempore subuentum foret, ultra sustentaturi fuerint. Sed in Laus  
 consule ea vis animi atque ingenii fuit, ut omnia Catonis.  
 maxima minimaque per se adiret atque ageret: nec cogitaret modo imperaretque, quæ in rem essent,

U. C. 557. sed pleraque ipse per se transigeret ; nec in quem-  
A. C. 195. quam omnium gravius severiusque, quam in semet ipsum, imperium exercebat ; parsimonia, et vigiliis, et labore cum ultimis militum certaret ; nec quidquam in exercitu suo præcipui, præter honorem atque imperium, haberet.

**Aliæ ejus expeditio-**nes. **XIX.** Difficilis bellum in Turdetania prætori P. Manlio Celtiberi, mercede exciti ab hostibus, sicut ante dictum est, faciebant : itaque eo consul, arcensus literis prætoris, legiones duxit. Ubi eo venit, (castra separati Celtiberi et Turdetani habebant) cum Turdetanis extemplo levia prælia, incursantes in stationes eorum, Romani facere ; semperque vici- tores ex quamvis temere cœpto certamine abire. Ad Celtiberos in conloquium tribunos militum ire consul, atque iis trium conditionum electionem ferre, jubet. Primam, si transire ad Romanos velint, et duplex stipendum accipere, quam quantum a Turdetanis pepigissent : alteram, si domos abire, publica fide accepta, nihil eam rem noxæ futuram, quod hostibus se Romanorum junxissent : tertiam, si utique bellum placeat, diem locumque consti- tuant, ubi secum armis decernant. A Celtiberis dies ad consultandum petita : concilium inmixtis Turdetanis habitum magno cum tumultu : eo mi- nus decerni quidquam potuit. Quum incertum, bel- lum an pax cum Celtiberis esset, commeatus tamen, haud secus quam in pace, ex agris castellisque hos- tium Romani portabant : dein sæpe munimenta eo- rum, velut communi pacto commercio privatis in- duciis, ingredientes. Consul ubi hostes ad pugnam elicere nequit, primum prædatum sub signis aliquot expeditas cohortes in agrum integræ regionis ducit :

deinde audito, Seguntiæ Celtiberum omnes sarcinas U. C. 557.  
inpedimentaque relicta, eo pergit ducere ad ob- A. C. 195.  
pugnandum. Postquam nulla moventur re, perso-  
luto stipendio, non suis modo, sed etiam prætoris  
militibus, reliquo omni exercitu in castris præ-  
toriis, ipse cum septem cohortibus ad Iberum est  
regressus.

XX. Ea tam exigua manu oppida aliquot cepit :  
defecere ad eum Sedetani, Ausetani, Suessetani.  
Lacetanos, deviam et silvestrem gentem, quum in-  
sita feritas continebat in armis, tum conscientia,  
dum consul exercitusque Turdulo bello est occupa-  
tus, depopulatorum subitis incursionibus sociorum.  
Igitur ad oppidum eorum obpugnandum consul du-  
cit, non Romanas modo cohortes, sed juventutem  
etiam merito infensorum iis sociorum. Oppidum  
longum, in latitudinem haudquaquam tantumdem  
patens, habebant : quadringentos inde ferme passus  
constituit signa. Ibi delectarum cohortium statio-  
nen relinques, præcepit eis, ne se ex eo loco ante  
moverent, quam ipse ad eos venisset : ceteras co-  
pias ad ulteriore partem urbis circumducit. Maxi-  
mum ex omnibus auxiliis numerum Suessetanæ ju-  
ventutis habebat : eos ad murum obpugnandum  
subire jubet. Quorum ubi arma signaque Lacetani  
cognovere ; memores, quam sæpe in agro eorum  
inpune persultassent, quoties ipsos signis conlatis  
fudissent fugassentque ; patefacta repente porta,  
universi in eos erumpunt. Vix clamorem eorum,  
nedum inpetum, Suessetani tulere : quod postquam,  
sicut futurum ratus erat, consul fieri etiam vidi;  
equo citato subter murum hostium ad cohortes ad-  
vehitur : atque eas adreptas, effusis omnibus ad se-

U. C. 557. quendos Suessetanos, qua silentium ac solitudo erat,  
A. C. 195. in urbem inducit: priusque omnia cepit, quam se  
reciperent Lacetani. Mox ipsos, nihil præter arma  
habentes, in deditioñem accepit.

XXI. Confestim inde vitor ad Vergium castrum  
ducit: receptaculum id maxime prædonum erat: et  
inde incursions in agros pacatos provinciæ ejus  
fiebant. Transfugit inde ad consulem princeps Ver-  
gestanus, et purgare se ac populares cœpit: *non esse in manu ipsis rempublicam: prædones receptos*  
*totum sue potestatis id castrum fecisse.* Consul eum  
domum redire, conficta aliqua probabili, cur abfu-  
isset, caussa jussit. *Quum se muros subisse cerneret,*  
*intentosque prædones ad tuenda mænia esse; tum uti*  
*cum suæ factionis hominibus meminisset arcem occu-*  
*pare.* Id, uti præceperat, factum. Repente anceps  
terror, hinc muros adscendentibus Romanis, illinc  
arce capta, barbaros circumvasit. Hujus potitus  
loci consul eos, qui arcem tenuerant, liberos esse  
cum cognatis, suaque habere jussit: Vergestanos  
ceteros, quæstori, ut venderet, imperavit: de præ-  
donibus supplicium sumsit. Pacata provincia, vecti-  
galia magna instituit ex ferrariis argentariisque;  
quibus tum institutis, locupletior in dies provincia  
fuit. Ob has res gestas in Hispania supplicationem  
in triduum Patres decreverunt.

Valerius  
Boios vin-  
cit.

XXII. Eadem æstate alter consul L. Valerius  
Flaccus in Gallia cum Boiorum manu propter Lita-  
nam silvam, signis conlatis, secundo prælio con-  
fixit. Octo millia Gallorum cæsa traduntur: ce-  
teri, omissò bello, in vicis suos atque agros dilapsi.  
Consul reliquum æstatis circa Padum Placentiæ et  
Cremonæ exercitum habuit, restituitque, quæ in iis

oppidis bello diruta fuerant. Quum hic status re- U.C. 557.  
 rum in Italia Hispaniaque esset, T. Quinctio, in A.C. 195.  
 Græcia ita hibernis actis, ut, exceptis Ætolis, qui- Græciæ  
 bus nec pro spe victoriæ præmia contigerant, nec status.  
 diu quies placere poterat, universa Græcia, simul pacis libertatisque perfruens bonis, egregie statu suo gauderet, nec magis in bello virtutem Romani ducis, quam in victoria temperantiam justitiamque et moderationem miraretur, senatusconsultum, quo bellum adversus Nabin Lacedæmonium decretum erat, adfertur. Quo lecto, Quinctius, conventu Corinthum omnium sociarum civitatium legationibus in diem certam edicto, ubi frequentes undique principes convenerunt, ita ut ne Ætoli quidem abessent, tali oratione est usus: *Bellum adversus Philippum non magis communi animo consilioque Romani et Græci gesserunt, quam utrique suas caussas belli habuerunt.* Nam et Romanorum amicitiam, nunc Karthaginienses hostes eorum juvando, nunc hic sociis nostris obpugnandis, violaverat; et in vos talis fuit, ut nobis, etiamsi nostrarum obliviousceremur injuriarum, restræ injuriæ satis digna caussa belli fuerint. Hodierna consultatio tota ex vobis pendet. Refero enim ad vos, utrum Argos, sicut scitis ipsi, ab Nabide occupatos pati velitis sub ditione ejus esse: an æquum censeatis, nobilissimam vetustissimamque civitatem, in media Græcia sitam, repeti in libertatem, et eodem statu, quo ceteras urbes Peloponnesi et Græciæ, esse. Hæc consultatio, ut videtis, tota de re pertinente ad vos est; Romanos nihil contingit, nisi quatenus liberatae Græciæ, unius civitatis servitus, non plenam, nec integrum gloriam esse sinit. Ceterum si vos nec cura ejus civitatis, nec exemplum, nec periculum movet, ne

U. C. 557. serpat latius contagio ejus mali ; nos æqui bonique facimus. A. C. 195. De hac re vos consulo, status eo, quod plures censueritis.

**XXIII.** Post orationem Romani imperatoris, percenseri aliorum sententiæ cœptæ sunt. Quum legatus Atheniensium, quantum poterat gratiis agendis, Romanorum in Græciam merita extulisset, inploratos auxilium, adversus Philippum tulisse opem ; non rogatos, ultro adversus tyrannum Nabin obferre auxilium ; indignatusque esset, hæc tanta merita sermonibus tamen aliquorum carpi, futura calumniantium ; quum fateri potius præteriorum gratiam deberent ; adparebat incessi Ætolos. Igitur Alexander princeps gentis, invictus primum in Athenienses, libertatis quondam duces et auctores, adsentationis propriæ gratia communem caussam prodentes ; Ætolorum questus deinde, Achæos, Philippo quondam milites, querelæ, postremum ab inclinata ejus fortuna transfugas, et Corinthum recepisse, et id agere, ut Argos habeant : Ætolos, primos hostes Philippi, semper socios Romanorum, pactos in fædere suas urbes agrosque fore de victo Philippo, fraudari Echino et Pharsalo ; insimulavit fraudis Romanos : quod, vano titulo libertatis ostentato, Chalcidem et Demetriadem præsidiis tene rent ; qui Philippo, cunctanti deducere inde præsidia, objicere semper soliti sunt, numquam, donec Demetrias, Chalcisque, et Corinthus tenerentur, liberam Græciam fore : postremo, quia remanendi in Græcia retinendique exercitus Argos et Nabin caussam facerent. Deportarent legiones in Italianam. Ætolos polliceri, aut conditionibus et voluntate sua Nabin præsidium Argis deducturum, aut vi atque armis coacturos in potestate consentientis Græciæ esse.

XXIV. Hac vaniloquentia primum Aristænum U. C. 557.  
 prætorem Achæorum excitavit. Ne istuc, inquit, A. C. 195.  
*Jupiter optimus maximus sirit, Junoque regina, cuius prætor in*  
*in tutela Argi sunt, ut illa civitas inter tyrannum La-*  
*cedæmonium et latrones Ætolos præmium sit posita,*  
*in eo discrimine, ut miserius a nobis recipiatur, quam*  
*ab illo capta est. Mare interjectum ab istis prædoni-*  
*bis non tuetur nos, T. Quinti. Quid, si in media*  
*Peloponneso arcem sibi fecerint, futurum nobis est?*  
*Linguam tantum Græcorum habent, sicut speciem ho-*  
*minum. Moribus ritibusque efferioribus, quam ulli*  
*barbari, inmanes belluæ vivunt. Itaque vos rogamus,*  
*Romani, ut et ab Nabide Argos recuperetis, et ita res*  
*Græciæ constituatis, ut ab latrocinio quoque Ætolor-*  
*rum satis pacata hæc relinquatis. Romanus, cunctis*  
*undique increpantibus Ætolos, responsurum se fuisse*  
*iis, dixit, nisi ita infensos omnes in eos videret, ut se-*  
*dandi potius, quam irritandi, essent. Contentum ita-*  
*que opinione ea, quæ de Romanis Ætolisque esset, re-*  
*ferre se, dixit, quid de Nabidis bello placeret, nisi red-*  
*deret Achæis Argos? Quum omnes bellum decres-*  
*sent; auxilia ut pro viribus suis quæque civitates*  
*mitterent, est hortatus. Ad Ætolos legatum etiam*  
*misit: magis ut nudaret animos, id quod evenit,*  
*quam spe impetrari posse.*

XXV. Tribunis militum, ut exercitum ab Elatia <sup>Quinctius</sup> arcesserent, imperavit. Per eosdem dies et Antiochi <sup>Argos exer-</sup> <sub>citum du-</sub> legatis, de societate agentibus, respondit, *Nihil se, cit.*  
*absentibus decem legatis, sententiæ habere. Romam*  
*eundum ad senatum iis esse. Ipse copias adductas*  
*ab Elatia ducere Argos pergit; atque ei circa Cleo-*  
*nas Aristænus prætor, cum decem millibus Achæo-*  
*rum, equitibus mille, obcurrit: et haud procul inde,*

U. C. 557. junctis exercitibus, posuerunt castra. Postero die  
 A. C. 195. in campum Argivorum descenderunt, et quatuor  
 ferme millia ab Argis locum castris capiunt. Præ-  
 fectus præsidio Laconum erat Pythagoras, gener  
 idem tyranni, et uxoris ejus frater: qui sub adven-  
 tu Romanorum et utrasque arces, (nam duas ha-  
 bent Argi) et loca alia, quæ aut opportuna, aut  
 suspecta erant, validis præsidiis firmavit: sed inter  
 agenda hæc pavorem injectum adventu Romanorum  
 dissimulare haudquaquam poterat: et ad externum  
 terrorem intestina etiam seditio accessit. Damocles  
 erat Argivus, adolescens majoris animi, quam con-  
 siliī: qui primo, jurejurando interposito, de præsi-  
 dio expellendo cum idoneis conlocutus, dum vires  
 adjicere conjurationi studet, incautior fidei æstima-  
 tor fuit. Conloquentem eum cum suis satelles a  
 præfecto missus quum arcesseret, sensit proditum  
 consilium esse; hortatusque conjuratos, qui ad-  
 erant, ut potius, quam extorti morerentur, arma  
 secum caperent: atque ita cum paucis in forum ire  
 pergit, clamitans, ut, qui salvam rempublicam vel-  
 lent, auctorem et ducem se libertatis sequerentur.  
 Haud sane movit quemquam, quia nihil usquam  
 spei propinquæ, nedum satis firmi præsidii, cerne-  
 bant. Hæc vociferantem eum Lacedæmonii, cir-  
 cumventum cum suis, interfecerunt: comprehensi  
 deinde quidam et alii; ex iis occisi plures, pauci in  
 custodiam conjecti: multi proxima nocte, funibus  
 per muruni demissi, ad Romanos transfugerunt.

XXVI. Quintius, adfirmantibus iis, si ad portas  
 Romanus exercitus fuisset, non sine effectu futurum  
 eum motum fuisse, et, si proprius castra admove-  
 rentur, non quieturos Argivos, misit expeditos pe-

dites equitesque, qui circa Cylarabin (gymnasium U. C. 557.  
id est minus trecentos passus ab urbe) cum erum- A. C. 195.  
pentibus a porta Lacedæmoniis prælium commis-  
runt, atque eos haud magno certamine compulerunt  
in urbem: et castra eo ipso loco, ubi pugnatum  
erat, imperator Romanus posuit. Diem inde unum  
in speculis fuit, si quid novi motus oriretur: post-  
quam obpressam metu civitatem vidi, advocat con-  
cilium de obpugnandis Argis. Omnium principum  
Græciæ, præter Aristænum, eadem sententia erat;  
quum caussa belli non alia esset, inde potissimum  
ordiundi bellum. Quinctio id nequaquam placebat,  
sed Aristænum, contra omnium consensum disser-  
rentem, cum haud dubia adprobatione audivit: et  
ipse adjecit, *quum pro Argivis adversus tyrannum bel-  
lum suscepitum sit, quid minus conveniens esse, quam  
omisso hoste Argos obpugnari?* Se vero caput belli  
Lacedæmonem ei tyrannum petiturum. Et, dimisso  
concilio, frumentatum expeditas cohortes misit.  
Quod maturi erat circa, demessum et convectum  
est: viride, ne hostes mox haberent, protritum et  
corruptum. Castra deinde movit, et, Parthenio su-  
perato monte, præter Tegeam tertio die ad Caryas  
posuit castra: ibi, priusquam hostium intraret a-  
grum, sociorum auxilia exspectavit. Venerunt Ma- Lacedæmo-  
cedones a Philippo mille quingenti, et Thessalorum <sup>nem peti-</sup>  
equites quadrangenti: nec jam auxilia, quorum ad-  
fatum erat, sed commeatus finitimis urbibus impe-  
rati morabantur Romanum. Navales quoque magnæ  
copiæ conveniebant. Jam ab Leucade L. Quinctius  
quadraginta navibus venerat: jam Rhodiæ decem  
et octo tectæ naves, jam Eumenes rex circa Cycla-  
das insulas erat cum decem tectis navibus, triginta

**B.C. 557.** lembis, mixtisque aliis minoris formæ navigiis: ip-  
**A.C. 195.** sorum quoque Lacedæmoniorum exsules permulti, tyrannorum injuria pulsi, spe recuperandæ patriæ in castra Romana convenerant. Multi autem erant, jam per aliquot ætates, ex quo tyranni tenebant Lacedæmonem, alii ab aliis pulsi. Princeps erat exsulum Agesipolis, cuius jure gentis regnum Lacedæmone erat, pulsus infans ab Lycurgo tyranno post mortem Cleomenis, qui primus tyrannus Lacedæmone fuit.

**Adparatus** **tyranni.** XXVII. Quum terra marique tantum belli circumstaret tyrannum, et prope nulla spes esset vere suas hostiumque æstimanti vires, non tamen omisit bellum: sed et a Creta mille delectos juventutis eorum excivit, quum mille jam haberet: et tria milia mercenariorum militum, decem millia popularium cum castellanis agrestibus in armis habuit: et fossa valloque urbem communivit. Et, ne quid intestini motus oriretur, metu et acerbitate pœnarum tenebat animos, quoniam, ut salvum vellent tyrannum, sperare non poterat. Quum suspectos quosdam civium haberet, eductis in campum omnibus copiis, (Dromon ipsi vocant) positis armis, ad concionem vocari jussit Lacedæmonios, atque eorum concioni satellites armatos circumdedit: et pauca præfatus, cur sibi omnia timenti carentique ignoscendum in tali tempore foret: et ipsorum referre, si quos suspectos status præsens rerum faceret, prohiberi potius, ne quid moliri possint, quam puniri molientes. Itaque quosdam se in custodia habiturum, donec ea, quæ instet, tempestas prætereat. Hostibus repulsis, (a quibus, si modo proditio intestina satis caveatur, minus periculi esse) extemplo eos emissurum. Sub hæc

citari nomina octoginta ferme principum juventutis U. C. 557.  
 jussit : atque eos, ut quisque ad nomen responde- A. C. 195.  
 rat, in custodiam tradidit : nocte insequenti omnes  
 interfecti. Ilotarum deinde quidam, (hi sunt jam  
 inde antiquitus castellani, agreste genus) transfu-  
 gere voluisse insimulati, per omnes vicos sub verbe-  
 ribus acti necantur : hoc terrore obstupuerant mul-  
 titudinis animi ab omni conatu novorum consilio-  
 rum. Intra munitiones copias continebat, nec pa-  
 rem se ratus, si dimicare acie vellet ; et urbem re-  
 linquere, tam suspensis et incertis omnium animis,  
 metuens.

XXVIII. Quinctius, satis jam omnibus paratis,  
 profectus ab stativis, die altero ad Sellasiam super  
 Oenonta fluvium pervenit : quo in loco Antigonus,  
 Macedonum rex, cum Cleomene, Lacedæmonio-  
 rum tyranno, signis conlatis dimicasse dicebatur.  
 Inde, quum audisset adscensum difficilis et artæ viæ  
 esse, brevi per montes circuitu præmissis, qui mu-  
 nirent viam, lato satis et patenti limite ad Eurotam  
 amnem, sub ipsis prope fluentem mœnibus, perve-  
 nit : ubi castra metantes Romanos Quinctiumque  
 ipsum, cum equitibus atque expeditis prægressuni,  
 auxiliares tyranni adorti, in terrorem ac tumultum  
 conjecerunt, nihil tale exspectantes, quia nemo his  
 obvius toto itinere fuerat, ac veluti pacato agro  
 transierant. Aliquamdiu peditibus equites, equiti- Auxiliares  
 bus pedites vocantibus, quum in se cuique minimum ejus pulsi  
 fiduciæ esset, trepidatum est : tandem signa legio- in urbem.  
 num supervenerunt : et, quum primi agminis co-  
 hortes inductæ in prælium essent, qui modo terrori  
 fuerant, trepidantes in urbem compulsi sunt. Ro-  
 mani, quuni tantum a muro recessissent, ut extra

U.C. 557. ictum teli essent, acie directa paullisper steterunt.

A.C. 195. Postquam nemo hostium contra exibat, redierunt in castra. Postero die Quinctius prope flumen præter urbem sub ipsas Menelaii montis radices ducere copias instructas pergit: primæ legionariæ cohortes ibant: levis armatura et equites agmen cogebant. Nabis intra murum instructos paratosque sub signis habebat mercenarios milites, (in quibus omnis fiducia erat) ut ab tergo hostem adgredetur: postquam extremum agmen præteriit, tum ab oppido, eodem quo pridie eruperant tumultu.

~~Iterum fu-tu, pluribus simul locis erumpunt. Ap. Claudio~~ gantur.

agmen cogebat: qui ad id, quod futurum erat, ne inopinatum accideret, præparatis suorum animis, signa extemplo convertit, totumque in hostem agmen circumegit. Itaque, velut rectæ acies concurrissent, justum aliquamdiu prælium fuit. Tandem Nabidis milites in fugam inclinarunt: quæ minus infida ac trepida fuisset, ni Achæi locorum prudentes institissent: hi et cædem ingentem ediderunt, et dispersos passim fuga plerosque armis exuerunt. Quinctius prope Amyclas posuit castra: inde, quum perpopulatus omnia circumjecta urbi frequentis et amœni agri loca esset, nullo jam hostium porta excedente, movit castra ad flumen Eurotam: inde vallem Taygeto subjectam agrosque ad mare pertinentes evastat.

XXIX. Eodem fere tempore L. Quinctius maritimæ oræ oppida, partim voluntate, partim metu aut vi, recepit: certior deinde factus, Gythium oppidum omnium maritimarum rerum Lacedæmoniis receptaculum esse, nec procul a mari castra Romana abesse, omnibus id copiis adgredi constituit.

Erat eo tempore valida urbs, et multitudine ci- U.C. 557.  
 vium incolarumque, et omni bellico adparatu in- A.C. 195.  
 structa. In tempore Quintio, rem haud facilem Gythium  
 adgradienti, rex Eumenes et classis Rhodiorum su- captum a Romanis.  
 pervenerunt: ingens multitudo navalium sociorum,  
 e tribus contracta classibus, intra paucos dies om-  
 nia, quæ ad obpugnationem urbis terra marique  
 munitæ facienda opera erant, effecit. Jam testudi-  
 nibus admotis murus subruebatur: jam arietibus  
 quatiebatur. Itaque una crebris ictibus eversa est  
 turris, quodque circa muri erat, casu ejus prostra-  
 tum: et Romani simul a portu, unde aditus planior  
 erat, ut distenderent ab apertiore loco hostes, simul  
 per patefactum ruina iter intrumpere conabantur.  
 Nec multum absfuit, quin, qua intenderant, penetra-  
 rent: sed tardavit inpetum eorum spes objecta de-  
 dendæ urbis, mox deinde eadem turbata. Dexago-  
 ridas et Gorgopas pari imperio præerant urbi.  
 Dexagoridas miserat ad legatum Romanum, tradi-  
 turum se urbem: et quum ad eam rem tempus et  
 ratio convenisset, a Gorgopa proditor interficitur:  
 intentiusque ab uno urbs defendebatur; et difficilior  
 facta obpugnatio erat, ni T. Quinctius cum quatuor  
 millibus delectorum militum supervenisset. Is quum  
 supercelio hand procul distantis tumuli ab urbe in-  
 structam aciem ostendisset, et ex altera parte L.  
 Quinctius ab operibus suis terra marique instaret;  
 tum vero desperatio Gorgopam quoque coëgit id  
 consilii, quod in altero morte vindicaverat, capere:  
 et pactus, ut abducere inde milites, quos præsidii  
 caussa habebat, liceret, tradidit Quintio urbem.  
 Priusquam Gythium traderetur, Pythagoras, præ-  
 fectus Argis relictus, tradita custodia urbis Timo-

**U. C. 557.** crati Pellenensi, cum mille mercenariis militibus, et  
**A. C. 195.** duobus millibus Argivorum, Lacedæmonem ad Nabonum venit.

Nabis  
conloqui-  
um petit.

**XXX.** Nabis, sicut primo adventu Romanæ classis et traditione oppidorum maritimæ oræ conterritus erat, sic, parva spe quum adquievisset, Gythio ab suis retento, postquam id quoque traditum Romanis audivit esse, quum ab terra, omnibus circa hostibus, nihil spei esset, a mari quoque toto se interclusum, cedendum fortunæ ratus, caduceatorem primum in castra misit ad explorandum, si paterentur legatos ad se mitti : qua inpetrata re, Pythagoras ad imperatorem venit, nullis cum aliis mandatis, quam ut tyranno conloqui cum imperatore liceret. Consilio advocateo, quum omnes dandum conloquium censuissent, dies locusque constituitur. In mediae regionis tumulos, modicis copiis sequentibus, quum venissent, relictis ibi in statione conspecta utrimque cohortibus, Nabis cum delectis custodibus corporis, Quinctius cum fratre et Eumene rege, et Sosilao Rhodio, et Aristæno Achæorum prætore, tribunisque militum paucis descendit.

Tyranni  
oratio.

**XXI.** Ibi permisso, ut, seu dicere prius, seu audire mallet, ita cœpit tyrannus. *Si ipse per me, T. Quincti, vosque, qui adestis, caussam excogitare, cur mihi aut indixissetis bellum, aut inferretis, possem : tacitus eventum fortunæ meæ exspectassem : nunc imperare animo nequiviri, quin, priusquam perirem, cur peritus essem, scirem. Et, Hercule, si tales essetis, quales esse Karthaginienses fama est, apud quos nihil societatis fides sancti haberet ; in me quoque vobis quid faceretis minus pensi esse, non mirarer. Nunc, quum vos intueor, Romanos esse video, qui rerum divinarum*

fædera, humanarum fidem socialem sanctissimam ha- U. C. 557.  
 beatis. Quum me ipse respexi, eum esse spero, cui et A. C. 195.  
 publice, sicut ceteris Lacedæmoniis, vobiscum vetustis-  
 simum fædus sit: et meo nomine privatim amicitia ac  
 societas, nuper Philippi bello renovata. At enim ego  
 eam violari et everti, quod Argivorum civitatem teneo.  
 Quomodo hoc tuear? re, an tempore? Res mihi du-  
 plicem defensionem præbet: nam et, ipsis vocantibus  
 ac tradentibus, urbem eam accepi, non occupavi: et  
 accepi, quum Philippi partium, non in vestra socie-  
 tate esset. Tempus autem eo me liberat, quod, quum  
 jam Argos haberem, societas mihi vobiscum convenit:  
 et, ut vobis mitterem ad bellum auxilia, non ut Argis  
 præsidium deducerem, pepigistis. At, Hercle, in ea  
 controversia, quæ de Argis est, superior sum et æqui-  
 tate rei, quod non vestram urbem, sed hostium; quod  
 volentem, non vi coactam, accepi; et vestra confes-  
 sione, quod in conditionibus societatis mihi Argos reli-  
 quistis. Ceterum nomen tyranni et facta me premunt,  
 quod servos ad libertatem voco, quod in agros inopem  
 plebem deduco. De nomine hoc respondere possum,  
 me, qualiscumque sum, eundem esse, qui fui, quum tu  
 ipse mecum, T. Quincti, societatem pepigisti. Tum  
 me regem adpellari a vobis memini: nunc tyrannum  
 vocari video. Itaque si ego nomen imperii mutasssem,  
 mihi meæ inconstantiae; quum vos mutetis, vobis ves-  
 træ reddenda ratio est. Quod ad multitudinem servis  
 liberandis auctam, et egentibus dirisum agrum adtinet,  
 possum quidem et in hoc me jure temporis tutari. Jam  
 feceram hæc, qualiacumque sunt, quum societatem  
 mecum pepigistis, et auxilia in bello adversus Philip-  
 pum accepistis. Sed si nunc ea fecissem, non dico,  
 quid in eo vos læsissem, aut vestram amicitiam violas-

**U. C. 557.** sem? sed illud, me more atque instituto majorum fe-  
**A. C. 195.** cisse. Nolite ad vestras leges atque instituta exigere

ea, quæ Lacedæmone fiunt. Nihil comparare singula  
necessæ est: vos a censu equitem, a censu pedestrem le-  
gitis: et paucos excellere opibus, plebem subjectam esse  
illis, vultis. Noster legumlator non in paucorum  
manu rempublicam esse voluit, quem vos senatum ad-  
pellatis; nec excellere unum aut alterum ordinem in  
civitate: sed per æquationem fortunæ ac dignitatis  
fore credidit, ut multi essent, qui arma pro patriæ  
ferrent. Pluribus me peregrisse, quam pro patriæ ser-  
mone brevitatis, futeor. Et breviter peroratum esse  
potuit; Nihil me, postquam vobiscum amicitiam insti-  
tui, cur ejus vos peniteret, commisisse.

Respon-  
sio T.  
Quinctii.

XXXII. Ad hæc imperator Romanus: *Amicitia*  
et *societas* nobis nulla tecum, sed cum Pelope, rege  
Lacedæmoniorum justo ac legitimo, facta est. *Cujus*  
*jus tyranni quoque*, qui postea per vim tenuerunt La-  
cedæmone imperium, (*quia nos bella nunc Punica,*  
*nunc Gallica, nunc alia ex aliis occupaverant*) usurpa-  
runt; sicut tu quoque hoc Macedonico bello fecisti.  
Nam quid minus conreniret, quam eos, qui pro liber-  
tate Græciæ adversus Philippum gererent bellum,  
cum tyranno instituere amicitiam? et iyranno quam,  
qui umquam, sævissimo et violentissimo in suos? No-  
bis vero, etiamsi Argos nec cepisscs per fraudem, nec  
teneres, liberantibus omnem Græciam, Lacedæmon quo-  
que vindicanda in antiquam libertutem erat aique in  
leges suas, querum modo, tamquam æmulus Lycurgi,  
mentionem fecisti. An, ut ab Iasso et Bargylis præ-  
sidia Philippi deducantur, curæ erit nobis? Argos et  
Lacedæmonem, duas clarissimas urbes, lumina quon-  
dam Græciæ, sub pedibus tuis relinquemus; quæ titu-

lum nobis liberatæ Græciæ servientes deformant? At U. C. 557.  
enim cum Philippo Argivi senserunt. Remittimus hoc A. C. 195.  
tibi, ne nostram vicem irascaris. Satis compertum ha-  
bemus, duorum, aut summum trium in ea re, non ci-  
vitatis, culpam esse: tam, Hercole, quam in te tuoque  
præsidio arcessendo accipiendoque in arcem nihil sit  
publico consilio actum. Thessalos, et Phocenses, et Lo-  
crense, consensu omnium scimus partium Philippi fu-  
isse: tamen quum ceteram liberaverimus Græciam, quid  
tandem censes in Argivis, qui insontes publici consilii  
sint, facturos? Servorum ad libertatem vocatorum, et  
egentibus hominibus agri divisi crimina tibi objici dice-  
bas: non quidem nec ipsa mediocria: sed quid ista  
sunt præ iis, quæ a te tuisque quotidie alia super alia  
facinora eduntur? Exhibe liberam concionem vel Ar-  
gis, vel Lacedæmonie, si audire juvat vera dominationis  
inpotentissimæ criminæ. Ut omnia alia vetustiora  
omittam, quam eadem Argis Pythagoras isie gener-  
tus pene in oculis meis edidit? quam tu ipse, quum  
jam prope in flibus Lacedæmoniorum essem? Age-  
dum, quos in concione comprehensos, omnibus audienc-  
tibus civibus tuis, in cusiodia te habiliurum esse pro-  
nunciasti, jube vincetos produci, ut miseri parentes, quos  
falso lugent, vivere sciant. At enim, ut jam ita sint  
hæc, quid ad vos, Romani? Hoc tu dicas liberantibus  
Græciam? hoc iis, qui, ut liberare possent, mare tra-  
jecerunt, ierra marique gesserunt bellum? Vos tamen,  
inquis, vestramque amicitiam ac societatem proprie-  
non violavi. Quoties vis te id arguam fecisse? Sed  
nolo pluribus: summam rem complectar. Quibus igi-  
tur rebus amicitia violatur? Nempe his maxime dua-  
bus, si socios meos pro hostibus habeas; si cum hosti-  
bus te conjungas. Utrum non a te factum est? nam

**U. C. 557.** et Messenen, uno atque eodem jure fœderis, quo et **A. C. 195.** La-  
cedæmonem, in amicitiam nostram acceptam, socius  
ipse sociam nobis urbem vi atque armis cepisti: et cum  
Philippo, hoste nostro, non societatem solum, sed, si  
Diis placet, adfinitatem etiam per Philoclem præfec-  
tum ejus pepigisti: et bellum adversus nos gerens mare  
circa Maleam infestum navibus piraticis fecisti: et  
plures prope cives Romanos, quam Philippus, cepisti  
atque occidisti: tutiorque Macedoniae ora, quam pro-  
montorium Maleæ commentus ad exercitus nostros por-  
tantibus navibus fuit. Proinde parce, sis, fidem ac  
jura societatis jactare; et, omissa populari oratione,  
tamquam tyrannus et hostis loquere.

XXXIII. Sub hæc Aristænus nunc monere Na-  
bin, nunc etiam orare, ut, dum liceret, dum occasio  
esset, sibi ac fortunis suis consuleret. Referre de-  
inde nominatim tyrannos civitatum finitimarum cœ-  
pit, qui, deposito imperio, restitutaque libertate suis,  
non tutam modo, sed etiam honoratam inter cives  
senectutem egissent. His dictis in vicem auditis-  
que, nox prope diremit conloquium. Postero die  
**Nabis os-** **Nabis,** Argis se cedere ac deducere præsidium, quando  
**tendit ces-** ita Romanis placeret, et captivos et perfugas redditu-  
**surum se** rum, dixit. *Aliud si quid postularent, scriptum ut*  
**Argis.** ederent, pectiit, ut deliberare cum amicis posset. Ita et  
tyranno ad consultandum tempus datum est: et  
**Quinctius** Quinctius, sociorum etiam principibus adhibitis, ha-  
**habet su-** buit consilium. Maximiæ partis sententia erat:  
**per tota re** consilium. *Perseverandum in bello esse, et tollendum tyrannum:*  
*numquam aliter tutam libertatem Græciæ fore.* Satius  
*multo fuisse, non moveri bellum adversus eum, quam*  
*omitti motum: et ipsum velut comprobata dominatione*  
*firniorem futurum, auctore injusti imperii adsumto po-*

pulo Romano; et exemplo multos in aliis civitatibus U.C. 557.  
ad insidiandum libertati civium suorum incitaturum. A.C. 195.

Ipsius imperatoris animus ad pacem inclinatior erat: Socios ad videbat enim, compulso intra mœnia hoste, nihil pacem hor- præter obsidionem restare. Eam autem fore diu- turnam. Non enim Gythium, quod ipsum tamen tra- ditum, non expugnatum esset, sed Lacedæmonem, vali- dissimam urbem viris armisque, obpugnaturos. Unam spem fuisse, si qua admoventibus exercitum dissensio inter ipsos ac seditio excitari posset: quum signa portis prope inferri cernerent, neminem se movisse. Adjiciebat, et cum Antiocho infidam pacem, Villium legatum inde redeuntem nunciare: multo majoribus, quam ante, terrestribus navalibusque copiis in Europam eum trans- isse. Si occupasset obsidio Lacedæmonis exercitum, quibus aliis copiis adversus regem tam validum ac po- tentem bellum gesturos? Hæc propalam dicebat: illa tacita suberat cura, ne novus consul Græciam pro- vinciam sortiretur, et inchoati belli victoria succes- sori tradenda esset.

XXXIV. Quum adversus tendendo nihil move- ret socios, simulando se transire in eorum senten- tiā, omnes in adsensum consilii sui traduxit. Bene vertat, inquit, quando ita placet, olsideamus Lacedæ- monem. Illud modo ne fallat ceterum, quum res tam lenta, quam ipsi scitis, obpugnatio urbium sit, et obsi- dentibus prius sæpe, quam obsessis, tedium adferat, jam nunc hoc ita proponere vos animis oportet, hiber- nandum circa Lacedæmonis mœnia esse. Quæ mora si labore tantum ac periculum haberet, ut et animis, et corporibus ad sustinenda ea parati essetis, hortarer vos. Nunc inpensa quoque magna eget in opera, in machinationes, et tormenta, quibus tanta urbs obpug-

**U.C. 557.** *nanda est; in commeatus vobis nobisque in hiemem expediendos.* Itaque, ne aut repente trepidetis, aut rem inchoatam turpiter destituatis, scribendum ante vestris civitatibus censeo, explorandumque, quid quæque animi, quid virium habeat. Auxiliorum satis superque habeo: sed, quo plures sumus, pluribus rebus egebimus. Nihil jam præter nudum solum ager hostium habet. Ad hoc hiems accedit, ad comportandum ex longinquo difficilis. Hæc oratio primum animos omnium ad respicienda cuique domestica mala convertit; segnitiam, invidiā et obtractationem domi manentium adversus militantes, libertatem difficilem ad consensum, impian publicam, malignitatem conferendi ex privato. Versis itaque subito voluntatibus, facere, quod e republica populi Romani sociorumque esse crederet, imperatori permiserunt.

**Leges pacis tyranno dictæ.** XXXV. Inde Quinctius, adhibitis legatis tantum tribunisque militum, conditiones, in quas cum tyranno pax fieret, has conscripsit. Sex mensium inducæ ut essent Nabidi Romanisque, et Eumeni regi, et Rhodiis. Legatos exemplo mitterent Romanum T. Quinctius et Nabis, ut pax ex cuctorilate senatus confirmaretur. Ex qua die scriptæ conditiones pacis editæ Nabidi forent, ea dies ut induciarum principium esset: et ut ex ea die intra decimum diem ab Argis ceterisque oppidis, quæ in Argivorum agris essent, praesidia omnia deducerentur; vacuaque et libera traderentur Romanis: et ne quod inde mancipium regium publicumve aut privatum educeretur; et, si qua ante educta forent, dominis recte restituerentur. Nares, quas civitatibus maritimis ademisset, redderet: neve ipse navem ullam, præier duos lembos, qui non plus quam sexdecim remis agerentur, haberet. Perfugas et captivos omnibus so-

*cūis populi Romani civitatibus redderet, et Messeniis U.C. 557.*  
*omnia, quæ comparerent, quæque domini cognoscerent. A.C. 195.*

*Exsilibus quoque Lacedæmoniis liberos et conjuges re-*  
*stitueret, quæ earum viros sequi voluissent: invita ne*  
*qua exsulis comes esset. Mercenariorum militum Na-*  
*bidis, qui aut in civitates suas, aut ad Romanos trans-*  
*issent, iis res suæ omnes recte redderentur. In Creta*  
*insula ne quam urbem haberet: quas habuisset, redde-*  
*ret Romanis. Ne quam societatem cum ullo Creten-*  
*sium aut quoquam alio institueret, neu bellum gereret.*  
*Civitatibus omnibus, quas ipse restituisset, quæque se*  
*suaque in fidem ac ditionem populi Romani tradidis-*  
*sent, omnia præsidia deduceret: seque ipse suosque ab*  
*his abstineret. Nē quod oppidum, ne quod castellum*  
*in suo alieno agro conderet. Obsides, ea ita futura,*  
*daret quinque, quos imperatori Romano placuisset;*  
*filium in his suum: et talenta centum argenti in præ-*  
*senti, et quinquaginta talenta in singulos annos per*  
*annos octo.*

XXXVI. Hæc conscripta, castris propius urbem Ea respuit motis, Lacedæmonem mittuntur: nec sane quid- Nabis. quam eorum satis placebat tyranno: nisi quod, præter spem, reduendorum exsulum mentio nulla facta erat: maxime autem omnium ea res obfende- bat, quod et naves, et maritimæ civitates admette- erant. Fuerat autem ei magno fructui mare, om- nemi oram Maleæ prædatoriis navibus infestam ha- benti: juventutem præterea civitatum earum ad supplementum longe optimi generis militum habe- bat. Has conditiones, quamquam ipse in secreto volutaverat cū amicis, vulgo tamen omnes fama ferebant, vanis, ut ad ceteram fidem, sic ad secreta tegenda, satellitum regiorum ingenii. Non tam

**U. C. 557.** omnia universi, quam ea, quæ ad quemque pertineant, singuli carpebant: qui exsulum conjuges in matrimonio habebant, aut ex bonis eorum aliquid possederant, tanquam amissuri, non reddituri, indignabantur: servis liberatis a tyranno non irrita modo futura libertas, sed multo fœdior, quam fuisse ante, servitus redeuntibus in iratorum dominorum potestatem ante oculos obversabatur: mercennarii milites et pretia militiae casura in pace ægre ferebant, et redditum sibi nullum esse in civitates videbant, infensas non tyrannis magis, quam satellitibus eorum.

**XXXVII.** Hæc inter se primo in circulis serentes tremere: deinde ad arma subito discurrerunt. Quo tumultu quum per se satis irritatam multitudinem cerneret tyrannus, concionem advocari jussit: ubi quum ea, quæ imperarentur a Romanis, exposuisset, et graviora atque indigniora quædam falso adfinxisset, et ad singula, nunc ab universis, nunc a partibus concionis, adclamaretur, interrogavit, *Quid Parat se ad se respondere ad ea, aut quid facere vellent?* Prope bellum. una voce omnes, *Nihil respondere, bellum geri, jussent:* et pro se quisque, qualia multitudo solet, bonum animum habere, et bene sperare jubentes, *fortes fortunam aljuvare,* aiebant. His vocibus incitatus tyrannus, et Antiochum Ætolosque adjuturos pronunciavit; et sibi ad obsidionem sustinendam copiarum adfatum esse. Exciderat pacis mentio ex omnium animis, et in stationes non ultra quieturi discurrunt. Paucorum lacescentium excursio et emissâ jacula extemplo et Romanis dubitationem, quin bellandum esset, excmerunt. Levia inde prœlia per quatriduum primum sine ullo satis certo

eventu commissa: quinto die prope justa pugna U. C. 557,  
adeo paventes in oppidum Lacedæmonii compulsi A. C. 195.  
sunt, ut quidam milites Romani, terga fugientium  
cædentes, per intermissa, ut tunc erant, mœnia ur-  
bem intrarint.

XXXVIII. Et tunc quidem Quintius, satis eo  
terrore coërcitis excursionibus hostium, nihil præter  
ipsius obpugnationem urbis superesse ratus, missis,  
qui omnes navales socios a Gythio arcesserent, ipse  
interim cum tribunis militum ad visendum urbis si-  
tum mœnia circumvehitur. Fuerat quondam sine <sup>Spartæ mu-</sup>  
muro Sparta: tyranni nuper locis patentibus planis-  
que objecerant murum: altiora loca, et difficiliora  
aditu, stationibus armatorum pro munimento objec-  
tis tutabantur. Ubi satis omnia inspexit, corona  
obpugnandum ratus, omnibus copiis (erant autem  
Romanorum sociorumque, simul peditum equitum-  
que, simul terrestrium ac navalium copiarum, ad <sup>Corona ob-</sup>  
<sup>quinquaginta millia hominum) urbem cinxit. Alii</sup> <sup>pugnatur.</sup>  
scalas, alii ignem, alii alia, quibus non obpugnarent  
modo, sed etiam terrorrent, portabant: jussi clamore  
sublato subire undique omnes, ut, qua primum ob-  
currerent, quave opem ferrent, ad omnia simul pa-  
ventes Lacedæmonii ignorarent. Quod roboris in  
exercitu erat, trifariam divisum: parte una a Phœ-  
beo, altera a Dictynneo, tertia ab eo loco, quem  
Heptagonias adpellant (omnia autem hæc aperta  
sine muro loca sunt) adgredi jubet. Quum tantus  
undique terror urbem circumvasisset; primo tyran-  
nus et ad clamores repentinos, et ad nuncios trepi-  
dos motus, ut quisque maxime laboraret locus, aut  
ipse obcurrebat, aut aliquos mittebat: deinde, cir-  
cumfuso undique pavore, ita obtorpuit, ut nec di-

U. C. 557. cere, quod in rem esset, nec audire posset; nec  
A. C. 195. inops modo consilii, sed vix mentis compos esset.

XXXIX. Romanos primo sustinebant in angustiis Lacedæmonii: ternæque acies tenipore uno locis diversis pugnabant. Deinde, crescente certamine, nequaquam erat prælium par: missilibus enim Lacedæmonii pugnabant, a quibus se et magnitudine scuti perfacile Romanus tuebatur miles, et quod alii vani, alii leves admodum ictus erant: nam propter angustias loci confertamque turbam non modo ad emitenda cum procursu, quo plurimum concitantur tela, spatium habebant: sed ne ut de gradu quidem libero ac stabili conarentur. Itaque ex adverso missa tela, nulla in corporibus, rara in scutis hærebant: a circumstantibus ex superioribus locis quidam vulnerati sunt: mox progressos jam etiam ex tectis non tela modo, sed tegulæ quoque, inopinantes perculerunt. Sublatis deinde supra capita scutis, continuatisque ita inter se, ut non modo ad cæcos ictus, sed ne ad inferendum quidem ex propinquo telum loci quidquam esset, testudine facta subibant: et primæ angustiæ paullisper, sua hostiumque refertæ turba, tenuerunt: postquam in patentiorem viam urbis paullatim urgentes hostem processere, non ultra vis eorum atque impetus sustineri poterant. Quum terga vertissent Lacedæmonii, et effusa fuga superiora peterent loca; Nabis quidem, ut capta urbe trepidans, quanam ipse evaderet, circumspectabat. Pythagoras quum ad cetera animo officioque ducis fungebatur, tum vero unus, ne caperetur urbs, caussa fuit: succendi enim ædificia proxima muro jussit: quæ quum momento temporis arsissent, ut adjuvantibus ignem, qui alias ad extinguedum opem ferre

Creman-  
tur ab ob-  
sessis do-  
mus mu-  
ro vicinæ.

solent, ruere in Romanos tecta : nec tegularum mo- U. C. 557.  
do fragmenta, sed etiam ambusta tigna, ad armatos A. C. 195.  
pervenire, et flamma late fundi, fumus terrorem etiam  
majorem, quam periculum, facere. Itaque et qui  
extra urbem erant Romanorum, tum maxime inpe-  
tus facientes, recessere a muro : et, qui jam intrave-  
rant, ne incendio ab tergo oriente intercluderentur  
ab suis, receperunt sese: et Quinctius, postquam,  
quid rei esset, vidit, receptui canere jussit. Ita  
jam a capta prope urbe revocati redierunt in cas-  
tra.

XL. Quinctius plus ex timore hostium, quam ex  
re ipsa, spei nactus, per triduum insequens territavit  
eos; nunc prœliis lacessendo, nunc operibus inter-  
sepiendo quædam ; ne exitus ad fugam esset. His  
comminationibus compulsus tyrannus Pythagoram  
rursus oratorem misit, quem Quinctius primo ad-  
spernatum excedere castris jussit : deinde supplici-  
ter orantem, advolutumque genibus, tandem audi-  
vit. Prima oratio fuit omnia permittentis arbitrio Pax cum  
Romanorum : dein, quum ea velut vana et sine Nabide.  
effectu nihil proficerent, eo deducta res est, ut his  
conditionibus, quæ ex scripto paucis ante diebus  
editæ erant, induciæ fierent : pecuniaque et obsides  
accepti. Dum obpugnatur tyrannus, Argivi, nunciis Argivi sese  
aliis prope super alios adferentibus, tantum non jam ipsi libe-  
captam Lacedæmonem esse, erecti et ipsi, simul eo  
quod Pythagoras cum parte validissima præsidii ex-  
cesserat, contemta paucitate eorum, qui in arce erant,  
duce Archippo quodam, præsidium expulerunt. Ti-  
mocratem Pellenensem, quia clementer præfuerat, vi-  
vum fide data emiserunt. Huic lætitiae Quinctius  
supervenit, pace data tyranno, dimissisque ab Lacc-

U. C. 557. dæmone Eumene, et Rhodiis, et L. Quinctio fratre  
A. C. 195. ad classem.

**XLI.** Læta civitas celeberrimum festorum dierum ac nobile ludicrum Nemeorum, die stata propter belli mala prætermissum, in adventum Romani exercitus ducisque indixerunt, præfeceruntque ludis ipsum imperatorem. Multa erant, quæ gaudium cumularent: reducti cives ab Lacedæmone erant, quos nuper Pythagoras, quosque ante Nabis, abduxerant: redierant, qui post compertam a Pythagora conjurationem, et cæde jam cœpta, effugerant: libertatem ex longo intervallo, libertatisque auctores Romanos, quibus caussa bellandi cum tyranno ipsi fuissent, cernebant. Testata quoque ipso Nemeorum die voce præconis libertas est Argivorum. Achæis quantum restituti Argi in commune Achaiae concilium lætitiae adferebant; tantum serva Lacedæmon relicta, lateri adhærens tyranni, non sincerum gaudium præbebat. Ætoli vero eam rem omnibus conciliis lacerare. Cum Philippo non ante desitum bellari, quam omnibus excederet Græciæ urbibus. Tyranno relictam Lacedæmonem: regem autem legitimum, qui in Romanis fuerat castris, ceterosque nobilissimos cives in exilio victuros. Nabidis dominantis satellitem factum populum Romanum. Quinctius ab Argis Elatiā, unde ad bellum Spartanum profectus erat, copias reduxit. Sunt, qui non ex oppido proficiscentem bellum gessisse tyrannum tradant, sed castris adversus Romana castra pōsitī: diuque cunctatum, quum Ætolorum auxilia exspectasset, coactum ad extremum acie configere, in petu in pabulatorē suos ab Romanis facto: eo prælio victum, castrisque extum pacem petisse; quum cecidissent quindecim

Querelæ  
in Quinc-  
tium.

nullia militum, capta plus quatuor nullia es- U. C. 557.  
sent. A. C. 195.

**XLII.** Eodem fere tempore et a T. Quintio de rebus ad Lacedæmonem gestis, et ab M. Porcio consule ex Hispania literæ adlatae: utriusque nomine in dies ternos supplicatio a senatu decreta est. L. Valerius consul, quum post fusos circa Litanam silvam Boios quietam provinciam habuisse, comitiorum caussa Romam rediit; et creavit consules P. Cornelium Scipionem Africanum iterum et Ti. Sempronium Longum. Horum patres primo anno secundi Punici belli consules fuerant. Prætoria inde comitia habita: creati P. Cornelius Scipio, et duo Cn. Cornelii, Merenda et Blasio, et Cn. Domitius Ahenobarbus, et Sex. Digitius, et T. Juventius Thalna. Comitiis perfectis, consul in provinciam rediit. Novum jus eo anno a Ferentinatibus tentatum, ut Latini, qui in coloniam Romanam nomina dedissent, cives Romani essent. Puteolos, Salernumque, et Buxentum adscripti coloni, qui nomina dederant, quum ob id se pro civibus Romanis ferrent, senatus judicavit, non esse eos cives Romanos.

**XLIII.** Principio anni, quo P. Scipio Africa- U. C. 558.  
nus iterum et Ti. Sempronius Longus consules fuerunt, legati Nabidis tyranni Romam vene- A. C. 194.  
runt. Iis extra urbem in æde Apollinis senatus  
datus est: pax, quæ cum T. Quintio convenisset,  
ut rata esset, petierunt, inpetraveruntque. De pro-  
vinciis quum relatum esset, senatus frequens in eam  
sententiam ibat; ut, quoniam in Hispania et Mace-  
donia debellatum foret, consulibus ambobus Italia  
provincia esset. Scipio, satis esse Italæ unum con-  
sulem, censebat: alteri decernendam Macedoniam esse.

**U. C. 558.** *Bellum grave ab Antiocho imminere: jam ipsum sua  
A. C. 194. sponte in Europam transgressum.* Quid deinde facturum censerent, quum hinc Ætolii haud dubie hostes vocarent ad bellum, illinc Hannibal, Romanis cladibus insignis imperator, stimularet? Dum de provinciis consulum disceptatur, prætores sortiti sunt. Cn. Domitio urbana jurisdictio, T. Juventio peregrina evenit. P. Cornelio Hispania ulterior, Sex. Digitio citerior: duobus Cn. Corneliis, Blasioni Sicilia, Mendæ Sardinia. In Macedoniam novum exercitum transportari non placuit: eum, qui esset ibi, reduci in Italiam a Quintio, ac dimitti: item eum exercitum dimitti, qui cum M. Porcio Catone in Hispania esset. Consulibus ambobus Italiam provinciam esse, et duas urbanas eos legiones scribere: ut, dimissis, quos senatus censisset, exercitibus, octo omnino Romanæ legiones essent.

**XLIV.** Ver sacrum factum erat priore anno, M. Porcio et L. Valerio consulibus: id quum P. Licinius pontifex non esse recte factum collegio primum, deinde ex auctoritate collegii Patribus, renunciasset, de integro faciendum arbitratu pontificum censuerunt; ludosque magnos, qui una voti essent, tanta pecunia, quanta adsoleret, faciendo. Ver sacrum videri pecus, quod natum esset inter Kalendas Martias, et pridie Kalendas Maias, P. Cornelio Scipione et Ti. Sempronio Longo consulibus. Censorum inde conitia habita sunt: creati censores Sex. Ælius Pætus et C. Cornelius Cethegus principem senatus P. Scipionem consulem, quem et priores censores legerant, legerunt: tres omnino senatores, neminem curuli honore usum, præterierunt. Gratiam quoque ingentem apud eum ordinem pepererunt, quod, ludis Romanis, ædilibus curulibus imperarunt, ut loca se-

natoria secernerent a populo : nam antea in promis- U.C. 558.  
 cuo spectabant. Equitibus quoque perpaucis ademti A.C. 194.  
 equi, nec in ullum ordinem sævitum. Atrium Li- Loca sena-  
 bertatis et Villa publica ab eisdem refecta amplifi- toria in lu-  
 cataque. Ver sacrum ludique votivi, quos voverat dis.  
 Ser. Sulpicius Galba consul, facti. Quum specta-  
 culo eorum occupati animi omnium essent, Q. Ple- Pleminius  
 minius, qui propter multa in Deos hominesque sce- necatus.  
 lera, Locris admissa, in carcerem conjectus fuerat,  
 comparaverat homines, qui pluribus simul locis ur-  
 bis nocte incendia facerent; ut in consternata noc-  
 turno tumultu civitate refringi carcer posset. Ea  
 res indicio consciorum palam facta, delataque ad  
 senatum est. Pleminius in inferiorem demissus car-  
 cerem est, necatusque.

**XLV.** Coloniæ civium Romanorum eo anno de- Coloniæ  
 ductæ sunt Puteolos, Vulturnum, Liternum ; treceni deductæ.  
 homines in singulas. Item Salernum Buxentumque  
 coloniæ civium Romanorum deductæ sunt : deduxere  
 triumviri, Ti. Sempronius Longus, qui tum consul  
 erat, M. Servilius, Q. Minucius Thermus. Ager di-  
 visus est, qui Campanorum fuerat. Sipontum item  
 in agrum, qui Arpinorum fuerat, coloniam civium  
 Romanorum alii triumviri, D. Junius Brutus, M.  
 Bæbius Tamphilus, M. Helvius deduxerunt. Tem-  
 psam item et Crotonem civium Romanorum coloniæ  
 deductæ. Tempsanus ager de Bruttis captus erat :  
 Bruttii Græcos expulerant. Crotonem Græci habe-  
 bant. Triumviri Cn. Octavius, L. Æmilius Paullus,  
 C. Plætorius Crotonem ; Tempsam L. Cornelius  
 Merula et C. Salonius deduxerunt. Prodigia quo-  
 que alia visa eo anno Romæ sunt, alia nunciata. In  
 foro, et comitio, et Capitolio sanguinis guttæ visæ

U. C. 558. snnt: et terra aliquoties pluit: et caput Vulcani ar-  
A. C. 194. sit. Nunciatum est, Nare anni lac fluxisse: pueros  
ingenuos Arimini sine oculis ac naso; et in Piceno  
agro non manus, non pedes habentem natum: ea  
prodigia ex pontificum decreto procurata. Et sacri-  
ficium novemdiale factum, quod Hadriani nunciave-  
rant, in agro suo lapidibus pluisse.

**XLVI.** In Gallia L. Valerius Flaccus proconsul  
circa Mediolanum cum Gallis Insubribus, et Boiis,  
qui Dorulaco duce ad concitandos Insubres Padum  
transgressi erant, signis conlatis depugnavit: decem  
millia hostium sunt cæsa. Per eos dies collega ejus  
M. Porcius Cato ex Hispania triumphavit: tulit in  
eo triumpho argenti infecti viginti quinque millia  
pondo, bigati centum viginti tria millia, Oscensis  
quingenta quadraginta: auri pondo mille quadrin-  
genta. Militibus ex præda divisit in singulos, duce-

Catonis  
trium-  
phus.  
  
Sempronii nos septuagenos æris, triplex equiti. Ti. Sempro-  
res gestæ nius consul, in provinciam profectus, in Boiorum  
adversus primum agrum legiones duxit. Boiorix tum regulus  
Boios.

eorum, cum duobus fratribus tota gente concitata  
ad rebellandum, castra locis apertis posuit: ut ad-  
pareret dimicatueros, si hostis fines intrasset. Con-  
sul ubi, quantæ copiæ, quanta fiducia esset hosti,  
sensit, nuncium ad collegam mittit, *ut, si videretur*  
*ei, maturaret venire: se tergiversando in adventum*  
*ejus rem extracturum.* Quæ caussa consuli cunctandi,  
eadem Gallis (præterquam quod cunctatio hos-  
tium animos faciebat) rei maturandæ erat, ut, prius-  
quam conjungerentur consulum copiæ, rem transi-  
gerent: per biduum tamen nihil aliud, quam stete-  
runt parati ad pugnandum, si quis contra egredere-  
tur: tertio subiere ad vallum, castraque ab omni-

simul parte adgressi sunt. Consul extempsu arma U. C. 558.  
capere milites jussit: armatos inde paullisper conti- A. C. 194.  
nuit; ut et stolidam fiduciam hosti augeret, et dis-  
pōneret copias, quibus quæque portis erumperent.  
Duæ legiones duabus principalibus portis signa  
efferre jussæ: sed in ipso exitu ita conferti obstitere  
Galli, ut clauderent viam. Diu in angustiis pugna-  
tum est: nec dextris magis gladiisque gerebatur res,  
quam scutis corporibusque ipsis obnisi urgebant;  
Romani, ut signa foras efferrent; Galli, ut aut ipsi  
in castra penetrarent, aut exire Romanos prohibe-  
rent. Nec ante in hanc aut illam partem moveri  
acies potuerunt, quam Q. Victorius primi pili centu-  
rio, et C. Atinius tribunus militum, quartæ hic, ille  
secundæ legionis, (rem in asperis præliis sæpe ten-  
tatam) signa ademta signiferis in hostes injecerunt:  
dum repetunt enise signum, priores secundani se  
porta ejecere.

XLVII. Jam hi extra vallum pugnabant, quarta  
legione in porta hærente, quum alias tumultus ex  
aversa parte castrorum est exortus: in portam quæ-  
storiam intruperant Galli; resistentesque pertinacius  
occiderant L. Postumium quæstorem, cui Tympano  
fuit cognomen, et M. Atinium, et P. Sempronium,  
præfectos sociūm, et ducentos ferme milites. Capta  
ab ea parte castra erant, donec cohors extraordina-  
ria, missa a consule ad tuendam quæstoriam portam,  
et eos, qui intra vallum erant, partim occidit, par-  
tim expulit castris, et intrumentibus obstitit. Eo-  
dem fere tempore et quarta legio cum duabus extra-  
ordinariis cohortibus porta erupit: ita simul tria  
prælia circa castra locis distantibus erant; clamo-  
resque dissoni ad incertos suorum eventus a præ-

U. C. 558. senti certamine animos pugnantium avertebant. Us-  
A. C. 194. que ad meridiem æquis viribus, ac prope pari spe,  
pugnatum est: labor et æstus mollia et fluida cor-  
pora Gallorum, et minime patientia sitis, quum de-  
cedere pugna coëgisset, in paucos restantes inpetum  
Romani fecerunt, fusosque compulerunt in castra.  
Signum inde receptui a consule datum est; ad quod  
pars major receperunt sese; pars, certaminis studio  
et spe potiundi castris hostium, perstitit ad vallum.  
Eorum paucitate contemta, Galli universi ex castris  
eruperunt; fusi inde Romani, quæ imperio consulis  
noluerant, suo pavore ac terrore castra repetunt:  
ita varia hinc atque illinc nunc fuga, nunc victoria  
fuit. Gallorum tamen ad undecim millia, Romano-  
rum quinque millia, sunt occisa. Galli recepere in  
intima finium sese.

**XLVIII.** Consul Placentiam legiones duxit. Scipionem alii, conjuncto exercitu cum collega, per Boiorum Ligurumque agros populantem isse, quoad progredi silvæ paludesque passæ sint, scribunt: alii, nulla memorabili re gesta, comitiorum caussa rediisse Romam. Eodem hoc anno T. Quinctius Elatiæ, quo in hiberna reduxerat copias, totum hiemis tempus jure dicundo consumsis, mutandisque iis, quæ aut ipsius Philippi, aut præfectorum ejus licentia in civitatibus facta erant, quum, suæ factionis hominum vires augendo, jus ac libertatem aliorum Quinctius deprimaret. Veris initio Corinthum, conventu edicto, Græciam venit: ibi omnium civitatum legationes in concionis relinques adloquitur modum circumfusas est adlocutus; orsus ab initia sociorum legatos. primum Romanis amicitia cum Græcorum gente, et imperatorum, qui ante se in Macedonia fuissent, suisque rebus gestis. Omnia cum adprobatione ingenti

sunt auditæ; præterquam quum ad mentionem Na- U.C. 558.  
bidis ventum esset, id minime conveniens liberanti A.C. 194.  
Græciam videbatur, tyrannum reliquisse, non suæ  
solum patriæ gravem, sed omnibus circa civitatibus  
metuendum, hærentem visceribus nobilissimæ civi-  
tatis.

**XLIX.** Nec ignarus hujus habitus animorum Quinctius, *Si sine excidio Lacedæmonis fieri potuisset,* fatebatur, *pacis cum tyranno mentionem admittendam* auribus non fuisse. Nunc, quum aliter, quam ruina gravissima civitatis, obprimi non posset, satius risum esse, tyrannum debilitatum, ac totis prope viribus ad nocendum cuiquam ademtis, relinqu; quam intermori vehementioribus, quam quæ pati posset, remedii civitatem sinere, in ipsa vindicta libertatis peritoram. Præteritorum commemorationi subjicit, Proficisci sibi in Italiam, atque omnem exercitum deportare, in animo esse. Demetriadis Chalcidisque præsidia intra decimum diem audituros deducta: Acrocorinthum ipsis extemplo videntibus vacuam Achæis traditurum: ut omnes scirent, utrum Romanis, an Ætolis, mentiri mos esset; qui male commissam libertatem populo Romano sermonibus distulerint, et mutatos pro Macedonibus Romanos dominos. Sed illis, nec quid dicarent, nec quid facerent, quidquam umquam pensi fuisse. Reliquas civitates monere, ut ex factis, non ex dictis, amicos pensent: intelligantque, quibus credendum, et a quibus cavendum sit. Libertate modice utantur: temperatam eam, salubrem et singulis, et civitatibus esse; nimiam et aliis gravem, et ipsis, qui habeant, effrenatam et præcipitem esse. Concordiæ in civitatibus, principes et ordines inter se, et in commune omnes civitates, consulerent: adversus consentientes nec regem quem-

U. C. 558. *quam satis validum, nec tyrannum fore.* *Discordiam*  
 A. C. 194. *et seditionem omnia opportuna insidiantibus facere,*  
*quum pars, quæ domestico certamine inferior sit, exter-*  
*no potius se adplicet, quam civi cedat.* *Alienis armis*  
*partam, externa fide redditam libertatem sua cura cus-*  
*todirent servarentque: ut populus Romanus dignis da-*  
*tam libertatem, ac munus suum bene positum sciret.*

L. Has velut parentis voces quum audirent, manare omnibus gaudio lacrimæ, adeo ut ipsum quoque confunderent dicentem. Paullisper fremitus adprobantium dicta fuit, monentiumque aliorum alios, ut eas voces, velut oraculo missas, in pectora animosque demitterent. Silentio deinde facto, petiit ab iis, ut cives Romanos, si qui apud eos in servitute essent, conquisitos intra duos menses mitterent

Cives Rom. ser-  
vitute ex-  
emti.

*ad se in Thessalam. Ne ipsis quidem honestum esse,*  
*in liberata terra liberatores ejus servire.* Omnes ad-

clamarunt, *gratias se inter cetera etiam ob hoc agere,*  
*quod admoniti essent, ut tam pio, tam necessario officio*  
*fungerentur.* Ingehs numerus erat bello Punico cap-  
 torum, quos Hannibal, quum a suis non redimeren-  
 tur, venumdederat. Multitudinis eorum argumen-  
 tum sit, quod Polybius scribit, centum talentis eam  
 rem Achæis stetisse: quum quingenos denarios pre-  
 tium in capita, quod redderetur dominis, statuissent.  
 Mille enim ducentos ea ratione Achaia habuit. Ad-

jice nunc pro portione, quot verisimile sit totam

Græciam habuisse. Nondum conventus dimissus  
 erat, quum respiciunt præsidium, ab Acrocorintho  
 descendens, protinus ad portam duci atque abire.  
 Quorum agmen imperator secutus, prosequentibus  
 cunctis, servatorem liberatoremque adclamantibus,  
 salutatis dimissisque eis, eadem, qua venerat, via

Liberatæ  
Acroco-  
rinthus,

Elatiam rediit. Inde cum omnibus copiis Ap. Clau- U. C. 558.  
diui legatum dimitit; per Thessaliam atque Epi- A. C. 194.  
rum ducere Oricum jubet, atque ibi se obperiri:  
inde namque in animo esse, exercitum in Italiam  
trajicere: et L. Quinctio fratri, legato et præfecto  
classis, scribit, ut onerarias ex omni Græciæ ora  
codem contraheret.

LI. Ipse, Chalcidem profectus, deductis non a Chalcis,  
Chalcide solum, sed etiam ab Oreo atque Eretria,  
præsidiis, conventum ibi Euboïcarum civitatum ha-  
buit: commonitosque, in quo statu rerum accepis-  
set eos, et in quo relinquenter, dimisit. Demetriadem  
inde proficiscitur: deductoque præsidio, prosequen- Demetrias.  
tibus cunctis, sicut Corinthi et Chalcide, pergit ire  
in Thessaliam: ubi non liberandæ modo civitates  
erant, sed ex omni conluvione et confusione in ali-  
quam tolerabilem formam redigendæ. Nec enim  
temporum modo vitiis, ac violentia, et licentia regia  
turbati erant: sed inquieto etiam ingenio gentis, nec  
comitia, nec conventum, nec concilium ullum, non  
per seditionem ac tumultum, jam inde a principio  
ad nostram usque ætatem, traducentes. A censu  
maxime et senatum et judices legit: potentiores  
que eam partem civitatum fecit, cui salva tranqui-  
laque omnia magis esse expediebat.

LII. Ita quum percensuisset Thessaliam, per Epi-  
rum in Oricum, unde erat trajектurus, venit. Ab T. Quinctii  
Orico copiæ omnes Brundisium transportatae: inde triumphus.  
non minore agmine rerum captarum, quam suo, præ  
se acto, venerunt. Postquam Romanum ventum est,  
senatus extra urbem Quinctio ad res gestas edisse-  
rendas datus est, triumphusque meritus ab iubenti-

U.C. 556. bus decretus. Triduum triumphavit: die primo ar-  
A.C. 194. ma, tela, signaque ærea et marmorea transtulit,  
plura Philippo adeinta, quam quæ ex civitatibus  
ceperat: secundo die aurum argentumque, factum  
infectumque et signatum. Infecti argenti fuit de-  
cem et octo millia pondo, et ducenta septuaginta  
facti: vasa multa omnis generis, cælata pleraque,  
quædam eximiæ artis: et ex ære multa fabrefacta:  
ad hoc clipea argentea decem. Signati argenti octo-  
ginta quatuor millia fuere Atticorum: tetradrachma  
vocant: trium fere denariorum in singulis argenti  
est pondus. Auri pondo fuit tria millia septingenta  
quatuordecim, et clipeum unum ex auro totum: et  
Philippei nummi aurei quatuordecim millia, quin-  
genti quatuordecim. Tertio die coronæ aureæ, dona  
civitatum, translatæ centum quatuordecim: et hos-  
tiæ ductæ: et ante currum multi nobiles captivi ob-  
sidesque, inter quos Demetrius regis Philippi filius  
fuit, et Armenes, Nabidis tyranni filius, Lacedæmo-  
nius. Ipse deinde Quintius in urbem est invectus:  
milites secuti currum frequentes, ut omni ex provin-  
cia exercitu deportato. His ducenti quinquageni æris  
in pedites divisi: duplex centurioni, triplex equiti.  
Præbuerunt speciem triumpho capitibus rasis secuti,  
qui servitute exempti fuerant.

Coloniæ  
Latinæ  
deductæ.

LIII. Exitu hujus anni Q. Ælius Tubero tribu-  
nus plebis ex senatusconsulto tulit ad plebem, ple-  
besque scivit, *Ut Latinæ duæ coloniæ, una in Bruttios, altera in Thurinum agrum, deducerentur.* His  
deducendis triumviri creati, quibus in triennium im-  
perium esset, in Bruttios Q. Nævius, M. Minucius  
Rufus, M. Furius Crassipes: in Thurinum agrum  
Cn. Manlius, Q. Ælius, L. Apustius: ea bina comi-

tia Cn. Domitius prætor urbanus in Capitolio ha- U. C. 558.  
 buit. Ædes eo anno aliquot dedicatæ sunt: una A. C. 194.  
 Junonis Sospitæ in foro olitorio, vota locataque  
 quadriennio ante a C. Cornelio consule Gallico  
 bello; censor idem dedicavit: altera Fauni: ædiles  
 eam biennio ante ex multaticio argento faciendam  
 locarant, C. Scribonius, et Cn. Domitius; qui præ-  
 tor urbanus eam dedicavit. Et ædem Fortunæ Pri-  
 migeniæ in colle Quirinali dedicavit Q. Marcius Ral-  
 la, duumvir ad id ipsum creatus: voverat eam decem  
 annis ante Punico bello P. Sempronius Sophus, lo-  
 caverat idem censor. Et in insula Jovis ædem C.  
 Servilius duumvir dedicavit: vota erat sex annis  
 ante Gallico bello ab L. Furio Purpureone præ-  
 tore; ab eodem postea consule locata. Hæc eo  
 anno acta.

LIV. P. Scipio ex provincia Gallia ad consules  
 subrogandos venit. Comitia consulum fuere, quibus  
 creati sunt L. Cornelius Merula et Q. Minucius  
 Thermus. Postero die creati sunt prætores L. Cor-  
 nelius Scipio, M. Fulvius Nobilior, C. Scribonius,  
 M. Valerius Messalla, L. Porcius Ladinus, et C. Fla- Ludos Ro-  
 minius. Megalesia, ludos scenicos, C. Atilius Ser- manos tum  
 ranus, L. Scribonius Libo ædiles curules primi fece- primum se-  
 runt. Horum ædilium ludos Romanos primum se- natus spec-  
 natus a populo secretus. tat a populo  
 spectavit, præbuitque ser- secretus.

mones, (sicut omnis novitas solet) aliis, tandem,  
 quod multo ante debuerit, tributum, censemibus, am-  
 plissimo ordini; aliis, demum ex dignitate populi,  
 quidquid majestati Patrum adjectum esset, interpre-  
 tantibus: et omnia discrimina talia, quibus ordines  
 discernerentur, et concordiae, et libertatis æque minuen-  
 dæ esse. Ad quingentesimum quinquagesimum octavum

U. C. 558. annum in promiscuo spectatum esse. Quid repente fac-  
A. C. 194. tum, cur inmiseri sibi in cavea Patres plebem nollent ?  
cur dives pauperem concessorem fastidiret ? novam et  
superbam libidinem, ab nullius ante gentis senatu neque  
desideratam, neque institutam. Postremo ipsum quo-  
que Africanum, quod consul auctor ejus rei fuisset,  
probabile est : veteribus, nisi quæ usus evidenter  
arguit, stari malunt.

U. C. 559. LV. Principio anni, quo L. Cornelius, Q. Minu-  
A. C. 193. cius consules fuerunt, terræ motus ita crebri num-  
ciabantur, ut non rei tantum ipsius, sed feriarum  
quoque ob id indictarum, homines tæderet : nam  
neque senatus haberet, neque respublica administrari  
poterat, sacrificando expiandoque occupatis consuli-  
bus. Postremo, decemviris adire libros jussis, ex  
responso eorum supplicatio per triduum fuit : coro-  
nati ad omnia pulvinaria supplicaverunt ; edictum-  
que est, ut omnes, qui ex una familia essent, pariter  
supplicarent : item ex auctoritate senatus consules  
edixerunt, ne quis, quo die, terræ motu nunciato,  
feriæ indictæ essent, eo die alium terræ motum nun-  
ciaret. Provincias deinde consules prius, tum præ-  
tores sortiti. Cornelius Galliam, Minucius Ligures  
sortiti sunt. C. Scribonius urbanam, M. Valerius  
peregrinam, L. Cornelius Siciliam, L. Porcius Sar-  
diniam, C. Flaminius Hispaniam citeriorem, M. Ful-  
vius Hispaniam ulteriorem.

Ligurum  
conjura-  
tio.

LVI. Nihil belli eo anno exspectantibus consuli-  
bus, litteræ M. Cincii (præfectus is Tisis erat) ad-  
latae : *Ligurum viginti millia armatorum, conjuratione*  
*per omnia conciliubula universæ gentis facta, Lunen-*  
*sem primum agrum depopulatos, Pisanum deinde finem*

*transgressos, omnem oram maris peragrasse.* Itaque U.C. 559.  
 Minucius consul, cui Ligures provincia evenerat, ex A.C. 193.  
 auctoritate Patrum in Rostra adscendit, et edixit,  
*Ut legiones duæ urbanæ, quæ superiore anno conscriptæ  
 essent, post diem decimum Arretii adessent : in earum  
 locum se duas legiones urbanas scripturum : item sociis  
 et Latino nominis, magistratibus legatisque eorum,*  
 qui milites dare debebant, edixit, ut in Capitolio se  
 adirent. Iis quindecim millia peditum et quingen-  
 tos equites, pro numero cujusque juniorum, descrip-  
 sit : et inde e Capitolio protinus ire ad portam, et,  
 ut maturaretur res, proficisci ad delectum jussit.  
 Fulvio Flaminioque terna millia Romanorum pedi-  
 tum et centeni equites in supplementum, et quina  
 millia sociū Latini nominis et duceni equites de-  
 creti ; mandatumque prætoribus, ut veteres dimitte-  
 rent milites, quum in provinciam venissent. Quum  
 milites, qui in legionibus urbanis erant, frequentes  
 tribunos plebis adissent, uti caussas cognoscerent  
 eorum, quibus aut emerita stipendia, aut morbus  
 caussæ essent, quo minus militarent ; eam rem literæ  
 Ti. Sempronii discusserunt, in quibus scriptum erat,  
*Ligurum decem millia in agrum Placentinum venisse :*  
*et eum usque ad ipsa coloniæ mœnia et Padi ripas cum*  
*cædibus et incendiis perpopulatos esse.* Boiorum quo-  
 que gentem ad rebellionem spectare. Ob eas res tu- Tumultum  
 multum esse decrevit senatus ; tribunos plebei non esse decer-  
 placere caussas militares cognoscere, quo minus ad nit senatus.  
*edictum convenienter.* Adjecerunt etiam, ut socii no-  
 minis Latini, qui in exercitu P. Cornelii, Ti. Sem-  
 pronii fuissent, et dimissi ab iis consulibus essent,  
 ut, ad quam diem L. Cornelius consul edixisset, et in  
 quem locum edixisset Etruriæ, convenienter : et uti

U. C. 559. L. Cornelius consul, in provinciam proficisciens, in op-  
A. C. 193. pidis agrisque, qua iturus esset, si quos ei videretur,  
milites scribebat, armaretque, et duceret secum: dimis-  
tendique ei, quos eorum, quandoque vellet, jus esset.

Legatio-  
nes Græ-  
ciae et A-  
siæ.

**LVII.** Postquam consules, delectu habito, pro-  
fecti sunt in provincias, tum T. Quinctius postula-  
vit, *ut de his, quæ cum decem legatis ipse statuisset, se-  
natus audiret; eaque, si videretur, auctoritate sua con-  
firmaret.* Id eos facilius facturos, si legatorum verba,  
qui ex universa Græcia et magna parte Asiæ, quique  
ab regibus venissent, audissent. Hæ legationes a C.  
Scribonio prætore urbano in senatum introductæ  
sunt; benigneque omnibus responsum. Cum An-  
tiocho quia longior disceptatio erat, decem legatis,  
quorum pars in Asia, aut Lysimachia apud regem  
fuerant, delegata est. T. Quinctio mandatum, ut,  
adhibitis iis, legatorum regis verba audiret, respon-  
deretque iis, quæ ex dignitate atque utilitate populi  
Romani responderi possent. Menippus et Hege-  
sianax principes regiæ legationis erant: ex iis Me-  
nippus, *Ignorare se, dixit, quidnam perplexi sua lega-  
tio haberet, quum simpliciter ad amicitiam petendam  
jungendamque societatem venissent.* Esse autem tria  
genera fæderum, quibus inter se paciscerentur amici-  
tias civitatis regesque. Unum, quum bello victis dice-  
rentur leges: ubi enim omnia ei, qui armis plus posset,  
dedita essent, quæ ex iis habere victos, quibus multari  
eos velit, ipsius jus atque arbitrium esse. Alterum,  
quum pares bello æquo fædere in pacem atque amici-  
tiam venirent: tunc enim repeti reddique per conven-  
tionem res, et, si quarum turbata bello possessio sit,  
eas aut ex formula juris antiqui, aut ex partis utrius-  
que commodo componi. Tertium esse genus, quum, qui

Oratio le-  
gatorum  
Antiochi.

*hostes numquam fuerint, ad amicitiam sociali fædere U.C. 559.  
inter se jungendam cœant: eos neque dicere, neque A.C. 193.  
accipere, leges; id enim victoris et victi esse. Ex eo  
genere quum Antiochus esset, mirari se, quod Romani  
æquum censeant, ei leges dicere, quas Asiæ urbium li-  
beras et inmunes, quas stipendiarias esse velint; quas  
intrare præsidia regia regemque vetent. Cum Philippo  
enim hoste pacem, non cum Antiocho amico societatis  
fædus ita sanciendum esse.*

**LVIII.** Ad ea Quintius: *Quoniam vobis distincte Responsurn  
agere libet, et genera jungendarum amicitiarum enu- Quintii.  
merare, ego quoque duas conditiones ponam, extra quas  
nullam esse regi nuncietis amicitiae cum populo Romano  
jungendæ. Unam, si nos nihil, quod ad urbes Asiæ ad-  
tinet, curare velit, ut et ipse omni Europa abstineat:  
alteram, si se ille Asiæ finibus non contineat, et in Eu-  
ropam transcendat, ut et Romanis jus sit, Asiæ civitati-  
um amicitias et tueri, quas habeant, et novas complecti.  
Enimvero id auditu etiam, dicere, indignum  
esse, Hegesianax, Thraciæ et Chersonesi urbibus arceri  
Antiochum; quæ Seleucus proavus ejus, Lysimacho  
rege bello victo et in acie cæso, per sumnum decus parta  
reliquerit; pari cum laude partim ab Thracibus pos-  
sessa armis receperit Antiochus, partim deserta, sicut  
ipsam Lysimachiam, et revocatis cultoribus frequenta-  
verit, et, quæ strata ruinis atque incendiis erant, ingen-  
tibus inpensis ædificaverit. Quid igitur simile esse, ex  
ea possessione, ita parta, ita recuperata, deduci Antio-  
chum, et Romanos abstinere Asia, quæ numquam eo-  
rum fuerit? Amicitiam Romanorum expetere Antio-  
chum: sed quæ inpetrata gloriæ sibi, non pudori, sit.  
Ad hæc Quintius, Quandoquidem, inquit, honesta  
pensamus; sic ut aut sola, aut prima certe, pensari*

U. C. 559. *decet principi orbis terrarum populo et tanto regi;*  
 A. C. 193. *utrum tandem videtur honestius, liberas velle omnes,*  
*quæ ubique sunt, Græciæ urbes, an servas et vectigales*  
*facere? Si sibi Antiochus pulcrum esse censem, quas*  
*urbes proavus belli jure habuerit, avus paterque num-*  
*quam usurpaverint pro suis, eas repetere in servitutem;*  
*et populus Romanus, susceptum patrocinium libertatis*  
*Græcorum non deserere, fidei constantiæque suæ ducit*  
*esse. Sicut a Philippo Græciæ liberavit, ita et ab*  
*Antiocho Asiæ urbes, quæ Graii nominis sint, liberare*  
*in animo habet. Neque enim in Æolidem Ioniamque*  
*coloniæ in servitutem regiam missæ sunt: sed stirpis*  
*augendæ caussa, gentisque vetustissimæ per orbem ter-*  
*rarum propagandæ.*

LIX. Quum hæsitaret Hegesianax, nec inficiari posset, honestioreni caussam libertatis, quam servitutis, prætexi titulo; *Quin mittimus ambages, inquit P. Sulpicius, qui maximus natu ex decem legatis erat. Alteram ex duabus conditionibus, quæ modo diserte a Quinetio datæ sunt, legite: aut supersedete de amicitia agere. Nos vero, inquit Menippus, nec volumus, nec possunus pacisci quidquam, quo regnum Antiochi minuatur.* Postero die Quinetius legationes universas Græciæ Asiæque quum in senatum introduxisset, ut scirent, quali animo populus Romanus, quali Antiochus erga civitates Græciæ essent; postulata et sua, et regis exposuit. *Renunciarent civitatibus suis, populum Romanum, quia virtute qua-que fide libertatem eorum a Philippo vindicaverit, ea- dem ab Antiocho, nisi decedat Europa, vindicaturum.* Tum Menippus deprecari et Quinetium et Patres instituit, *Ne festinarent decernere, quo decreto turbaturi orbem terrarum essent. Tempus et sibi sumerent, et*

*regi ad cogitandum darent: cogitaturum, quum re-* U. C. 559.  
*nunciatæ conditiones essent; et inpetraturum aliquid,* A. C. 193.  
*aut pacis caussa consensurum.* Ita integra dilata res Integra res  
 est: legatos mitti ad regem eosdem, qui Lysima-<sup>de Antio-</sup>  
 chiaæ apud eum fuerant, placuit, P. Sulpicium, P. tur.  
 Villium, P. Ælium.

LX. Vixdum ii profecti erant, quum a Kartha- Hannibal  
 gine legati, bellum haud dubie parare Antiochum,<sup>Antiochum</sup> ad bellum  
 Hannibale ministro, adtulerunt, injeceruntque cu- concitat,  
 ram, ne simul et Punicum bellum excitaretur. Han-  
 nibal, patria profugus, pervenerat ad Antiochum,  
 sicut ante dictum est: et erat apud regem in magno  
 honore, nulla alia arte, nisi quod volutanti diu con-  
 silia de Romano bello nemo aptior super tali re par-  
 ticeps sermonis esse poterat. Sententia ejus una  
 atque eadem semper erat, *ut in Italia bellum gerere-*  
*tur. Italianum et commeatus et militem præbituram ex-*  
*tero hosti. Si nihil ibi moveatur, liceatque populo*  
*Romano viribus et copiis Italiam extra Italiam bellum*  
*gerere; neque regem, neque gentem ullam parem Ro-*  
*manis esse.* . Sibi centum tectas naves, et decem mil-  
 lia peditum, mille equites deposcebat. Ea se classe  
 primum Africam petiturum: magnopere confidere, et  
 Karthaginienses ad rebellandum ab se compelli posse.  
 Si illi cunctentur, se aliqua parte Italiam bellum exci-  
 taturum Romanis. Regem cum ceteris omnibus trans-  
 ire in Europam debere, et in aliqua parte Græciæ co-  
 pias continere, neque trajicientem, et (quod in speciem  
 famamque belli satis sit) paratum trajicere.

LXI. In hanc sententiam quum adduxisset re- Concitare  
 gem, præparandos sibi ad id popularium animos ra-<sup>conatur</sup>  
 tus, literas, ne quo casu interceptæ palam facerent  
 conata, scribere non est ausus. Aristonem quem-<sup>Pœnos.</sup>

U. C. 559. dam Tyrium nactus Ephesi, expertusque solertiam  
 A. C. 193. levioribus ministeriis; partim donis, partim spe  
 Aristonem præmiorum oneratum, quibus etiam ipse rex adnue-  
 mittit Karthaginem. rat, Karthaginem cum mandatis mittit; edit nomina  
 eorum, quibus conventis opus esset: instruit etiam  
 secretis notis, per quas haud dubie agnoscerent sua  
 mandata esse. Hunc Aristonem Karthagine obver-  
 santem non prius amici, quam inimici Hannibal, *qua de caussa venisset, cognoverunt.* Et primo in  
 circulis conviviisque celebrata sermonibus res est:  
 deinde in senatu quidam, *Nihil actum esse, dicere,*  
*exsilio Hannibal, si absens quoque novas moliri res,*  
*sollicitandoque animos hominum turbare statum civita-*  
*tis posset.* Aristonem quemdam, Tyrium advenam, in-  
 structum mandatis ab Hannibale et ab Antiocho rege,  
 venisse: certos homines quotidie cum eo secreta conlo-  
 quia serere, et in occulto conloqui, quod mox in om-  
 nium perniciem erupturum esset. Conclamare omnes,  
 Vocari Aristonem debere, et quæri, quid venisset; et,  
 nisi expromeret, cum legatis Romanis mitti: satis pro  
 temeritate unius hominis suppliciorum pensum esse.  
 Privatos suo periculo peccaturos: renipublicam non  
 extra noxam modo, sed etiam extra famam noxae, con-  
 servandam esse. Vocatus Aristo purgare sese, et fir-  
 missimo propugnaculo uti, quod literarum nihil ad  
 quemquam adtulisset: ceterum nec caussam adven-  
 tus satis expediebat, et in eo maxime hæsitabat,  
 quod cum Barcinæ solum factionis hominibus con-  
 locutum eum arguebant. Orta deinde altercatio  
 est, aliis pro speculatori comprehendi jam et custo-  
 diri jubentibus, aliis negantibus, tumultuandi caus-  
 sam esse: mali rem exempli esse, de nihilo hospites  
 corripi. Idem Karthaginiensibus, et Tyri, et in aliis

*emporii, in quæ frequenter commeent, eventurum.* Di- U.C. 559.  
 lata eo die res est. Aristo, Punico ingenio inter A. C. 193.  
 Pœnos usus, tabellas conscriptas celeberrimo loco  
 supra sedem quotidianam magistratum prima ves-  
 pера suspendit: ipse de tertia vigilia navem conscen-  
 dit et profugit. Postero die, quum suffetes ad jus  
 dicendum consedissent, conspectæ tabellæ, demtæ-  
 que, et lectæ. Scriptum erat, ARISTONEM PRIVATIM  
 AD NEMINEM, PUBLICE AD SENIORES (ita senatum  
 vocabant) MANDATA HABUISSE. Publicato crimine,  
 minus intenta de paucis quæstio erat: mitti tamen  
 legatos Romam, qui rem ad consules et ad senatum  
 deferrent, placuit; simul qui de injuriis Masinissæ  
 quererentur.

LXII. Masinissa postquam et infames Karthagi-  
 nienses, et inter se ipso's discordes sensit, principes adgreditur  
 propter conloquia Aristonis senatui, senatum prop- Karthagi-  
 nienses. ter indicium ejusdem Aristonis populo suspectum;  
 locum injuriæ esse ratus, agrum maritimum eorum  
 et depopulatus est, et quasdam urbes vectigales Kar-  
 thaginiensium sibi coëgit stipendum pendere. Em-  
 poria vocant eam regionem: ora est minoris Syrtis,  
 et agri uberis; una civitas ejus Leptis: ea singula  
 in dies talenta vectigal Karthaginiensibus dedit.  
 Hanc tum regionem et totam infestam Masinissa,  
 et ex quadam parte dubiæ possessionis, sui regni,  
 an Karthaginiensium esset, efficerat: et quia simul  
 ad purganda crimina, et questum de se Romam eos  
 ituros comperit; qui et illa onerarent suspicionibus,  
 et de jure vectigalium disceptarent, legatos et ipse Legati Pœ-  
 Romam mittit. Audit de Tyrio advena primum norum et  
 Karthaginienses curam injecere Patribus, ne cum Romam  
 Antiocho simul et Pœnis bellandum esset: maxime Masinissæ  
 veniunt.

U. C. 559. ea suspicio crimen urgebat, quod, quem comprehen-  
A. C. 193. sumi Romam mitti placuisse, nec ipsum, nec navem  
ejus custodissent. De agro deinde cum regis legatis  
disceptari cœptum. Karthaginienses jure finium  
caussam tutabantur: *quod intra eos terminos esset,*  
*quibus P. Scipio victor agrum, qui juris esset Kartha-*  
*giniensium, finisset: et confessione regis: qui, quum*  
*Aphirem profugum ex regno suo, cum parte Numida-*  
*rum vagantem circa Cyrenus, persequeretur, precario*  
*ab se iter per eum ipsum agrum, tamquam haud dubie*  
*Karthaginiensium juris, petisset. Numidæ et de ter-*  
*minatione Scipionis mentiri eos arguebant: et, si quis*  
*veram originem juris exigere vellet, quem proprium*  
*agrum Karthaginiensium in Africa esse? Advenis,*  
*quantum secto bovis tergo amplecti loci potuerint, tan-*  
*tum ad urbem communiendam precario datum: quid-*  
*quid Byrsam sedem suam excesserint, vi atque injuria*  
*partum habere. Neque eum, de quo agatur, probare*  
*eos posse, non modo semper, ex quo cœperint, sed ne*  
*diu quidem eos possedisse. Per opportunitates, nunc*  
*illos, nunc reges Numidarum, usurpasse jus: semper*  
*que penes eum possessionem fuisse, qui plus armis potu-*  
*isset. Cujus conditionis res fuerit, priusquam hostes*  
*Romanis Karthaginienses, socius atque amicus rex Nu-*  
*midarum esset, ejus sinerent esse: nec se interponerent,*  
*quo minus, qui possent, tenerent. Responderi legatis*  
*utriusque partis placuit, missuros se in Africam, qui*  
*inter populum Karthaginensem et regem in re præ-*  
*senti disceptarent. Missi P. Scipio Africanus, et*  
*C. Cornelius Cethegus, et M. Minucius Rufus; au-*  
*dita inspectaque re, suspensa omnia, neutro inclina-*  
*tis sententiis, reliquere. Id utrum sua sponte fece-*  
*rint, an quia mandatum ita fuerit, non tam certum*

Scipio le-  
gatus in  
Africam  
missus.

est, quam videtur tempori aptum fuisse, integro U. C. 559.  
certamine eos relinqu. Nam, ni ita esset, unus Sci- A. C. 193.  
pio, vel notitia rei, vel auctoritate, ita de utrisque  
meritus, finire nutu disceptationem potuisset.

---

## EPITOME LIBRI XXXV.

---

**P.** SCIPIO AFRICANUS legatus ad Antiochum Ephesi cum Hannibale, qui se Antiocho junxit, conlocutus est; ut, si fieri posset, metum ei, quem ex populo Romano conceperat, eximeret. Inter alia quum quæreret, quem fuisse maximum imperatorem Hannibal crederet, respondit: Alexandrum Macedonum regem, quod parva manu innumerabiles exercitus fudisset; quodque ultimas oras, quas visere supra spem humanam esset, peragrasset. Quærenti deinde, quem secundum poneret, Pyrrhum, inquit, castra metari primum docuisse: ad hoc neminem elegantius loca cepisse, præsidia disposuisse. Exsequenti, quem tertium diceret, semet ipsum dixit. Ridens Scipio, Quidnam tu dices, si me, inquit, vices? Tunc vero, inquit, me et ante Alexandrum, et ante Pyrrhum, et ante alios posuissem. Inter cetera prodigia, quæ plurima fuisse traduntur, bovem Cn. Domitii consulis locutum, Roma cave tibi, refertur. Adparant in Antiochum bellum Romani. Nabis Lacedæmoniorum tyranus, incitatus ab Ætolis, qui et Philippum et Antiochum ad inferendum bellum populo Romano sollicitabant, a populo Romano descivit: et, bello adversus Philopæmenem Achæorum prætorem gesto, ab Ætolis et ab Alexameno duce eorum imperfectus est. Ætolii quoque ab amicitia populi Romani defecerunt:

*cum quibus societate juncta, Antiochus Syriæ rex, quum bellum Græciæ intulisset, complures urbes occupavit : inter quas Chalcidem, et totam Eubœam. Res præterea in Liguribus gestas, et adparatum belli ab Antiocho continet.*

---

## T. LIVII PATAVINI

### LIBER XXXV.

---

U. C. 559. A. C. 193. **P**RINCIPIO anni, quo hæc gesta sunt, Sex. Dicitus prætor in Hispania citeriore cum civitatibus iis, quæ post profectionem M. Catonis permultæ rebellaverant, crebra magis, quam digna dictu, prælia fecit, et adeo pleraque adversa, ut vix dimidium militum, quam quod acceperat, successori tradiderit. Nec dubium est, quin omnis Hispania sublatura animos fuerit, ni alter prætor P. Cornelius Cn. F. Scipio trans Iberum multa secunda prælia fecisset: quo terrore non minus quinquaginta oppida ad eum defecerunt. Prætor hæc gesserat Scipio. Idem pro prætore, Lusitanos, pervastanta ulteriori provincia, cum ingenti præda domum redeuntes, in ipso itinere adgressus, ab hora tertia diei ad octavam incerto eventu pugnavit, numero militum inpar, superior aliis: nam et acie frequenti armatis adversus longum et impeditum turba pecorum agmen, et recenti milite adversus fessos longo itinere concurrerat. Tertia namque vigilia exierant hostes: huic nocturno itineri tres diurnæ horæ accesserant: nec ulla quiete data, laborem viæ prælium exceperat. Itaque principio pugnæ vigoris aliquid in corporibus animisque fuit, et turbaverant

primo Romanos : deinde æquata paullisper pugna U.C. 559.  
est. In hoc discrimine ludos Jovi, si vi fudisset ce-  
cidissetque hostes, proprætor vovit. Tandem gra-  
dum acrius intulere Romani, cessitque Lusitanus :  
deinde prorsus terga dedit : et, quum institissent  
fugientibus victores, ad duodecim millia hostium  
sunt cæsa ; capti quingenti quadraginta, omnes fere  
equites ; et signa militaria capta centum triginta  
quatuor. De exercitu Romano septuaginta et tres  
amissi. Pugnatum haud procul Ilipa urbe est. Eo  
victorem opulentum prædæ exercitum P. Cornelius  
reduxit : ea omnis ante urbem exposita est ; po-  
testasque dominis suas res cognoscendi facta : ce-  
tera vendenda quæstori data ; quod inde refectum  
est, militi divisum.

II. Nondum ab Roma profectus erat C. Flami-  
nius prætor, quum hæc in Hispania gerebantur :  
itaque tam adversæ, quam secundæ res per ipsum  
amicosque ejus magnis sermonibus celebrabantur :  
et tentaverat, quoniam bellum ingens in provincia  
exarsisset, et exiguae reliquias exercitus ab Sex.  
Digitio, atque eas ipsas plenas pavoris ac fugæ ac-  
cepturus esset, ut unam sibi ex urbanis legionibus  
decernerent : ad quam quum militem ab se ipso  
scriptum ex senatusconsulto adjecisset, eligeret ex  
omni numero sex millia et quingentos pedites, et  
equites trecentos. *Ea se legione (nam in Sex. Digitii  
exercitu haud multum spei esse) rem gesturum.* Se-  
niores negare, *Ad rumores, a privatis temere in gra-  
tiam magistratum conflictos, senatusconsulta facienda  
esse : nisi quod aut prætores ex provinciis scriberent,  
aut legati renunciarent, nihil ratum haberi debere.* Si  
tumultus in Hispania esset, placere, tumultuarios mi-

A. C. 193.

*U. C. 559. lites extra Italiam scribi a prætore.* Mens ea senatus  
*A. C. 193.* fuit, ut in Hispania tumultuarii milites legerentur.

Valerius Antias et in Siciliam navigasse delectus caussa C. Flaminium scribit : et ex Sicilia Hispaniam petentem, tempestate in Africam delatum, vagos milites de exercitu P. Africani sacramento rogasse : his duarum provinciarum delectibus tertium in Hispania adjecisse.

III. Nec in Italia segnius Ligurum bellum crescebat. Pisas jam quadraginta millia hominum, adfluente quotidie multitudine ad famam belli spem Minucius que prædæ, circumsedebant. Minucius consul Ar in Liguria, retium die, quem dixerat ad conveniendum militibus, venit : inde quadrato agmine ad Pisas duxit ; et, quum hostes mille passum ab oppido trans flumen movissent castra, consul urbem, haud dubie servatam adventu suo, est ingressus. Postero dic et ipse trans flumen fere quingentos passus ab hoste posuit castra : inde levibus præliis a populationibus agrum sotorum tutabatur : in aciem exire non audebat, novo milite, et ex multis generibus hominum conlecto, ne cum noto satis inter se, ut fidere alii aliis possent. Ligures multitudine freti et in aciem exhibant, parati de summa rerum decernere : et abundantes militum numero passim multas manus per extrema finium ad prædandum emittebant : et, quum coacta vis magna pecorum prædæque es set, paratum erat præsidium, per quod in castella eorum vicosque ageretur.

L. Cornelii  
res gestæ  
apud Boi os.

IV. Quum bellum Ligustum ad Pisas constitisset, consul alter L. Cornelius Merula per extremos Ligurum fines exercitum in agrum Boiorum induxit, ubi longe alia belli ratio, quam cum Ligu-

ribus, erat. Consul in aciem exibat, hostes pug- U.C. 55<sup>4</sup>.  
 nam detractabant: prædatumque, ubi nemo ob- A.C. 19<sup>3</sup>.  
 viam exiret, discurrebant Romani; Boii diripi sua  
 impune, quam tuendo ea conserere certamen, male-  
 bant. Postquam omnia ferro ignique satis evastata  
 erant, consul agro hostium excessit, et ad Mutinam  
 agmine incauto, ut inter pacatos, ducebat. Boii,  
 ubi egressum e finibus suis hostem sensere, seque-  
 bantur silenti agmine, locum insidiis quærentes:  
 nocte prætergressi castra Romana, saltum, qua  
 transeundum erat Romanis, insederunt. Id quum  
 parum occulte fecissent, consul, qui multa nocte  
 solitus erat movere castra, ne nox terrorem in tu-  
 multuario prælio augeret, lucem exspectavit: et,  
 quum luce moveret, tamen turmam equitum explo-  
 ratum misit. Postquam relatum est, quantæ copiæ,  
 et in quo loco essent, totius agminis sarcinas in  
 medium conjici jussit, et triarios vallum circumji-  
 cere: cetero exercitu instructo ad hostem accessit.  
 Idem et Galli fecerunt, postquam apertas esse insi-  
 dias, et recto ac justo prælio, ubi vera virtus vince-  
 ret, dimicandum viderunt.

V. Hora secunda ferme concussum est: sinistra  
 sociorum ala et extraordinarii prima in acie pugna-  
 bant: præerant duo consulares legati, M. Marcellus  
 et Ti. Sempronius, prioris anni consul. Novus  
 consul nunc ad prima signa erat, nunc legiones  
 continebat in subsidiis; ne certaminis studio prius  
 procurerent, quam datum signum esset: equites  
 earum extra aciem in locum patentem Q. et P. Mi-  
 nucios tribunos militum educere jussit: inde, quum  
 signum dedisset, inpetum ex aperto facerent. Hæc  
 agenti nuncius venit a Ti. Sempronio Longo, non

U.C. 559. *sustinere extraordinarios inpetum Gallorum, et cæsos*  
A.C. 193. *permultos esse; et, qui supersint, partim labore, partim metu remisisse ardorem pugnæ: legionem alteram ex duabus, si videretur, submitteret, priusquam ignominia acciperetur.* Secunda legio missa est, et extraordinarii recepti. Tum redintegrata est pugna. Quum et recens miles, et frequens ordinibus legio successisset, et sinistra ala ex prælio subducta est; dextra in primam aciem subiit. Sol ingenti ardore torrebat minime patientia æstus corpora Gallorum: densis tamen ordinibus nunc alii in alios, nunc in scuta incumbentes, sustinebant inpetus Romano-rum. Quod ubi anima leviter consul, ad perturbanos ordines eorum C. Livium Salinatorem, qui præerat alariis equitibus, quam concitatissimos equos inmittere jubet: et legionarios equites in subsidiis esse. Hæc procella equestris primo confudit et turbavit, deinde dissipavit aciem Gallorum; non tamen, ut terga darent. Obstabant duces, hastilibus cædentes terga trepidantium, et redire in ordines cogentes: sed interequitantes alarii non patiebantur. Consul obtestabatur milites, *Ut paullulum adniterentur; victoriam in manibus esse: dum perturbatos et trepidantes viderent, instarent: si restitui ordines sissent, integro rursus eos prælio et dubio dimicatores.* Inferre vexillarios jussit signa: omnes con-nisi tandem averterunt hostem. Postquam terga dabant, et in fugam passim effundebantur, tum ad persequendos eos legionarii equites inmissi. Quatuordecim millia Boiorum eo die cæsa sunt; vivi capti mille nonaginta duo: equites septingenti vi-ginti unus, tres duces eorum, signa militaria ducenta duodecim, carpenta sexaginta tria. Nec Ro-

rianis incruenta victoria fuit: supra quinque millia U. C. 559.  
militum, ipsorum aut sociorum, sunt amissa, centu- A. C. 193.  
riones tres et viginti, præfecti socium quatuor, et  
M. Genucius, et M. Marcius, tribuni militum se-  
cundæ legionis.

VI. Eodem fere tempore duorum consulum lite-  
ræ adlatæ sunt, L. Cornelii de prælio ad Mutinam  
cum Boiis facto, et Q. Minucii a Pisis. Comitia  
suæ sortis esse: ceterum adeo suspensa omnia in Liguri-  
ribus se habere, ut abscedi inde, sine pernicie sociorum  
et damno reipublicæ, non possit. Si ita videretur Pa-  
tribus, mitterent ad collegam, ut is, qui profligatum  
bellum haberet, ad comitia Romam rediret: si id fa-  
cere gravaretur, quod non suæ sortis id negotium esset,  
se quidem facturum, quodcumque senatus censisset;  
sed etiam atque etiam viderent, ne magis e republica  
esset interregnum iniri, quam ab se in eo statu relinqui  
provinciam. Senatus C. Scribonio negotium dedit,  
ut duos legatos ex ordine senatorio mitteret ad L.  
Cornelium consulem, qui literas collegæ ad sena-  
tum missas deferrent ad eum; et nunciarent, sena-  
tum, ni is ad magistratus subrogandos Romam veni-  
ret, potius, quam Q. Minucius a bello integro avoca-  
retur, interregnum iniri passurum. Missi legati re-  
nunciarunt, L. Cornelium ad magistratus subrogan-  
dos Romam venturum. De literis L. Cornelii, quas  
scripserat secundum prælium cum Boiis factum,  
disceptatio in senatu fuit: quia privatim plerisque  
senatoribus legatus M. Claudius scripserat, Fortuna  
populi Romani et militum virtuti gratiam habendam,  
quod res bene gesta esset. Consulis opera et militum ali-  
quantum amissum, et hostium exercitum, cuius delendi  
oblata fortuna fuerit, elapsum. Milites eo plures

U. C. 559. *perisse, quod tardius ex subsidiis, qui laborantibus*  
*A. C. 193. opem ferrent, successissent. Hostes e manibus emissos,*  
*quod equitibus legionariis et tardius datum signum es-*  
*set, et persecui fugientes non licuisset.*

Civitas  
fœnore la-  
borat.

VII. De ea re nihil temere decerni placuit: ad frequentiores consultatio dilata est. Instabat enim cura alia, quod civitas fœnore laborabat: et quod, quum multis fœnebribus legibus constricta avaritia esset, via fraudis inita erat, ut in socios, qui non tenerentur iis legibus, nomina transcriberent; ita libero fœnore obruebant debitores. Cujus coercendi quum ratio quæreretur, diem finiri placuit Feralia, quæ proxime fuissent: ut, qui post eam diem socii civibus Romanis credidissent pecunias, profiterentur; et ex ea die pecuniæ creditæ, quibus debitor vellet legibus, jus creditorū diceretur. Inde, postquam professionibus detecta est magnitudo æris alieni, per hanc fraudem contracti, M. Sempronius tribunus plebis ex auctoritate Patrum plebem rogavit, plebesque scivit, ut cum sociis ac nomine Latino pecuniæ creditæ jus idem, quod cum civibus Romanis, esset. Hæc in Italia domi militiæque acta. In Hispania nequaquam tantum belli fuit, quantum auxerat fama. C. Flaminius in citeriori Hispania oppidum Iluciam in Oretanis cepit: deinde in hiberna milites deduxit: et per hiemem prælia aliquot, nulla memoria digna, adversus latronum magis, quam hostium, excusiones, variotam eventu, nec sine militum jactura, sunt facta. Majores res gestæ a M. Fulvio. Is apud Toletum oppidum cum Vaccæis Vectonibusque et Celtiberis signis coulatis dimicavit: exercitum earum gentium fudit fugavitque: regem Hilermum vivum cepit.

Res His-  
paniæ.

VIII. Quum hæc in Hispania gerebantur, comi- U. C. 559.  
 tiorum jam adpetebat dies : itaque L. Cornelius con- A. C. 193.  
 consul, relichto ad exercitum M. Claudio legato, Romam L. Corne-  
 venit. Is in senatu quum de rebus ab se gestis dis- lius postu-  
 seruisset, quoque in statu provincia esset ; questus lat trium-  
 est cum Patribus conscriptis, quod, tanto bello una phum sibi  
 secunda pugna tam feliciter perfecto, non esset ha- decerni.  
 bitus Diis inmortalibus honos. Postulavit deinde,  
 ut supplicationem simul triumphumque deerernerent.  
 Prius tamen, quam relatio fieret, Q. Metellus, qui  
 consul dictatorque fuerat, *Literas eodem tempore*,  
 dixit, et *consulis L. Cornelii ad senatum, et M. Mar-*  
*celli ad magnam partem senatorum, adlatas esse, inter*  
*se pugnantes : eoque dilatam esse consultationem, ut*  
*præsentibus auctoribus earum literarum disceptaretur.*  
*Itaque exspectasse sese, ut consul, qui sciret ab legato*  
*suo adversus se scriptum aliquid, quum ipsi veniendum*  
*esset, deduceret eum secum Romam : quum etiam verius*  
*esset, Ti. Sempronio imperium habenti tradi exercitum,*  
*quam legato. Nunc videri esse amotum de industria,*  
*ne ea, quæ scripsisset, præsens diceret, aut argueret*  
*coram : et, si quid vani adferret, argui posset, donec*  
*ad liquidum veritas explorata esset. Itaque nihil eo-*  
*rūm, quæ postularet consul, decernendum in præsentia*  
*censere. Quum pergeret nihilo segnius referre, ut Nec inpe-*  
*supplatio decerneretur, triumphantique sibi urbem trat.*  
*invehi liceret ; M. et C. Titinii tribuni plebis, se in-*  
*tercessuros, si de ea re fieret senatusconsultum, dix-*  
*erunt.*

IX. Censores erant priore anno creati Sex. Æ-  
 lius Pætus et C. Cornelius Cethagus. Cornelius lus-  
 trum condidit : censa sunt civium capita centum qua-  
 draginta tria millia, septingenta quatuor. Aquæ

U. C. 559. ingentes eo anno fuerunt, et Tiberis loca plana  
 A. C. 193. urbis inundavit. Circa portam Flumentanam etiam  
 conlapsa quædam ruinis sunt: et porta Cœlimon-  
 tana fulmine icta est, murusque circa multis locis  
 de cœlo tactus. Et Ariciæ, et Lanuvii, et in Aven-  
 tino, lapidibus pluit; et a Capua nunciatum est,  
 examen vesparum ingens in forum advolasse, et in  
 Martis æde consedisse: eas conlectas cum cura, et  
 igni crematas esse. Horum prodigiorum caussa de-  
 cemviri libros adire jussi, et novemdiale sacrum  
 factum, et supplicatio indicta est, atque urbs lus-  
 trata. Iisdem diebus ædiculam Victoriæ Virginis,  
 prope ædem Victoriæ, M. Porcius Cato dedicavit,  
 biennio post, quam vovit. Eodem anno coloniani  
 Latinam in agrum Thurinum triumviri deduxerunt  
 Cn. Manlius Vulso, L. Apustius Fullo, Q. Ælius  
 Tubero, cuius lege deducebatur: tria millia pedi-  
 tum iere, trecenti equites: numerus exiguus pro  
 copia agri. Dari potuere tricena jugera in pedites,  
 sexagena in equites. Apustio auctore, tertia pars  
 agri demta est: quo postea, si vellent, novos colo-  
 nos adscribere possent. Vicena jugera pedites, qua-  
 dragena equites accepérunt.

X. In exitu jam annus erat, et ambitio magis,  
 quam umquam alias, exarserat consularibus comi-  
 tiis: multi et potentes petebant patricii plebeiique;  
 P. Cornelius Cn. filius Scipio, qui ex Hispania pro-  
 vincia nuper decesserat magnis rebus gestis, et L.  
 Quinctius Flamininus, qui classi in Græcia præfu-  
 erat, et Cn. Manlius Vulso: hi patricii. Plebeii au-  
 tem C. Lælius, Cn. Domitius, C. Livius Salinator,  
 M'. Acilius: sed omnium oculi in Quinetium Cor-  
 neliumque conjecti: nam et in unum locum pete-

Multi et  
 potentes  
 candidati  
 consulatu-

bant ambo patricii, et rei militaris gloria recens U. C. 559.  
utrumque commendabat. Ceterum ante omnia certamen A. C. 198.  
accendebant fratres candidatorum, duo clarissimi ætatis suæ imperatores: major gloria in  
Scipione; et, quo major, eo propior invidiam:  
Quinctii recentior, ut qui eo anno triumphasset.  
Accedebat, quod alter decimum jam prope annum  
adsiduus in oculis hominum fuerat; quæ res minus  
verendos magnos homines ipsa satietate facit: con-  
sul iterum post devictum Hannibalem, censorque  
fuerat. In Quinctio nova et recentia omnia ad gra-  
tiam erant: nihil nec petierat a populo post trium-  
phum, nec adeptus erat: *pro fratre germano, non  
patruele, se petere aiebat; pro legato et participe ad-  
ministrati belli: se terra, fratrem mari, rem gessisse.*  
His obtinuit, ut præferretur candidato, quem Afri- Scipio  
canus frater duebat; quem Cornelia gens, Corne- victus a  
lio consule comitia habente; quem tantum præju- Quinctio.  
dicum senatus, virum e civitate optimum judica-  
tum, qui matrem Idæam Pessinunte venientem in  
urbem acciperet. L. Quinctius et Cn. Domitius  
Ahenobarbus consules facti: adeo ne in plebeio  
quidem consule, quum pro C. Lælio niteretur, Afri-  
canus valuit. Postero die prætores creati L. Scri-  
bonius Libo, M. Fulvius Centumalus, A. Atilius  
Serranus, M. Bæbius Tamphilus, L. Valerius Tappo,  
Q. Salonius Sarra. Ædilitas insignis eo anno fuit  
M. Æmilii Lepidi et L. Æmilii Paulli. Multos pe-  
cuarios damnarunt: ex ea pecunia clipea inaurata  
in fastigio Jovis ædis posuerunt. Porticum unam  
extra portam Trigeminam, emporio ad Tiberim ad-  
jecto; alteram a porta Fontinali ad Martis aram, qua  
in Campum iter esset, perduxerunt.

U. C. 559. XI. Diu nihil in Liguribus dignum memoria  
 A. C. 193. Res gestae apud Ligures. gestum erat. Extremo ejus anni bis in magnum periculum res adducta est: nam et castra consulis obpugnata, ægre sunt defensa; et non ita multo post per saltum angustum quum duceretur agmen Romanum, ipsas fances exercitus Ligurum insedit: qua quum exitus non pateret, converso agmine redire institit consul: et ab tergo fauces saltus occupatae a parte hostium erant, Caudinæque cladis memoria non animis modo, sed prope oculis, obversabatur.

Numida-  
 rum equi-  
 tatus libe-  
 rat exerci-  
 cetur, se parte, utra vellet, cum suis erupturum. Tan-  
 tum Ro-  
 manum. tum uti diceret, utra pars frequentior vicis esset: in eos se inpetum facturum: et nihil prius quam flam-  
 mam tectis injecturum, ut is pavor cogeret Ligures ex-  
 cedere saltu, quem obsiderent, et discurrere ad open-  
 ferendam suis. Conlaudatum eum consul spe præ-  
 miorum onerat. Numidæ equos condescendunt, et obequitare stationibus hostium, neminem lacessen-  
 tes, cœperunt. Nihil primo adspectu contemtius: equi hominesque paulluli et graciles: discinctus et inermis eques, præterquam quod jacula secum portat: equi sine frenis, deformis ipse cursus rigida cervice et extento capite currentium. Hunc con-  
 temtum de industria augentes, labi ex equis, et per ludibrium spectaculo esse. Itaque, qui primo intenti paratiique, si lacesserentur, in stationibus fu-  
 erant, jani inermes sedentesque pars maxima spec-  
 tabant. Numidæ adequitare, dein refugere, sed propius saltum paullatim evehi; velut quos inpotentes regendi equi invitox efferrent; postremo subditis calcaribus inter medias stationes hostium eru-

pere: et, in agrum latiorem evecti, omnia propin- U. C. 559.  
 qua viæ tecta incendunt: proximo deinde vico in- A. C. 193.  
 ferunt ignem, ferro flammaque omnia pervstant.  
 Fumus primo conspectus, deinde clamor trepidan-  
 tium in vicis auditus, postremo seniores puerique  
 refugientes tumultum in castris fecerunt: itaque  
 sine consilio, sine imperio, pro se quisque currere  
 ad sua tutanda: momentoque temporis castra re-  
 licta erant, et obsidione liberatus consul, quo in-  
 tenderat, pervenit.

XII. Sed neque Boii, neque Hispani, cum qui- Ætolorum  
 bus eo anno bellatum erat, tam inimici infestique <sup>molitiones.</sup>  
 erant Romanis, quam Ætolorum gens. Ii post de-  
 portatos ex Græcia exercitus primo in spe fue-  
 rant, et Antiochum in vacuam Europæ possessio-  
 nem venturum; nec Philippum, aut Nabin quietu-  
 ros. Ubi nihil usquam moveri viderunt, agitandum  
 aliquid miscendumque rati, ne cunctando senesce-  
 rent consilia, concilium Naupactum indixerunt.  
 Ibi Thoas prætor eorum, conquestus injurias Ro-  
 manorum statumque Ætoliae, quod omnium Græciæ  
 gentium civitatumque inhonoratissimi post eam victo-  
 riam essent, cuius caussa ipsi fuissent, legatos censuit  
 circa reges mittendos, qui non solum tentarent animos  
 eorum, sed suis quemque stimulis moverent ad Ro-  
 manum bellum. Damocritus ad Nabin, Nicander Concitant  
 ad Philippum, Dicæarchus frater prætoris ad An- <sup>reges ad</sup>  
 tiochum est missus. Tyranno Lacedæmonio Da- <sup>bellum Ro-</sup>  
 mocritus, ademtis maritimis civitatibus enervatam ty-  
 rannidem, dicere: inde militem, inde naves navales-  
 que socios habuisse: inclusum suis prope muris Achæos  
 videre dominantes in Peloponneso; numquam habitu-  
 rum recuperandi sua occasionem, si eam, quæ tum es-

U. C. 559. *set, prætermisisset.* Nullum exercitum Romanum in  
A. C. 193. *Græcia esse: nec propter Gythium, aut maritos*  
*alios Laconas, dignam caussam existimaturos Roma-*  
*nos, cur legiones in Græciam rursus transmittant.*  
Hæc ad incitandum animum tyranni dicebantur, ut,  
quum in Græciam Antiochus trajecisset, conscienc-  
tia violatæ per sociorum injurias Romanæ amicitiæ,  
conjungeret se cum Antiocho. Et Philippum Ni-  
cander haud dissimili oratione incitabat: erat et-  
iam major orationi materia, quo ex altiore fastigio  
rex, quam tyrannus, detractus erat, quoque plures  
ademptæ res. Ad hoc vetusta regum Macedoniæ  
fama, peragratusque orbis terrarum victoriis ejus  
gentis referebatur. *Et tutum vel incepto, vel eventu*  
*se consilium adferre: nam neque, ut ante se moveat*  
*Philippus, quam Antiochus cum exercitu transierit in*  
*Græciam, suadere; et, qui sine Antiocho adversus Ro-*  
*manos Ætolosque tam diu sustinuerit bellum, ei, ad-*  
*juncto Antiocho, socius Ætolis, qui tum graviores hos-*  
*tes, quam Romani, fuerint, quibus tandem viribus re-*  
*sistere Romanos posse?* Adjiciebat de duce Hanni-  
bale, nato adversus Romanos hoste, qui plures et  
duces et milites eorum occidisset, quam quot super-  
essent. Hæc Philippo Nicander. Alia Dicæarehus  
Antiocho: et omnium primum, *prædam de Philippo*  
*Romanorum esse dicere, victoriam Ætolorum, et adi-*  
*tum in Græciam Romanis nullos alios, quam Ætolos,*  
*dedisse; et ad vincendum vires eosdem præbuisse:* de-  
inde quantas peditum equitumque copias præbituri  
Antiocho ad bellum essent: quæ loca terrestribus  
copiis, quos portus maritimis. Tum de Philippo  
et Nabide libero mendacio abutebatur: *paratum*  
*utrumque ad rebellandum esse: et primam quamque*

*occasionem recuperandi ea, quæ bello amisissent, ad-* U. C. 559.  
*repturos. Ita per totum simul orbem terrarum* A. C. 193.  
*Romanis concitabant bellum : reges tamen aut non*  
*moti, aut tardius moti sunt.*

XIII. Nabis extemplo circa omnes vicos mariti- *Nabis*  
*mos dimisit, ad seditiones in iis miscendas : et* bellum  
*alios principum donis ad suam caussam perduxit,* molitur.  
*alios pertinaciter in societate Romana manentes oc-*  
*cident. Achæis omnium maritimorum Laconum tu-*  
*endorum a T. Quinctio cura mandata erat : itaque*  
*extemplo et ad tyrannum legatos miserunt, qui ad-*  
*monerent fœderis eum Romani, denunciarentque, ne*  
*pacem, quam tantopere petisset, turbaret : et auxi-*  
*lia ad Gythium, quod jam obpugnabatur a tyranno,*  
*et Romam, qui ea nunciarent, legatos miserunt.*  
*Antiochus rex, ea hieme Raphiæ in Phœnice Pto-*  
*lemæo regi Ægypti filia in matrimonium data,*  
*quum Antiochiam se recepisset, per Ciliciam,*  
*Tauro monte superato, extremo jam hiemis Ephe-*  
*sum pervenit : inde principio veris, Antiocho filio*  
*misso in Syriam ad custodiam ultimarum partium*  
*regni, ne quid, absente se, ab tergo moveretur, ipse*  
*cum omnibus terrestribus copiis ad Pisidas, qui*  
*circa Sidam incolunt, obpugnandos est profectus.*  
*Eo tempore legati Romani P. Sulpicius et P. Vil-* Legati Ro-  
*lius, qui ad Antiochum (sicut ante dictum est) mis- mani ad*  
*si erant, jussi prius Eumenem adire, Elæam venere ; chum.*  
*inde Pergamum (ibi regia Eumenis fuit) escende-*  
*runt. Cupidus belli adversus Antiochum Eumenes*  
*erat, gravem, si pax esset, adcolam tanto potentio-*  
*rem regem credens ; eundem, si motum bellum es-*  
*set, non magis parem Romanis fore, quam Philip-*  
*pus fuisset : et aut funditus sublatum iri ; aut, si*

U. C. 559. pax victo daretur, multa illi detracta sibi accessura;  
 A. C. 193. ut facile deinde se ab eo sine ullo Romano auxilio tueri posset. Etiam, si quid adversi casurum foret, satius esse Romanis sociis quamcumque fortunam subire, quam solum aut imperium pati Antiochi, aut abnuentem vi atque armis cogi. Ob hæc, quantum auctoritate, quantum consilio valebat, incitabat Romanos ad bellum.

XIV. Sulpicius æger Pergami substituit. Villius, quum Pisidiæ bello occupatum esse regem audisset, Ephesum profectus, dum paucos ibi moratur dies, dedit operam, ut cum Hannibale, qui tum ibi forte erat, sæpe congrederetur; ut animum ejus et tentaret, si qua posset, et metum demeret periculi ei quidquam ab Romanis esse. His conloquiis aliud quidem actum nihil est: secutum tamen sua sponte est, velut consilio petitum esset, ut vilior ob ea regi Hannibal et suspectior ad omnia fieret. Claudius, secutus Græcos Acilianos libros, P. Africanum in ea fuisse legatione tradit: eumque Ephesi conlocatum cum Hannibale. Et sermonem etiam unum refert, quo quærenti Africano, quem fuisse maximum imperatorem Hannibal crederet? respondisse, Alexander Macedonum regem; quod parva manu innumerabiles exercitus fudisset, quodque oras, quas visere supra spem humanam esset, peragrasset. Quærenti deinde, quem secundum poneret? Pyrrhum, dixisse: castra metari primum docuisse: ad hoc neminem elegantius loca cepisse, praesidia disposuisse, artem etiam conciliandi sibi homines eam habuisse, ut Italicæ gentes regis externi, quam populi Romani, tamdiu principis in ea terra, imperium esse mollent. Exsequenti, quem tertium duceret? haud dubie semet ipsum dix-

Conlo-  
quium  
Scipionis  
cum Han-  
nibale.

isse. Tum risum obortum Scipioni, et subjecisse : U. C. 559.  
*Quidnam tu dices, si me vicisses? Tum me vero,* A. C. 193.  
 inquit, et ante Alexandrum, et ante Pyrrhum, et ante  
 omnes alios imperatores esse. Et perplexum Punico  
 astu responsum, et improvisum adsentationis genus  
 Scipionem movisse, quod e grege se imperatorum  
 velut inæstimabilem secrevisset.

XV. Villius ab Epheso Apameam processit: eo  
 et Antiochus, auditio Romanorum legatorum ad-  
 ventu, obcurrit: Apameæ congressis disceptatio ea-  
 dem ferme fuit, quæ Romæ inter Quinctium et le-  
 gatos regis fuerat. Mors nunciata Antiochi, filii regis  
 regis, quem missum paullo ante dixeram in Syriam,  
 diremit conloquia. Magnus luctus in regia fuit,  
 magnumque ejus juvenis desiderium: id enim jam  
 specimen sui dederat, ut, si vita longior contigisset,  
 magni justique regis in eo indolem fuisse adpareret.  
 Quo carior acceptiorque omnibus erat, eo mors  
 ejus suspectior fuit, gravem successorem eum in-  
 stare senectuti suæ patrem credentem, per spadones  
 quosdam, talium ministeriis facinorum acceptos re-  
 gibis, veneno sustulisse. Eam quoque caussam  
 clandestino facinori adjiciebant, quod, quum Se-  
 leuco filio Lysimachiam dedisset, Antiocho quam  
 similem daret sedem, ut procul ab se honore cum  
 quoque allegaret, non habuisset. Magni tamen  
 luctus species per aliquot dies regiam tenuit: le-  
 gatusque Romanus, ne alieno tempore incommodus  
 obversaretur, Pergamum concessit. Rex Ephesum,  
 omissio, quod inchoaverat, bello, rediit: ibi, per-  
 luctum regia clausa, cum Minione quodam, qui  
 princeps amicorum ejus erat, secreta consilia agita-  
 vit. Minio, ignarus omnium externorum, viresque-

**U. C.** 559. æstimans regis ex rebus in Syria aut Asia gestis, non  
**A. C.** 193. caussa modo superiorem esse Antiochum, quod nihil æqui postularent Romani, sed bello quoque superaturum credebat. Fugienti regi disceptationem cum legatis, seu jam experto eam minus prosperam, seu mœrore recenti confuso, professus Minio, se, quæ pro caussa essent, dicturum, persuasit, ut a Pergamo arcesserentur legati.

Conloqui- **XVI.** Jam convaluerat Sulpicius: itaque ambo  
 um lega- Ephesum venerunt. Rex a Minione excusatus, et  
 torum Rom. cum absente eo res agi cœpta est. Ibi præparata ora-  
 Minione. tione Minio; *Specioso titulo*, inquit, *uti vos, Romani,*  
*Græcarum civitatum liberandarum video: sed facta*  
*vestra orationi non conveniunt; et aliud Antiocho juris*  
*statuistis, alio ipsi utimini. Qui enim magis Smyrnæi*  
*Lampsacenique Græci sunt, quam Neapolitani, et Rhe-*  
*gini, et Tarentini, a quibus stipendium, a quibus nares*  
*ex fædere exigitis? Cur Syracusas, atque in alias Sici-*  
*liæ Græcas urbes prætorem quotannis, cum imperio et*  
*virgis et securibus, mittitis? nihil aliud profecto dica-*  
*tis, quam armis superatis vos iis has leges inposuisse.*  
*Eandem de Smyrna et Lampsaco civitatibusque, quæ*  
*Ioniæ aut Æolidis sunt, caussam ab Antiocho accipite.*  
*Bello superatas a majoribus, et stipendiarias ac recti-*  
*gales factas, in antiquum jus repetit: itaque ad hæc ei*  
*responderi velim, si ex æquo disceptatur, et non belli*  
*caussa queritur. Ad ea Sulpicius, Fecit verecunde,*  
*inquit, Antiochus, qui, si alia pro caussa ejus non erant,*  
*quæ dicerentur, quemlibet ista, quam se, dicere maluit.*  
*Quid enim simile habet civitatum earum, quas compa-*  
*rasti, caussa? Ab Reginis, et Neapolitanis, et Taren-*  
*tinis, ex quo in nostram venerunt potestatem, uno et*  
*perpetuo tenore juris, semper usurpato, numquam in-*

*termisso, quæ ex fædere debent, exigimus. Potesne U. C. 559.  
tandem dicere, ut ii populi non per se, non per alium A. C. 193.  
quemquam fædus mutaverint, sic Asiæ civitates, ut se-  
mel venerunt in majorum Antiochi potestatem, in per-  
petua possessione regni vestri permansisse, et non alias  
earum in Philippi, alias in Ptolemæi fuisse potestate,  
alias per multos annos nullo ambigente libertatem usur-  
passe? Nam si, quod aliquando servierunt, temporum  
iniquitate pressi, jus post tot secula adserendi eos in  
servitutem faciet; quid abest, quin actum nobis nihil sit,  
quod a Philippo liberavimus Græciam, et repetant pos-  
teri ejus Corinthum, Chalcidem, Demetriadem, et Thes-  
salorum totam gentem? Sed quid ego caussam civita-  
tium ago, quam, ipsis agentibus, et nos et regem ipsum  
cognoscere æquius est?*

XVII. Vocari deinde civitatum legationes jussit, præparatas jam ante et instructas ab Eumene, qui, quantumcumque virium Antiochœ decessisset, suo id accessurum regno ducebat. Admissi plures, dum suas quisque nunc querelas, nunc expostulationes inserit, et æqua inquis miscent, e disceptatione altercationem fecerunt: itaque, neque remissa ulla re, neque inpetrata, æque ac venerant, omnium incerti legati Romam redierunt. Rex, dimissis iis, consilium de bello Romano habuit. Ibi aliis alio fero- cius (quia quo quisque asperius adversus Romanos locutus esset, co spes gratiæ major erat) aliis superbiā postulatorum increpare, tamquam Nabidi victo, sic Antiocho, maximo Asiæ regum, inponentium leges: quamquam Nabidi tamen dominationem in patriam suam, et patriam Lacedæmonem, remissam: An- tiocho si Smyrna et Lampsacus imperata faciant, in- dignum videri. Alii, parvas et vix dictu dignas belli

Rex consi-  
lium habet  
de Romano  
bello.

U.C. 559. caussas tanto regi eas civitates esse: sed initium semper  
A.C. 193. a parvis injusta imperandi fieri: nisi crederent, Persas,  
quum aquam terramque ab Lacedæmoniis petierunt,  
gleba terræ et haustu aquæ eguisse. Per similem ten-  
tationem Romanis de duabus civitatibus agi: et alias  
civitates, simul duas jugum exuisse vidissent, ad libera-  
torem populum defecturas. Si non libertas servitute  
potior sit, tamen omni præsenti statu spem cœque no-  
vandi res suas blandiorem esse.

XVIII. Alexander Acarnan in consilio erat, Phi-  
lippi quondam amicus, nuper relicto eo secutus opu-  
lentiorem regiam Antiochi: et, tamquam peritus Græ-  
ciæ, nec ignarus Romanorum, in eum gradum ami-  
ctiæ regis, ut consiliis quoque arcanis interesset,  
acceptus erat. Is, tamquam non, utrum bellandum  
esset, nec ne, consuleretur, sed ubi et qua ratione  
bellum gereretur, Victoriam se haud dubiam proponere  
animo adfirmabat, si in Europam transisset rex, et in  
aliqua Græciæ parte sedem bello cepisset. Jam pri-  
mum Ætolos, qui umbilicum Græciæ incolerent, in ar-  
mis eum inventurum, antesignanos ad asperrima quæ-  
que belli paratos. In duobus velut cornibus Græciæ,  
Nabin a Peloponneso concitaturum omnia, repetentem  
Argivorum urbem, repetentem maritimas civitates; qui-  
bus eum depulsum Romani Lacedæmonis muris inclusis-  
sent; a Macedonia Philippum, ubi primum bellicum  
cani andisset, arma capturum. Nosse se spiritus ejus,  
nosse animum; scire, ferarum modo, quæ claustris aut  
vinculis teneantur, ingentes jam diu iras eum in pectore  
volvere: meminisse etiam se, quoties in bello precari  
omnes Deos solitus sit, ut Antiochum sibi darent adju-  
torem: cuius voti si compos nunc fiat, nullam moram  
rebellandi facturum. Tantum non cunctandum, neque

*cessandum esse: in eo enim victoriam verti, si et loca U. C. 559.  
opportuna, et socii præoccuparentur. Hannibalem quo-* A. C. 193.  
*que sine mora mittendum in Africam esse ad distrin-*  
*gendos Romanos.*

XIX. Hannibal non adhibitus in consilium, propter conloquia cum Villio suspectus regi, et in nullo postea honore habitus, primo eam contumeliam tacitus tulit: deinde melius esse ratus, et percunctari caussam repentinæ alienationis, et purgare se, tempore apto, quæsita simpliciter iracundiæ caussa auditaque, *Pater Hamilcar, inquit, Antioche, parvum Se purgat. admodum me, quum sacrificaret, altaribus admotum jurejurando adegit, numquam amicum fore populi Romani.* Sub hoc sacramento sex et triginta annos militavi: hoc me in pace patria mea expulit: hoc patria extorrem in tuam regiam adduxit: hoc duce, si tu spem meam destitueris, ubicumque vires, ubi arma esse sciam, huc veniam, toto orbe terrarum quærens aliquos Romanis hostes. Itaque, si quibus tuorum meis criminibus apud te crescere libet, aliam materiam crescendi ex me quærant. Odi, odioque sum Romanis: id me verum dicere, pater Hamilcar et Diū testes sunt. Proinde, quum de bello Romano cogitabis, inter primos amicos Hannibalem habeto: si qua res te ad pacem compellat, in id consilium aliud, cum quo deliberes, quærito. Non movit modo talis oratio regem, sed etiam reconciliavit Hannibali. Ex consilio ita discessum est, ut bellum gereretur.

XX. Romæ destinabant quidem sermonibus hos- U. C. 560.  
tem Antiochum, sed nihil ad id bellum præter A. C. 192.  
animos parabant. Consulibus ambobus Italia pro-  
vincia decreta est: ita ut inter se compararent, sor-

Hannibal  
suspectus  
regi.

U. C. 560. timenturve, uter comitiis ejus anni præesset: ad  
 A. C. 192. utruin ea non pertineret cura, ut paratus esset, si  
 quo eum extra Italiam opus esset ducere legiones.  
 Huic consuli permisum, ut duas legiones scriberet  
 novas, et sociūm Latini nominis viginti millia, et  
 equites octingentos. Alteri consuli duæ legiones  
 decretæ, quas L. Cornelius consul superioris anni  
 habuisset: et sociūm ac Latini nominis ex eodem  
 exercitu quindecim millia, et equites quingenti. Q.  
 Minucio cum exercitu, quem in Liguribus habebat,  
 prorogatum imperium: additum, in supplementum  
 ut quatuor millia peditum Romanorum scriberentur,  
 et centum quinquaginta equites; et sociis eodem  
 quinque millia peditum imperarentur, ducenti quin-  
 quaginta equites. Cn. Domitio extra Italiam, quo  
 senatus censisset, provincia evenit, L. Quinctio  
 Gallia et comitia habenda. Prætores deinde pro-  
 vincias sortiti: M. Fulvius Centumalus urbanam,  
 L. Scribonius Libo peregrinam, L. Valerius Tappo  
 Siciliam, Q. Saloni Sarra Sardiniam, M. Baebius  
 Tamphilus Hispaniam citeriorem, A. Atilius Serra-  
 nus ulteriorem. Sed his duobus primum senatus-  
 consulto, deinde plebis etiam scito permutatæ pro-  
 vinciæ sunt. Atilio classis et Macedonia, Baebio  
 Brutii decreti. Flaminio Fulvioque in Hispaniis  
 prorogatum imperium. Baebio Tamphilo in Brut-  
 ios duæ legiones decretæ, quæ priore anno urbanæ  
 fuissent: et ut sociis eodem millia peditum quinde-  
 cim imperarentur, et quingenti equites. Atilius tri-  
 ginta naves quinqueremes facere jussus, et ex nava-  
 libus veteres deducere, si quæ utiles essent, et scri-  
 bere navales socios. Et consulibus imperatum, ut

Classem  
 parant  
 Romani.

ei duo millia sociūm ac Latini nominis, et mille pe- U. C. 560.  
dites darent Romanos. Hi duo praetores et duo exer- A. C. 192.  
citus, terrestris navalisque, adversus Nabin, aperte  
jam obpugnantem socios populi Romani, dicebantur  
parari. Ceterum legati ad Antiochum missi exspec-  
tabantur: et, priusquam ii redissent, vetuerat Cn.  
Domitium consulem senatus ab urbe discedere.

**XXI.** Prætoribus Fulvio et Scribonio, quibus,  
ut jus dicerent Romæ, provincia erat, negotium da-  
tum, ut, præter eam classem, cui Atilius præfuturus  
erat, centum quinqueremes pararent. Priusquam  
consul prætoresque in provincias proficiscerentur,  
supplicatio fuit prodigiorum caussa. Capram sex  
hœdos uno fœtu edidisse, ex Piceno nunciatum est:  
et Arretii puerum natum unimanum: Amiterni terra  
pluisse: Formiis portam murumque de cœlo tacta:  
et (quod maxime terrebat) consulis Cn. Domitii bo-  
vem locutum, **ROMA CAVE TIBI.** Ceterorum prodi-  
giorum caussa supplicatum est: bovem cum cura  
servari aliœ aruspices jusserunt. Tiberis, infestiore  
quam priore inpetu inlatus urbi, duo pontes, ædifica  
multa, maxime circa portam Flumentanam, evertit.  
Saxum ingens, sive imbribus, sive motu terræ leviore,  
quam ut alioqui sentiretur, labefactatum, in vicum  
Jugarium ex Capitolio procidit, et multos obpressit.  
In agris passim inundatis pecua ablata, villarum  
strages facta est. Priusquam L. Quinctius consul  
in provinciam perveniret, Q. Minucius in agro Pi-  
sano cum Liguribus signis conlatis pugnavit: no- Ligur. victi  
vem millia hostium occidit: ceteros fusos fugatos- a Minucio.  
que in castra compulit. Ea usque in noctem magno  
certamine obpugnata defensaque sunt: nocte clam  
profecti Ligures; prima luce Romanus vacua castra

U. C. 560. invasit: prædæ minus inventum est, quod subinde  
 A. C. 192. spolia agrorum capta domos mittebant. Minucius  
 nihil deinde laxamenti hostibus dedit: ex agro Pi-  
 sano in Ligures profectus, castella vicosque eorum  
 igni ferroque pervastavit: ibi præda Etrusca, quæ  
 missa a populatoribus fuerat, repletus est miles Ro-  
 manus.

**XXII.** Sub idem tempus legati ab regibus Ro-  
 manam reverterunt: qui quum nihil, quod satis matu-  
 ram caussam belli haberet, nisi adversus Lacedæ-  
 monium tyrannum, adtulissent, quem et Achæi le-  
 gati nunciabant contra fœdus maritimam oram La-  
 conum obpugnare; Atilius prætor cum classe mis-  
 sus est in Græciam ad socios tuendos. Consules,  
 quando nihil ab Antiocho instaret, profici sci ambo  
 in provincias placuit. Domitius ab Arimino, qua  
 proximum fuit, Quinctius per Ligures in Boios ve-  
 nit. Duo consulum agmina diversa late agrum hos-  
 tium pervastarunt: primo equites eorum pauci cum  
 præfectis, deinde universus senatus, postremo in qui-  
 bus aut fortuna aliqua, aut dignitas erat, ad mille  
 quingenti ad consules transfugerunt. Et in utraque  
 Hispania eo anno res prospere gestæ: nam et C.  
 Flaminius oppidum Litabrum, munitum opulentum-  
 que, vineis expugnavit, et nobilem regulum Corribi-  
 lonem vivum cepit: et M. Fulvius proconsul cuin  
 duobus exercitibus hostium duo secunda prælia fe-  
 cit; oppida duo Hispanorum, Vesceliam Holonem-  
 que, et castella multa expugnavit: alia voluntate ad  
 eum defecerunt: tum in Orcanos progressus, et ibi  
 duobus potitus oppidis, Noliba et Cusibi, ad Tagum  
 amnem ire pergit. Toletum ibi parva urbs erat, sed  
 loco munito: eam quum obpugnaret, Vectonum

Atilius  
 contra  
 Nabin  
 missus.

Res His-  
 paniæ.

magnus exercitus Toletanis subsidio venit. Cum U. C. 560.  
his signis conlatis prospere pugnavit: et, fusis Vec- A. C. 192.  
tonibus, operibus Toletum cepit.

**XXIII.** Ceterum eo tempore minus ea bella, quæ gerebantur, curæ Patribus erant, quam exspectatio nondum cœpti cum Antiocho belli: nam etsi per legatos idem idem omnia explorabantur, tamen rume-  
res, temere sine ulla auctoribus orti, multa falsa veris miscebant. Inter quæ adlatum erat, quum in Ætoliam venisset Antiochus, extemplo classem eum in Siciliam missurum. Itaque senatus, etsi præto-  
rem Atilium cum classe miserat in Græciam, tamen, Legati in  
quia non copiis modo, sed etiam auctoritate opus Græciam  
erat ad tuendos sociorum animos, T. Quintium, et missi.  
Cn. Octavium, et Cn. Servilium, et P. Villium lega-  
tos in Græciam misit; et, ut M. Baebius ex Bruttii-  
ad Tarentum et Brundisium promoveret legiones,  
decrevit; ut inde, si res posceret, in Macedoniam  
trajiceret; et ut M. Fulvius prætor classem navium  
triginta mitteret ad tuendam Siciliæ oram: et ut  
cum imperio esset, qui classem eam duceret: (duxit  
L. Oppius Salinator, qui priore anno aëdilis plebis  
fuerat) et ut idem prætor L. Valerio collegæ scribe-  
ret, *Periculum esse, ne classis regis Antiochi ex Ætolia*  
*in Siciliam trajiceret: itaque placere senatui, ad eum*  
*exercitum, quem haberet, tumultuariorum militum ad*  
*duodecim millia, et quadringentos equites scribere eum,*  
*quibus oram maritimam provinciæ, qua vergeret in*  
*Græciam, tueri posset.* Eum delectum prætor non  
ex Sicilia ipsa tantum, sed etiam ex circumjacenti-  
bus insulis habuit: oppidaque omnia maritima, quæ  
in Græciam versa erant, præsidiis firmavit. Addidit Attalus fra-  
alimenta rumoribus adventus Attali, Eumenis fra- ter Eume-  
nis Romæ.

U. C. 560. tris, qui nunciavit, Antiochum regem Hellespontum  
▲. C. 192. cum exercitu transisse; et Ætolos ita se parare, ut  
sub adventum ejus in armis essent. Et Eumeni ab-  
senti, et præsenti Attalo gratiæ actæ: et ædes libe-  
ræ, locus, lautia decreta, et munera data, equi duo,  
bina equestria arma, et vasa argentea centum pondo,  
et aurea viginti pondo.

XXIV. Quum alii atque alii nuncii bellum in-  
stare adferrent, ad rem pertinere visum est, consules  
primo quoque tempore creari. Itaque senatuscon-  
sultum factum est, ut M. Fulvius prætor literas ex-  
templo ad consulem mitteret, quibus certior fieret,  
senatui placere, provincia exercituque tradito lega-  
tis, Romam reverti eum, et ex itinere præmittere  
edictum, quo comitia consulibus creandis ediceret.  
Paruit his literis consul, et, præmisso edicto, Ro-  
mam venit. Eo quoque anno magna ambitio fuit,  
quod patricii tres in unum locum petierunt, P. Cor-  
nelius Cn. F. Scipio, qui priore anno repulsam tule-  
rat, et L. Cornelius Scipio, et Cn. Manlius Vulso.  
P. Scipioni, ut dilatum viro tali, non negatum, ho-  
norem adpareret, consulatus datus est: additur ei  
de plebe collega, M'. Acilius Glabrio. Postero die  
prætores creati, L. Æmilius Paullus, M. Æmilius  
Lepidus, M. Junius Brutus, A. Cornelius Mammula,  
C. Livius, et L. Oppius; utrique eorum Salinator  
cognomen erat. Oppius is erat, qui classem triginta  
navium in Siciliam duxerat. Interim dum novi ma-  
gistratus sortirentur provincias, M. Bæbius a Brun-  
disio cum omnibus copiis transire in Epirum est  
jussus, et circa Apolloniam copias continere: et  
M. Fulvio prætori urbano negotium datum est, ut  
quinqueremes novas quinquaginta faceret.

XXV. Et populus quidem Romanus ita se ad U. C. 560.  
 omnes conatus Antiochi præparabat. Nabis jam A. C. 192.  
 non differebat bellum, sed summa vi Gythium ob- Nabis Gy-  
 pugnabat; et, infensus Achæis, quod miserant ob- thium ob-  
 sessis præsidium, agros eorum vastabat. Achæi, Achæi bel-  
 non antea ausi capessere bellum, quam ab Roma lum in eum  
 revertissent legati, ut, quid senatui placeret, scirent, decernunt.  
 post redditum legatorum et Sicyonein concilium edix-  
 erunt, et legatos ad T. Quinctium miserunt, qui con-  
 silium ab eo peterent. In concilio omnium ad bel-  
 lum extemplo capessendum inclinatae sententiæ e-  
 rant: literæ T. Quinctii cunctationem injecerunt,  
 quibus auctor erat prætorem classemque Romanam  
 exspectandi. Quum principum alii in sententia per-  
 manerent; alii utendum ejus, quem ipsi consuluis-  
 sent, consilio censerent; multitudo Philopœmenis  
 sententiam exspectabat. Prætor is tum erat, et  
 omnes eo tempore et prudentia et auctoritate an-  
 teibat. Is præfatus, *bene comparatum apud Ætolos*  
*esse, ne prætor, quum de bello consuluisse, ipse senten-*  
*tiam diceret: statuere quamprimum ipsos, quid vel-*  
*lent, jussit. Prætorem decreta eorum cum fide et cura*  
*executurum: adnisurumque, ut, quantum in consilio*  
*humano positum esset, nec pacis eos pæniteret, nec*  
*belli. Plus ea oratio momenti ad incitandos ad bel-*  
*lum habuit, quam si aperte suadendo cupiditatem*  
*res gerendi ostendisset. Itaque ingenti consensu*  
*bellum decretum est: tempus et ratio administrandi*  
*ejus libera prætori permissa sunt. Philopœmen, præ-*  
*terquam quod ita Quinctio placeret, et ipse existi-*  
*mabat classem Romanam exspectandam, quæ a mari*  
*Gythium tueri posset, sed metuens, ne dilationem*  
*res non pateretur, et non Gythium solum, sed præ-*

U. C. 560. sidium quoque missum ad tuendam urbem amittere-  
A. C. 192. tur, naves Achæorum deduxit.

**XXVI.** Comparaverat et tyrannus modicam classem ad prohibenda, si qua obsessis mari submitterentur, præsidia, tres tectas naves, et lembos pristesque, tradita vetere classe ex fœdere Romanis. Harum novarum tum navium agilitatem ut experietur, simul ut omnia satis apta ad certamen essent, proiectos in altum quotidie remigem militemque simulacris navalis pugnæ exercebat, in eo ratus verti spem obsidionis, si præsidia maritima interclusisset. Prætor Achæorum, sicut terrestrium certaminum arte quemvis clarorum imperatorum vel usu vel ingenio æquabat, ita rudis in re navalی erat; Arcas, mediterraneus homo, exterorum etiam omnium, nisi quod in Creta præfектus auxiliorum militaverat, ignarus. Navis erat quadriremis vetus, capta annis octoginta ante, quum Crateri uxorem Nicæam ab Naupacto Corinthum veheret: hujus fama motus (fuerat enim nobile in classe regia quondam navigium) deduci ab Ægio putrem jam admodum et vetustate dilabentem jussit. Hac tum præatoria nave Classevin- præcedente classem, quum in ea Patrensis Tiso præcitur Phi- lopœmen. effectus classis veheretur, obcurrerunt a Gythio Lacum naves: et primo statim incursu ad novam et firmam navem vetus, quæ per se ipsa omnibus compagibus aquam acciperet, divulsa est: captique omnes, qui in nave erant. Cetera classis, præatoria nave amissa, quantum quæque remis valuit, fugerunt: ipse Philopœmen in levi speculatoria nave fugit: nec ante fugæ finem, quam Patras ventum est, fecit. Nihil ea res animum militaris viri, et multos experti casus, inminuit: quin contra, si in

re navalı, cuius esset ignarus, obfendisset, eo plus in U. C. 560.  
ea, quorum usu calleret, spei nactus, breve id tyran-<sup>A. C. 192.</sup>  
no gaudium se effecturum adfirmabat.

XXVII. Nabis, quum prospera elatus re, tum spem etiam hand dubiam nactus, nihil jam a mari periculi fore, et terrestres aditus claudere opportune positis præsidiis voluit: tertia parte copiarum ab obsidione Gythii abducta, ad Pleias posuit castra. Inmimet is locus et Leucis, et Acriis, qua videbantur hostes exercituum admoturi. Quum ibi stativa essent, et pauci tabernacula haberent, multitudo alia casas ex arundine textas fronde, quæ umbram modo præberet, texissent; priusquam in conspectum hostium veniret Philopœmen, nec opinantem eum inproviso genere belli adgredi statuit. Navigia parva Nabidis in stationem occultam agri Argivi contraxit: in ea expeditos milites, cætratos plerosque, cum fundis et jaculis, et alio levi genere armaturæ, inposuit: inde litora legens, quum ad propinquum castris hostium promontorium venisset, egressus callibus notis, nocte Pleias pervenit: et, sopitis vigilibus, ut in nullo propinquo metu, ignem casis ab onini parte castorum injecit. Multi prius incendio absunti sunt, quam hostium adventum sentirent: et, qui senserant, nullam opem ferre potuerunt. Ferro flammataque omnia absunta: perpauci tamen ex tam ancipiiti peste ad Gythium in majora castra perfugerunt. Ita perculsis hostibus, Philopœmen protinus ad depopulandam Tripolim Laconici agri, qui proximus finem Megalopolitarum est, duxit: et, magna vi pecorum hominumque inde abrepta, priusquam a Gythio tyrannus præsidium agris mitteret, discessit. Inde Tegeam exercitu contracto, concilioque eodem

**U. C. 560.** et Achæis et sociis indicto, in quo et Epirotarum et  
**A. C. 192.** Acarnanum fuere principes, statuit, quoniam satis

et suorum a pudore maritimæ ignominiae restituti animi, et hostium conterriti essent, ad Lacedæmonem ducere: eo modo uno ratus ab obsidione Gythii hostem abduci posse. Ad Caryas primum in

Gythium hostium terra posuit castra. Eo ipso die Gythium captum a Nabide.

expugnatum est: cuius rei ignarus Philopœmen, castra ad Barbosthenem (mons est decem millia passuum ab Lacedæmone) promovit. Et Nabis, recepto Gythio, cum expedito exercitu inde profectus, quum præter Lacedæmonem raptim duxisset, Pyrrhi (quæ vocant) castra occupavit: quem peti locum ab Achæis, non dubitabat: inde hostibus obcurrit. Obtinebant autem longo agmine propter angustias viæ prope quinque millia passuum: cogebatur agmen ab equitibus, et maxime a parte auxiliorum; quod existimabat Philopœmen, tyrannum mercenariis militibus, quibus plurimum fideret, ab tergo suos adgredsurum. Duæ res simul inopinatae perculerunt eum: una, præoccupatus, quem petebat, locus: altera, quod primo agmini obcurrisse hostem cernebat, ubi, quum per loca confragosa iter esset, sine levis armaturæ præsidio signa ferri non videbat posse.

**Philopœmenis so-**  
**fertia in**  
**locis ca-**  
**piendis.**

XXVIII. Erat autem Philopœmen præcipuæ inducendo agmine locisque capiendis solertiæ atque usus: nec belli tantum temporibus, sed etiam in pace, ad id maxime animum exercuerat. Ubi iter quopiam faceret, et ad difficilem transitu saltum venisset, contemplatus ab omni parte loci naturam, quum solus iret, secum ipse agitatbat animo; quum comites haberet, ab iis quarebat, *Si hostis eo loco adparuisset, quid, si a fronte, quid, si ab latere hoc*

aut illo, quid, si ab tergo adoriretur, capiendum consilii foret? Posse instructos recta acie, posse inconditum agmen, et tantummodo aptum viæ, obcurrere. U. C. 360.  
A. C. 192.  
Quem locum ipse capturus esset, cogitando aut quarendo exsequebatur; aut quot armatis, aut quo genere armorum (plurimum enim interesse) usurus; quo impedimenta, quo sarcinas, quo turbam inermem rejiceret; quanto ea, aut quali præsidio custodiret; et utrum pergere, qua cœpisset ire via, an eam, qua venisset, repetere melius esset; castris quoque quem locum caperet, quantum munimento amplectetur loci, qua opportuna aquatio, qua pabuli lignorumque copia esset: qua postero die castra moventi tutum maxime iter, quæ forma agminis foret. His curis cogitationibusque ita ab ineunte ætate animum agitaverat, ut nulla ei nova in tali re cogitatio esset. Et tum omnium primum agmen constituit: dein Cretenses auxiliares et, quos Tarentinos vocabant, equites, binos secum trahentes equos, ad prima signa misit: et, jussis equitibus subsequi, super torrentem, unde aquari possent, rupem occupavit. Eo impedimenta omnia et calonum turbam conjectam armatis circumdedit, et pro natura loci castra communivit: tabernacula statuere in aspretis et inæquabili solo difficile erat. Hostes quingentos passus aberant: ex eodem rivo utrimque cum præsidio levis armaturæ aquati sunt: et, priusquam (qualia in propinquis castris solent) contrahetur certamen, nox intervenit. Postero die adparebat pugnandum pro aquatoribus circa rivum esse: nocte in valle a conspectu hostium aversa, quantam multitudinem locus occulere poterat, condidit, cætrorum.

XXIX. Luce orta, Cretensium levis armatura et

**U.C. 560.** Tarentini equites super torrentem prœlium commis-  
**A. C. 192.** serunt. Tclemnastus Cretensis popularibus suis,  
Prœlium inter Philo- equitibus Lycortas Megalopolitanus præerat. Cre-  
pœmenem tenses et hostium auxiliares, equitumque idem genus  
et Nabin.

Tarentini, præsidio aquatoribus erant. Aliquamdiu dubium prœlium fuit, ut eodem ex parte utraque hominum genere, et armis paribus. Procedente certamine, et numero vicere tyranni auxiliares, et quia ita præceptum a Philopœmene præfectis erat, ut, modico edito prœlio, in fugam inclinarent, hostemque ad insidiarum locum pertraherent. Effuse secuti fugientes per convallem, plerique et vulnerati, et imperfecti sunt, priusquam occultum hostem videbantur. Cætrati ita, quantum latitudo vallis patiebantur, instructi sederant, ut facile per intervalla ordinum fugientes suos acciperent. Consurgunt deinde ipsi integri, recentes, instructi: et in hostes inordinatos, effusos, labore etiam et vulneribus fessos, in petum faciunt. Nec dubia victoria fuit: extemplo terga dedit tyranni miles: et haud paullo concitatiore cursu, quam secutus erat, fugiens, ad castra est compulsus: multi cæsi capti que in ea fuga sunt. Et in castris quoque foret trepidatum, ni Philopœmen receptui cani jussisset; loca magis confragosa, et, quacumque temere processisset, iniqua, quam hostem, metuens. Inde et ex fortuna pugnæ, et ex ingenio ducis conjectans, in quo tum is pavore esset, unum de auxiliaribus specie transfugæ mittit ad eum, qui pro comperto adferret: Achæos statuisse postero die ad Eurotam amniem, qui prope ipsis adfluit mœnibus, progredi, ut intercluderent iter; ne aut tyrannus, quum vellet, receptum ad urbem haberet; aut commeatus ab urbe in castra portarentur: si-

mul etiam tentaturus, si quorum animi sollicitari U. C. 560.  
 ad defectionem a tyranno possent. Non tam fidem A. C. 192.  
 dictis perfuga fecit, quam perculo metu relinquendi Castra de-  
 castra caussam probabilem præbuit. Postero die serit tyran-  
 nus.

Pythagoram cum auxiliaribus et equitatu stationem  
 agere pro vallo jussit: ipse, tamquam in aciem cum  
 robore exercitus egressus, signa ocios ferri ad ur-  
 bem jussit.

XXX. Philopœmen, postquam citatum agmen  
 per angustam et proclivem viam duci raptim vidi, Funditur  
 equitatum omnem et Cretensium auxiliares in statio- ejus exer-  
 nem hostium, quæ pro castris erat, emittit. Illi,  
 ubi hostes adesse, et a suis se desertos viderunt, citus.  
 primo in castra recipere se conati sunt: deinde,  
 postquam instructa acies tota Achæorum admove-  
 batur, metu ne cum ipsis castris caperentur, sequi  
 suorum agmen aliquantum prægressum insistunt.  
 Extemplo cætrati Achæorum in castra inpetum fa-  
 ciunt, et diripiunt: ceteri ad persequendos hostes  
 ire pergunt. Erat iter tale, per quod vix tranquil-  
 lum ab hostili metu agnen expediri posset. Ut vero ad postremos prælium ortum est, clamorque  
 terribilis a tergo paventium ad prima signa est per-  
 latus, pro se quisque, armis abjectis, in circumjectas  
 itineri silvas diffugiunt, momentoque temporis strage  
 armorum septa via est, maxime hastis; quæ, pleræ-  
 que adversæ cadentes, velut vallo objecto, iter impe-  
 diebant. Philopœmen, utcumque possent, instare et  
 persequi auxiliaribus jussis, (utique enim equitibus  
 haud facilem futuram fugam) ipse gravius agmen  
 via patentiore ad Eurotam amnem deduxit: ibi cas-  
 tris sub occasum solis positis, levem armaturam,  
 quam ad persequendum reliquerat hostem, obperie-

U. C. 360. batur. Qui ubi prima vigilia venerunt, nunciantes,  
 A. C. 192. tyrannum cum paucis ad urbem penetrasse, ceteram  
 multitudinem inermem toto sparsam vagari saltu,  
 corpora curare eos jubet: ipse ex cetera copia militum  
 (qui, quia priores in castra venerant, refecti et  
 cibo sumto, et modica quiete erant) delectos, nihil  
 praeter gladios secum ferentes, extemplo educit, et  
 duarum portarum itineribus, quae Pheras, quæque  
 Barbosthenem ferunt, eos instruxit; qua ex fuga  
 recepturos sese hostes credebat. Nec eum opinio  
 fefellit: nam Lacedæmonii, quoad lucis superfuit  
 quidquam, deviis callibus medio saltu se recipiebant.  
 Primo vespere ut lumina in castris hostium con-  
 spexere, e regione eorum occultis semitis se tenuerunt:  
 ubi ea sunt prægressi, jam tutum rati, in pa-  
 tentes vias descenderunt: ibi excepti ab insidente  
 hoste passim ita multi cæsi captique sunt, ut vix  
 quarta pars de toto exercitu evaserit. Philopœmen,  
 incluso tyranno in urbem, insequentes dies prope  
 triginta vastandis agris Laconum absumsit, debili-  
 tatisque ac prope fractis tyranni viribus, domum re-  
 diit, æquantibus eum gloria rerum Achæis impera-  
 tori Romano, et, quod ad Laconicum bellum adti-  
 neret, præferentibus etiam.

XXXI. Dum inter Achæos et tyrannum bellum  
 erat, legati Romanorum circumire sociorum urbes,  
 solliciti, ne Ætoli partis alicujus animos ad Antio-  
 chum avertissent: minimum operæ in Achæis ade-  
 undis consumserunt; quos, quia Nabidi infesti erant,  
 ad cetera quoque satis fidos censebant esse. Athe-  
 nas primum, inde Chalcidem, inde in Thessaliam

Legati iere: allocutique concilio frequenti Thessalos, De-  
 Rom. apud metriadem iter flexere: eo Magnetum concilium in-  
 Magnetas.

dictum est. Adecuratior ibi habenda oratio fuit, quod U.C. 560.  
pars principum alienati a Romanis, totique Antio- A. C. 192.  
chi et Ætolorum erant: quia, quum reddi filium ob-  
sidem Philippo adlatum esset, stipendumque inpo-  
situm remitti, inter cetera vana adlatum erat, De-  
metriadem quoque ei reddituros Romanos esse. Id  
ne fieret, Eurylochus princeps Magnetum, factionis-  
que ejus quidam, omnia novari Ætolorum Antiochi-  
que adventu malebant. Adversus eos ita disseren-  
dum erat, ne, timorem vanum iis demendo, spes in-  
cisa Philippum abalienaret: in quo plus ad omnia  
momenti, quam in Magnetibus, esset. Illa tantum  
commemorata, quum totam Græciam beneficio liber-  
tatis obnoxiam Romanis esse, tum eam civitatem præ-  
cipue. Ibi enim non præsidium modo Macedonum fu-  
isse, sed regiam exædificatam, ut præsens semper in  
oculis habendus esset dominus. Ceterum nequidquam  
ea facta, si Ætoli Antiochum in Philippi regiam ad-  
ducerent, et novus et incognitus pro vetere et experto  
habendus rex esset. Magnetarchen summum magis-  
tratum vocant: is tum Eurylochus erat: ac potes-  
tate ea fretus, negavit dissimulandum sibi et Mag-  
netibus esse, quæ fama vulgata de reddenda Deme-  
triade Philippo foret: id ne fieret, omnia et conanda  
et audenda Magnetibus esse. Et inter dicendi con-  
tentioñem inconsultius evectus projicit; *Tum quaque specie liberam Demetriadem esse: re vera omnia ad nuntium Romanorum fieri.* Sub hanc vocein fremjitus  
variantis multitudinis fuit, partim adsensum, partim  
indignationem, dicere id ausum eum. Quintius  
quidem adeo exarsit ira, ut, manus ad cœlum ten-  
dens, Deos testes ingrati ac perfidi animi Magne-  
tum invocaret. Hac voce perterritis omnibus, Ze-

Eurylochi  
inconsulta  
vox.

**U. C. 560.** no, ex principibus unus, magnæ tum ob eleganter  
**A. C. 192.** actam vitam auctoritatis, tum quod semper Romanorum haud dubie partis fuerat, ab Quintio legatis que aliis flens petiit, ne unius amentiam civitati assignarent. *Suo quemque periculo furere. Magnetas non libertatem modo, sed omnia, quæ hominibus sancta caraque sint, T. Quintio et populo Romano debere. Nihil quemquam ab Diis immortalibus precari posse, quod non Magnetes ab illis haberent; et in corpora sua citius per furorem scvituros, quam ut Romanam amicitiam violarent.*

**XXXII.** Hujus orationem subsecutæ multitudinis preces sunt. Eurylochus ex concilio itineribus occultis ad portam, atque inde protinus in Ætoliam profugit. Jam enim, et id magis in dies, Ætoli defectionem nudabant: eoque ipso forte tempore Thoas, princeps gentis, quem miserant ad Antiochum, redierat, indeque Menippum secum adduxerat, regis legatum. Qui, priusquam concilium iis daretur, impleverant omnium aures, terrestres navalesque copias commemorando; *ingentem vim peditum equitumque venire: ex India elephantos: ante omnia (quo maxime moveri credebant multitudinis animos) tantum advehi auri, ut ipsos emere Romanos possit.* Adparebat, quid ea oratio in concilio motura esset: nam et venisse eos, et, quæ agerent, omnia Romanis legatis deferebantur: et, quamquam prope absissa res erat, tamen non ab re esse Quintio visum est, sociorum aliquos legatos interesse ei concilio, qui admonerent Romanæ societatis Ætolos, qui vocem liberam mittere adversus regis legatum auderent. Athenienses maxime in eam rem idonei visunt, propter et civitatis dignitatem, et vetustam

*Ætoli de-  
fectionem  
nudant.*

societatem cum Ætolis: ab iis Quinctius petiit, ut U. C. 560. legatos ad Panætolicum concilium mitterent. Thoas A. C. 192. primus in eo concilio renunciavit legationem. Me- Concilium Panætoli- nippus post eum intromissus, optimum fuisse omnibus, cum. qui Græciam Asiamque incolerent, ait, integris rebus Philippi potuisse intervenire Antiochum: sua quemque habiturum fuisse, neque omnia sub nutum ditionemque Romanam perventura. Nunc quoque, inquit, si modo vos, quæ inchoastis, consilia constanter perducitis ad exitum, poterit, Diis juvantibus, et Ætolis sociis, Antiochus quamvis inclinatas Græciæ res restituere in pristinam dignitatem. Ea autem in libertate posita est, quæ suis stat viribus, non ex alieno arbitrio pendet. Athenienses, quibus primis, post regiam legationem, dicendi, quæ vellent, potestas facta est, mentione omni regis prætermissa, Romanæ societatis Ætolos, meritorumque in universam Græciam T. Quinctii, admonuerunt, ne temere eam celeritate nimia consilio- rum everterent. Consilia calida et audacia prima specie læta, tractatu dura, erentu tristia esse: legatos Roma- nos, et in iis T. Quinctium, haud procul inde abesse. Dum integra omnia essent, verbis potius de iis, quæ am- bigerentur, disceptarent, quam Asiam Europamque ad funestum armarent bellum.

XXXIII. Multitudo avida novandi res, Antiochi tota erat; et ne admittendos quidem in concilium Romanos censebant: principum maxime seniores auctoritate obtinuere, ut daretur iis concilium. Hoc decretum Athenienses quum retulissent, eundum in Ætoliam Quinctio visum est. Aut enim moturum Legati Ro- aliquid, aut omnes homines testes fore, penes Æto- mani in Ætoliam los belli culpam esse: Romanos justa ac prope ne- eunt. cessaria sumtuos arma. Postquam ventum est eo,

**U.C. 560.** Quinctius in concilio, orsus a principio societatis  
**A.C. 192.** Ætolorum cum Romanis, et quoties ab iis fides mota

fœderis esset, pauca de jure civitatum, de quibus ambigeretur, disseruit. Si quid tamen æqui se habere arbitrarentur, quanto esse satius Romam mittere legatos, seu disceptare, seu rogare senatum mallent; quam populum Romanum cum Antiocho, lanistis Ætolis, non sine motu magno generis humani, et pernicie Græciæ dimicare? nec ullos prius cladem ejus belli sensuros, quam qui movissent. Hæc nequidquam velut vaticinatus Romanus. Thoas deinde ceterique factionis ejusdem, cum adsensu omnium audit, pervicerunt, ut, ne dilato quidem concilio, et absentibus Romanis, decretum fieret, quo arcesseretur Antiochus ad liberandam Græciam; disceptatumque inter Ætolos et Romanos. Huic tam superbo decreto addidit propriam contumeliam Damocritus prætor eorum: nam quum id ipsum decretum posceret eum Quinctius, non veritus majestatem viri, aliud in præsentia, quod magis instaret, prævertendum sibi esse, dixit: decretum responsumque brevi in Italia, castris super ripam Tiberis positis, daturum. Tantus furor illo tempore gentem Ætolorum, tantusque magistratus eorum cepit.

**XXXIV.** Quinctius legatique Corinthum redierunt: inde, ut quæque de Antiocho, nihil per se ipsi moti, et sedentes exspectare adventum viderentur regis, concilium quidem universæ gentis post dismissos Romanos non habuerunt: per apocletos autem (ita vocant sanctius consilium: ex delectis constat viris) id agitabant, quonam modo res in Græcia noventur. Inter omnes constabat, in civitatibus principes, optimum quemque, Romanæ societatis

Ætoliar-  
cessunt  
Antio-  
ehum.

esse, et præsenti statu gaudere: multitudinem, et U. C. 560.  
 quorum res non ex sententia ipsorum essent, omnia  
 novare velle. Ætoli consilium uno die spei quoque  
 non audacis modo, sed etiam inpudentis, ceperunt,  
 Demetriadem, Chalcidem, et Lacedæmonem occu-  
 pandi. Singuli in singulas missi sunt principes:  
 Thoas Chalcidem, Alexamenus Lacedæmonem, Dio-  
 cles Demetriadem. Hunc exsul Eurylochus, de cu- Demetria-  
 jus fuga caussaque fugæ ante dictum est, quia redi- dem occu-  
 pants.  
 tus in patriam nulla spes alia erat, adjuvit. Literis  
 Eurylochi admoniti propinqui amicique, et qui ejus-  
 dem factionis erant, liberos et conjugem ejus cum  
 sordida veste, tenentes velamenta supplicum, con-  
 cionem frequentem adire jubent, singulos universos-  
 que obtestantes, ne insontem, indemnatum conse-  
 nescere in exsilio sinerent. Et simplices homines  
 misericordia, et improbos seditiososque inmiscendi-  
 res tumultu Ætolico spes movit: pro se quisque  
 revocare jubebant. His præparatis, Diocles, cum  
 omni equitatū (et erat tunc præfector equitum) spe-  
 cie reducentis exsulem hospitem profectus, die ac  
 nocte ingens iter emensus, quum millia sex ab urbe  
 abesset, luce prima tribus electis turmis, cetera mul-  
 titudine equitum subsequi jussa, præcessit: postquam  
 portæ adpropinquabat, desilire omnes ex equis jus-  
 sit, et loris ducere equos, itineris maxime modo, so-  
 lutis ordinibus: ut comitatus magis præfecti videre-  
 tur, quam præsidium. Ibi una ex turmis ad portam  
 relicta, ne excludi subsequens equitatus posset, me-  
 dia urbe ac per forum, manu Eurylochum tenens,  
 multis obcurrentibus gratulantibusque, domum de-  
 duxit. Mox equitum plena urbs erat, et loca op-  
 portuna occupabantur: tum in domos missi, qui

U. C. 560. principes adversæ factionis interficerent. Ita Deme-  
A. C. 192. trias Ætolorum facta est.

Nabin dolo capi- XXXV. Lacedæmone non urbi vis adferenda,  
unt, et oc- sed tyrannus dolo capiendus erat: quem, spoliatum  
cidunt. maritimis oppidis a Romanis, tunc intra mœnia  
etiam Lacedæmonis ab Achæis compulsum, qui oc-  
cupasset occidere, eum totius gratiam rei apud La-  
cedæmonios laturum. Caussam mittendi ad eum  
habuerunt, quod fatigabat precibus, ut auxilia sibi,  
quum illis auctoribus rebellasset, mitterentur. Mille  
pedites Alexameno dati sunt, et triginta delecti ex  
juventute equites. Iis a prætore Damocrito in con-  
silio arcano gentis, de quo ante dictum est, denun-  
ciatum, *Ne se ad bellum Achaicum aut rem ullam,*  
*quam sua quisque opinione præcipere posset, crederent*  
*missos esse: quidquid Alexanenum res monuisset subiti*  
*consilii capere, ad id, quamvis inopinatum, temera-*  
*rium, audax, obedienter exsequendum parati essent, ac*  
*pro eo acciperent, tamquam ad id unum agendum mis-*  
*sos ab domo se seirent.* Cum his ita præparatis Alex-  
amenus ad tyrannum venit, quem adveniens extem-  
plo spei inplevit. *Antiochum jam in Europam trans-*  
*isse, mox in Græcia fore; terras, maria, armis, viris*  
*completurum.* Non cum Philippo rem esse credituros  
Romanos: numerum iniri peditum equitumque ac na-  
vium non posse; elephantorum aciem conspectu ipso  
debellaturam. Ætolos toto suo exercitu paratos esse  
venire Lacedæmonem, quum res poscat: sed frequentes  
armatos ostendere advenienti regi voluisse. Nabidi  
quoque et ipsi faciendum esse, ut, quas haberet copias,  
non sineret sub tectis marcescere otio: sed educeret, et in  
armis decurrere cogeret, simul animos acueret, et cor-  
pora exerceret. Consuetudine leviorem laborem fore:

*et comitate ac benignitate ducis etiam non injucundum U. C. 560.  
fieri posse. Educi inde frequenter ante urbem in A. C. 192.  
campum ad Eurotam amnem cœpere. Satellites ty-  
ranni media fere in acie consistebant, tyrannus cum  
tribus summum equitibus, inter quos plerumque  
Alexamenus erat, ante signa vectabatur, cornua ex-  
trema invisens; in dextro cornu Ætolí erant, et qui  
ante auxiliares tyranni fuerant, et qui venerant mille  
cum Alexameno. Fecerat sibi morem Alexamenus,  
nunc cum tyranno inter paucos ordinés circumeundi,  
monendique eum, quæ in rem esse videbantur; nunc  
in dextrum cornu ad suos adequitandi; mox inde,  
velut imperato, quod res poposcisset, recipiendi se  
ad tyrannum. Sed, quem diem patrando facinori  
statuerat, eo paullisper cum tyranno vectatus, quum  
ad suos concessisset, tum equitibus ab domo secum  
missis, *Agenda*, inquit, *res est, juvenes, audendaque,*  
*quam me duce inpigre exsequi jussi estis. Parate ani-*  
*mos dextrasque, ne quis in eo, quod me viderit facien-*  
*tem, cessen. Qui cunctatus fuerit, et suum consilium*  
*meo interponet, sciat sibi redditum ad penates non esse.*  
Horror cunctos cepit: et meminerant, cum quibus  
mandatis exissent. Tyrannus ab lævo cornu venie-  
bat. Ponere hastas equites Alexamenus jubet, et se  
intuerti: colligit et ipse animum confusum tantæ co-  
gitatione rei. Postquam adpropinquabat, inpetum  
facit, et, transfixo equo, tyrannum deturbat. Ja-  
centem equites confodiunt: multis frustra in lori-  
cam ictibus datis, tandem in nudum corpus vulnera  
pervenerunt: et, prinsquam a media acie subcurre-  
retur, exspiravit.*

XXXVI. Alexamenus cum omnibus Ætolis citato  
gradu ad regiam occupandam pergit. Corporis cus-

**U.C. 560.** *todes, quum res in oculis gereretur, pavor primo A.C. 192.* cepit: deinde, postquam abire Ætolorum agmen videre, concurrunt ad relictum tyranni corpus: et spectatorum turba ex custodibus vitæ mortisque ultoribus est facta. Nec movisset se quisquam, si extemplo, positis armis, vocata in concionem multitudo fuisse, et oratio habita tempori conveniens, frequentes inde retenti in armis Ætolii sine injuria cuiusquam: sed, ut oportuit in consilio fraude cœpto, omnia in maturandam perniciem eorum, qui fecerant, sunt acta. Dux regia inclusus diem ac noctem in scrutandis thesauris tyranni consumsit: Ætolii, velut capta urbe, quam liberasse videri volebant, in prædam versi. Simul indignitas rei, simul contemptus, animos Lacedæmoniis ad coëundum fecit: alii dicere, exturbanos Ætolos, et libertatem, quum restitui videretur, interceptam repetendam: alii, ut

**Lacedæmonii cædunt Ætolos.** caput agendæ rei esset, regii generis aliquem in speciem adsumendum. Laconicus ejus stirpis erat puer admodum, educatus cum liberis tyranni: eum in equum inponunt, et, armis adreptis, Ætolos vagos per urbem cædunt. Tum regiam invadunt: ibi Alexamenum cum paucis resistentem obtruncant. Ætolii circa Chalcicœcon (Minervæ est templum æereum) congregati cæduntur. Pauci, armis abjectis, pars Tegeam, pars Megalopolim perfugiunt: ibi, comprehensi a magistratibus, sub corona venierunt.

**Philopœmen Laconas societati Achæorum adjungit.** XXXVII. Philopœmen, audita cæde tyranni, profectus Lacedæmonem, quuni omnia turbata metu invenisset; evocatis principibus, et oratione habita, qualis habenda ab Alexameno fuerat, societati Achæorum Lacedæmonios adjunxit: eo etiam facilius, quod forte ad idem tempus A. Atilius cum qua-

tuor et viginti quinqueremibus ad Gythium accessit. U. C. 560.  
 Iisdem diebus circa Chalcidem Thoas, per Euthymi- A. C. 192.  
 dam principem, pulsum opibus eorum, qui Romanæ Thoas frus-  
 societatis erant, post T. Quintii legatorumque ad- tra Chalci-  
 ventum, et Herodoruni Cianum mercatorem, sed po- dem tentat.  
 tentem Chalcide propter divitias, præparatis ad pro-  
 ditionem iis, qui Euthymidae factionis erant, nequa-  
 quam eamdem fortunam, qua Demetrias per Eu-  
 rylochum occupata erat, habuit. Euthymidas ab  
 Athenis (eum domicilio delegerat locum) Thebas  
 primum, hinc Salganea processit; Herodorus ad  
 Thronium. Inde haud procul in Maliaco sinu duo  
 millia peditum Thoas et ducentos equites, onerarias  
 leves ad triginta habebat: eas cum sexcentis pediti-  
 bus Herodorus trajicere in insulam Atalantam jus-  
 sus; ut inde, quum pedestres copias adpropinquare  
 jam Aulidi atque Euripo sensisset, Chalcidem trai-  
 ceret: ipse ceteras copias, nocturnis maxime itine-  
 ribus, quanta poterat celeritate, Chalcidem ducebat.

**XXXVIII.** Mictio et Xenoclides, penes quos tum  
 summa rerum, pulso Euthymida, Chalcide erat, seu  
 ipsi per se suspiciati, seu indicata re, primo pavidi,  
 nihil usquam spei, nisi in fuga, ponebant: deinde,  
 postquam resedit terror, et prodi et deserit non pa-  
 triam modo, sed etiam Romanorum societatem, cer-  
 nebant, consilio tali animum adjecerunt. Sacrum  
 anniversarium eo forte tempore Eretriae Amarynthi-  
 dis Dianæ erat: quod non popularium modo, sed  
 Carystiorum etiam cœtu celebratur. Eo miserunt,  
 qui orarent Eretrientes Carystiosque, *Ut et suarum*  
*fortunarum in eadem insula geniti misererentur, et Ro-*  
*manam societatem respicerent: ne sinerent Ætolorum*  
*Chalcidem fieri. Eubœam habituros, si Chalcidem ha-*

U. C. 560. *buisserent.* *Graves fuisse Macedonas dominos; multo*  
A. C. 192. *minus tolerabiles futuros Ætolos.* Romanorum ma-  
xime respectus civitates movit, et virtutem nuper in  
bello, et in victoria justitiam benignitatemque ex-  
pertas: itaque, quod roboris in juventute erat, utra-  
que civitas armavit misitque. His tuenda mœnia  
Chalcidis oppidani quum tradidissent, ipsi omnibus  
copiis transgressi Euripum, ad Salganea posuerunt  
castra: inde caduceator primum, deinde legati ad  
Ætolos missi percunctatum, quo suo dicto factove  
socii atque amici ad se obpugnandos venirent? Re-  
spondit Thoas dux Ætolorum, *Non ad obpugnandos,*  
*sed ad liberandos ab Romanis, venire sese. Splendi-*  
*diore nunc eos catena, sed multo graviore, vinctos esse,*  
*quam quum præsidium Macdonum in arce habuissent.*  
*Se vero, negare Chalcidenses, aut servire ulli, aut*  
*præsidio cuiusquam egere.* Ita digressi ex conloquio  
legati ad suos. Thoas et Ætoli, ut qui spem omnem  
in eo, ut improviso obprimerent, habuissent, ad jus-  
tum bellum obpugnationemque urbis mari ac terra  
munitæ haudquaquam pares, domum rediere. Eu-  
thymidas, postquam castra popularium ad Salganea  
esse, profectosque Ætolos audivit, et ipse a Thebis  
Athens rediit. Et Herodorus, quum per aliquot  
dies intentus ab Atalanta signum nequidquam ex-  
spectasset, missa speculatoria nave, ut, quid moræ  
esset, sciret, postquam rem omissam a sociis vidit,  
Thronium, unde venerat, repetit.

XXXIX. Quintius quoque, his auditis, ab Corin-  
tho veniens navibus, in Chalcidis Euripo Eumeni  
regi obcurrit. Placuit, quingentos milites præsidii  
caussa relinqu Chalcide ab Eumiene rege: ipsum  
Athens ire. Quintius, quo profectus erat, Deme-

triadem contendit; ratus Chalcidem liberatam mo- U.C. 560.  
 menti aliquid apud Magnetas ad repetendam socie- A.C. 192.  
 tatem Romanam facturam. Et, ut præsidii aliquid Quintcius  
 esset suæ partis hominibus, Eunomo prætori Thes- Magnetas  
 salorum scripsit, ut armaret juventutem, et Villium tentat.  
 ad Demetriadem præmisit ad tentandos animos: non  
 aliter, nisi pars aliqua inclinaret ad respectum pris-  
 tinæ societatis, rem adgressurus. Villius quinque-  
 remi nave ad ostium portus est invectus. Eo mul-  
 titudo Magnetum omnis quum se effudisset, quæsivit  
 Villius, utrum ad amicos, an ad hostes, sese venisse  
 mallent? Respondit Magnetarches Eurylochus, *Ad  
 amicos venisse eum: sed abstineret portu, et sineret  
 Magnetas in concordia et libertate esse, nec per con-  
 loquii speciem multitudinem sollicitaret.* Alteratio  
 inde, non sermo, fuit: quum Romanus ut ingratos  
 increparet Magnetas, inminentesque prædiceret clades;  
 multitudo obstreperet, nunc senatum, nunc  
 Quintium accusando: ita irrito incepto Villius ad  
 Quintium sese recepit. At Quintius, nuncio ad  
 prætorem misso, ut reduceret domum copias, ipse  
 navibus Corinthum rediit.

XL. Abstulerunt me velut de spatio Græciæ res  
 iumixtae Romanis: non quia ipsas operæ pretium  
 esset perscribere, sed quia caussæ fuerunt cum An-  
 tiocho belli. Consulibus designatis, (inde namque  
 diverteram) L. Quintius et Cn. Domitius consules Res Italæ,  
 in provincias profecti sunt: Quintius in Ligures,  
 Domitius adversus Boios. Boii quieverunt: atque  
 etiam senatus eorum cum liberis, et præfecti cum  
 equitatu (summa omnium mille et quingenti) con-  
 suli dediderunt sese. Ab altero consule ager Ligu-  
 rum late est vastatus, castellaque aliquot capta:

U. C. 560. unde non præda modo omnis generis cum captivis  
 A. C. 192. parta, sed recepti quoque aliquot cives sociique, qui  
 in hostium potestate fuerant. Eodem anno Vi-  
 bonem colonia dedueta est ex senatusconsulto ple-  
 beique scito: tria millia et septingenti pedites ierunt,  
 trecenti equites. Triumviri deduxerunt eos, Q. Næ-  
 vius, M. Minucius, M. Furius Crassipes: quina dena  
 jugera agri data in singulos pedites sunt, duplex  
 equitibus. Bruttiorum proxime fuerat ager: Bruttii  
 ceperant de Græcis. Romæ per idem tempus duo  
 maximi fuerunt terrores; diutinus alter, sed segnior.  
 Terra dies duodequadraginta movit: per totidem dies  
 feriæ in sollicitudine ac metu fucre: in triduum ejus  
 rei caussa supplicatio habita est. Ille non pavor  
 vanus, sed vera multorum clades fuit: incendio a  
 foro Boario orto, diem noctenique ædificia in Tibe-  
 riin versa arsere, tabernæque omnes cum magni  
 pretii mercibus conflagraverunt.

Adparatus    XLI. Jam fere in exitu annus erat: et in dies  
 belli ad-    magis fama de Antiochi bello, et cura Patribus  
 versus An-    crescebat. Itaque de provinciis magistratum de-  
 tiochum. signatorum, quo intentiores essent omnes, agitari  
     cœptum est. Decrevere, ut consulibus Italia, et  
     quo senatus censuisset, (jam esse bellum adversus  
     Antiochuni regem omnes sciebant) provinciæ essent:  
     cuius ea sors esset, quatuor millia peditum civium  
     Romanorum, et trecenti equites, sex millia socium  
     Latini nominis cum quadringentis equitibus sunt de-  
     creta: Eorum delectum habere L. Quinetius con-  
     sul jussus; ne quid moraretur, quo minus consul  
     novus, quo senatus censuisset, exemplo proficisci  
     posset. Item de provinciis prætorum decretum est:  
     prima ut sors duæ, urbanaque et inter cives ac perc-

grinos jurisdictione esset: secunda, Bruttii: tertia, U. C. 360.  
 classis, ut navigaret, quo senatus censuisset: quarta, A. C. 192.  
 Sicilia: quinta, Sardinia: sexta, Hispania ulterior.  
 Imperatum præterea L. Quinetio consuli est, ut  
 duas legiones civium Romanorum novas conscribe-  
 ret; et socium ac Latini nominis viginti millia pedi-  
 tum, et octingentos equites: eum exercitum prætori,  
 cui Bruttii provincia evenisset, decreverunt. Ædes  
 duæ Jovi eo anno in Capitolio dedicatæ sunt. Vo-  
 verat L. Furius Purpureo prætor Gallico bello unam,  
 alteram consul: dedicavit Q. Marcius Ralla duum-  
 vir. Judicia in fœneratores eo anno multa severe  
 sunt facta, accusantibus privatos ædilibus curulibus,  
 M. Tuccio et P. Junio Bruto: de multa damnato-  
 rum quadrigæ inauratae in Capitolio positæ in cella  
 Jovis supra fastigium ædiculæ, et duodecim clipea  
 inaurata: et iidem porticum extra portam Trigemi-  
 nam inter lignarios fecerunt.

**XLII.** Intentis in adparatum novi belli Romanis,  
 ne ab Antiocho quidem cessabatur. Tres eum civi-  
 tates tenebant, Smyrna, et Alexandria Troas, et  
 Lampsacus; quas neque vi expugnare ad eam diem  
 poterat, neque conditionibus in amicitiam perlicere,  
 neque a tergo relinquere, trajiciens ipse in Europam,  
 volebat. Tennit eum et de Hannibale deliberatio.  
 Et primo naves apertæ, quas cum eo missurus in Africam fuerat, moratæ sunt: deinde, an omnino  
 mittendus esset, consultatio mota est, maxime a Thoante Ætolo, qui, omnibus in Græcia tumultu  
 completis, Demetriadem adferebat in potestate esse:  
 et, quibus mendaciis de rege, multiplicando verbis  
 copias ejus, erexerat multorum in Græcia animos,  
 iisdem et regis spem inflabat; omnium votis eum ar-

Antiochi de  
Hannibale  
deliberatio.

U. C. 560. cessi: concursum ad litora futurum, unde classem re-  
A. C. 192. giam prospexissent. Hic idem ausus de Hannibale  
est movere sententiam prope jam certam regis: nam  
neque dimittendam partem navium a classe regia cen-  
sebat: neque, si mittendæ naves forent, minus quem-  
piam ei classi, quam Hannibalem, præficiendum. Ex-  
sulem illum et Pænum esse, cui mille in dies nova con-  
silia vel fortuna sua, vel ingenium possit facere. Et  
ipsam eam gloriam belli, qua velut dote Hannibal con-  
cilietur, nimiam in præfecto regio esse. Regem con-  
spici, regem unum ducem, unum imperatorem videri  
debere. Si classem, si exercitum amittat Hannibal,  
idem damni fore, ac si per alium ducem amittantur:  
si quid prospere eveniat, Hannibal eam, non Antiochi,  
gloriam fore. Si vero universo bello vincendi Roma-  
nos fortuna detur, quam spem esse, sub rege victurum  
Hannibalem uni subjectum, qui patriam prope non tu-  
lerit? Non ita se a juventa eum gessisse, spe animoque  
complexum orbis terrarum imperium, ut in senectute  
dominum latus rideatur. Nihil opus esse regi Han-  
nibale duce: comite et consiliario eodem ad bellum uti  
posse. Modicum fructum ex ingenio tali neque gravem,  
neque inutilem fore: si summa petantur, et dantem, et  
accipientem prægravatura.

**Consilium**  
**mittendi**  
**Hanniba-**  
**lis in Ita-**  
**liam abji-**  
**citur.**

**XLIII.** Nulla ingenia tam prona ad invidiam  
sunt, quam eorum, qui genus ac fortunam suam  
animis non æquant: quia virtutem et bonum alienum  
oderunt. Extemplo consilium mittendi Han-  
nibal, quod unum in principio belli utiliter cogita-  
tum erat, abjectum est. Demetriadis maxime de-  
fectione ab Romanis ad Ætolos elatus, non ultra  
Antiochus differre profectionem in Græciam constituit. Prius-  
in Euro-  
pam tra-  
quam solveret naves, Ilium a mari adscendit, ut  
jicit.

Minervæ sacrificaret. Inde ad classem regressus, U.C. 560.  
proficiscitur quadraginta tectis navibus, apertis sex- A.C. 192.  
aginta : et ducentæ onerariæ cum omnis generis com-  
meatu bellicoque alio adparatu sequebantur. Imbrum  
primo insulam tenuit : inde Scyathum, trajecit : ubi,  
conlectis in alto, quæ dissipatæ erant, navibus, ad  
Pteleum primum continentis venit. Ibi Eurylochus  
ei Magnetarches principesque Magnetum ab Deme-  
triade obcurrerunt : quorum frequentia lætus, die  
postero in urbis portum navibus est invectus. Co-  
pias haud procul inde exposuit : decem millia pedi-  
tum fuere, et quingenti equites, sex elephanti ; vix  
ad Græciam nudam occupandam satis copiarum, ne-  
dum ad sustinendum Romanum bellum. Ætoli, post-  
quam Demetriadem venisse Antiochum adlatum est,  
concilio indicto, decretum, quo arcesserent eum, fe-  
cerunt. Jam profectus ab Demetriade rex, quia ita  
decretuos sciebat, Phalara in sinum Maliacum pro-  
cesserat : inde, decreto accepto, Lamiam venit, ex-  
ceptus ingenti favore multitudinis, cum plausibus  
clamoribusque, et quibus aliis lætitia effusa vulgi sig-  
nificatur.

XLIV. In concilium ut ventum est, ægre a Phæ-  
nea prætore principibusqne introductus, inde facto  
silentio, rex dicere orsus. Prima ejus oratio fuit ex-  
cusantis, *Quod tanto minoribus spe atque opinione* Antiochi  
*omnium copiis venisset.* *Id suæ inpensæ erga eos vo-* oratio in  
*luntatis maximum debere indicium esse, quod nec para-* concilio  
*tus satis ulla re, et tempore ad navigandum inmaturo,* Ætolorum.  
*vocantibus legatis eorum, haud gravate obsecutus esset,*  
*credidissetque, quum se vidissent Ætoli, omnia vel in*  
*se uno posita præsidia existimaturos esse.* Ceterum eo-  
rum quoque se, quorum exspectatio destituta in præ-

**U. C. 560.** *sentia videatur, spem abunde expleturum. Nam simul*  
**A. C. 192.** *primum anni tempus navigabile præbuisset mare, omnem se Græciam armis, viris, equis, omnem oram maritimam classibus completurum. Nec impensa, nec labore, nec periculo parsurum, donec, depulso cervicibus eorum imperio Romano, liberam vere Græciam, atque in ea principes Ætolos fecisset : cum exercitibus comedatus quoque omnis generis ex Asia venturos. In præsentia curæ esse Ætolis debere, ut copia frumenti suis, et annona tolerabilis rerum aliarum subpeditetur.*

**XLV.** In hanc sententiam rex cum magno omnium adsensu locutus discessit. Post discessum regis, inter duos principes Ætolorum, Phæneam et Thoantem, contentio fuit. Phæneas, reconciliatore pacis et disceptatore de iis, quæ in controversia cum populo Romano essent, utendum potius Antiocho, censebat, quam duce belli. *Adventum ejus et majestatem ad verecundiam faciendam Romanis vim majorem habituram, quam arma. Multa homines, ne bellare necesse sit, voluntate remittere, quæ bello et armis cogi non possint.* Thoas negare, paci studere Phæneam : sed discutere adparatum belli velle, ut tædio et inpetus relanguescat regis, et Romani tempus ad comparandum habeant. Nihil enim æqui ab Romanis inpetrari posse, toties legationibus missis Romam, toties cum ipso Quintio disceptando, satis expertum esse : nec, nisi abscissa omni spe, auxilium Antiochi inploratueros fuisse. Quo celerius spe omnium oblato, non esse elangescendum, sed orandum potius regem, ut, quoniam, quod maximum fuerit, ipse vindex Græciæ venerit, copias quoque terrestres navalesque arcessat. *Armatum regem aliquid inpetraturum : inermem non pro Ætolis modo, sed ne pro se quidem ipso, momenti ullius futurum apud Ro-*

*manos.* Hæc vicit sententia : imperatoremque re- U. C. 560.  
gem adpellandum censuerunt : et triginta principes, A. C. 192.  
cum quibus, si qua vellet, consultaret, delegerunt. Imperato-  
rem eum

XLVI. Ita, dimisso concilio, multitudo omnis in Ætolis ad-  
suas civitates dilapsa est. Rex postero die cum apo-  
cletis eorum, unde bellum ordiretur, consultabat.

Optimum visum est, Chalcidem, frustra nuper ab Chalcidem  
Ætolis tentatam, primum adgredi : et celeritate in frusta  
eam rem magis, quam magno conatu et adparatu,  
opus esse. Itaque cum mille peditibus rex, qui ab  
Demetriade secuti erant, profectus per Phocidem  
est : et alio itinere principes Ætolii, juniorum paucis  
evocatis, ad Chæroneam obcurrerunt, et decem con-  
stratis navibus secuti sunt. Rex, ad Salganea castris  
positis, navibus ipse cum principibus Ætolorum Eu-  
ripum trajecit, et, quum haud procul portu egressus  
esset, magistratus quoque Chalcidensium et princi-  
pes ante portam processerunt. Pauci utrimque ad  
conloquium congressi sunt. Ætolii magnopere sua-  
dere, ut, salva Romanorum amicitia, regem quoque  
adsumerent socium atque amicum. Neque enim eum  
inferendi belli, sed liberandæ Græciæ, caussa in Euro-  
pam trajecisse ; et liberandæ re, non verbis et simula-  
tione, quod fecissent Romani. Nihil autem utilius  
Græciæ civitatibus esse, quam utramque complecti ami-  
citiam : ita enim ab utriusque injuria tutam alterius  
semper præsidio et fiducia fore. Nam si non recepissent  
regem, viderent, quid patiendum iis extemplo fore :  
quum Romanorum procul auxilium, hostis Antiochus,  
cui resistere viribus suis non possent, ante portas esset.  
Ad hæc Mictio, unus ex principibus, Mirari sc̄e, dixit,  
ad quos liberandos Antiochus, relicto regno suo, in Eu-  
ropam trajecisset. Nullam enim civitatem se in Græ-

U. C. 560. *cia nosse, quæ aut præsidium habeat, aut stipendium*

A. C. 192. *Romanis pendat, aut fædere iniquo adligata, quas nolit, leges patiatur. Itaque Chalcidenses neque vindice libertatis ullo egere, quum liberi sint, neque præsidio, quum pacem ejusdem populi Romani beneficio et libertatem habeant. Amicitiam regis non adspernari, neque ipsorum Ætolorum : id primum eos pro amicis facturos, si insula excedant, atque abeant : nam ipsis certum esse, non modo non recipere mænibus, sed ne societatem quidem ullam pacisci, nisi ex auctoritate Romanorum.*

XLVII. Hæc renunciata regi ad naves, ubi restiterat, quum essent ; in præsentia (neque enim iis venerat copiis, ut vi agere quidquam posset) reverti Demetriadem placuit : ibi, quoniam primum vanum inceptum evassisset, consultare cum Ætolis rex, quid deinde fieret. Placuit, Achæos et Amynandrum, regem Athamanuni, tentare. Bœotorum gentem aversam ab Romanis jam inde a Brachyllæ morte, et quæ secuta eam fuerant, censebant. Achæorum Philopœmenem principem, æmulatione gloriæ in bello Laconum, infestum invisumque esse Quintio credebant. Amynander uxorem Apamiam, filiam Alexandri cuiusdam Megalopolitani, habebat : qui, se oriundum a Magno Alejandro ferens, filiis duobus Philippum atque Alexandrum, et filiæ Apamiam nomina inposuerat : quam, regiis inclitani nuptiis, major ex fratribus Philippus secutus in Athamaniam fuerat. Hunc, forte ingenio vanum, Ætoli et Antiochus inpulerant in spem, quod is vere regum stirpis esset, regni Macedoniæ, si Amynandrum Athamanesque Antiocho conjunxisset : et ea vanitas promissorum non apud Philippum modo, sed etiam apud Amynandrum, valuit.

**XLVIII.** In Achaia legatis Antiochi Ætolorum- U. C. 560.  
 que, coram T. Quintcio, Ægii datum est concilium. A. C. 192.  
 Antiochi legatus prior, quam Ætoli, est auditus. Is, Legati An-  
 ut plerique, quos opes regiae alunt, vaniloquus, ma- tiochi et  
 ria terrasque inani sonitu verborum complevit. Ætolorum  
*Equitum innumerabilem vim trajici Helleponto in Europam,*  
*partim loricatos, quos cataphractos vocant; partim sa-*  
*gittis ex equo utentes, et, a quo nihil satis tecti sit,*  
*aversos refugiente equo certius figentes.* His equestri-  
 bus copiis quamquam vel totius Europæ exercitus in  
 unum coacti obrui possent, adjiciebat multiplices co-  
 pias peditum, et nominibus quoque gentium vix fando  
 auditis terrebat; Dahas, Medos, Elymæosque et Cad-  
 dusios adpellans. *Navalium vero copiarum, quas nulli*  
*portus capere in Græcia possent, dextrum cornu Sido-*  
*nios et Tyrios, sinistrum Aradios, et ex Pamphylia Si-*  
*detas tenere; quas gentes nullæ umquam nec arte, nec*  
*virtute navali æquassent.* Jam pecuniam, jam alias belli  
 adparatus referre, supervacaneum esse: scire ipsos,  
 abundasse semper auro regna Asiæ. Itaque non cum  
 Philippo, nec Hannibale rem futuram Romanis, prin-  
 cipe altero civitatis, altero Macedoniæ tantum regni fi-  
 nibus inclusò; sed cum magno Asiæ totius partisque  
 Europæ rege. Eum tamen, quamquam ab ultimis ori-  
 entis terminis ad liberandam Græciam veniat, nihil  
 postulare ab Achæis, in quo fides eorum adversus Ro-  
 manos, priores socios atque amicos, lædatur. Non  
 enim, ut secum adversus eos, arma capiant, sed ut neu-  
 tri parti sese conjungant, petere. Pacem utrique parti,  
 quod medios deceat amicos, optent: bello se non inter-  
 ponant. Idem ferme et Ætolorum legatus Archida-  
 mus petiit, ut, quæ facillima et tutissima esset, qui-  
 tem præstarent, spectatoresque belli, fortunarum

U. C. 560. alienarum eventum sine ullo discriminé rerum suarum  
A. C. 192. obperirentur.

Provectus deinde est intemperantia linguae in maledicta, nunc communiiter Romanorum, nunc proprie ipsius Quinctii : *ingratos* adpellans, et exprobrans *non victoriam modo de Philippo virtute* *Ætolorum partam, sed etiam salutem ; ipsumque et exercitum sua opera servatos* : *quo enim illum umquam imperatoris functum officio esse ? Auspicantem, inmolantemque, et vota nuncupantem sacrificuli votis modo in acie vidisse, quum ipse corpus suum pro eo telis hostium obji ceret.*

Eorum dicta confutat Quinctius.

**XLIX.** Ad ea Quinctius, *Coram quibus magis, quam apud quos, verba faceret, dicere, Archidamum rationem habuisse. Achæos enim probe scire, Ætolorum omnem ferociam in verbis, non in factis, esse ; et in conciliis magis concionibusque, quam in acie, adparere : itaque parvi Achæorum existimationem, quibus notos esse se scirent, fecisse ; legatis regis, et per eos absenti regi eum se jactasse.* Quod si quis antea ignorasset, quæ res Antiochum et Ætolos conjunxisset, ex legatorum sermone potuisse adparere : *mentiendo in vicem jactandoque vires, quas non huberent, inflasse vana spe, atque inflatos esse : dum ii ab se Philippum victimum, sua virtute protectos Romanos, et quæ modo audiebatis, narrant ; vos ceterasque civitates et gentes suam sectam esse secuturos : rex contra peditum equitumque nubes jactat, et consternit maria suis classibus.* Est autem res simillima cœnæ Chalcidensis hospitis mei, hominis et boni, et sciti convivatoris : *apud quem solstitiali tempore comiter accepti quum miraremur, unde illi eo tempore anni tam multa et varia venatio ; homo non, quam isti sunt, gloriosus, renidens, condimentis, ait, varieta tem illam et speciem ferinæ carnis ex mansueto sue*

factam. *Hoc dici apte in copias regis, quæ paullo ante U. C. 560. jactatæ sint, posse.* *Varia enim genera armorum, et A. C. 192. multa nomina gentium inauditaram, Dahas, et Medos, et Caddusios, et Elymæos, Syros omnes esse: haud paullo mancipiorum melius, propter servilia ingenia, quam militum genus.* *Et utinam subjicere oculis vestris, Achæi, possem concursationem regis magni ab Deme- triade, nunc Lamiam in concilium Ætolorum, nunc Chalcidem!* *Videretis vix duarum male plenarum legi- uncularum instar in castris regis: videretis regem, nunc mendicantem prope frumentum ab Ætolis, quod militi admetiatur; nunc mutuas pecunias fænore in stipen- dium quærentem; nunc ad portas Chalcidis stantem; et mox inde exclusum, nihil aliud quam Aulide atque Euripo spectatis, in Ætoliam redeuntem.* *Male cre- diderunt et Antiochus Ætolis, et Ætoli regiae vanitati.* *Quo minus vos decipi debetis, sed expertæ potius spec- tatæque Romanorum fidei credere.* *Nam quod opti- num esse dicant, non interponi vos bello; nihil immo tam alienum rebus vestris est.* *Quippe sine gratia, sine dignitate, præmium victoris eritis.*

L. Nec absurde adversus utrosque respondisse vi- Achæi bel- sus est, et facile erat orationem apud faventes æquis lum Antio- auribus accipi: nulla enim nec disceptatio, nec du- cho et Æ- bitatio fuit, quin omnes, eosdem genti Achæorum tolis nunci- hostes et amicos, quos populus Romanus censuisset, ciari jubent. Auxilia etiam, quo censuit Quintius, hostiles et amicos, quos populus Romanus censuisset, judicarent, bellumque et Antiocho, et Ætolis num- ciari jubent. Auxilia etiam, quo censuit Quintius, quingentorum militum Chalcidem, quingentorum Pi- ræum extemplo miserunt. Erat enim haud procul seditione Athenis res, trahentibus ad Antiochum quibusdam spe largitionum venalem pretio multitudinem; donec ab iis, qui Romanæ partis erant,

**U.C. 560.** Quinctius est aditus, et, accusante Leonte quodam,  
**A.C. 192.** Apollodorus auctor defectionis damnatus, atque in

exsilium est ejectus. Et ab Achæis quidem cum tristi responso legatio ad regem rediit. Bœoti nihil certi responderunt : *quum Antiochus in Bœotiam venisset, tum, quid sibi faciendum esset, se deliberaturos esse.* Antiochus, quum ad Chalcidis præsidium, et Achæos et Eumenem regem misisse audisset, matrandum ratus, ut et prævenirent sui, et venientes, si possent, exciperent, Menippum cum tribus ferme millibus militum, et cum omni classe Polyxenidam mittit : ipse paucos post dies sex millia suorum militum, et ex ea copia, quæ Lamiæ repente conligi potuit, non ita niultos Ætolos dicit. Achæi quingenti, et ab Eumene rege modicum auxilium missum, duce Xenoclide Chalcidensi, nondum obsessis itineribus, tuto transgressi Euripum, Chalcidem pervenerunt. Romani milites, quingenti ferme et ipsi, quum jam Menippus castra ante Salganea ad Hermæum, qua transitus ex Bœotia in Eubœam insulam est, haberet, venerunt. Mictio erat cum iis, legatus a Chalcide ad Quinctium, ad id ipsum præsidium petendum, missus : qui, postquam obsessas ab hostibus fauces vidit, omisso ad Aulidem itinere, Delium convertit, ut inde in Eubœam transmissurus.

**Ad De-** **LI.** Templum est Apollinis Delium, inminens ma-  
**lium cæsi** ri ; quinque millia passuum a Tanagra abest : minus  
**milites** quatuor millium inde in proxima Eubœæ est mari  
**Romani.** trajectus. Ubi et in fano lucoque, ea religione et eo  
 jure sancto, quo sunt templa, quæ asyla Græci ad-  
 pellant, et nondum aut indicto bello, aut ita com-  
 misso, ut strictos gladios, aut sanguinem usquam  
 factum audissent, quuni per magnum otium milites,

alii ad spectaculum templi lucique versi, alii in litore U.C. 500.  
 inermes vagarentur, magna pars per agros lignatum A. C. 192.  
 pabulatumque dilapsa esset; repente Menippus, pa-  
 latos passim adgressus, eos cecidit, ad quinquaginta  
 vivos cepit: perpauci effugerunt, in quibus Mictio  
 parva oneraria nave exceptus. Ea res Quinctio Ro-  
 manisque, sicut jactura militum molesta, ita ad jus  
 inferendi Antiocho belli adjecisse aliquantum vide-  
 batur. Antiochus, admoto ad Aulidem exercitu, Chalcidem  
 quum rursus oratores, partim ex suis, partim <sup>Antiochus</sup> Äto-occupat.  
 los, Chalcidem misisset, qui eadem illa, quæ nuper,  
 cum minis gravioribus agerent, nequidquam contra  
 Mictione et Xenoclide tendentibus, facile tenuit, ut  
 portæ sibi aperirentur. Qui Romanæ partis erant,  
 sub adventum regis urbe excesserunt. Achæorum et  
 Eumenis milites Salganea tenebant. Et in Euripo  
 castellum Romani milites pauci custodiæ caussa loci  
 communiebant. Salganea Menippus, rex ipse castel-  
 lum Euripi obpugnare est adortus. Piores Achæi  
 et Eumenis milites pacti, ut sine fraude liceret abire,  
 præsidio excesserunt: pertinacius Romani Euripum  
 tuebantur. Hi quoque tamen, quum terra marique  
 obsiderentur, et jam machinas tormentaque coin-  
 portari viderent, non tulere obsidionem. Quum id,  
 quod caput erat Eubœæ, teneret rex, ne ceteræ qui-  
 dem ejus insulæ urbes imperium abnuerunt: magno-  
 que principio sibi orsus bellum videbatur, quod tanta  
 insula et tot opportunæ urbes in suam ditionem ve-  
 nissent.

---

## EPITOME LIBRI XXXVI.

---

**M**AN. ACILIUS GLABRIO consul Antiochum, apud Thermopylas, Philippo rege adjuvante, vicit, Græcia expulit, idemque Ætolos subegit. P. Cornelius Scipio Nasica consul ædem matris Deūm, quam ipse in Palatium intulerat, vir optimus a senatu judicatus, dedicavit; idemque Boios Gallos victos in dedicationem accepit, et de iis triumphavit. Præterea navalia certamina prospera adversus prefectos Antiochi regis referuntur.

---

# T. LIVII PATAVINI

## LIBER XXXVI.

---

P. CORNELIUM Cn. filium Scipionem et M'. U. C. 561.  
P. Acilium Glabronem consules, inito magistratu,<sup>A. C. 191.</sup>  
Patres, priusquam de provinciis agerent, res divinas  
facere majoribus hostiis jussérunt in omniis fanis,  
in quibus lectisternum majorem partem anni fieri  
solet; precarique, quod senatus de novo bello in  
animo haberet, ut ea res senatui populoque Roniano  
bene ac feliciter eveniret. Ea omnia sacrificia læta  
fuerunt, primisque hostiis perlitatum est: et ita arus-  
pices responderunt, eo bello terminos populi Ro-  
mani propagari, victoriam ac triumphum ostendi.  
Hæc quum renunciata essent, solutis religione ani-  
mis, Patres rogationem ad populum ferri jussérunt:  
*Vellent juberentae, cum Antiocho rege, qui que sectam Bellum a  
ejus secuti essent, bellum iniri? si ea rogatio perlata* P. R. in  
esset, tum, si ita videretur consulibus, rem integrum  
ad senatum referrent. P. Cornelius eam rogationem  
pertulit: tum senatus decrevit, ut consules Italiam  
et Græciam provincias sortirentur; cui Græcia  
evenisset, ut præter eum numerum militum, quem  
L. Quinctius in eam provinciam ex auctoritate se-  
natus scripsisset imperassetve, ut eum exercitum ac-  
ciperet, quem M. Baebius prætor anno priore ex se-

**U. C. 361.** natusconsulto in Macedoniam trajecisset. Et extra  
**A. C. 191.** Italiam permissum, ut, si res postulasset, auxilia ab

sociis, ne supra quinque millium numerum, acciperet. **L. Quinctium** superioris anni consulem legari ad id bellum placuit. Alter consul, cui Italia provincia evenisset, cum Boiis jussus bellum gerere, utro exercitu mallet ex duobus, quos superiores consules habuissent; alterum ut mitteret Romam, eæque urbanæ legiones essent paratæ, quo senatus censuisset.

II. His ita in senatu ad id, quæ cujus provincia foret, decretis, tum demum sortiri consules placuit. **Acilio Græcia, Cornelio Italia** evenit. Certa deinde sorte senatusconsultum factum est: *quod populus Romanus eo tempore duellum jussisset esse cum rege Antiocho, quique sub imperio ejus essent, ut ejus rei eaussa supplicationem imperarent consules: utique M'. Acilius consul ludos magnos Jovi voveret, et dona ad omnia pulvinaria.* Id votum in hæc verba, præeunte **P. Licinio pontifice maximo**, consul nuncupavit: *Si duellum, quod cum Antiocho rege sumi populus jussit, id ex sententia senatus populique Romani confectum erit; tum tibi, Jupiter, populus Romanus ludos magnos dies decem continuos faciet; donaque ad omnia pulvinaria dabuntur de pecunia, quantam senatus decreverit. Quisquis magistratus eos ludos quando ubique faxit, hi ludi recte facti, donaque data recte sunt.* Supplicatio inde ab duobus consulibus edicta per biduum fuit. Consulibus sortitis provincias, extemplo et prætores sortiti sunt. **M. Junio Bruto** jurisdictio utraque evenit, **A. Cornelio Mammulæ Brutii, M. Æmilio Lepido Sicilia, L. Oppio Salinatori Sardinia, C. Livio Salinatori classis, L. Æmilio Paullo Hispaniæ**

nia ulterior. His ita exercitus decreti. A. Cornelio U.C. 561.  
 novi milites, conscripti priore anno ex senatuscon- A.C. 191.  
 sulto a L. Quinctio consule, dati sunt; jussusque  
 tueri omnem oram circa Tarentum Brundisiumque.  
 L. Æmilio Paullo in ulteriore Hispaniam præter eum  
 exercitum, quem a M. Fulvio proprætore accepturus  
 esset, decretum est, ut novorum militum tria millia-  
 duceret, et trecentos equites; ita ut in iis duæ partes  
 sociū Latini nominis, tertia civium Romanorum  
 esset. Idem supplementi ad C. Flaminium, cui im-  
 perium prorogabatur, in Hispaniam citeriorem est  
 missum. M. Æmilius Lepidus a L. Valerio, cui  
 successurus esset, simul provinciam exercitumque  
 accipere jussus: L. Valerium, si ita videretur, pro-  
 prætore in provincia retinere, et provinciam ita di-  
 videre, ut una ab Agrigento ad Pachynum esset, al-  
 tera a Pachyno Tyndarium. Eam maritimam oram  
 L. Valerius viginti navibus longis custodiret. Eadem  
 prætori mandatum, ut duas decumas frumenti exi-  
 geret: id ad mare comportandum devehendumque in  
 Græciam curaret. Idem L. Oppio de alteris decu-  
 mis exigendis in Sardinia imperatum. Ceterum non  
 in Græciam, sed Romam, id frumentum portari pla-  
 cere. C. Livius prætor, cui classis evenerat, cum  
 triginta navibus paratis trajicere in Græciam primo  
 quoque tempore jussus, et ab Atilio naves accipere:  
 veteres naveſ, quæ in navalibus erant, ut reficeret et  
 armaret, M. Junio prætori negotium datum est, et  
 in eam classem socios navales libertinos legeret.

III. Legati terni in Africam ad Karthaginienses  
 et in Numidiam ad frumentum rogandum, quod in  
 Græciam portaretur, missi; pro quo pretium solveret  
 populus Romanus. Adeoque in adparatum curam-

U. C. 561. que ejus belli civitas intenta fuit, ut P. Cornelius  
 A. C. 191. consul ediceret, *Qui senatores essent, quibusque in  
 senatu sententiam dicere liceret, quique minores ma-  
 gistratus essent, ne quis eorum longius ab urbe Roma  
 abiret, quam unde eo die redire posset; neve uno tem-  
 pore quinque senatores ab urbe Roma abessent.* In  
 comparando in pigre classem C. Livium prætorem  
 contentio, orta cum colonis maritimis, paullisper te-  
 nuit. Nam, quum cogerentur in classem, tribunos  
 plebei adpellarunt: ab iis ad senatum rejecti sunt.  
 Senatus ita, ut ad unum omnes consentirent, decre-  
 vit, vacationem rei navalis his colonis non esse.  
 Ostia, et Fregenæ, et Castrum novum, et Pyrgi, et  
 Antium, et Tarracina, et Minturnæ, et Sinuessa fu-  
 erunt, quæ cum prætore de vacatione certaverunt.  
 Consul deinde M'. Acilius ex senatusconsulto ad  
 collegium facialium retulit: *Ipsine utique regi An-  
 tiocho indiceretur bellum, an ad præsidium nunciaretur?  
 et num Ætolis quoque separatim indici juberent  
 bellum? et num prius societas eis et amicitia renun-  
 cianda esset, quam bellum indicendum?* Feciales re-  
 sponderunt: *Jam ante sese, quum de Philippo consu-  
 lerentur, decresserat, nihil referre, ipsi coram, an ad præ-  
 sidium, nunciaretur. Amicitiam renunciatam videri,  
 quum legatis, toties repetentibus res, nec reddi, nec sa-  
 tisfieri æquum censuerint.* Ætolos ultro sibi bellum  
 indixisse, quum Demetriadem, sociorum urbem, per  
 vim occupassent; Chalcidem terra marique obpugna-  
 tum issent; regem Antiochum in Europam ad bellum  
 populo Romano inferendum traduxissent. Omnibus  
 jam satis comparatis, M'. Acilius consul edixit: *Ut,  
 quos L. Quinctius milites conscripsisset, et quos sociis  
 nominique Latino imperasset, quos secum in provinciam*

*ire oporteret, et tribuni militum legionis primæ et ter-* U. C. 561.  
*tiæ, uti omnes Brundisium Idibus Maiis convenirent:* A. C. 191.  
 ipse ante diem quintum Nonas Maias paludatus urbe  
 egressus est. Per eosdem dies et prætores in pro-  
 vincias profecti sunt.

IV. Sub idem tempus legati ab duobus regibus, Legati a  
 Philippo Macedoniæ et Ptolemæo Ægypti, Romam Philippo et  
 venerunt, pollicentes ad bellum auxilia, et pecuni- Ptolemæo.  
 am, et frumentum: ab Ptolemæo etiam mille pondo  
 auri, viginti millia pondo argenti adlata. Nihil ejus  
 acceptum. Gratiae regibus actæ: et, quum uterque  
 se cum omnibus copiis in Ætoliam venturum, bello-  
 que interfuturum polliceretur, Ptolemæo id remis-  
 sum: Philippi legatis responsu, gratum eum sena-  
 tui populoque Romano facturum, si M'. Acilio con-  
 suli non defuisset. Item ab Karthaginiensibus et  
 Masinissa rege legati venerunt: Karthaginienses  
 tritici modiūm mille, hordei quingenta millia ad ex-  
 ercitum, dimidium ejus Romam adportaturos polli-  
 citi sunt; id ut ab se inunus Romani acciperent, pe-  
 tere se: et classem suorum suo sumtu comparatu-  
 ros; et stipendum, quod pluribus pensionibus in  
 multos annos deberent, præsens omne daturos.  
 Masinissæ legati quingenta millia modiūm tritici,  
 trecenta hordei ad exercitum in Græciam; Romam  
 trecenta millia modiūm tritici, ducenta quinqua-  
 ginta hordei; equites quingentos, elephantes viginti  
 regem ad M'. Acilium consulem missurum. De fru-  
 mento utrisque responsum, ita usurum eo populum  
 Romanum, si pretium acciperent. De classe Kar-  
 thaginiensibus remissum; præterquam si quid na-  
 vium ex fœdere deberent: de pecunia item respon-  
 sum, nullam ante diem accepturos.

U. C. 561.  
A. C. 191.  
Antiochus  
civitates  
Græciae  
sollicitat.

V. Quum hæc Romæ agebantur, Chalcide Antiochus, ne cessaret per hibernorum tempus, partim ipse sollicitabat civitatum animos mittendis legatis, partim ultiro ad eum veniebant: sicut Epirotæ communī gentis consensu, et Elei e Peloponneso venerunt. Elei auxilium adversus Achæos petebant, quos, post bellum non ex sua sententia indictum Antiocho, primum civitati suæ arma inlaturos credebant. Mille iis pedites cum duce Cretensi Euphane sunt missi. Epirotarum legatio erat minime in partem ullam Iberi aut simplicis animi. Apud regem gratiam initam volebant cum eo, ut caverent, ne quid obfenderent Romanos: petebant enim, ne se temere in caussam deduceret, expositos adversus Italiam pro omni Græcia, et primos inpetus Romanorum excepturos. Sed, si ipse posset terrestribus navalibusque copiis præsidere Epiro, cupide eum omnes Epirotas et urbibus et portubus suis accepturos: si id non posset, deprecari, ne se nudos atque inermes Romano bello objiceret. Hac legatione id agi adparebat, ut, sive (quod magis credebant) abstinuisse Epiro, integra sibi omnia apud exercitus Romanos essent, conciliata satis apud regem gratia, quod accepturi fuissent venientem; sive venisset, sic quoque spes veniae ab Romanis foret, quod, non exspectato longinquō auxilio ab se, præsentis viribus subcubuissent. Huic tam perplexæ legationi, quia non satis in promtu erat, quid responderet, legatos se missurum ad eos dixit, qui de iis, quæ ad illos seque communiter pertinerent, loquerentur.

VI. In Bœotiam ipse profectus est, caussas in speciem iræ adversus Romanos cas, quas ante dixi, habentem; Brachyllæ necem, et bellum a Quintio

Coroneæ, propter Romanorum militum cædes, inlatum; re vera per multa jam secula publice privatim-<sup>U. C. 561.</sup>  
 que labante egregia quondam disciplina gentis, et multorum eo statu, qui diuturnus esse sine mutatione rerum non posset. Obviam effusis undique Bœotiae principibus, Thebas venit: ibi in concilio gentis, quamquam et ad Delium, in petu in præsidium Romanum facto, et ad Chalcidem commiserat nec a parvis nec dubiis principiis bellum, tamen eamdem orationem exorsus, qua in couloquio primo ad Chalcidem, quaque per legatos in concilio Achæorum usus erat, ut amicitiam secum institui, non bellum indici Romanis postularet; neminem, quid ageretur, fallebat: decretum tamen sub levi verborum prætextu pro rege adversus Romanos factum est. Hac quoque gente adjuncta, Chalcidem regressus, præmissis inde literis, ut Demetriadem convenirent principes Ætolorum, cum quibus de summa rerum deliberaret, navibus eo ad diem indictam concilio venit. Et Amynander aditus ad consultandum ex Athamania; et Hannibal Pœnus, jam diu non adhibitus, interfuit ei concilio. Consultatum de Thessalorum gente est, quorum omnibus, qui aderant, voluntas tentanda videbatur: in eo modo diversæ sententiae erant; quod alii extemplo agendum; alii ex hieme, quæ tum ferme media erat, differendum in veris principium; et alii legatos tantummodo mittendos; alii cum omnibus copiis eundum censemebant, terrendosque metu, si cunctarentur.

VII. Quum circa hanc fere consultationem discep-tatio omnis verteretur, Hannibal, nominatim interrogatus sententiam, in universi belli cogitationem regem atque eos, qui aderant, tali oratione avertit:

Deliberat  
cum sociis  
de summa  
rerum.

U. C. 561. *Si, ex quo trajecimus in Græciam, adhibitus essem in  
A. C. 191. consilium, quum de Eubœa, de Achæis, de Bœotia  
Hannibalis sententia, agebatur; eamdem sententiam dixisse, quam hodie,  
quum de Thessalis agitur, dicam. Ante omnia Philippum et Macedonas in societatem belli quacumque  
ratione censeo deducendos esse: nam quod ad Eubœum  
Bœotosque et Thessalos adtinet, cui dubium est, quin,  
ut quibus nullæ suæ vires sint, præsentibus adulando  
semper, quem metum in consilio habeant, eodem ad  
inpetrandam veniam utantur? simul ac Romanum ex-  
ercitum in Græcia viderint, ad consuetum imperium se  
arertant? nec iis noxæ futurum sit, quod, quum Ro-  
mani procul abessent, vim tuam præsentis exercitusque  
tui experiri noluerint? Quanto igitur prius potiusque  
est, Philippum nobis conjungere, quam hos? cui, si se-  
mel in caussam descenderit, nihil integri futurum sit,  
quiique eas vires adferat, quæ non accessio tantum ad  
Romanum esse bellum, sed per se ipsæ nuper sustinere  
potuerint Romanos. Hoc ego adjuncto (absit verbo in-  
vidia) qui dubitare de eventu possim? quum, quibus  
adversus Philippum valuerint Romani, iis nunc fore vi-  
deam ut ipsi obpugnentur. Ætolis, qui Philippum (quod  
inter omnes constat) vicerunt, cum Philippo adversus  
Romanos pugnabunt. Amyntander atque Athamanum  
gens, quorum secundum Ætolos plurima fuit opera in  
eo bello, nobiscum stabunt. Philippus tum, te quieto,  
totam molem sustinebat belli: nunc duo maximi reges,  
Asiae Europæque viribus, adversus unum populum, (ut  
meam utramque fortunam taceam) patrum certe ætate  
ne uni quidem Epirotarum regi parem, (quid tandem  
erit vobiscum comparatus?) geretis bellum. Quæ igi-  
tur res mihi fiduciam præbet, conjungi nobis Philippum  
posse? Una, communis utilitas, quæ societatis maxi-*

num vinculum est : altera, auctores vos *Ætolii*. Vester U.C. 561.  
enim legatus hic Thoas inter cetera, quæ ad exciendum A.C. 191.  
in Græciam Antiochum dicere est solitus, ante omnia  
hoc semper adfirmavit ; fremere Philippum, et ægre  
pati, sub specie pacis leges servitutis sibi inpositas. Ille  
quidem feræ bestiæ vincetæ aut clausæ, et refringere  
clastra cupienti, regis iram verbis æquabat : cuius si  
talis animus est, solvamus nos ejus vincula, et clastra  
refringamus, ut erumpere diu coërcitam iram in hostes  
communes possit. Quod si nihil eum legatio nostra  
moverit, at nos, quoniam nobis eum adjungere non pos-  
sumus, ne hostibus nostris ille adjungi possit, careamus.  
Seleucus filius tuus Lysimachiæ est : qui si eo exercitu,  
quem secum habet, per Thraciam proxima Macedoniæ  
cœperit depopulari ; facile ab auxilio ferendo Romanis  
Philippum ad sua potissimum tuenda avertet. De  
Philippo me:im sententiam habes. De ratione universi  
belli quid sentirem, jam ab initio non ignorasti : quod  
si tum auditus forem, non in Eubæa Chalcidem captam,  
et castellum Euripi expugnatum Romani, sed Etruriam  
Ligurumque et Galliæ Cisalpinæ oram bello ardere, et,  
qui maximus iis terror est, Hannibalem in Italia esse  
audirent. Nunc quoque arcessas censeo omnes navales  
terrestresque copias. Sequantur classem onerariæ cum  
commeatibus : nam hic sicut ad bellum munera pauci su-  
mus, sic nimis multi pro inopia commeatum. Quum  
omnes tuas contrareris vires, divisam classem partim  
Corcyrae in statione habebis, ne transitus Romanis liber  
ac tutus pateat : partim ad litus Italiæ, quod Sardi-  
niam Africamque spectat, trajicies : ipse cum omnibus  
terrestribus copiis in Byllinum agrum procedes. Inde  
Græciae præsidebis, et speciem Romanis trajecturum te  
præbens, et, si res poposcerit, trajecturus. Haec suadeo,

U. C. 561. qui, ut non omnis peritissimus sim belli, cum Romanis  
 A. C. 191. certe bellare bonis malisque meis didici In quæ consilium dedi, in eadem nec infidelem, nec segnem operam polliceor. Dii adprobent eam sententiam, quæ tibi optimæ visa fuerit.

Eam non exsequitur Antiochus. VIII. Hæc ferme Hannibal's oratio fuit; quam laudarunt magis in præsentia, qui aderant, quam rebus ipsis executi sunt: nihil enim eorum est factum, nisi quod ad classem copiasque arcessendas ex Asia Polyxenidam misit. Legati Larissam ad concilium Thessalorum sunt missi, et Ætolis Amyntandroque dies ad conveniendum exercitui Pheras est dictus: eodem et rex cum suis copiis confestim venit. Ibi dum obperitur Amyntandrum atque Ætolos, Philippum Megalopolitanum cum duobus millibus hominum ad legenda ossa Macedonum circa Cynoscephalas, ubi debellatum erat cum Philippo, misit; sive ab ipso, quærente sibi commendationem ad Macedonum gentem et invidiam regi, quod insepultos milites reliquisset, monitus; sive ab insita regibus vanitate ad consilium specie amplum, re inane, animo adjecto. Tumulus est, in unum ossibus, quæ passim strata erant, coacervatis, factus; qui nullam gratiam ad Macedonas, odium ingens ad Philippum movit. Itaque, qui ad id tempus fortunam esset in consilio habiturus, is extemplo ad M. Bæbium proprætorem misit, *Antiochum in Thessalam inpetum fecisse: si videretur ei, moreret ex hibernis: se obriam processurum, ut, quid agendum esset, consultarent.*

Ejus gesta in Thessalia.

IX. Antiocho, ad Pheras jam castra habenti, ubi conjunixerant ei se Ætolis et Amyntander, legati ab Larissa venerunt, quærentes, quod ob factum dictumve Thessalorum bello lacesseret eos? simul oran-

tes, ut, remoto exercitu, per legatos, si quid ei vi- U. C. 561.  
deretur, secum disceptaret. Eodem tempore quin- A. C. 191.  
gentos armatos, duce Hippolocho, Pheras in præsi-  
dium miserunt: hi, exclusi aditu, jam omnia itinera  
obsidentibus regiis, Scotussam se receperunt. Le-  
gatis Larissæorum rex clementer respondit, *Non*  
*belli faciendi, sed tuendæ et stabiendæ libertatis Thes-*  
*salorum caussa, se Thessaliam intrasse.* Similia his  
qui cum Pheræis ageret, missus: cui nullo dato re-  
sponso, Pheræi ipsi legatum ad regem, principem  
civitatis Pausaniam, miserunt. Qui quum haud dis-  
similia his, ut in caussa pari, quæ pro Chalcidensi-  
bus in conloquio ad Euripi fretum dicta erant, quæ-  
dam etiam ferocius, egisset; rex etiam atque etiam  
deliberare eos jussos, ne id consilii caperent, cujus,  
dum in futurum nimis cauti et providi essent, ex-  
templo pœniteret, dimisit. Hæc renunciata Pheras  
legatio quum esset, ne paullum quidem dubitarunt,  
quin pro fide erga Romanos, quidquid fors belli tu-  
lisset, paterentur. Itaque et hi summa ope parabant  
se ad urbem defendendam: et rex ab omni parte si-  
mul obpugnare mœnia est adgressus; et, ut qui satis  
intelligeret, (neque enim dubium erat) in eventu  
eius urbis positum esse, quam primam adgressus es-  
set, aut sperni deinde ab universa gente Thessalo-  
rum, aut timeri se, omnem undique terrorem obsessis  
injectit. Primum inpetum obpugnationis satis con-  
stanter sustinuerunt: dein, quum multi propugnan-  
tes caderent, aut vulnerarentur, labare animi cœpe-  
re. Revocati deinde castigationibus principum ad  
perseverandum in proposito, relicto exteriore circulo  
muri, deficientibus jam copiis, in interiore partem  
urbis concesserunt, cui brevior orbis munitionis cir-

U. C. 561. cumjectus erat : postremo victi malis, quum timeant, ne vi captis nulla apud victorem venia esset, dediderunt sese. Nihil inde moratus rex, quatuor millia armatorum, dum recens terror esset, Scotus-sam misit : nec ibi mora deditio[n]is est facta, cernentibus Pheræorum recens exemplum ; qui, quod pertinaciter primo abnuerant, malo domiti tandem fecissent : cum ipsa urbe Hippolochus Larissæorumque deditum est præsidium. Dimissi ab rege inviolati omnes ; quod eam rem magni momenti futuram rex ad conciliandos Larissæorum animos credebat.

X. Intra decimum diem, quam Pheras venerat, his perfectis, Cranonem, profectus cum toto exercitu, primo adventu cepit : inde Cypæram et Metro-polim, et iis circumjecta castella recepit ; omniaque jam regionis ejus, præter Atracem et Gyrtonem, in potestate erant. Tum adgredi Larissam constituit : ratus vel terrore ceterarum expugnatarum, vel beneficio præsidii dimissi, vel exemplo tot civitatum dedentium sese, non ultra in pertinacia mansuros. Elephantis agi ante signa terroris caussa jussis, quadra-to agmine ad urbem incessit ; ut incerti fluctuantur animi magnæ partis Larissæorum inter me-tum præsentem hostium et verecundiam absentium sociorum. Per eosdem dies Amynander cum Athamanum juventute occupat Pellinæum : et Menippus, cum tribus millibus peditum Ætolorum et ducentis equitibus in Perrhæbiam profectus, Malloeam et Cy-retias vi cepit, depopulatusque est agrum Tripolitanum. His raptim peractis, Larissam ad regem red-eunt : consultanti, quidnam agendum esset de La-rissa, supervenerunt. Ibi in diversum sententiæ ten-debant : aliis, vim adhibendam, et non differendum

censemibus, quin operibus ac machinis simul undi- U. C. 561.  
 que mœnia adgrederentur urbis sitæ in plano, aper- A. C. 191.  
 tæ, campestri undique aditu : aliis nunc vires urbis,  
 nequaquam Pheris conferendæ, memorantibus ; nunc  
 hiemem et tempus anni nulli bellicæ rei, minime ob-  
 sidioni atque obpugnationi urbium, aptum. Incerto  
 regi inter spem metumqne legati a Pharsalo, qui ad  
 dedendam urbem suam forte venerant, animos auxe-  
 runt. M. Bæbius interim, cum Philippo in Dassa-  
 retiis congressus, Ap. Claudium ex communi consi-  
 lio ad præsidium Larissæ misit, qui per Macedoni-  
 am magnis itineribus in jugum montium, quod su-  
 per Gonnos est, pervenit. Oppidum Gonni viginti  
 millia ab Larissa abest, in ipsis faucibus saltus, quæ  
 Tempe adpellantur, situm. Ibi castra metatus latius,  
 quam pro copiis, et plures, quam quot satis in usum  
 erant, ignes quum accendisset, speciem, quam quæ-  
 sierat, hosti fecit, omnem ibi Romanum exercitum  
 cum rege Philippo esse. Itaque hiemem instare a-  
 pud suos caussatus rex, unum tantum moratus diem,  
 ab Larissa recessit, et Demetriadem rediit : Ætolis-  
 que et Athamanes in suos receperunt se fiues. Ap-  
 pius, etsi, cuius rei caussa missus erat, solutam cer-  
 nebat obsidionem, tamen Larissam ad confirmandos  
 in reliquum sociorum animos descendit : duplexque  
 lætitia erat, quod et hostes excesserant finibus, et  
 intra mœnia præsidium Romanum cernebant.

XI. Rex Chalcidem a Demetriade profectus, Antiochus  
 amore captus virginis Chalcidensis Cleoptolemi filiæ, <sup>nuptias</sup>  
 quuni patrem, primo allegando, deinde coram ipse <sup>Chalcide</sup> celebrat.  
 rogando, fatigasset, invitum se gravioris fortunæ  
 conditioni inligantem, tandem inpetrata re, tam-  
 quam in media pace nuptias celebrat : et reliquum

U. C. 561. hiemis, oblitus quantas simul duas res suscepisset,  
 A. C. 191. bellum Romanum et Græciam liberandam, omissa  
 omnium rerum cura, in conviviis et vinum sequen-  
 tibus voluptatibus, ac deinde, ex fatigatione magis,  
 quam satietate earum, in somno traduxit. Eadem  
 omnes præfectos regios (qui ubique, ad Bœotiam  
 maxime, præpositi hibernis erant) cepit luxuria :  
Exercitus  
luxuria  
conrum-  
pitur.
 in eamdem et milites effusi sunt : nec quisquam eo-  
 rum aut arma induit, aut stationem, aut vigilias ser-  
 vavit ; aut quidquam, quod militaris operis, aut mu-  
 neris esset, fecit. Itaque principio veris, quum per  
 Phocidem Chæroneam, quo convenire omnem undi-  
 que exercitum jusserat, venisset ; facile animadver-  
 tit, nihilo severiore disciplina milites, quam ducem,  
 hibernasse. Alexandrum inde Acarnana et Menip-  
 pum Macedonem Stratum Ætoliae copias ducere  
 jussit : ipse, Delphis saerificio Apollini facto, Nau-  
 pactum processit : consilio principum Ætoliae ha-  
 bito, via, quæ præter Calydonem et Lysimachiam  
 fert ad Stratum, suis, qui per Maliacum sinum ve-  
Antiochus  
Acarnani-  
am petit.
 niebant, obcurrit. Ibi Mnesilochus princeps Acar-  
 nanum, multis emitis donis, non ipse solum gentem  
 regi conciliabat, sed Clytum etiam prætorem, penes  
 quem tum summa potestas erat, in suam sententiam  
 adduxerat. Is quum Leucadios, quod Acarnaniæ  
 caput est, non facile ad defectionem posse cerneret  
 in pelli, propter metum Romanæ classis, quæ cum  
 Atilio, quæve circa Cephalleniam erat, arte eos est  
 adgressus : nam quum in concilio dixisset, tuenda  
 mediterranea Acarnaniæ esse, et omnibus, qui arma  
 ferrent, exeundum ad Medionem et Thyrium, ne ab  
 Antiocho aut Ætolis occuparentur ; fuere, qui dice-  
 rent, nihil adtinere omnes tumultuose concitari ; sa-

tis esse quingentorum hominum præsidium: eam U.C. 561.  
 juventutem nactus, trecentis Medione, ducentis Thy- A. C. 191.  
 rii in præsidio positis, id agebat, ut pro obsidibus  
 futuri venirent in potestatem regis.

XII. Per eosdem dies legati regis Medionem  
 venerunt: quibus auditis, quum in concione, quid-  
 nam respondendum regi esset, consultaretur; et alii  
 manendum in Romana societate, alii non adsper-  
 nandam amicitiam regis censerent; media visa est  
 Clyti sententia, eoque accepta est, ut ad regem mit-  
 terent legatos, peterentque ab eo, ut Medionios su-  
 per tanta re consultare in concilio Acarnanum pa-  
 teretur. In eam legationem Mnesilochus, et qui  
 ejus factionis erant, de industria conjecti, clam mis-  
 sis, qui regem admoveare copias juberent, ipsi tere-  
 bant tempus: itaque vixdum iis egressis legatis,  
 Antiochus in finibus, mox ad portas erat, et trepi-  
 dantibus, qui expertes proditionis fuerant, tuinul-  
 tuoseque juventutem ad arma vocantibus, ab Clyto  
 et Mnesilocho in urbem est inductus: et, aliis sua  
 voluntate adfluentibus, metu coacti etiam, qui dis-  
 sentiebant, ad regem convenerunt: quos placida  
 oratione territos quum permulsisset, ad spem vul-  
 gatae clementiae aliquot populi Acarnaniæ defece-  
 runt. Thyrium a Medione profectus est, Mnesilocho  
 eodem et legatis præmissis. Ceterum detecta  
 Medione fraus cautiores, non timidiores, Thyrienses  
 fecit, dato ei haud perplexo responso, nullam se  
 novam societatem, nisi ex auctoritate Romanorum  
 imperatorum, accepturos, portisque clausis, armatos  
 in muris disposuerunt. Et peropportune ad confir-  
 mandos Acarnanum animos Cn. Octavius missus a  
 Quinetio, quum præsidium et paucas naves ab A.

U. C. 561. Postunio, qui ab Atilio legato Cephalleniae præpositus fuerat, accepisset, Leucadem venit, inplevitque spei socios : M'. Acilium consulem jam cum legionibus mare trajecisse, et in Thessalia castra Romana esse. Hunc rumorem quia similem veri tempus anni maturum jam ad navigandum faciebat ; rex, præsidio Medione inposito, et in quibusdam aliis Acarnaniæ oppidis, Thyrio abscessit, et per Ætoliae ac Phocidis urbes Chalcidem redit.

*Redit in  
Eubœam.*

*Philippus  
et Bæbius  
in Thes-  
salia.*

XIII. Sub idem tempus M. Bæbius et Philippus rex, jam ante per liemem in Dassaretiis congressi, quum Ap. Claudium, ut obsidione Larissam eximeret, in Thessaliam misissent, quia id tempus rebus gerendis immaturum erat, in hiberna regressi, principio veris conjunctis copiis in Thessaliam descendederunt. In Aearnania tum Antiochus erat. Advenientes, Philippus Mallœam Perrhæbiæ, Bæbius Phacium est adgressus, quo primo prope inpetu capto, Phæstum eadem celeritate capit : inde Atracem quum se recepisset, Cyretias hinc et Eritium occupat : præsidiisque per recepta oppida dispositis, Philippo rursus obsidenti Mallœam se conjungit. Sub adventum Romani exercitus, seu ad metum virium, seu ad spem veniae, quum dedidissent sese ; ad ea recipienda oppida, quæ Athamanes occupaverant, uno agmine ierunt. Erant autem hæc, Æginium, Ericinium, Gomphi, Silana, Tricca, Melibœa, Phaloria. Inde Pellinæum, ubi Philippus Megalopolitanus cum quingentis peditibus et equitibus quadragesima in præsidio erat, et circumsidunt, et, priusquam obpugnarent, mittunt ad Philippum, qui moneret, ne vim ultimam experiri vellet. Quibus ille satis ferociter respondit, vel Romanis, vel Thessalis

se crediturum fuisse: in Philippi se potestatem U.C. 561.  
commissurum non esse. Postquam adparuit vi A.C. 191.  
agendum, quia videbatur et Limnæam eodem tem-  
pore obpugnari posse, regem ad Limnæam ire  
placuit: Bæbius restitit ad Pellinæum obpugnan-  
dum.

XIV. Per eos forte dies M'. Acilius consul, cum M'. Acilii  
decem millibus peditum, duobus millibus equitum,<sup>res gestæ.</sup>  
quindecim elephantis, mari trajecto, pedestres co-  
pias Larissam ducere delectos militum tribunos jus-  
sit: ipse cum equitatu Limnæam ad Philippum ve-  
nit. Adventu consulis deditio sine cunctatione est  
facta: traditumque præsidium regium, et cum iis  
Athamanes. Ab Linnæa Pellinæum consul profi-  
ciscitur. Ibi primi Athamanes tradiderunt sese, de-  
inde et Philippus Megalopolitanus: cui, decedenti  
de præsidio, quum obvius forte fuisset Philippus  
rex, ad ludibrium regem eum consalutari jussit; ipse  
congressus fratrem, haud sane decoro majestati suæ  
joco, adpellavit. Deductus inde ad consulem custo-  
diri jussus, et haud ita multo post in vinculis Ro-  
mam missus: cetera multitudo Athamanum aut mi-  
litum Antiochi regis, quæ in præsidiis deditorum per  
eos dies oppidorum fuerat, Philippo tradita regi est:  
fuere autem ad tria millia hominum. Consul La-  
rissam est profectus, ibi de summa belli consultatu-  
rus: in itinere ab Pieria et Metropoli legati traden-  
tes urbes suas obcurrerunt. Philippus, Athama-  
num præcipue captivis indulgenter habitis, ut per  
eos conciliaret gentem, nactus spem Athamianæ po-  
tiundæ, exercitum eo duxit, præmissis in civitates  
captivis. Et illi magnam auctoritatem apud popu-  
lares habuerunt, clementiam erga se regis munifi-

U. C. 561. centiamque commemorantes: et Amynander, cuius  
 A. C. 191. præsentis majestas aliquos in fide continuisset, veri-  
 tus ne traderetur Philippo jam pridein hosti, et Ro-  
 manis merito tuuc propter defectionem infensis,  
 cum conjuge ac liberis regno excessit, Ambraciæ  
 que se contulit: ita Athamania omnis in jus ditio-  
 nemque Philippi concessit. Consul, ad refienda  
 maxime jumenta, quæ et navigatione, et postea iti-  
 neribus fatigata erant, paucos Larissæ moratus dies,  
 velut renovato modica quiete exercitu Cranonem est  
 progressus. Venienti Pharsalus, Scotussa, et Pheræ,  
 quæque in eis præsidia Antiochi erant, deduntur:  
 ex iis interrogatis, qui manere secum vellent, mille  
 volentes Philippo tradit: ceteros inermes Demetria-  
 dem remittit. Proernam inde recepit, et quæ circa  
 eam castella erant. Ducere tum porro in sinum  
 Maliacum cœpit. Adpropinquante faucibus, super  
 quas siti Thaumaci sunt, deserta urbe, juventus  
 omnis armata silvas et itinera insedit, et in agmen  
 Romanum ex superioribus locis incursavit. Consul  
 primo mittere, qui ex propinquo conloquentes deter-  
 rerent eos a tali furore: postquam perseverare in  
 incepto vidit, tribuno cum duorum signorum militi-  
 bus circummisso, interclusit ad urbem iter armatis,  
 vacuamque eam cepit: tum, clamore ab tergo captæ  
 urbis audito, refugientium undique ex silvis insidia-  
 torum cædes facta est. A Thaumacis altero die  
 consul ad Sperchium amnem pervenit: inde Hypa-  
 tæorum agros vastavit.

XV. Quum hæc agebantur, Chalcide erat Antio-  
 chus: qui, jam tum cernens, nihil se ex Græcia,  
 præter amœna Chalcide hiberna et infames nuptias,  
 petisse, Ætolorum vana promissa incusare et Thoan-

tem; Hannibalem vero, non ut prudentem tantum U. C. 561.  
virum, sed prope vatem omnium, quæ tum eveni- A. C. 191.  
rent, admirari: ne tamen temere cœpta, segnitia  
insuper everteret, nuncios in Ætoliam mittit, ut,  
omni contracta juventute, convenienter. Jam et ipse  
eo decem millia fere peditum ex iis, qui postea ve-  
nerant ex Asia, expleta, et equites quingentos duxit.  
Quo quum aliquanto pauciores, quam unquam  
antea, convenienter, et principes tantummodo cum  
paucis clientibus essent, atque ii dicerent, omnia  
sedulo ab se facta, ut quam plurimos ex civitatibus  
suis evocarent; nec auctoritate, nec gratia, nec im- Antiochus  
perio adversus detractantes militiam valuisse; desti- intra sal-  
tutus undique et ab suis, qui morabantur in Asia, Thermopylarum  
et ab sociis, qui ea, in quorum spem vocaverant, locat.  
non præstabant, intra saltum Thermopylarum sese  
recepit. Id jugum, sicut Apennini dorso Italia di- Descriptio  
viditur, ita medianam Græciam dirimit: ante saltum locorum.  
Thermopylarum in septentrionem versa Epirus, et  
Perrhæbia, et Magnesia, et Thessalia est, et Phthio-  
tæ Achæi, et sinus Maliacus: intra fauces ad meri-  
diem vergunt Ætoliae pars major, et Acarnania, et  
cum Locride Phocis, et Bœotia adjunctaque insula  
Eubœa, et, excurrente in altum, velut promontorio,  
Attica terra, sita ab tergo et Peloponnesus. Hoc  
jugum, ab Leucade et mari ad occidentem verso per  
Ætoliam ad alterum mare orienti objectum tendens,  
ea aspreta rupesque interjectas habet, ut non modo  
exercitus, sed ne expediti quidem facile ulla ad  
transitum calles inveniant. Extremos ad orientem  
montes Cœtam vocant, quorum quod altissimum est,  
Callidronion adpellatur: in cuius valle ad Maliacum  
sinum vergente iter est non latius, quam sexaginta

U. C. 561. passus. Hæc una militaris via est, qua traduci  
 A. C. 191. exercitus, si non prohibeantur, possint: ideo Pylæ,  
 et ab aliis, quia calidæ aquæ in ipsis faucibus sunt,  
 Thermopylæ locus adpellatur, nobilis Lacedæmoniorum  
 adversus Persas morte magis memorabili, quam pugna.

XVI. Haudquaquam pari tum animo Antiochus, intra portas loci ejus castris positis, munitionibus insuper saltum impeditiebat: et, quum duplii vallo fossaque, et muro etiam, qua res postulabat, ex multa copia passim jacentium lapidum, perimunisset omnia, satis fidens, numquam ea vim Romanum exercitum facturum, Ætolos ex quatuor millibus (tot enim convenerant) partim ad Heracleam præsidio obtinendam, quæ ante ipsas fauces posita est, partim Hypatam mittit, et Heracleam haud dubius consulem obpugnaturum, et jam multis nunciantibus,

Consul ad circa Hypatam omnia evastari. Consul, depopulatus Hypatensem primo, deinde Heracleensem agrum, inutili utrobique auxilio Ætolorum, in ipsis faucibus prope fontes calidarum aquarum adversus regem castra posuit. Ætolorum utræque manus Heracleam sese incluserunt. Antiochum, cui, priusquam hostem cerneret, satis omnia permunita et præsidiis obsepta videbantur, timor deinde incessit, ne quas per iuminentia juga calles inveniret ad transitum Romanus: nam et Lacedæmonios quondam ita a Persis circumitos fama erat; et nuper Philippum ab iisdem Romanis: itaque nuncium Heracleam ad Ætolos mittit, ut hanc saltem sibi operam eo bello præstarent, ut vertices circa montium occuparent obsiderentque, ne qua transire Romanus posset. Hoc nuncio audito, dissensio inter Ætolos orta est:

Thermo-  
pylas.

pars imperio parendum regis atque eundum cense- U. C. 561.  
 bant, pars subsistendum Heracleæ ad utramque for- A. C. 191.  
 tunam; ut, sive victus a consule rex esset, in expé-  
 dito haberent integras copias ad opem propinquis  
 ferendam civitatibus suis; sive vinceret, ut dissipa-  
 tos in fugam Romanos persequerentur. Utraque  
 pars non mansit modo in sententia sua, sed etiam  
 exsecuta est consilium: duo millia Heracleæ substi-  
 terunt: duo trifariam divisa Callidromum, et Rho-  
 duntiam, et Tichiunta (hæc nomina cacuminibus  
 sunt) occupavere.

XVII. Consul postquam insessa superiora loca  
 ab Ætolis vidit, M. Porcius Catonem et L. Vale-  
 rium Flaccum, consulares legatos, cum binis milli-  
 bus delectorum peditum, ad castella Ætolorum,  
 Flaccum in Rhoduntiam et Tichiunta, Catonem in  
 Callidromum mittit: ipse, priusquam ad hostem co- Consul  
 piyas admoveret, vocatos in concionem milites paucis suos hor-  
 est adlocutus: *Plerosque omnium ordinum, milites,*  
*inter vos esse video, qui in hac eadem provincia T.*  
*Quinctii ductu auspicioque militaveritis. Macedonico*  
*bello inexsuperabilis magis saltus ad amnem Aoum fuit,*  
*quam hic. Quippe portæ sunt hæ, et unus, inter duo*  
*maria clavis omnibus, velut naturalis transitus est:*  
*munitiores et locis opportuniорibus tunc fuerunt, et*  
*validiores inpositæ: exercitus hostium ille et numero*  
*major, et militum genere aliquanto melior. Quippe*  
*illic Macedones Thracesque et Illyrii erant, ferocissimæ*  
*omnes gentes: hic Syri et Asiatici Græci sunt, levissi-*  
*ma genera hominum et servituti nata. Rex ille bellissimus,*  
*exercitatus jam inde ab juventa finitimus*  
*Thracum atque Illyriorum, et circa omnium adcolarum bellis; hic, ut aliam omnem vitam omittam, is*

U. C. 561. est, qui, quum ad inferendum populo Romano bellum  
A. C. 191. ex Asia in Europam transisset, nihil memorabilius toto  
tempore hibernorum gesserit, quam quod amoris caussa  
ex domo privata, et obscuri etiam inter populares gene-  
ris, uxorem duxit: et novus maritus, velut saginatus  
nuptialibus cœnis, ad pugnam processit. Summa vi-  
rium speique ejus in Ætolis fuit; gente vanissima et  
ingratissima, ut vos prius experti estis, nunc Antiochus  
experitur. Nam nec convenerunt frequentes, nec con-  
tineri in castris potuerunt, et in seditione ipsi inter se  
sunt: et quum Hypatam tuendam Heracleamque depo-  
poscissent, neutram tutati, refugerunt in juga montium,  
pars Heracleæ incluserunt sese. Rex ipse confessus,  
nusquam æquo campo non modo congregdì se ad pugnam  
audere, sed ne castra quidem in aperto ponere, relicta  
omni ante se regione ea, quam se nobis ac Philippo  
udemisse gloriabatur, condidit se intra rupes: ne ante  
fauces quidem saltus, ut quondam Lacedæmonios fama  
est, sed intra penitus retractis castris: quod quantum  
interest ad timorem ostendendum, an muris alicujus  
urbis obsidendum sese incluserit? Sed neque Antiochum  
tuebuntur angustiæ, nec Ætolos vertices illi, quos cepe-  
runt. Satis undique pro visum atque præcantum est,  
ne quid adversus vos in pugna præter hostes esset. Il-  
lud proponere animo vestro debetis, non vos pro Græciæ  
libertate tantum dimicare, (quamquam is quoque egre-  
gius titulus esset, liberatam a Philippo ante, nunc ab  
Ætolis et ab Antiocho liberare) neque ea tantum in  
præmium restrum cessura, quæ nunc in regiis castris  
sunt: sed illum quoque omnem adparatum, qui in dies  
ab Epheso exspectatur, prædæ futurum: Asiam deinde  
Syriamque, et omnia usque ad ortus solis ditissima  
regna imperio Romano aperturos. Quid deinde aberit,

*quin ab Gadibus ad mare rubrum Oceano fines termi-* U. C. 561.  
*nemus, qui orbem terrarum amplexu finit, et omne hu-* A. C. 191.  
*manum genus secundum Deos nomen Romanum vene-*  
*retur? In hæc tanta præmia dignos parute animos, ut*  
*crastino die, bene juvantibus Diis, acie decernamus.*

XVIII. Ab hac concione dimissi milites, prius- Pugna ad  
 quam corpora curarent, arma telaque parant. Luce Thermopylas.  
 prima, signo pugnæ proposito, instruit aciem consul,  
 arta fronte, ad naturam et angustias loci. Rex, postquam signa hostium conspexit, et ipse copias  
 eduxit. Levis armaturæ partem ante vallum in primo  
 locavit; tum Macedonum robur, quos Sarissophoros  
 adpellabant, velut firmamentum circa ipsas muni-  
 tiones constituit: his ab sinistro cornu jaculatorum  
 sagittariorumque et funditorum manum sub ipsis ra-  
 dicibus montis posuit, ut ex altiore loco nuda latera  
 hostium incesserent: ab dextro Macedonibus ad ip-  
 sum munimentorum finem, qua loca usque ad mare  
 invia palustri limo et voraginibus claudunt, elephan-  
 tos cum adsueto præsidio posuit; post eos, equites;  
 tum, modico intervallo relicto, ceteras copias in se-  
 cunda acie. Macedones, pro vallo locati, primo fa-  
 cile sustinebant Romanos, tentantes ab omni parte  
 aditus: multum adjuvantibus, qui ex loco superiore  
 fundis, velut nimbum, glandes et sagittas simul ac  
 jacula ingerebant. Deinde, ut major, nec jam to-  
 leranda vis hostium inferebat se, pulsi loco intra  
 munimenta, subductis ordinibus, concesserunt; inde  
 ex vallo prope alterum vallum, hastis præ se objectis,  
 fecerunt: et ita modica altitudo valli erat, ut et lo-  
 cum superiorem ad pugnandum suis præberet, et  
 propter longitudinem hastarum subjectum haberet  
 hostem. Multi, temere subeuntes vallum, transfixi

**U. C. 561.** sunt : et ant incepto irrito recessissent, aut plures  
**A. C. 191.** cecidissent, ni M. Porcius ab jugo Callidromi, dejectis inde Ætolis, et magna ex parte cæsis, (incautos enim et plerosque sopitos obpresserat) super imminentem castris collem adparuisset.

XIX. Flacco non eadem fortuna ad Tichiunta et Rhoduntiam, nequidquam subire ad ea castella conato, fuerat. Macedones, quiue alii in castris regiis erant, primo, dum procul nihil aliud, quam turba et agmen, adparebat, Ætolos credere, visa procul pugna, subsidio venire. Ceterum, ut primum signaque et arma ex propinquo cognita errorem aperuerunt, tantus repente pavor omnes cepit, ut, abjectis

**Victus An-** armis, fugerent : et munimenta sequentes impedi-  
**tochus.** runt, et angustiæ vallis, per quam sequendi erant ; et maxime omnium, quod elephanti novissimi agminis erant, quos pedes ægre præterire, eques nullo poterat modo, timentibus equis, tumultumque inter se majorem, quam in prælio, edentibus. Aliquantum temporis et direptio castrorum tenuit. Scarphiam tamen eo die persecuti sunt hostem. Multis in ipso itinere cæsis captisque, non equis virisque tantum, sed etiam elephantis, quos capere non potuerant, interfectis, in castra reverterunt ; quæ tentata eo die inter ipsum pugnæ tempus ab Ætolis, Heracleam obtinentibus præsidio, sine ullo haud parum audacis incepti effectu, fuerant. Consul, noctis insequentis tertia vigilia præmisso equitatu ad persequendum hostem, signa legionum prima luce movit. Aliquantum viæ præceperat rex ; ut qui non ante, quam Elatiæ, ab effuso constiterit cursu : ubi primum reliquiis pugnæque et fugæ collectis, cum per exigua manu semiermum militum Chalcidem se recepit.

Chalcidem  
se recipit.

Romanus equitatus ipsum quidem regem Elatiæ ad- U. C. 561.  
 secutus non est, sed magnam partem agminis, aut A. C. 191.  
 lassitudine subsistentis, aut errore, ut qui sine duci-  
 bus per ignota itinera fugerent, dissipatos obpresse-  
 runt: nec præter quingentos, qui circa regem fue-  
 runt, ex toto exercitu quisquam effugit: etiam ex  
 decem millibus militum, quos, Polybio auctore, tra-  
 jecisse secum regem in Græciam scripsimus, exiguis  
 numerus: quid si Antiati Valerio credamus, sexa-  
 ginta millia militum fuisse in regio exercitu scribenti,  
 quadraginta inde millia cecidisse, supra quinque mil-  
 lia capta cum signis militaribus ducentis triginta?  
 Romanorum centum quinquaginta in ipso certamine  
 pugnæ, ab ineursu Ætolorum se tuentes non plus  
 quinquaginta interfecti sunt.

XX. Consule per Phocidem et Bœotiam exercitum Consul A-  
 ducente, consciæ defectionis civitates cum velamentis tiochum  
 ante portas stabant, metu ne hostiliter diriperentur: persequi- tur.  
 ceterum per omnes dies haud secus, quam in pacato  
 agro, sine violatione ullius rei agmen processit, do-  
 nec in agrum Coronæum ventum est. Ibi statua regis  
 Antiochi, posita in templo Minervæ Itoniæ, iram  
 accedit; permisumque militi est, ut circumjectum  
 templo agrum popularetur: deinde cogitatio animum  
 subiit, quum communi decreto Bœotorum posita  
 esset statua, indignum esse, in unum Coronensem  
 agrum sœvire. Revocato extemplo milite, finis po-  
 pulandi factus: castigati tantum verbis Bœoti ob  
 ingratum in tantis tamque recentibus beneficiis ani-  
 mum erga Romanos. Inter ipsum pugnæ tempus  
 decem naves regiæ cum præfecto Isidoro ad Thro-  
 nium in sinu Maliaco stabant: eo gravis vulneribus  
 Alexander Acarnan, nuncius adversæ pugnæ, quum

**U. C. 561.** perfugisset, trepidæ iude recenti terrore naves Ce-  
**A. C. 191.** næum Eubœæ petierunt: ibi mortuus sepultusque Alexander. Tres, quæ ex Asia profectæ eundem portum tenuerant, naves, audita exercitus clade, Ephesum redierunt. Isidorus ab Cenæo Demetri-adem, si forte eo deferret fuga regem, trajecit. Per eosdem dies A. Atilius, præfectus Romanæ classis, magnos regios commeatus, jam fretum, quod ad Andrum insulam est, prætervectos, exceptit: alias mer-sit, alias cepit naves: quæ novissimæ agminis erant, cursum in Asiam verterunt. Atilius Piræum, unde profectus erat, cum agmine captivarum navium re-vectus, magnam vim frumenti et Atheniensibus et aliis ejusdem regionis sociis divisit.

**Antiochus in Asiam majicit.** **XXI.** Antiochus, sub adventum consulis a Chal-cide profectus, Tenum primo tenuit: inde Ephesum transmisit. Consuli Chalcidem venienti portæ pa-tuerunt, quum, adpropinquante eo, Aristoteles, præ-fectus regis, urbe excessisset: et ceteræ urbes in Eubœa sine certamine traditæ, post paucosque dies, omnibus perpacatis, sine ullius noxa urbis exercitus Thermopylas reductus, multo modestia post victori-am, quam ipsa victoria, laudabilior. Inde consul M. Catonem, per quem, quæ gesta esseent, senatus populusque Ronianus haud dubio auctore sciret, Ro-man misit. Is a Creusa (Thespieum emporium est, in intimo sinu Corinthiacœ retractum) Patras Achææ petit; a Patris Corcyram usque Ætoliae at-que Aearnaniæ litora legit, atque ita ad Hydruntum Italiæ trajecit: quinto die inde pedestri itinere Ro-mam ingenti cursu pervenit: ante lucem ingressus urbem, a porta ad prætorem M. Junium iter intendit. Is prima luce senatum vocavit: quo **L. Cornelius**

Scipio, aliquot diebus ante a consule dimissus, quum U. C. 561.  
adveniens audisset, prægressum Catonem in senatu A. C. 191.  
esse, supervenit exponenti, quæ gesta essent. Duo  
inde legati jussu senatus in concionem sunt pro-  
ducti: atque ibi eadem, quæ in senatu, de rebus in  
Ætolia gestis exposuerunt. Supplicatio in triduum  
decreta est; et ut quadraginta hostiis majoribus  
prætor, quibus Diis ei videretur, sacrificaret. Per  
eosdem dies et M. Fulvius Nobilior, qui biennio ante  
prætor in Hispaniam erat profectus, ovans urbem  
est ingressus: argenti bigati præ se tulit centum  
triginta millia: et extra numeratum duodecim millia  
pondo argenti: auri pondo centum viginti septem.

XXII. Acilius consul ab Thermopylis Heracleam Ætolos ad  
ad Ætolos præmisit, *ut tunc saltem, experti regiam resipiscen-*  
*runitatem, resipiscerent; traditaque Heraclea, cogita-*  
*rent de petenda ab senatu seu furoris sui, seu erroris ve-*  
*nia: et ceteras Græciæ civitates defecisse eo bello ab*  
*optime de se meritis Romanis: sed, quia post fugam*  
*regis, cuius fiducia officio decessissent, non addidissent*  
*pertinaciam culpæ, in fidem receptas esse. Ætolos quo-*  
*que, quamquam non secuti sint regem, sed arcessierint,*  
*et duces belli, non socii, fuerint, si pœnitere possint,*  
*posse et incolumes esse. Ad ea quum pacati nihil re-*  
*sponderetur, adpareretque, armis rem gerendam, et,*  
*rege superato, bellum Ætolicum integrum restare;*  
*castra ab Thermopylis ad Heracleam movit: eoque Heracleam*  
*ipso die, ut situm nosceret urbis, ab omni parte obsidet.*  
*equo mœnia est circumvectus. Sita est Heraclea in*  
*radicibus Cœtæ montis: ipsa in campo, arcem inni-*  
*nentem loco alto et undique præcipiti habet. Con-*  
*templatus omnia, quæ noscenda erant, quatuor si-*  
*mul locis adgredi urbem constituit: a flumine Aso-*

U. C. 561. po, qua et gymnasium est, L. Valerium operibus at-  
A. C. 191. que obpugnationi præposuit: arcem extra muros,  
quæ frequentius prope, quam urbs, habitabatur, Ti.  
Sempronio Longo obpugnandam dedit: a sinu Ma-  
liaco, quæ aditum haud facilem pars habebat, M.  
Bæbium; ab altero amniculo, quem Melana vocant,  
adversus Dianæ templum, Ap. Claudium obposuit.  
Horum magno certamine intra paucos dies turres,  
arietesque, et alias omnis adparatus obpugnandarum  
urbium perficitur. Et quum ager Heracleensis pa-  
luster omnis frequensque proceris arboribus, benigne  
ne ad omne genus operum materiam subpeditatbat:  
tum, quia refugerant intra mœnia Ætolii, deserta,  
quæ in vestibulo urbis erant, tecta in varios usus  
non tigna modo et tabulas, sed laterem quoque, et  
clementa, et saxa variæ magnitudinis, præbebant.

XXIII. Et Romani quidem operibus magis, quam  
armis, urbem obpugnabant; Ætolii contra armis se  
tuebantur: nam, quum ariete quaterentur muri, non  
laqueis, ut solet, exceptos declinabant ictus; sed ar-  
mati frequentes, quidam ignes etiam, quos aggeribus  
injicerent, ferebant: fornices quoque in muro erant  
apti ad excurrendum; et ipsi, quum pro dirutis refi-  
earent muros, crebrios eos, ut pluribus crumpere-  
tur in hostem locis, faciebant. Hoc primis diebus,  
dum integræ vires erant, et frequentes et in pigre fe-  
cerunt: in dies deinde, pauciores et seguius. Ete-  
nim, quum multis urgerentur rebus, nulla eos res  
æque, ac vigiliæ conficiebant; Romanis in magna  
copia militum succendentibus aliis in stationem alio-  
rum, Ætolos propter paucitatem eisdem dies noc-  
tesque adsiduo labore urente. Per quatuor et vi-  
ginti dies, ita ut nullum tempus vacuum dimicatione-

esset, adversus quatuor e partibus simul obpugnan- U. C. 561:  
tem hostem nocturnus diurno continuatus labor est. A. C. 191.  
Quum fatigatos jam Ætolos sciret consul et ex ra-  
tione temporis, et quod ita transfugæ adfirmabant,  
tale consilium iniit: media nocte receptui signum  
dedit, et ab obpugnatione simul omnes milites de-  
ductos usque ad tertiam diei horam quietos in castris  
tenuit: inde cœpta obpugnatio ad medium rursus  
noctem perducta est; intermissa deinde usque ad  
tertiam diei horam. Fatigationem rati caussam esse  
Ætoli non continuandæ obpugnationis, quæ et ipsos  
adfecerat, ubi Romanis datum receptui signum esset,  
velut ipsi quoque hoc revocati, pro se quisque ex sta-  
tionibus decessebant: nec ante tertiam diei horam  
armati in muris adparebant.

**XXIV.** Consul, quum nocte media intermisisset  
obpugnationem, quarta vigilia rursus ab tribus par-  
tibus summa vi adgressus, ab una Ti. Sempronium  
tenere intentos milites signumque exspectantes jus-  
sit, ad ea in nocturno tumultu, unde clamor exaudi-  
retur, haud dubie ratus hostes concursuros. Ætoli  
pars sopiti affecta labore ac vigiliis corpora ex som-  
no moliebantur: pars vigilantes adhuc ad strepitum  
pugnantium in tenebris currunt. Hostes partim per  
ruinas jacentis muri transcendere conantur: partim  
scalis adscensus tentant: adversus quos undique ad  
opem ferendam obcurrunt Ætoli. Pars una, in qua  
aedificia extra urbem erant, neque defenditur, neque  
obpugnatur: sed, qui obpugnarent, intenti signum  
exspectabant; defensor nemo aderat. Jam diluces- Et capit,  
cebat, quum signum consnl dedit: et sine ullo cer-  
tamime partim per semiruta, partim scalis integros  
muros transcendere. Simul clamor, index capti op-

U. C. 561. pidi, est exauditus, undique Ætoli, desertis stationibus, in arcem fugiunt. Oppidum victores permissu  
 A. C. 191. consulis diripiunt; non tam ab ira, nec ab odio, quam ut miles, coërcitus in tot receptis ex potestate hostium urbibus, aliquo tandem loco fructum victoriæ sentiret. Revocatos inde a medio ferme die milites quum in duas divisisset partes, unam radicibus montium circumduci ad rupem jussit, quæ, fastigio altitudinis par, media valle velut abrupta ab arce erat; sed adeo prope geminata cacumina eorum montium sunt, ut ex vertice altero conjici tela in arcem possint: cum dimidia parte militum consul, ab urbe escensurus in arcem, signum ab iis, qui ab tergo in rupem evasuri erant, exspectabat. Non tulere, qui in arce erant, Ætoli primum eorum, qui rupem cuperant, clamorem, deinde inpetum ab urbe Romanorum, et fractis jam animis, et nulla ibi præparata re ad obsidionem diutius tolerandam: utpote congregatis feminis, puerisque, et inbelli alia turba in arcem, quæ vix capere, nedum tueri, multitudinem tantam posset: itaque, ad primum inpetum abjectis armis, dediderunt sese. Traditus inter ceteros princeps Ætolorum Damocritus est: qui principio belli decretum Ætolorum, quo arcessendum Antiochum censuerant, T. Quinctio poscenti responderat: *In Italia daturum, quum castra ibi Ætoli posuissent: ob eam ferociam majus victoribus gaudium traditus fuit.*

XXV. Eodem tempore, quo Romani Heracleam, Philippus Lamiam ex composito obpugnabat, circa Thermopylas cum consule, redeunte ex Bœotia, ut victoriam ipsi populoque Romano gratularetur, excusaretque, quod morbo impeditus bello non inter-

fuisse, congressus : inde diversi ad duas simul ob- U. C. 561.  
 pugnandas urbes profecti. Intersunt septem millia A. C. 191.  
 ferme passuum : et quia Lamia quum posita est in Lamiam  
 tumulo, tum regionem ea maxime despectat oppi- Philippus  
 dum, qua breve intervallum videtur, et omnia in obpugnat.  
 conspectu sunt ; quum enise, velut proposito certa-  
 mine, Romani Macedonesque diem ac noctem aut in  
 operibus, aut in prœliis essent, hoc major difficultas  
 Macedonibus erat, quod Romani aggere et vincis,  
 et omnibus supra terram operibus, subitus Mace-  
 dones cuniculis obpugnabant : et in asperis locis si-  
 lex sæpe inpenetrabilis ferro obcurrebat : et, quum  
 parum procederet inceptum, per conloquia princi-  
 pum oppidanos tentabat rex, ut urbem dederent ;  
 haud dubius, quin, si prius Heraclea capta foret,  
 Romanis se potius, quam sibi, dedituri essent, suam-  
 que gratiani consul in obsidione liberanda facturus  
 esset. Nec eumi opinio est frustrata : confestim enim Jubetur ab  
 ab Heraclea capta nuncius venit, ut obpugnatione ea recedere.  
 absisteret : *æquius esse, Romanos milites, qui acie di-*  
*micassent cum Ætolis, præmia victoriae habere.* Ita re-  
 cessum ab Lamia est, et propinquæ clade urbis ipsi,  
 ne quid simile paterentur, effugerunt.

XXVI. Paucis, priusquam Heraclea caperetur,  
 diebus, Ætolii, concilio Hypatam coacto, legatos ad  
 Antiochum miserunt : inter quos et Thoas idem, qui  
 antea, missus est. Mandata erant, ut ab rege pete-  
 rent, primum, ut ipse, coactis rursus terrestribus na-  
 valibusque copiis, in Græciam trajiceret ; deinde, si  
 qua ipsum teneret res, ut pecuniam et auxilia mitte-  
 ret : *id quum ad dignitatem ejus fidemque pertinere,*  
*non prodi socios, tum etiam ad incolumitatem regni,*  
*non sinere, Romanos, omni cura vacuos, quum Ætolo-*

**U. C. 561.** *rum gentem sustulissent, omnibus copiis in Asiam tra-*  
**A. C. 191.** *jicere.* Vera erant, quæ dicebantur : eo magis regem moverunt. Itaque in præsentia pecuniam, quæ ad usus belli necessaria erat, legatis dedit : auxilia terrestria navaliaque adfirmavit missurum. Thoantem unum ex legatis retinuit, et ipsum hand invitum morantem, ut exactor præsens promissorum adesset.

Ætoli  
de pace  
agunt.

XXVII. Ceterum Heraclea capta fregit tandem animos Ætolorum : et post paucos dies, quam ad bellum renovandum adciendumque regem in Asiam miserant legatos, abjectis belli consiliis, pacis pectendæ oratores ad consulem miserunt. Quos dicere exorsos consul interfatus, quum alia sibi prævertenda esse dixisset, redire Hypatam eos, datis dierum decem induciis, et L. Valerio Flacco cum iis misso, jussit : ei, quæ secum acturi fuissent, exponere, et si qua vellent alia. Hypatam ut est ventum, principes Ætolorum apud Flaccum concilium habuerunt ; consultantes, quonam agendum modo apud consulem foret. His parantibus antiqua fœderuni ordiri, meritaque in populum Romanum, absistere iis, Flaccus jussit, quæ ipsi violassent ac rupissent : confessionem iis culpæ magis profuturam, et totam in preces orationem versam : nec enim in caussa ipsorum, sed in populi Romani clementia spem salutis positam esse : et se suppliciter agentibus iis adfuturum, et apud consulem, et Romæ in senatu : eo quoque enim mittendos fore legatos. Hæc una via omnibus ad salutem visa est, ut in fidem se permitterent Romanorum. Ita enim et illis violandi supplices verecundiam se inposituros : et ipsos nihilominus suæ potestatis fore, si quid melius fortuna ostendisset.

XXVIII. Postquam ad consulem ventum est,

Phæneas legationis princeps longam orationem, et U.C. 561.  
 varie ad mitigandam iram victoris compositam, ita A.C. 191.  
 ad extremum finivit, ut diceret; *Ætolos se suaque Fidei pop.*  
*omnia fidei populi Romani permittere.* Id consul ubi <sup>Romani se</sup> <sub>permittunt.</sub>  
 audivit: *Etiam atque etiam videte, inquit, Ætolis, ut*  
*ita permittatis.* Tum decretum Phæneas, in quo id  
 diserte scriptum erat, ostendit. *Quando ergo, inquit,* <sup>Consulis</sup> <sub>postulata.</sub>  
*ita permittitis, postulo, ut mihi Dicæarchum civem ves-*  
*trum, et Menestam Epirotam, (Naupactum is cum*  
*præsidio ingressus ad defectionem compulerat) et*  
*Amynandrum cum principibus Athamanum, quorum*  
*consilio ab nobis defecistis, sine mora dedatis.* Prope  
 dicentem interfatus Romanum Phæneas, *Non in ser-*  
*vitudinem, inquit, sed in fidem tuam nos tradidimus: et*  
*certum habeo, te imprudentia labi, qui nobis imperes,*  
*quæ moris Græcorum non sint.* Ad hæc consul, *Nec,*  
*Hercle, inquit, magnopere nunc curo, quid Ætolis satis*  
*ex more Græcorum factum esse censeant: dum ego*  
*more Romano imperium inhibeam in deditos modo de-*  
*creto suo, ante armis victos.* *Itaque, ni propere fit, quod*  
*impero, vinciri vos jam jubeo: adferrique catenas, et*  
*circumsistere lictores jussit.* Tum fracta Phæneæ fe-  
 rocia, *Ætolisque aliis est: et tandem, cuius condi-*  
*tionis essent, sensere, et, se quidem, Phæneas, et qui*  
*adsint Ætolorum, scire facienda esse, quæ imperentur,*  
*dixit; sed ad decernenda ea concilio Ætolorum opus*  
*esse: ad id petere, ut decem dierum inducias daret.*  
 Petente Flacco pro Ætolis, induciæ datæ; et Hy-  
 patam redditum est. Ubi quum in concilio delecto-  
 runi, quos Apocletos vocant, Phæneas, et quæ im-  
 perarentur, et quæ ipsis prope accidissent, expo-  
 suisset: ingemuerunt quidem principes conditioni

U.C. 561. suæ, parendum tamen victori censebant, et ex A.C. 191. omnibus oppidis convocandos Ætolos ad concilium.

Exasperantur *Æ-*  
toli.

XXIX. Postquam vero omnis coacta multitudo eadem illa audivit, adeo sævitia imperii atque indig-nitate exasperati animi sunt, ut, si in pace fuissent, illo impetu iræ concitari potuerint ad bellum. Ad iram accedebat et difficultas eorum, quæ imperarentur : *quoniam modo enim utique regem Amynandrum se tradere posse?* Et spes forte oblata, quod Nicander, eo ipso tenipore ab rege Antiocho veniens, in-plevit exspectatione vana multitudinem, terra mari-que ingens parari bellum. Is duodecimo die, quam conseenderat navem, in Ætoliam, perfecta legatione, rediens Phalara in sinu Maliaco tenuit : inde La-miam pecuniam quum devexisset, ipse cum expeditis vespera prima inter Macedonum Romanaque castra medio agro, dum Hypatam notis callibus petit, in stationem incidit Macedonum, deductusque ad regem est, nondum convivio dimisso. Quod ubi nunciatum est, velut hospitis, nou hostis, adventu motus Phi-lippus, adcumbere cum epolarique jussum, atque inde, dimissis aliis, solum retentum, ipsum quidem de se timere quidquam vetuit. Ætolorum prava con-silia, atque in ipsorum caput semper residentia, ac-cusavit : qui primum Romanos, deinde Antiochum in Græciam adduxissent. Sed *præteritorum, quæ magis reprehendi, quam corrigi, possint, oblitum se, non facturum, ut insultet adversis rebus eorum.* Ætolos quoque finire tandem adversus se odia debere ; et Ni-candrum privatim ejus diei, quo servatus a se foret, meminisse. Ita datis, qui in tutum eum prosequen-

rentur, Hypatam Nicander consultantibus de pace U. C. 561.  
Romana supervenit. A. C. 191.

XXX. M'. Acilius, vendita, aut concessa militi circa Heracleam præda, postquam nec Hypatae pacata esse consilia, et Naupactuni concurrisse Ætolos, ut inde totum inpetum belli sustinerent, audivit ; præmisso Ap. Claudio cum quatuor millibus militum ad occupanda juga, qua difficiles transitus montium erant, ipse Œtam adscendit, Herculique sacrificium fecit in eo loco, quem Pyram, quod ibi mortale corpus ejus Dei sit crematum, adpellant : inde toto exercitu profectus reliquum iter satis expedito agmine fecit. Ut ad Coracem est ventum, (mons est altissimus inter Callipolin et Naupactum) ibi et jumenta multa ex agmine præcipitata cum ipsis oneribus sunt, et homines vexati. Et facile adparebat, quam cum inerti hoste res esset, qui tam impeditum saltum nullo præsidio, ut clauderet transitum, insedisset. Tum quoque vexato exercitu, ad Naupactuni de- Consul scendit : et, uno castello adversus arcem posito, ce- Naupac- teras partes urbis, divisis copiis pro situ mœnium, tum obsi- circumsedit : nec minus operis laborisque ea obpug- det. natio, quam Heracleæ, habuit.

XXXI. Eodem tempore et Messene in Peloponneso ab Achæis, quod concilii eorum recusaret esse, obpugnari cœpta est. Etenim duæ civitates, Messene et Elis, extra concilium Achaicum erant : cum Ætolis sentiebant. Elei tamen, post fugatum ex Græcia Antiochum, legatis Achæorum lenius responderant ; dimisso præsidio regio, cogitatueros se, quid sibi faciendum esset. Messenii, sine responso dimissis legatis, moverant bellum ; trepidique rerum suarum, quum jani ager effuso exercitu passim ureretur, cas-

U. C. 561. traque prope urbem poni viderent, legatos Chalcidem  
 A. C. 191. ad T. Quinctium, auctorem libertatis, miserunt, qui  
 nunciarent, Messenios Romanis, non Achæis, et ape-  
 rire portas, et dedere urbem paratos esse. Auditis le-  
 gatis, extemplo profectus Quinctius, a Megalopoli  
 ad Diophanem prætorem Achæorum misit, qui ex-  
 templo reducere eum a Messene exercitum, et ve-  
 nire ad se juberet. Dicto paruit Diophanes: et, so-  
 luta obsidione, expeditus ipse, prægressus agmen,  
 circa Andaniam, parvum oppidum, inter Megalopo-  
 lim Messenenque positum, Quinctio obcurrit; et,  
 quum caussas obpugnationis exponeret, castigatum  
 leniter, quod tantam rem sine auctoritate sua cona-  
 tus esset, dimittere exercitum jussit, nec pacem om-  
 nium bono partam turbare. Messeniis imperavit,  
 ut exsules reducerent, et Achæorum concilii essent:  
 si qua haberent, de quibus aut recusare, aut in pos-  
 terum caveri sibi vellent, Corinthum ad se venirent.  
 Diophanem concilium Achæorum extemplo sibi præ-  
 bere jussit. Ibi, de Zacyntho intercepta per frau-  
 dem insula questus, postulavit, ut restitueretur Ro-  
 manis. Philippi Macedonum regis Zacynthus fue-  
 rat: eam mercedem Amynandro dederat, ut per  
 Athamaniam ducere exercitum in superiorem partem  
 Ætoliae liceret: qua expeditione fractis animis, Æ-  
 tolos compulit ad petendam pacem. Amynander  
 Philippum Megalopolitanum insulæ præfecit: postea  
 per bellum, quo se Antiocho adversus Romanos con-  
 junxit, Philippo ad munia belli revocato, Hieroclem  
 Agrigentinum successorem misit.

**XXXII.** Is, post fugam ab Thermopylis Antio-  
 chi, Amynandrumque a Philippo Athamania pul-  
 sum, missis ultiro ad Diophanem prætorem Achæo-

Zacyn-  
thum re-  
petunt ab  
Achæis  
Romani.

rum nunciis, pecuniam pactus, insulam Achæis tra- U. C. 561.  
dedit. Id præmium belli suum esse, æquum cense- A. C. 191.  
bant Romani: *non enim M. Acilium consulem legio-*  
*nesque Romanas Diophani et Achæis ad Thermopylas*  
*pugnasse.* Diophanes adversus hæc purgare inter-  
dum sese gentemque; interdum de jure facti disse-  
rere. Quidam Achæorum et initio eam se rem ad-  
spernatos testabantur, et tunc pertinaciam increpi-  
tabant prætoris: auctoribusque iis decretum est, ut  
**T. Quinctio** ea res permitteretur. Erat Quinctius,  
sicut adversantibus asper, ita, si cederes, idem pla-  
cabilis. Omissa igitur contentione vocis vultusque,  
*Si utilem, inquit, possessionem ejus insulæ censerem*  
*Achæis esse, auctor essem senatui populoque Romano,*  
*ut eam vos habere sinerent.* Ceterum sicut testudinem,  
ubi conlecta in suum tegumen est, tutam ad omnes ictus  
video esse; ubi exserit partes aliquas, quodecumque nu-  
davit, obnoxium atque infirmum habere; haud dissimi-  
liter vos, Achæi, clausos undique mari, quæ intra Pe-  
loponnesi sint terminos, ea et jungere vobis, et juncta  
tueri facile; simul ariditate plura amplectendi hinc  
excedatis, nuda vobis omnia, quæ extra sint, et expo-  
sita ad omnes ictus esse. Adsentiente omni concilio,  
nec Diophane ultra tendere auso, Zacynthus Roma-  
nis traditur.

XXXIII. Per idem tempus Philippus rex, prófi-  
ciscentem consulem ad Naupactum percunctatus, si  
se interim, quæ defecissent ab societate Romana,  
urbes recipere vellet, permittente eo, ad Demetria- Demetrias  
dem copias admovit, haud ignarus, quanta ibi tum se Philippo  
perturbatio esset. Destituti enim ab omni spe,  
quam desertos se ab Antiocho, spem nullam in  
Ætolis esse cernerent, dies noctesque aut Philippi

U. C. 561. hostis adventum, aut infestiorem etiam, quo justius  
A. C. 191. irati erant, Romanorum exspectabant. Turba erat  
ibi incondita regiorum: qui, primo pauci in præsi-  
dio relieti, postea plures, plerique inermes, ex præ-  
lio adverso fuga delati, nec virium, nec animi satis  
ad obsidionem tolerandam habebant: itaque præ-  
missis a Philippo, qui spem impetrabilis veniae ostendebant, responderunt, patere portas regi. Ad pri-  
mum ejus ingressum principum quidam urbe excesserunt: Eurylochus morteni sibi concivit. Antio-  
chi milites (sic enim pacti erant) per Macedoniam Thraciamque, prosequentibus Macedonibus, ne quis eos violaret, Lysimachiam deducti sunt. Erant et paucæ naves Demetriade, quibus præerat Isidorus: eæ quoque cum præfecto suo dimissæ sunt. Inde Dolopiam, et Aperantium, et Perrhaebiæ quasdam civitates recepit.

Quinctius  
it Naupac-  
tum.

XXXIV. Dum hæc a Philippo geruntur, T. Quinctius, recepta Zacyntho ab Achaico concilio, Naupactum trajecit; quæ jam per duos menses (sed prope excidium erat) obpugnabatur, et, si capta vi foret, onine ibi nomen Ætolorum ad internacionem videbatur venturum. Ceterum, quamquam merito iratus erat Ætolis, quod solos obtractasse gloriæ suæ, quum liberaret Græciam, meminerat, et nihil auctoritate sua motos esse, quum, quæ tum maxime acciderant, casura præmonens, a furioso incepto eos deterret; tamen, sui maximè operis esse credens, nullam gentem liberatæ a se Græciæ funditus everti, obambulare muris, ut facile nosceretur ab Ætolis, cœpit. Confestim a primis stationibus cognitus est, vulgatumque per omnes ordines, Quinctium esse: itaque, concursu facto undique in muros, manus pro

se quisque tendentes, consonante clamore nomina- U. C. 561.  
tim Quinetum orare, ut ope<sup>m</sup> ferret ac servaret. A. C. 191.  
Et tum quidem, quamquam moveretur his vocibus, Opem ejus  
manu tamen abnuit, quidquam opis in se esse. Ce- inplorant  
terum, postquam ad consulem venit : *Utrum fefellit,*  
*inquit, te, M. Acili, quid agatur? an, quum satis per-*  
*videas, nihil id magnopere ad summam rem pertine-*  
*re censes?* Exixerat exspectatione consulem; et, *Quin*  
*expromis, inquit, quid rei sit?* Tum Quinctius : *Ec-*  
*quid vides, te, devicto Antiocho, in duabus urbibus ob-*  
*pugnandis tempus terere, quum jam prope annus cir-*  
*cumactus sit imperii tui?* *Philippum autem, qui non*  
*aciem, non signa hostium vidit, non solum urbes, sed*  
*tot jam gentes, Athamaniam, Perrhaebiam, Aperan-*  
*tiam, Dolopiam, sibi adjunxisse?* *Atqui non tantum*  
*interest nostra, Ætolorum opes ac vires minui, quan-*  
*tum, non supra modum Philippum crescere, et victoriae*  
*tuæ præmium te militesque tuos nondum duas urbes,*  
*Philippum tot gentes Græciæ habere.*

XXXV. Adsentiebatur his consul : sed pudor, si irrito incepto abscederet obsidione, obcurrerbat ; tota inde Quinctio res permissa est. Is rursus ad eam partem muri, qua paullo ante vociferati Ætoli fuerant, rediit : ibi quum impensis orarent, ut miscereretur gentis Ætolorum, exire aliquos ad se jussit. Phœneas ipse principesque alii extemplo egressi sunt : quibus provolutis ad pedes, *Fortuna*, inquit, *vestra facit, ut et iræ meæ et orationi temperem.* *Eve-*  
*nerunt, quæ prædixi erentura : et ne hoc quidem reliqui*  
*robis est, ut indignis accidisse ea videantur.* Ego ta-  
men, sorte quadam nutrientæ Græciæ datus, ne ingrat-  
atis quidem benefacere absistam. Mittite oratores ad  
consulem, qui inducias tantum temporis petant, ut mit-

U.C. 561. *tere legatos Romam possitis, per quos senatui de vobis*  
 A.C. 191. *permittatis.* Ego apud consulem deprecator defensor-  
 Legatos Romam mittunt. que vobis adero. Ita, ut censuerat Quintius, fece-  
 runt: nec adspernatus est legationem consul: indu-  
 ciisque in diem certam datis, qua legatio renunciari  
 ab Roma posset, soluta obsidio est, et exercitus in  
 Phocidem missus. Consul cum T. Quintio ad A-  
 chaicum concilium Ægium trajecit: ibi de Eleis et  
 de exsilibus Lacedæmoniorum restituendis actum:  
 et neutra perfecta res, quia suæ gratiæ reservari eam  
 Achæi, Elei per se ipsi, quam per Romanos, malue-  
 runt Achaico contribui concilio. Epirotarum le-  
 gati ad consulem venerunt, quos non sincera fide in  
 amicitia fuisse satis constabat: militem tamen nul-  
 lum Antiocho dederant: pecunia juvisse eum insi-  
 mulabantur; legatos ad regem ne ipsi quidem misis-  
 se inficiabantur. Iis potentibus, ut in amicitia pris-  
 tina esse liceret, respondit consul, *Se utrum hostium,*  
*an pacatorum, eos numero haberet, nondum scire.* Se-  
 natum ejus rei judicem fore. *Integram se caussam eo-*  
*rum Romam rejicere: inducias ad id dierum nonagin-*  
*ta dare.* Epirotæ Romam missi senatum adierunt:  
 iis, magis, quæ non fecissent hostilia, referentibus,  
 quam purgantibus ea, de quibus arguebantur, re-  
 sponsum datum est, quo veniam impetrasse, non  
 caussam probasse, videri possent. Et Philippi regis  
 legati sub idem tempus in senatum introducti, gra-  
 tulantes de victoria: iis potentibus ut sibi sacrificare  
 in Capitolio, donumque ex auro liceret ponere in  
 æde Jovis Optimi Maximi, permissum ab senatu:  
 centum pondo coronam auream posuerunt. Non  
 responsum solum benigne legatis est; sed Philippi  
 quoque filius Demetrius, qui obses Romæ erat, ad

patrem reducendus legatis datus est. Bellum, quod <sup>U. C. 561.</sup>  
cum Antiocho rege in Græcia gestum est a M'. Aci-  
<sup>A. C. 191.</sup>  
lio consule, hunc finem habuit.

XXXVI. Alter consul P. Cornelius Scipio, Gal-  
liam provinciam sortitus, priusquam ad bellum,  
quod cum Boiis gerendum erat, proficeretur, pos-  
tulavit ab senatu, ut pecunia sibi decerneretur ad  
ludos, quos proprætor in Hispania inter ipsum dis-  
crimen pugnæ vovisset. Novum atque iniquum pos-  
tulare est visus: censuerunt ergo, *quos ludos inconsulto senatu ex sua unius sententia vovisset, eos uti de manubiis, si quam pecuniam ad id reservasset, vel sua ipse impensa faceret:* eos ludos per dies decem P. Cornelius fecit. Per idem fere tempus ædes Matris Magnæ Idææ dedicata est: quam Deam is P. Cornelius, advectam ex Asia P. Cornelio Scipione, cui post Africano fuit cognomen, P. Licinio consulibus, in Palatium a mari detulerat. Locaverant ædem faciendam ex senatusconsulto M. Livius, C. Clau-  
dius censores, M. Cornelio, P. Sempronio consulibus: tredecim annis post, quam locata erat, dedica-  
vit eam M. Junius Brutus, Iudique ob dedicationem ejus facti, quos primos scenicos fusse, Antias Vale-  
rius est auctor, Megalesia adpellatos. Item Juven-  
tatis ædem in circo maximo C. Licinius Lucullus duumvir dedicavit. Voverat eam sexdecim annis ante M. Livius consul, quo die Hasdrubalem exerci-  
tumque ejus cecidit: idem censor eam faciendam lo-  
cavit, M. Cornelio, P. Sempronio consulibus. Hu-  
jus quoque dedicandæ caussa ludi facti: et eo omnia  
cum majore religione facta, quod novum cum Anti-  
ocho instabat bellum.

XXXVII. Principio ejus anni, quo hæc, jam

U. C. 561. profecto ad bellum M. Acilio, manente adhuc Ro-  
 A. C. 191. mae P. Cornelio consule, agebantur, boves duos do-  
 mitos in Carinis per sealas pervenisse in tegulas ædi-  
 ficii, proditum memoriae est. Eos vivos comburi,  
 cinere inque eorum dejici in Tiberim, aruspices jus-  
 serunt. Tarracinæ et Amiterni nunciatum est ali-  
 quoties lapidibus pluisse: Minturnis ædem Jovis et  
 tabernas circa forum de cœlo tactas esse; Vulturni  
 in ostio fluminis duas naves fulmine ictas conflagras-  
 se. Eorum prodigiorum caussa libros Sibyllinos ex  
 senatusconsulto decemviri quum adissent, renuncia-  
 runt, *Jejunium instituendum Cereri esse, et id quinto*  
*quoque anno servandum: et ut novemidiale sacrum fieret,*  
*et unum diem supplicatio esset: coronati supplica-*  
*rent; et consul P. Cornelius, quibus Diis, quibusque*  
*hostiis edidissent decemviri, sacrificaret.* Placatis Diis,  
 nunc votis rite solvendis, nunc prodigiis expiandis,  
 in provinciam proficiscitur consul, atque inde Cn.  
 Domitium proconsulem, dimisso exercitu, Romam  
 decidere jussit: ipse in agrum Boiorum legiones in-  
 duxit.

XXXVIII. Sub idem fere tempus Ligures, lege  
 Ligures fusi sacrata coacto exercitu, nocte improviso castra Q.  
 a Minucio. Minucii proconsulis adgressi sunt. Minucius usque  
 ad lucem intra vallum militem instructum tenuit;  
 intentus, ne qua transcederet hostis munimenta.  
 Prima luce duabus simul portis eruptionem fecit:  
 nec primo impetu, quod speraverat, Ligures pulsi  
 sunt: duas amplius horas dubium certamen susti-  
 nuere. Postremo, quum alia atque alia agmina  
 erumperent, et integri fessis succederent ad pugnam,  
 tandem Ligures, inter cetera etiam vigiliis confecti,  
 terga dederunt: cæsa supra quatuor millia hostium;

ex Romanis sociisque minus trecenti perierunt. U.C. 561.  
 Duobus fere post mensibus P. Cornelius consul A.C. 191.  
 cum Boiorum exercitu signis conlatis egregie pug- Boii cæsi a  
 navit. Duodetriginta millia hostium cæsa, Antias P. Cornelio.  
 Valerius scribit; capta tria millia et quadringentos;  
 signa militaria centum viginti quatuor; equos mille  
 ducentos triginta; carpenta ducenta quadraginta  
 septem: ex victoribus mille quadringentos octoginta  
 quatuor cecidisse. Ubi ut in numero scriptori pa-  
 rum fidei sit, (quia in augendo eo non aliis intem-  
 perantior est) magnam victoram fuisse adparet,  
 quod et castra capta sunt, et Boii post eam pugnam  
 extemplo dediderunt sese, et quod supplicatio ejus  
 victoriæ caussa decreta ab senatu, victimæque ma-  
 jores cæsæ.

XXXIX. Per eosdem dies M. Fulvius Nobilior ex ulteriore Hispania ovans urbem est ingressus: argenti transtulit duodecim millia pondo; bigati argenti centum triginta: auri centum viginti septem pondo. P. Cornelius consul primo, obsidibus a Boiorum gente acceptis, agri parte fere dimidia eos multavit: quo, si vellet, populus Romanus colonias mittere posset. Inde, Romam, ut ad triumphum Trium- haud dubium, decedens, exercitum dimisit, et adesse phum petit Romæ ad diem triumphi jussit: ipse, postero die, quam venit, senatu in ædem Bellonæ vocato, quum de rebus ab se gestis disseruisset, postulavit, ut sibi triumphanti liceret in urbe invehiri. P. Sempronius Blæsus tri- Blæsus tribunus plebis, non negandum Scipioni, sed bunus ple- differendum honorem triumphi, censebat. Bella Ligu- bis differen- dum censem.  
 rum Gallicis semper juncta fuisse: eas inter se gentes mutua ex propinquo ferre auxilia. Si P. Scipio, de- victis acie Boiis, aut ipse cum victore exercitu in agrum

**U. C. 561.** *Ligurum transisset, aut partem copiarum Q. Minucio*  
**A. C. 191.** *misisset, qui jam tertium ibi annum dubio detineretur*  
*bello, debellari cum Liguribus potuisse. Nunc ad tri-*  
*umphum frequentandum deductos esse milites, qui egre-*  
*giam navare operam reipublicæ potuissent: possent*  
*etiam, si senatus, quod festinatione triumphi præter-*  
*missum esset, id restituere differendo triumpho vellet.*  
*Juberent, consulem cum legionibus redire in provin-*  
*ciam; dare operam, ut Ligures subigantur. Nisi illi*  
*cogantur in jus judiciumque populi Romani, ne Boios*  
*quidem quieturos: aut pacem, aut bellum utroque ha-*  
*benda. Devictis Liguribus, paucos post menses procon-*  
*sulem P. Cornelium multorum exemplo, qui in magis-*  
*tratu non triumphaverunt, triumphaturum esse.*

**XL.** Ad ea consul, Neque se *Ligures provinciam*  
*sortitum esse, ait, neque cum Liguribus bellum gessisse,*  
*neque triumphum de iis postulare: Q. Minucium confi-*  
*dere brevi, subactis iis, meritum triumphum postulatu-*  
*rum atque inpetraturum esse. Se de Gallis Boiis pos-*  
*tulare triumphum, quos acie vicerit, castris exuerit:*  
*quorum gentem biduo post pugnam totam acceperit in*  
*deditioinem: a quibus obsides abduxerit, pacis futuræ*  
*pignus. Verum enimvero illud multo majus esse, quod*  
*tantum numerum Gallorum occiderit in acie, quod cum*  
*tot millibus certe Boiorum nemo ante se imperator*  
*pugnaverit: plus partem dimidiā ex quinquaginta*  
*millibus hominum cœsam, multa millia capta: senes*  
*puerosque Boiis superesse. Itaque id quemquam mirari*  
*posse, cur victor exercitus, quum hostem in provincia*  
*neminem reliquisset, Romam venerit ad celebrandum*  
*consulis triumphum? Quorum militum si et in alia*  
*provincia opera uti senatus velit; utro tandem modo*  
*promptiores ad aliud periculum norumque laborem itu-*

*ros credit, si persoluta iis sine detractatione prioris U. C. 561.  
periculi laborisque merces sit, an si spem pro re feren- A. C. 191.  
tes dimittant, jam semel in prima spe deceptos? Nam,  
quod ad se adtineat, sibi gloriæ in omnem vitam illo  
die satis quæsitum esse, quo se virum optimum judica-  
tum ad accipiendam Matrem Idæam misisset senatus.  
Hoc titulo, etsi nec consulatus nec triumphus adjicitur,  
satis honestam honoratamque P. Scipionis Nasicæ ima-  
ginem fore. Universus senatus non ipse modo ad Consul  
decernendum triumphuni consensit, sed etiam tri- inpetrat.  
bunum plebis auctoritate sua compulit ad remitten-  
dam intercessionem. P. Cornelius consul triumpha-  
vit de Boiis: in eo triumpho Gallicis carpentis arma  
signaque et spolia omnis generis transvexit, et vasa  
ænea Gallica: et cum captivis nobilibus equorum  
quœque captorum gregem traduxit. Aureos torques  
transtulit mille quadringentos septuaginta unum: ad  
hoc auri pondo ducenta quadraginta septem, argenti  
infecti factique in Gallicis vasis, non infabre suo  
mōre factis, duo millia trecenta quadraginta pondo,  
bigatorum nummorum ducenta triginta quatuor:  
militibus, qui currum secuti sunt, trecenos vicenos  
quinos asses divisit; duplex centurioni; triplex  
equiti. Postero die, concione advocata, de rebus ab  
se gestis, et de injuria tribuni bello alieno se inli-  
gantis, ut suæ victoriae fructu se defraudaret, quum  
disseruissest, milites exauctoratos dimisit.*

XLI. Dum hæc in Italia geruntur, Antiochus E-  
phesi securus admodum de bello Romano erat, tam-  
quam non transituris in Asiam Romanis: quam se-  
curitatem ei magna pars amicorum aut per errorem,  
aut adsentando faciebat. Hannibal unus, cuius eo  
tempore vel maxima apud regem auctoritas erat,

U. C. 561. *Magis mirari se, aiebat, quod non jam in Asia essent*  
 A. C. 191. *Romani, quam venturos dubitare. Propius esse, in*

*Asiam ex Græcia, quam ex Italia in Græciam tracicere:*  
*et multo majorem caussam Antiochum, quam Ætolos,*  
*esse. Neque enim mari minus, quam terra, pollere*  
*Romana arma: jampridem classem circa Maleam esse.*  
*Audire scese, nuper novas naves novumque imperatorem*  
*rei gerendæ caussa ex Italia venisse. Itaque desineret*  
*Antiochus pacem sibi ipse spe vana facere. In Asia, et*  
*de ipsa Asia, brevi terra marique dimicandum ei cum*  
*Romanis esse: et aut imperium adimendum orbem ter-*  
*rarum adfectantibus, aut ipsi regnum amittendum.*  
*Unus vera et providere, et fideliter prædicere visus:*  
*itaque ipse rex navibus, quæ paratæ instructæque*  
*erant, Chersonesum petit; ut ea loca, si forte terra*  
*venirent Romani, præsidiis firmaret: ceteram clas-*  
*sem Polyxenidam parare et deducere jussit; spe-*  
*culatoria naves ad omnia exploranda circa insulas*  
*dimisit.*

Classis  
Romana.

XLII. C. Livius præfector Romanæ classis, cum  
 quinquaginta navibus tectis profectus, ab Roma  
 Neapolim, quo ab sociis ejus oræ convenire jusserat  
 apertas naves, quæ ex födere debebantur, Siciliam  
 inde petit: fretoque Messanam prætervectus, quum  
 sex Punicas naves ad auxilium missas accepisset, ab  
 Reginis Locrisque et ejusdem juris sociis debitas  
 exegisset naves, lustrata classe ad Lacinium, altum  
 petit. Coreyram, quam primam Græciæ civitatum  
 adiit, quum venisset, percunctatus de statu belli,  
 (necedum enim omnia in Græcia perpacata erant) et  
 ubi classis Romana esset, postquam audivit, circa  
 Thermopilarum saltum in statione consulem ac  
 regem esse, classem Piræci stare, maturandum ratus

omnium rerum caussa, pergit protinus navigare U.C. 561.  
Peloponnesum. Samen Zacynthumque, quia partis A.C. 191.  
Ætolorum maluerant esse, protinus depopulatus,  
Malcam petit: et, prospera navigatione usus, paucis  
diebus Piræum ad veterem classem pervenit. Ad  
Scyllæum Eumenes rex cum tribus navibus obcurrit;  
quum Æginæ diu incertus consilii fuisset, utrum ad  
tuendum rediret regnum, (audiebat enim Antiochum  
Ephesi navales terrestresque parare copias) an nus-  
quam abscederet ab Romanis, ex quorum fortuna  
sua penderet. A Piræo A. Atilius, traditis succes-  
sori quinque et viginti navibus tectis, Romam est  
profectus. Livius una et octoginta rostratis navi-  
bus, multis præterea minoribus, quæ aut apertæ ros-  
tratae, aut sine rostris speculatoriæ erant, Delum  
trajecit.

XLIII. Eo fere tempore consul Acilius Naupac-  
tum obpugnabat. Livium Deli per aliquot dies (et  
est ventosissima regio inter Cycladas, fretis alias  
majoribus, alias minoribus divisas) adversi venti te-  
nuerunt. Polyxenidas, certior per dispositas spe-  
culatorias naves factus, Deli stare Romanam clas-  
semi, nuncios ad regem misit: qui, omissis, quæ in  
Hellesponto agebat, cum rostratis navibus, quantum  
adcelerare potuit, Ephesum rediit: et consilium ex-  
templo habuit, faciendumne periculum navalis cer-  
taminis foret. Polyxenidas negabat cessandum: *et* Antiochus  
*utique prius configendum, quam classis Eumenis et* <sup>cum ea</sup>  
*Rhodiæ naves conjungerentur Romanis: ita numero* <sup>pugnan-</sup>  
*dum decer-* <sup>nit.</sup>  
*non ferme inparos futuros se, ceteris omnibus superiores,*  
*et celeritate navium, et varietate auxiliorum. Nam*  
*Romanas naves, quum ipsas inscite factas immobiles*  
*esse, tum etiam, ut quæ in terram hostium veniant,*

U. C. 561. *oneratas commeatu venire : suas autem, ut pacata omnia circa se relinquentes, nihil præter militem atque arma habituras : multum etiam adjuturam notitiam maris terrarumque et ventorum : quæ omnia ignaros turbatura hostes essent.* Movit omnes auctor consilii, qui et re consilium exsecuturus erat. Biduum in adparatu morati : tertio die centum navibus, quarum septuaginta tectæ, ceteræ apertæ, minoris omnes formæ, erant, profecti Phocæam petierunt : inde, quum audisset, adpropinquare jam Romanam classem, rex, quia non interfuturus navalí certamini erat, Magnesiam, quæ ad Sipylum est, concessit, ad terrestres copias comparandas : classis ad Cyssuntem portum Erythræorum, tamquam ibi aptius expectatura hostem, contendit. Romani, ubi primum aquilones (ii namque per aliquot dies tenuerant) cecidere, ab Delo Phanas, portum Chiorum in Ægæum mare versum, petunt : inde ad urbem circumegere naves, commeatuque sumto, Phocæam trajiciunt. Euumenes, Elæam ad suam classem profectus, paucis post inde diebus, cum quatuor et vingtibz navibus tectis, apertis pluribus, paullo a Phocæa ad Romanos, parantes instruentesque se ad navale certamen, rediit. Inde centum quinquaginta tectis navibus, apertis ferme quinquaginta, profecti, primo, aquilonibus transversis quum urgerentur in terram, cogebantur tenui agmine prope in ordinem singulæ naves ire ; deinde, ut lenita paullum vis venti est, ad Corycum portum, qui super Cyssuntem est, conati sunt trajicere.

Pugna  
navalis.

XLIV. Polyxenidas, ut adpropinquare hostes adlatum est, occasione pugnandi lætus, sinistrum ipse cornu in altum extendit, dextrum cornu præfectos

navium ad terram explicare jubet, et æqua fronte ad U. C. 561.  
pugnam procedebat. Quod ubi vidit Romanus, vela  
contrahit, malosque inclinat, et, simul armamenta  
componens, obperitur insequentes naves. Jam ferme  
triginta in fronte erant, quibus ut æquaret lævum  
cornu, dolonibus erectis altum petere intendit :  
jussis, qui sequebantur, adversus dextrum cornu  
prope terram proras dirigere. Eumenes agmen co-  
gebat : ceterum, ut demendis armamentis tumultuari  
primum cœptum est, et ipse, quanta maxima celeri-  
tate potest, concitat naves. Jam omnibus in con-  
spectu erant : duæ Punicæ naves antecedebant Ro-  
manam classem, quibus obviæ tres fuerunt regiæ  
naves ; et ut in numero inpari, duæ regiæ unam cir-  
cumisistunt : et primum ab utroque latere remos de-  
tergunt : deinde transcendunt armati, et, dejectis  
cæsisque propugnatoribus, navem capiunt. Una,  
quæ compari Marte concurrerat, postquam captam  
alteram navem vidit, prinsquam a tribus simul cir-  
cumveniretur, retro ad classem refugit. Livius, in-  
dignatione accensus, prætoria nave in hostes tendit :  
adversus quam eadem spe duæ, quæ Punicam unam  
navem circumvenerant, quum inferrentur, demittere  
in aquam remos ab utroque latere remiges stabili-  
endæ navis caussa jussit, et in advenientes hostium  
naves ferreas manus injicere, et, ubi pugnam pedes-  
tri similem fecisset, meminisse Romanæ virtutis, nec  
pro viris ducere regia mancipia. Haud paullo faci-  
lius, quam ante duæ unam, tunc una duas naves ex-  
pugnavit, cepitque. Et jam classes quoque undique  
concurrerant, et passim permixtis navibus pugna-  
batur. Eumenes, qui extremus commisso certa-  
mine advenerat, ut animadvertisit lævum cornu hos-

A. C. 191.


U. C. 561. tium ab Livio turbatum, dextrum ipse, ubi æqua  
A. C. 191. pugna erat, invadit.

Vincunt Romani. XLV. Nec ita multo post primum ab lævo cornu fuga cœpit. Polyxenidas enim, ut virtute militum haud dubie superari se vidit, sublatis dolonibus effuse fugere intendit: mox idem et, qui prope terram cum Eumene contraxerant certamen, fecerunt. Romani et Eumenes, quoad subficere remiges potuerunt, et in spe erant extremi agminis vexandi, satis pertinaciter secuti sunt: postquam celeritate navium, utpote levium, suas commeatu onustas eludi frustra tendentes viderunt, tandem abstiterunt: tredecim captis navibus cum milite ac remige, decem demersis. Romanæ classis una Punica navis, in primo certamine ab duabus circumventa, periiit. Polyxenidas non prius, quam in portu Ephesi, fugæ finem fecit. Romani eo die, unde egressa regia classis erat, manserunt: postero die hostem persequi intenderunt: medio fere in cursu obviæ fuere iis quinque et viginti tectæ Rhodiæ naves, cum Pausistrato præfecto classis. Iis adjunctis, Ephesum hostem persecuti, ante ostium portus acie instructa steterunt. Postquam confessionem victis satis expresserunt, Rhodii et Eumenes domos dimissi: Romani, Chium petentes, Phoenicuntem primum portum Erythraeæ terræ prætervecti, nocte anchoris jactis, postero die in insulam ad ipsam urbem trajecserunt: ubi paucos dies remige maxime reficiendo morati, Phocæam transmittunt. Ibi relictis ad præsidium urbis quatuor quinqueremibus, ad Canas classis venit: et, quum jam hiems adpeteret, fossa valloque circumdatis naves subductæ. Exitu anni comitia Romæ habita, quibus creati sunt consules L.


Cornelius Scipio et C. Lælius, intuentibus cunc- U. C. 561.  
tis ad finiendum cum Antiocho bellum. Postero A. C. 191.  
die prætores creati, M. Tuccius, L. Aurunculeius,  
Cn. Fulvius, L. Æmilius, P. Junius, C. Atinius  
Labeo.


FINIS TOM. III.











PA  
6452  
A2  
1800  
t.3

Livius, Titus  
Historiarum quae  
supersunt

PLEASE DO NOT REMOVE  
CARDS OR SLIPS FROM THIS POCKET

---

---

UNIVERSITY OF TORONTO LIBRARY

---

